

ಅಪೊಸ್ತಲರ ಕೃತ್ಯಗಳು ಅಪೊಸ್ತಲರನ್ನು ಕಾಮ್‌ಖ್ವಾರು ಮಾಲುಮ್ ಕರಾನು

ಅಪೊಸ್ತಲರನ್ನು ಕಾಮ್ನು ಪುಸ್ತಕ್, ಖಿವಿ ಪರಕ್ ಶುರುಹುಯು ಅಜ್ಜು ಸಭೆ ಖಿವಿಪರಕ್ಯೆರೊಸಲೇಮ್‌ಥು ಯುದಾಯ, ಸಮಾರ್ಯ, ಅಜ್ಜು ಇನ ಅಖ್ವಿ ಬಾಜುಮ ಪೈಲಾಯು ಕರಿಬೋಲಾನು ಖ್ವಾಚಿ ಘಟನೆ ಅನಾಮ ಲಿಖ್ವಿರ್ದುಸ್. ಯೇಸು ಪರಲೋಕ್‌ನ ಜಾವಾನ ಅಗ್ಗಳ ಬೋಲ್ಯೋತೆ ಪರಕ್ 1:8. ಆ ಪುಸ್ತಕ್ ಲೂಕನೆ ಲೀಖಿರಾಖ್ಯೊಸ್ ಅಜ್ಜು ಯೋ ಏಕ್ ವೈದ್ಯಹುಯಿರ್ದೊಡೊ, ಅಜ್ಜು ಯೋ ಘಣು ಹೊಷಾರ್‌ಥಿ ದಪ್ತರ್‌ನ ಮೈಲಿರಾಖ್ಯೊಸ್. ಲೂಕನೆ ಆ ಬೇ ಪುಸ್ತಕಹುಯಿರ್ದೊತೆ ಅಪೊಸ್ತಲನು ಕಾಮ್‌ಖ್ವಾರು ಅಜ್ಜು ಲೂಕನಿ ಸುವಾರ್ತೆನ ಗ್ರೀಕ್‌ವಾಳೊ ಹುಯಿರೋತೆ ಥಿಯೊಫಿಲನ ಬೋಲಾನಿತರ ಲೀಖಿರಾಖ್ಯೊಸ್. ಆ ಪುಸ್ತಕಖ್ವಾರು ಬೋಲ್ಕುಕತೊ ಕ್ರಿಸ್ತನ ಮಿಮ್‌ವಾಳನ ಅಜ್ಜು ಗ್ರೀಕ್‌ವಾಳನಾಬಿ, ಯೆಹೂದ್ಯರ್‌ನ ಖ್ವಾಜೀಬಿ ಲಿಖ್ವಿರ್ದುಸ್ 1:1. ಆ ಪುಸ್ತಕ್ ಯೇಸು ಕ್ರಿಸ್ತ ಪೈದಹುವಾನು 60-64 ವರಖ್ವಾನ್ ವಾರ್ ಲಿಖ್ವಿರ್ದುಸ್. ಶನಕತೊ ಆ ಪುಸ್ತಕ್ ಪೌಲ ಜೇಲ್‌ಮಾಥೊ ಛುಟ್ಕಾರ್ ಹುಯೋತೆ ಇನ ಅಗಾಡಿಸ್ ಆ ಲೀಖ್ವಿನ್ ಖ್ವರ್ತಿ ಹುಯಿರುಸ್. ಲೂಕಾಬಿ ಜಿನುಕು ಪೌಲನಿ ಜೋಡೆ ಚಾಲಿಗಯೋತೆ ತದೆ ಬೋಲ್ಕುಕತೊ ಆ ಅಪೊಸ್ತಲರನ್ನು ಕಾಮ್ನು ಆ ಪುಸ್ತಕನ ಅಂತಿಯೋಕ್ಯ ಖ್ವಯೇರ್ಮ ಲೀಖಿರಾಖ್ಯೊಸ್. ಅಪೊಸ್ತಲರನ್ನು ಪುಸ್ತಕ್ ಲೂಕಾನೆ ಲೀಖ್ಯೋತೆ ಸುವಾರ್ತೆನು ಪುಸ್ತಕಾನು ಶುರುವಾತ್ ಹುಯಿರ್ದುಸ್. ಶನಕತೊ ಆ ಪುಸ್ತಕ್ ಯೇಸು ಪರಲೋಕ್‌ನ ಜಾವಾನು ವಾರ್ತೆಥಿ ಶುರುವಾತ್ ಹುಯಿರ್ದುಸ್. ಲೂಕನೆ ಅನ ಲೀಖ್ಯೋತೆ ಸುವಾರ್ತೆನು ಪುಸ್ತಕ್‌ಬಿ ಲಿಖ್ಯೋತೆ ಉದ್ದೇಶ್ ಆ ಪುಸ್ತಕ್‌ಮ ಎಕ್ಕ್‌ಸ್ ಹುಯಿರುಸ್, ಅಜ್ಜು ಥಿಯೊಫಿಲನಾಬಿ ಭಡುಕರಾತೆ ವಿಶ್ವಾಸಿಯೋನ ಶಿಕಾಡ್ಯೋತೆ ಬಾರೇಮ

ಅಜ್ಜು ಕಿಮ್ ಜಿವ್ವು ಕರ್ನುಕರಿ ಬೋಲಾನು, ಯೋ ಕ್ರಿಸ್ತನು ಸಿದ್ಧಾಂತ ಕಿಮ್ ಫೈಲಾಯುಕರಿ ಬೋಲಾನು ಬೋಲಿವತಾಳಾನ ಖ್ವಾಜೆ ಲೀಖಿರಾಖ್ಯೊಸ್. ಅಪೊಸ್ತಲನು ಕಾಮ್ನು ಪುಸ್ತಕ್ ಪಹಿಲಿ ಸಬೇನು ಉದಾಹರಣೆ ದೇಸ್. ಅಜ್ಜು ಖಿವಿ ಪರಕ್ತ ಯೇಸುನ ಉಪ್ಪರ್ ಕಿಮ್ ವಿಶ್ವಾಸ್ ರಾಖವಾಳು ಕಿಮ್ ಜಿವ್ವು ಕರ್ನುಕರಿ, ಅಜ್ಜು ಅಪೊಸ್ತಲರನ್ನ ಉದಾಹರಣೆ ಅಪ್ಪುನ ಪವಿತ್ರಾತ್ಮನ ಶಕತ್ತ್ ಉಪ್ಪರ್ ಕಿಮ್ ರಾಖಿರಾಕ್ಣಕರಿ ಅಜ್ಜು ಸುವಾರ್ತೆ ಬಿಜ್ಜ ಅದ್ಮಿವೋನ ಕಿಮ್ ಫೈಲಾವ್ಣು ಕರಿ ವತಾಳಸ್.

ಕಾಡಿದೇಖೊ

- 1 ಶುರುಮಾಸ್ ಪವಿತ್ರಾತ್ಮ ಶಿಷ್ಯರನ ಉಪ್ಪರ್ ಆವಾತೆ ಅಜ್ಜು ಸಭೆ ಭಡಾನು ಹುಯಿರುಸ್. 1:1—8:1
- 2 ಇನಕೇಡೆಥು ಸಭೆನ ಖ್ವತಾಪ್ಪಿ ಹುಯುತೆ ಅಜ್ಜು ಯೇರೂಸಲೇಮ್‌ಥು ಅಶ್‌ಪಿಶ್ ಫೈಲಾವನು ಶುರುಹುಯುತೆ. 8:2—12:23
- 3 ಇನಕೇಡೆಥು ಪೌಲ ಪಹಿಲಿ ಸೇವೆನಿ ಚಾಲ್‌ನ ಭಾಸ್ತೆ. 12:24—14:28
- 4 ನವ ವಿಶ್ವಾಸಿಖ್ವಾರನ ಶನಿ ಉದ್ದೇಶ್‌ಥಿ ಉಪಯೋಗ್ ಹುವಾನ ಯೆರೂಸಲೇಮ್‌ಮಳ್ಳುತೆ. 15:1-35
- 5 ಇನಕೇಡೆಥು ಪೌಲ ಭೇನೆಹಲ್ಲ ಸುವಾರ್ತೆನ ಗಯೋತೆ 15:36-18:22
- 6 ಇನಕೇಡೆಥು ಪೌಲನೆ ತೀನ್ನೆಹಲ್ಲ ಸುವಾರ್ತೆನು ಚಾಲ್ಯೊತೆ 18:23—20:38
- 7 ಇನಕೇಡೆಥು ಪೌಲ ಯೆರೂಸಲೇಮ್‌ಕೊಂಡಾಯೊತೆ 21—26
- 8 ಖರ್ತಿಮ ಪೌಲನ ರೋಮ್‌ನ ಲೀಗಯೊತೆ 27—28

1 ಪ್ಯಾರ್‌ನೊ ಥಿಯೊಫಿಲ, ಯೇಸುನೆ ಕರಯೊತೆ ಕಾಮ್ನಿ ಬಾರೇಮ ಅಜ್ಜು ವಚನ್ನಿ ಬಾರೇಮ ಹರೇಕ್‌ನಾಬಿ ಮೆ ಮಾರ ಪಹಿಲ ಪುಸ್ತಕ್‌ಮ ಲೀಖಿರಾಖ್ಯೊಸ್.

2 ಇನೆ ಪರಲೋಕ್‌ನ ಜಾವಾಲಗು ಇನು ಅಪೊಸ್ತಲರನ್ನ ಚೂಣಾಯಹುಯ ಪವಿತ್ರಾತ್ಮನಿ ಶಕಧ್ಲಿ ಶಿಕಾಡ್ಲೊ.

3 ಆ ಹೈರುತೆ ಯೊ ಮರಾನಿ ಬಾದ್‌ಮ ಚಾಲ್ಯಾತೆ, ಇನೆ ಬಚಿನ್ ಆಯೋತೆ ಇನಿ ಬಾರೇಮ ಅಪೊಸ್ತಲರನ್ನ ವತಾಳಿಲಿದೊ ಇನೆ ಜಿವೀನ್ ಉರೊತೆ ಘಣಿ ವಖ್ತಾಲಗೂಬಿ ಕೈಏಕ್ ಭಣಾನ ದೆಖಾವೊರ್ದಯೊ ದೇವ್ನಿ ರಾಜ್ಯನಿ ಬಾರೇಮ ಇವ್ವಮ ಬೋಲ್ತೊರ್ದಯೊ.

4 ಅಮ್ ರ್ಹವಾನಿ ವಖ್ತಾತೆ ಏಕ್‌ಬಾರ್ ಶಿಷ್ಯರನಿ ಜೋಡ್ಲ ಖಾಣು ಖಾವನಿವಖ್ತಾತೆ ಇನೆ ಇವ್ವುನ “ಮಾರೊ ಬಾ ಏಕ್ ಜಿಭಾನ್ ದಿರಾಖ್ಯೊಸ್ ಕರಿ ಅನಿ ಬಾರೇಮ ಪಹಿಲೇಸ್ ತುಮೂನ ಮೇ ಬೋಲಿರಾಖ್ಯಾತೆ ಇನ ಖಿಮ್‌ಜಿರಾಖ್ಯಾತೆ ಇಮ್ ಆ ವಾಗ್ಗಾನ್ನಿ ವರ್ದಾದಾನ್ ಲ್ಯವಾನಖ್ವಾಜೆ ತುಮೆ ಯೆರೂಸಲೇಮ್ನ ಟಿವೈರ್ದೇಣುಕರಿ ಬೋಲ್ತೊ.

5 ಯೋಹಾನೆನ್ ಅದ್ಮಿವೋನ ಪಾಣಿಥಿ ಬ್ಯಾಪ್ತಿಸ್ಮ ಕರಾಯೊ ಕತೋಬಿ ಬಿಜ ಥೋಡಸ್ ದನ್ಮ ತುಮೂನ ಪವಿತ್ರಾತ್ಮಧಿಬಿ ಬ್ಯಾಪ್ತಿಸ್ಮ ಉಷೆ” ಕರಿ ಬೋಲ್ತೊ.

ಯೇಸು ಸೊರ್ಗನ ಪಡ್ಲೆಗಯೋತೆ

(ಮಾರ್ಕ 16:19-20; ಲೂಕ 24:50-53)

6 ಮಳಿರ್ದ್ಲಧೂತೆ ಅಪೊಸ್ತಲರ್ ಖಾರು, ಇವ್ಣೆ “ಪ್ರಭು, ತೂ ಇಸ್ರಾಯೇಲ್ ಅದ್ಮಿವೋನ ಹಮೇಶ ಪಾಳ್ಲೊ ಇವ್ಣಿ ರಾಜ್ಯನ ಆಸ್ ದನ್ಮ ದ್ಯವಾನ ಆಯೋಕಿ ಶು? ಕರಿ ಬೋಲ್ಯು.

7 ಯೇಸು ಇವ್ವುನ ಅಖ್ಲಿ ವಖ್ತಾತೆ ರ್ಹವೊ ಹಗಾಮ್ನ ರ್ಹವೊ ಮಾಲುಮ್ ಕರಾನಿ ಅದಿಕಾರ್ ಬಾನ ಛಾ ಪಣ್ಣಿ ಇನ ಮಾಲುಮ್ ಕರಾನು ಕಾಮ್ ತುಮಾರು ಕಾಹೆ.

8 ಕತೋಬಿ ಪವಿತ್ರಾತ್ಮ ತುಮಾರಪರ್ ಆಯಿಗೋತೊ, ತುಮೆ ಶಕತ್‌ಲೀನ್ ಯೆರೂಸಲೇಮ್ನಾಬಿ ಯೂದಾಯಮಬಿ, ಸಮಾರ್ಯ ತಬರ್‌ಖಾಮಾಬಿ ಅಜು ಜಗತ್ತ್ ಕಡೆಷಿ ಲಗೂಬಿ ಮನ ಸಾಕ್ಷಿಹುಯಿರಿಶು.

9 ಆ ವಾತೆ ಅಪೊಸ್ತಲರ ಣ್ಣ ಬೋಲಿಹುಯಿಗು ತದೆ ಇವ್ಣೆ ದೇಖುಕರ್ತಧಾತೆ ತದೇಸ್ ಯೋ ಸೊರ್ಗಮ ಪಡೈಗಯೊ. ವಾದ್‌ಳು ಮೂಚಿನಾಖಿದಿದೂತೆ ಇನಖ್ವಾಜೆ ಯೇಸುನ ಇವ್ಣೆ ದೆಖಾನ ಕೊಹುಯುನಿ.

10 ಯೇಸು ಜಾವಾನಿವಖ್ವಾತೆ ಇನ ಇವ್ಣೆ ಆಬ್‌ನಾಸ್ ಠರ್‌ಕ್ಯೆನ್ ದೇಖುಕರ್ತಧು. ತದೆ, ಧೋಳು ಲುಂಗ್ಡು ಫೇರಹುಯ ಬೇಜುಣ ಇನ ಭೀಡೆ ಭೀರಿನ್,

11 ಗಲಿಲಾಯವಾಳ ಅದ್ಮಿವೊ, ತುಮೆ ಶನ ಆಸ್ತಾನ್ನಾಸ್ ದೇಖುಕರಸ್? ತುಮಾರಕಂಥು ಯೇಸು ಕಿಮ್ ಪರ್‌ಲೋಕ್ಕ್ ಲ್ಲಡಿಗಯೊತೆ ತುಮೆ ದೇಖ್ಯಾಕಿ ಇಮ್ಮಿ ಪರಕ್ಯಾಸ್ ಪಾಲ್ಟು ಆವಾಶೆ.

ಯೂದನಿ ಝಗೋಮ ಉತ್ತರಾಧಿಕಾರಿ (ಮತ್ತಾಯ 27:3,10)

12 ಇನಕೇಡೆಥು ಅಪೊಸ್ತಲರ್ ಖ್ವಾರು ಆಲಿವ್‌ನ್* ಟೇಕ್‌ಡಿ ಕಂಥು ಯೆರೂಸಲೇಮ್ಮ ಪಾಲ್ಟುಗಯು. ಯೊ ಟೇಕ್‌ಡಿಥು ಯೋ ಖ್ವಯೇರ್‌ಥು ಜಾಖ್ವತ್ ಕತೊ ಆಧುಮೈಲ್ ದೂರ್ ಥು.

13 ತದೆ ಇವ್ಣೆ ಖ್ವಯೇರ್‌ಮ ಗಯ ಇವ್ಣೆಥೂತೆ ಘರ್‌ನ ಉಪ್ಪಿಬಾಜುಮ ಗಯ; ಇವ್ಣೆ ಕೋಣ್ ಕೋಣ್‌ಕತೊ, ಪೇತ್ರ, ಯೋಹಾನ. ಯಾಕೋಬ, ಅಂದ್ರೆಯ, ಫಿಲಿಪ್ಪ, ಅಜು ತೋಮ, ಬಾರ್ತೊಲೊಮಾಯ, ಮತ್ತಾಯ, ಅಜು ಅಲ್ಫಾಯನೊ ಥಿಯ್ಯೊ ಯಾಕೋಬ, ಜಾತ್ನೊಅಭಿಮಾನಿ ಕರಿ ಬೋಲ್ವೆಲಿದೋತೆ ಸೀಮೋನ ಅಜು ಯಾಕೋಬನೊ ಥಿಯ್ಯೊ ಯೂದ ಇವ್ಣೆ ಖ್ವಾರು ಹಿಜ್ಜಾ ಥು.

14 ಇವ್ಣೆ ಅಖ್ವುಜುಣು ಏಕ್‌ಮನ್‌ಥಿ ಎಕ್ಚುಹುಯಿನ್ ದೇವ್ನಿ ಪ್ರಾರ್ಥನೆಮ ಥು. ಹಿಜ್ಜಾ ಥೋಡಿಭಣಿ ತಯೇಡಾಬಿ, ಯೇಸುನಿ ಆಯಾ ಮರಿಯಾಬಿ ಇನ ಬೈಯೇಬಿ ಅಪೊಸ್ತಲರ ಣ್ಣಿ ಜೋಡ್ಡುಡೂ.

* 1:12 1:12 ಆಲಿವ್ ಝಾಡ್‌ಥಿ ತೇಲ್ವಿ ಕಾಡೆಜಾಯ್

15 ಥೋಡದನ್ ಬಾದ್‌ಮ, ವಿಶ್ವಾಸಿಮ ಖುಮಾರ್ ಏಕ್‌ಖೊವೀಖ್ವೊ ಜಣು ಸಭೆಮ ಮಳೇನ್ ಅಯಿರ್ವ್ವಾಮ, ಪೇತ್ರನೆ ಬೀಚ್ಚೆ ಉರಿ ಭೀರಿನ್:

16 “ಭೈಯೇಭೇನೆವೊ, ಯೇಸುನ ಧರಿದ್ಯವಾಳನ ವಾಟ್ ವತಾಳ್ವೊತೆ ಯೂದನಿ ಬಾರೇಮ ಪವಿತ್ರಾತ್ಮನೆ ದಾವೀದ್‌ಧಿ ಪವಿತ್ರ ಪುಸ್ತಕ್‌ಮ ಬೋಲೈರಲ್ವೊತೆ ವಾತೆ ಪೂರಹೋಣುಸ್‌ಪಡ್ತುಡು,

17 ಯೂದ ಅಪ್ಪುನ ಮಾಲುಮ್‌ರಲ್ವಾಳೊ ಹುಯಿರಲ್ವೊಥೊ ಅಜ್ಜು ಸೇವೇನ ಚೂಣೈರಲ್ವೊ ತೋಬಿ ಯೇಸುನ ಧರಿದ್ಯವಾಳನ ಯೂದನೆ ಮದತ್ ಕರ್ನುಡೊತೆ ಇನ ಪವಿತ್ರಾತ್ಮನೆ ಪಹಿಲೇಸ್ ದಾವಿದ್ದ ಮ್ಹೋಡೇಧಿ ಬೋಲಿರಾಖೊಥೊ.”

18 ಯೂದನೆ, “ಇನಿ ನೀಚ್‌ಕಾಮ್‌ಧಿ ಲಿದೋತೆ ಪೈಶಾಮ ಏಕ್‌ ಖೇತರ್‌ನ ಲೀಲಿದೊ ಥೊ. ಇನಮಾಸ್ ಇನ ಜಾನ್ನ್ ಕಳ್ಳಿದೊ. ಉಪ್ಪರ್ ಥು ಮುಡ್‌ಕ್ಯ ಹೇಟ್ ಹುಯಿನ್ ಪಡೀನ್, ಪೇಟ್ ಫುಟೀನ್, ಅತಲ್ದಿ ಭಾರ್ ಅಯಿಗು.

19 ಅನಿ ಬಾರೇಮ ಯೆರೂಸಲೇಮ್ಮ ಖ್ವಾರ ಅದ್ವಿನ ಮಾಲುಮ್ ಪಡ್ತು ಯೊ ಜಮೀನ್ನ್ ಇವ್ವಿ ಬೋಲಿಮ ‘ಅಕೆಲ್ದಾಮಾ’ ಕರಿ ನಾಮ್‌ಮ್ವೆಲಾಯು. ‘ಅಕೆಲ್ದಾಮಾ, ಕತೊ ‘ಲೋಯಿನು ಖೇತರ್’ ಕರಿ ನಾಮ್ ಆಯು.

20 ಯೂದನಿ ಬಾರೇಮ ‘ಇನು ಘರ್ ಬರ್ಬಾತ್ ಹುವಾದೆ, ಯೋ ಅದ್ವಿಕೊಂತೆ ಉಜ್ವಾಡ್ ಹುವಾದೆ’ ಇನಿ ಅದಿಕಾರ್ ಬಿಜೇಕ್‌ಜಣಾನ ಜಾವಾದೆಕರಿಬಿ ಕೀರ್ತನೆ ಪುಸ್ತಕ್‌ಮ ಲೀಖೈರುಸ್.

21 “ಇನಖ್ವಾಜೆ ಅಲಕ್ ಏಕ್‌ಜಣೊ ಅಪ್ಪಿಜೋಡ್ಡ ಮಳಿನ್ ಪ್ರಭು ಯೇಸು ಮರೀನ್ ಜಿವ್‌ಯೊತೆ ಇನ ಸಾಕ್ಷಿಹುಯಿರೇಣು. ಎಥ್ರಾನವಾಳೊ ಯೇಸು ಫರೀನ್ ಸೇವೆಕರಾನಿ ಅಖ್ವಿವಖ್ವೊತೆ ಅಪ್ಪ ಟೋಳ್‌ವಾಳಾಮ ರಲ್ವವಾಳೊ ಹುಯಿರೇಣು.

22 ಇನಖ್ವಾಜೆ ಬ್ಯಾಪ್ತಿಸ್ಮ ದ್ಯವಾಳೊ ಯೋಹಾನ ಬೋಧನೆ ಕರಲ್ವೊತೆ ದನ್‌ಥು ಕತೊ ಯೋಹಾನ ಬ್ಯಾಪ್ತಿಸ್ಮ ಕರಲ್ವೊತೆ ಹಿಜ್ವಾಡು

ಧರೀನ್ ಯೇಸು ಸೊರ್ಗಮ ಗಯೋತೆ ದನ್‌ಲಗೂಬಿ ಅಪ್ಪ ಜೋಡ್ಡ ರ್ವವವಾಳೊ ಹುಯಿರೇಣು.” ಶನಕತೊ ಆ ವೇಳ್ತ್ ರ್ವವವಾಳೊ ಏಕ್ಲಣೊ ಯೇಸು ಪಾಳ್ತುಜಿವೊಹುಯಿನ್ ಉರೈತೆ ಇನ ಸಾಕ್ಷಿಹುಯಿರೇಣು.

23 ತದೆ ಬಾರ್ಸಬ ಕರಿ ನಾಮ್‌ವಾಳೊ ಯೋಸೇಫ್‌ನ ಯೂಸ್ತ ಕರೀಬಿ ಬೋಲ್ತುಧು. ಅಜು ಬಿಜೇಕ್ ಜಣೊ ಮತ್ತೀಯ. ಆ ಬೇ ಜಣಾನ ಅಪೊಸ್ತಲರನ್ನ ಸಭೆನ ಖ್ವಾಮ್ಲೆ ಭೀರಾಖ್ಯು.

24 ತದೆ ಇವ್ಣೆಅಮ್ ಪ್ರಾರ್ಥನೆ ಕರ್ಯ್ಕೀ, “ಪ್ರಭು, ತೂ ಅಖ್ಯಾನ ದಿಲ್‌ನೊಮಾಯಿನೊ ಮಾಲುಮ್ ಕರಿರಾಖ್ಯೊಸ್. ಆ ಬೇಜಣಾಮ ತೂ ಕಿನ ಚೂಣಿರಾಖ್ಯೊಸ್,

25 ಯೂದನಿ ಝಗೋಮ ಅಪೊಸ್ತಲಹುಯಿನ್ ಸೇವೆಕರಾನ ಯೋ ಝಗೋನ ಮ್ಹೇಲಿನ್ ಕಿಜ್ಜಾ ಇನಿ ಝಗೋಕಿ ಹಿಜ್ಜಾ ಚಲೆಗಯೊ

26 ತದೆ ಇವ್ಣೆಖ್ವಾಜಿ ಚಿಟ್ಟಿನಾಖ್ಯು ಇನಾಮ ಮತ್ತೀಯನು ನಾಮ್ ಪಡಾಯು.ತದೆ ಘ್ಯಾರ್‌ಭಣ ಅಪೊಸ್ತಲರನ್ನ ಜೋಡ್ಡಯೊ ಮಳಿಗೊ.

2

ಪವಿತ್ರಾತ್ಮ ಆಯೋತೆ

1 *ಪೆಂತಕೊಸ್ತ್ ಪೂಜಾನ ದನ್ನೆ ಇವ್ಣೆ ಅಖ್ಯುಜಣು ಏಕ್‌ಝಗೊ ಮಳ್ಳು.

2 ತದೆ ಜೊರೇಖ್ವು ತುರಂತ್, ಅಪಟ್‌ಝಪಟ್‌ನೊ ವಹಿರೊ ವಾಗಾನಿಘೊಣಿ ಏಕ್ ಅವಾಜ್ ಆಬ್‌ಧು ಖ್ವಮಜ್‌ಪಡ್ಕು ಯೊ ಇವ್ಣೆ ಬೆರಾಧಾತೆ ಘರ್ ಅಖ್ಯೊಸ್ ಭರಾಯು.

3 ಅಜು ಇವ್ಣಿ ಜೀಬ್ ಆಗ್‌ನಿ ಝಲ್‌ಪಟ್‌ನಿತರ ದೆಖಾಯು. ಯೊ ಅಖ್ಯು ಅಲಕ್ ಅಲಕ್‌ಹುಯಿನ್ ಹರೇಕ್ಷ ಉಪ್ಪರ್‌ಬಿ ಆಯು.

4 ಇವ್ಣೆಅಖ್ಯು ಪವಿತ್ರಾತ್ಮದಿ ಭರೈನ್ ಅಲಕ್ ಅಲಕ್ ಬೋಲಿಮ ವಾತೆಬೋಲಲಗ್ಕು. ಪವಿತ್ರಾತ್ಮಸ್ ಇವ್ಣುನ ಆ ಶಕತ್ತ್ ದಿದೊ,

* 2:1 2:1ಪಸ್ತ ಪೂಜಾನು ಅಡೈವಿಖ್ವಾನ್ ದನ್ನ ಪಾರ್ ಯಹೂದ್ಯರ್‌ನಿ ಖ್ವಗ್ಗೀನು ಪೂಜಾ ಕರಾನೊ ದನ್.

5 ತದೆ ಜಗತ್ತು ಅಖ್ವಿ ಬಾಜುಧು ಆಯುಹುಯು ಕೈವಕ್ ಜಞು ಭಕ್ತ ಯೆಹೂದ್ಯರ್ ಖಾರ್ರು, ಯೊ ವೇಳ್ತೆಯೆರೂಸಲೇಮ್ಮ ಥೂ.

6 ಯೊ ಅವಾಙ್‌ನ ಖ್ವಮ್‌ಜ್ಯುತೆ ಅದ್ವಿವ್‌ನು ಮೋಟು ಝೂಂಡ್ ಹಿಜ್ಜ ಭರೈನ್ ಆಯು. ಅಜು ಇವ್ವಿ ಇವ್ವಿ ಶೊಂತ್ ಬೋಲಿಮ ವಾತೆ ಬೋಲಾನು ಖ್ವಮ್‌ಜಿನ್ ಆಶ್ಚರ್ಯಕರ್ಯ್.

7 ಇವ್ವೆಅಖ್ವು ಆಶ್ಚರ್ಯ ಹುಯಿನ್ “ಅಮ್ ವಾತೆ ಬೋಲುಕರಾತೆ ಅವ್ಣೆ ಖಾರ್ರು ಗಲಿಲಾಯವಾಳು ಕಾಹೆಕಿ ಶು?

8 ಹಮೆ ಅಲಕ್ ಅಲಕ್ ಝುಗೋವಾಳ ಕತೋಬಿ ಅವ್ಣೆ ಅಪ್ಪಿ ಅಪ್ಪಿ ಬೋಲಿಮಾಸ್ ಬೋಲುಕರಾತೆ ಕಿಮ್?

9 ಅಪ್ಪಾಮ ಪಾರ್ದಿವಾಳು, ಮೇದ್ಯವಾಳು, ಎಲಾಮ್ಯವಾಳು, ಮೆಸಪಟೋಮಿಯವಾಳು, ಯೂದಾಯಬಿ ಅಜು ಕಪ್ಪದೋಕ್ಯವಾಳುಬಿ ಛಾ. ಪೊಂತ ಅಜು ಏಷ್ಯಾವಾಳುಬಿ,

10 ಪ್ರಿಜಿಯ ಅಜು ಪಂಫುಲ್ಯವಾಳುಬಿ ಛಾ. ಈಜಿಪ್ಟ್ ಅಜು ಸಿರೇನಿನ ಖನ್ನೆವಾಳು ಅಜು ಲಿಬಿಯನು ತಬರ್‌ಖವಾಳುಬಿ ಮಳಿರ್ಲ್ಯಾಸ್. ಯೊ ಕೊಂತೆ ಅಪ್ಪಾಮ ಥೋಡುಜಞು ರೋಮ್‌ವಾಳುಬಿ ಐರ್ಲ್ಯಾಸ್,

11 ಯೆಹೂದ್ಯರ್‌ಬಿನ್ ಯೆಹೂದ್ಯರ್‌ಕಾಹೆತೆ ಧರ್ಮ್‌ನ ಪಾಲನ್‌ಕರಾವಳು ಥೋಡು ಅದ್ವಿಖಾರ್ರು, ಕ್ರೇಟ್ ಅಜು ಅರೇಬಿಯವಾಳುಬಿ ಹಜ್ಜ ಛಾ. ಅವ್ಣೆ ಖಾರ್ರು ದೇವ್ನಿ ಮಹಾನ್ ಕಾಮ್ನಿ ಬಾರೇಮ ಬೋಲುಕರಸ್ತೆ ಯೊಅಖ್ವು ಅಪ್ಪಿ ಅಪ್ಪಿ ಬೋಲಿಮ ಖ್ವಮ್‌ಜು ಕರಿಯೇಸ್‌ನಿ ಕರಿ ಆಶ್ಚರ್ಯ ಕರ್ಯ್.

12 ಅದ್ವಿಖಾರ್ರು ಆಶ್ಚರ್ಯ ಹುಯಿನ್, ಕಲಾವ್ಹಿಹುಯಿನ್ ಆ ಶಾತ್ ರಕ್ಷೆವ್ಣು ಕರಿ ಏಕ್‌ಥಿ ಏಕ್ ಬೋಲಲಗ್ನು.

13 ಥೋಡುಜಞು ಅಪೊಸ್ತಲರನ್ನ ದೇಖಿನ್, “ಅವ್ಣೆ ಜಾಖ್ವತ್ ಪೀಲಿನ್ ಕಯೇಪ್ ಲ್ಲಡೀಗಿ” ಕರಿ ನಕ್ಕೆ ಕಾಡ್ತು.

ಪೇತ್ರನಿ ಬೋಧನೆ

14 ತದೆ ಪೇತ್ರನಿ ಜೋಡ್ವಾತೆ ಗ್ಯಾರ್ಜ್ವಣ ಅಪೊಸ್ತಲರನ್ನಿ ಜೋಡ್ವ ಉರಿಭೀರಿನ್, ಅದ್ವಿನಿ ಟೋಳ್ಳ ಊಚಿ ಆವಾಙ್‌ಥಿ ಅಮ್ ಬೋಲ್ಯೊಕಿ,

“ಯೆಹೂದ್ಯವಾಳವೊ, ಯೆರೂಸಲೇಮ್ನು ಖಾರ್ಡ್ ಅದ್ಮಿವೊ, ಮಾರಿ ವಾತ್ತ್ ಖ್ವಮ್‌ಜೊ, ತುಮೆ ಮಾಲುಮ್ ಕರಿಲೇಪ್ಪುತೆ ವಾತೆ ಕಾನ್ ಲಗಾಡಿ ಖ್ವಮ್‌ಜೊಣುಕರಿ ಮೇ ತುಮೂನ ಬೋಲುಸ್.

15 ತುಮೆ ಲಾರ್ಪುರೈಖ್ಯತೆ ತಿಮ್ ಅವ್ಣೆಖಾರು ಕಯೇಪ್ ಲ್ಲಡೈಲಿದುಕಾಹೆ” ಹಮ್ಮೆ ಬಿಜೂಬಿ ವ್ಹಾಣಾನ ನೌ ಘಂಟಾ ಹುಯಿರಾಸ್ ಎತ್ರೇಸ್.

16 ಕತೋಬಿ ಹಮ್ಮೆ ಚಾಲುಕರಾತೆ ಹಾಲತ್‌ನಿ ಬಾರೇಮ ಪ್ರವಾದಿ ಯೋವೇಲನೆ ಅಮ್ ಲೇಖಿರಾಖ್ಯೊಸ್;

17 ದೇವ್ವೆ ಅಮ್ ಬೋಲ್ಯೊಕಿ, ‘ಖ್ವರ್ತಿನ ದನ್ಮ ಖಾರ್ಡ್ ಅದ್ಮಿಪರ್, ಮಾರಿ ಆತ್ಮಾನ ಖಾರ್ಡ್ ಅದ್ಮಿವೋನ ಉಪ್ಪರ್ ರಂಚೀಶ್, ತುಮಾರ ತಯೇಡ ಪರ್ಖಾರ್ ಪ್ರವಾದ್‌ನೆ ಕರ್ಶೆ; ತುಮಾರ ಜಾನ್‌ಮಾನ್ ಖಾರ್ಡ್ ದರ್ಶನ್ ದೇಕ್‌ಶೆ; ಅಜು ತುಮಾರು ಗಲೆಡ್‌ಖಾರ್ಡ್ ಖ್ವೊಣ್ಯಮ ದೇಕ್‌ಶೆ.

18 ಯೊ ದನ್ಮಮಾರ ಆತ್ಮಾನ ಮಾರ ದಾಸದಾಸಿನ ಉಪ್ಪರ್ ರಂಚ್ಚೆಶ್. ತದೆ ಇವ್ಣೆಬಿ ಪ್ರವಾದ್‌ನೆ ಕರ್ಶೆ.

19 ಪ್ರಭುನ ಆವಾನೊ ಮೋಟೆ ದನ್ ಆವಾನ ಅಗಾಡಿ ಆಬ್‌ನ ಉಪ್ಪರ್ ಅದ್ಭುತ್‌ಕಾಮ್ನ ವತಾಳಿಶ್. ಧರ್ತಿನ ಉಪ್ಪರ್ ಖ್ವಣೇದ್ನಕಾಮ್ನ ಕರಿಶ್. ತದೆ ಲ್ಲೋಯಿ, ಆಗ್ ಅಜು ಬಾಪ್ತಿತರ ಲ್ಲಡಾನೊ ಧುವ್ವೊರೈಶೆ.

20 ಚಾಂದ್ ಅಂಧಾರ್‌ಗಡಪ್ ಬಣ್‌ಶೆ, ಚಂದರ್‌ಮೊ ಲ್ಲೋಯಿನಿತರ ಲಲೇಲಾಲ್ ಉಷೆ. ತದೆ ಪ್ರಭುನೊ †ಮಹಾ ಮಹಿಮೆನೊ ದನ್ ಆವ್‌ಶೆ.

21 ಕತೋಬಿ, ಕೋಣ್ ಪ್ರಭುನು ನಾಮ್ನ ಬೋಲಸ್ಕಿ ಯೊ ಹರೇಕ್‌ನಾಬಿ ರಕ್ಷಣೆ ಉಶೆ, ಕರಿ ದೇವ್ ಬೋಲುಕರಸ್.

22 “ಇಸ್ರಾಯೇಲ್ ಅದ್ಮಿವೊ, ಮಾರಿ ವಾತ್ತ್ ಖ್ವಮ್‌ಜೊ; ನಜರೇತ್‌ನೊ ಯೇಸು ಛಾನಿ ದೇವ್ ತುಮುನಾಬಿ ಮಾಲುಮ್ ರ್ಹವಾನಿತರ ದೇವ್‌ನ ಇನೇಥಿ ಚಲಾಯೊತೆ ಮಹಾ ಕಾಮ್‌ಬಿ,

ಅದ್ಭುತ್‌ಕಾಮ್‌ಧಿ ಇನ ಪಸಂದ್ ಹುವಾನಿತರ ತುಮೂನ ವತಾಳಿ ದಿದೊ.

23 ಯೊ ಯೇಸುಸ್ ದೇವ್ನಿ ಘಟ್ ಖ್ವಾಜ್‌ಧೀಬಿ, ಆವ್‌ಶೇತೆ ಹಗಾಮ್ನಿ ಪರಕ್ಮದೇವೈಜಾವದಿನ್, ತುಮೆ ಅಲಕ್‌ಅದ್ವಿವೋನ ದೀನ್ ಶಿಲ್‌ಬೇಪರ್ ಮೇಕ್ ಮರೈನ್ ಮಾರಿನಾಖ್.

24 ಯೇಸುನ ದೇವ್ನೆ ಮರಣ್ಣಿ ಖ್ವತಾಪ್ಪಿಧಿ ಛೋಡೈನ್ ಉರಾಡ್ಚೊ, ಶನಕತೊ ಮರಣ್ ಇನ ಧರಿಲ್ಯವಾನ ಕೊ ಹುಯುನಿ.

25 ಯೇಸುನಿ ಬಾರೇಮ ದಾವೀದನೆ ಅಮ್ ಬೋಲಿರಾಖ್ಲೊಸ್ಕಿ, 'ಪ್ರಭುತೊ ಕದೇಬಿ ಮಾರ ಖ್ವಾಮ್ಣೆ ರ್ವವಾನು ಮೆ ದೆಕ್ತೊಥೊ: ಮೇ ಖ್ವಿಳ್‌ಕುಣಾತೆ ತಿಮ್ ಯೊ ಮಾರ ಖಾವಿ ಬಾಙುಮಾಸ್ ಥಾ.

26 ಇನಖ್ವಾಜೆ ಮಾರೊ ದಿಲ್ ಘಣು ಖುಷಿಕರಸ್. ಮಾರಿ ಜೀಬ್ ಖುಷಿನ್ ವಾತೆಬೋಲಸ್. ಮಾರು ಶರೀರ್‌ಬಿ ಭರೋಖ್ವಾಧಿ ಟಿವೈರ್ಲ್ವಸ್.

27 ಶನಕತೊ ತೂ ಮಾರ ಜಾನ್‌ಆತ್ಮನ ಪಾತಾಳ್ ಮ್ಹೇಲಿಶ್ ಕೊಯ್ನಿ. ತಾರ ಪ್ಯಾರ್‌ನ ಅದ್ವಿನ ಪಾತಾಳ್ ಖ್ವಡ್ವಾನ ಮ್ಹೇಲಿಶ್‌ಕೊಯ್ನಿ.

28 ತಾರ ಜಾನ್‌ನೊ ಮಾರಗ್ ಮನ ಖ್ವಮ್‌ಜಾಡಿರಾಖ್ಲೊಸ್. ತಾರ ಖ್ವಾಮೆ ಮನ ಭರ್‌ಪೂರ್ ಖುಷಿಕರೈಷ್' ಕರಿ ಬೋಲಿರಾಖ್ಲೊಸ್.

29 'ಮಾರಾ ಭೇನೆ ಭೈಯೇವೊ ಅಪ್ಲೊ ಗುರುಗುರಬ್‌ಲೊ ದಾವೀದ್‌ನಿ ಬಾರೇಮ ಮೆ ತುಮೂನ ಭಾಲಿಧಿ ಬೋಲೆಜಾಯ್ ಶಾತ್‌ಕತೊ, ಯೊ ಮರಿನ್ ಮಖ್ವಾಣ್ಯ ಹುಯೊ, ಇನು ಮಖ್ವಾಣ್ಯ ಹಮ್ಲೆಲಗೂಬಿ ಅಪ್ಪ ಇಘ್‌ಮ ಥಾ.

30 ದಾವೀದ್ ಏಕ್ ಪ್ರವಾದಿಹುಯಿರಿನ್ ತಾರಿ ಪಿಳ್‌ಗೀಮ ಏಕ್‌ಙ್ಗಣಾನ ತಾರಿ ಸಿಂಹಾಸನ್‌ಪರ್ ಬೆಖ್ವಾಡಿಶ್. ಕರಿ ಇನ ದೇವ್ನೆ ಆಣ್‌ಕರಿನ್ ಬೋಲ್ಯೊತೆಯಿನ್ ಮಾಲುಮ್‌ಕರಿರಾಖ್ಲೊಥೊ

31 ಯೊ ಹುವಾನ ಅಗಾಡಿಸ್ ದಾವೀದನ ಮಾಲುಮ್‌ಥು. ಇನಖ್ವಾಜೇಸ್ ದಾವೀದನೆ, ಮರೀನ್ ಜಿವ್ವೊಲುಷೇತೆ ಕ್ರಿಸ್ತನಿ ಬಾರೇಮ ಅಮ್ ಬೋಲ್ಯೊಕಿ, 'ಇನ ಪಾತಾಳ್ ಮ್ಹೆಲಾವನ ಕೊ ಹುಯುನಿ, ಇನಿ

ಶರೀರ್ ಖಡ್ವಾನ್ ಮ್ಹೇಲಿಶ್‌ಕೊಯ್ನಿ' ಕರೀಬಿ ಬೋಲಿರಾಖ್ಯೊಸ್.

32 ಇನಖ್ವಾಜೆ ದೇವ್ನೆ ಮರ್ಮುಹುಯಾಮ ಜಿವ್ವೊಕರಿನ್ ಮ್ಹೇಲೊತೆ ಯೇಸುನಾಸ್, ಇನ ಹಮೆಅಖ್ಪು ಸಾಕ್ಷಿ ಹುಯಿರಾಸ್.

33 ಯೇಸು ಸೊರ್ಗನ ಪಡ್ಯೆಗೊ. ಹಮ್ಚೆ ಯೇಸು ದೇವ್ನಿ ಜೋಡ್ಡ ಲ್ಹಾ. ದೇವ್ನಿ ಖಾವಿ ಬಾಚುಮ ಲ್ಹಾ. ಹಮ್ಚೆ ಬಾ ಹುಯಿರೋತೆ ದೇವ್ ಪವಿತ್ರಾತ್ಮನ ಯೇಸುನ ದೀರಾಖ್ಯೊಸ್. ಪವಿತ್ರಾತ್ಮನ ದೇವುಸ್ ಕರಿ ದೇವ್ನೆ ವಾಗ್ದಾನ್ ಕರಿರಾಖ್ಯೊಥೊ. ಇನಖ್ವಾಜೆ ಯೇಸು ಹಮ್ಚೆ ಯೊ ಪವಿತ್ರಾತ್ಮನ ರಂಚಿರಾಖ್ಯೊಸ್. ತುಮೆ ದೇಖುಕರಾತೆ ಅಚ್ಚು ಖ್ವಮ್‌ಚುಕರಾತೆ ಅನಾಸ್.

34-35 ಸೊರ್ಗಾನ ಪಡ್ಯೆಗಯೊತೆ ದಾವೀದ್ ಕಾಹೆ, ಯೊ ಯೇಸುಸ್. ದಾವೀದ್ ಇನಿ ಬಾರೇಮ ಅಮ್ ಬೋಲಸ್. 'ಮೆ ತಾರ ವಹೇರನ್ ತಾರ ಗೋಡಾನೊ ರಚ್ಚೊ ಬಣಾವಲಗು ಮಾರಿ ಖಾವಿಬಾಚು ಬೆರೋರೆ' ಕರಿ ಪ್ರಭುನೆ ಮಾರ ಮಾಲಿಕ್‌ನ ಬೋಲಿರಾಖ್ಯೊಸ್.

36 ಇನಖ್ವಾಜೆ ತುಮೆ ಶಿಲ್‌ಬೆಪರ್ ಲ್ಲಡಾಯತೆ ಆ ಯೇಸುನಾಸ್ ದೇವ್ನೆ ಪ್ರಭುಕರೀಬಿ ಕ್ರಿಸ್ತಕರೀಬಿ ಹುಯಿರೊಸ್ ಕರಿ ಇಸ್ರಾಯೇಲ್‌ನ ಖುಮ್‌ವಾಳ ಅಖ್ವಾನ ಮಾಲುಮ್ ಹುಯಿರ್ದವಾದೆ ಕರಿ ಬೋಲೊ.

37 ಅನ ಖ್ವಮ್‌ಜ್ಯುತೆ ಇವ್ಣುನ, ದಿಲ್ಮಿ ಖ್ವುಯಿ ಟೋಚಾವನಿಘೊಣಿ ಹುಯು. ಇವ್ಣೆ ಪೇತ್ರನ ಅಚ್ಚು ಉಭಾರ್‌ಯಾತೆ ಅಪೊಸ್ತಲರ ಝ "ಬೈಯೇವೊ ಹಮ್ಚೆ ಹಮೆ ಶಾತ್‌ಕರ್ನು?" ಕರಿ ಬೋಲ್ಯು.

38 ಪೇತ್ರನೆ ಇವ್ಣುನ ತುಮಾರಮ ಹರೇಕ್‌ಫಣುಬಿ ತುಮಾರ ಪಾಪ್‌ಖ್ವಾಜೆ ಪಶ್ಚತ್ತಾಪ್ ಕರೀನ್ ದೇವ್‌ಭಣಿ ಫರಿನ್ ಯೇಸು ಕ್ರಿಸ್ತನ ನಾಮ್‌ಪರ್ ಬ್ಯಾಪ್ತಿಸ್ಮ್‌ಲೇವೊ. ತದೆ ದೇವ್ ತುಮಾರಿ ಪಾಪ್ ಅಖ್ಪು ಕ್ಷಮಾ ಕರ್ಚಿ, ತದೆ ತುಮೆ ಪವಿತ್ರಾತ್ಮ ದಾನ್ವಲೀಲಿಶು.

39 ಆ ವಾಗ್ದಾನ್ ತುಮೂನಾಬಿ ತುಮಾರ ಲಡ್ಕಾವ್‌ನಾಬಿ ಘಣ ದೂರ್ದಲಾತೆ ಅದ್ಮಿವೊನಾಬಿ ದೆವೈರ್ದೊಸ್. ಅಪ್ಲೊ ದೇವ್ ಹುಯಿರೋತೆ ಪ್ರಭು ಇನಕನ ಖುಷಿ ಲ್ಹವಾಳ ಹರೇಕ್ ಜ್ಞಾನಾಬಿ

ಆ ವಾಗ್ದಾನ ದೀರಾಖ್ಯೊನ್ ಕರಿ ಬೋಲ್ಯೊ.

40 ಪೇತ್ರನೆ ಅಜೂಬಿ ಕೈಏಕ್ ವಾಡ್ಲಿ ಖ್ವಮ್‌ಜಾಡ್ತೊ ಹುಯಿನ್, “ಆ ಖರಾಬ್ ಪಿಳ್ಳಿವಾಳಧಿ ತುಮೂನ ಬಚ್ಚಾಡಿಲೆವೊ” ಕರಿ ರೈತಾಯೊ.

41 ಇನೆ ಬೋಲ್ಯೊತೆ ಖ್ವಮ್‌ಜಿನ್ ಬ್ಯಾಪ್ತಿಸ್ಮ್‌ಲೀಲಿದು. ಯೋ ದನ್ ಕಮ್‌ಶಿಕಮ್ ತೀನ್ ಹಜಾರ್ ಅದ್ಮಿಖಾರು ವಿಶ್ವಾಸಿನ ಟೋಳ್‌ಮಳೀಗು.

ವಿಶ್ವಾಸಿನ ಇಫ್‌ಮ ಜಿವ್ಣು

42 ಯೊ ಅದ್ಮಿಖಾರು ಅಪೊಸ್ತಲರನ್ನಿಲುಪದೇಶ್‌ನ ಖ್ವಮ್‌ಜಾಮಾಬಿ, ಬೈಯೇಮ ಮಳಿನ್ ರ್ಹವಾಮಾಬಿ, ಖಾಣು ಖಾವಮಾಬಿ, ಪ್ರಾರ್ಥನೆ ಕರಾಮಾಬಿ ಜೋಡ್ತಾ ಅವ್ಣೆ ಮಳಿನ್ ಕರ್ತುಫು.

43 ಅಪೊಸ್ತಲರ್ ಅಖ್ಪಿ ಕೈಏಕ್ ಶಕತ್ಪುಬಿ ಅಜು ಅದ್ಭುತ್‌ಕಾಮ್ ಕರ್ತುಫು. ಅಜು ಹರೇಕ್ ಜಣಾನಾಬಿ ದೇವ್ನಿ ಡರ್ ಭಕ್ತಿ ಆಯು.

44 ವಿಶ್ವಾಸ್ ಕರವಾಳು ಖಾರು ಒಗ್ಗಟ್‌ಹುಯಿನ್ ಜಿವ್ಣು ಕರ್ತುಫು. ಇವ್ಣಾಮಥೂತೆ ಹರೇಕ್ ಚೀಞ್‌ನಾಬಿ ವಾಟಪಾಡಿಲ್ಯಾವಳು ಹುಯಿರುಫು.

45 ಇವ್ಣಿ ಜಮೀನ್ ಅಜು ಇವ್ಣಕನ ಥೂತೆ ಶೊತ್ತ್ ವೇಚಿನ್ ಮಳಾತೆ ಪೈಶಾನ ಜರೂರತ್ ರ್ಹವಳಾನ ವಾಟಪಾಡಿ ದೇತೂಫು.

46 ಇವ್ಣೆ ಹರೇಕ್ ದನ್ ಏಕ್‌ದಿಲ್‌ಧಿ ದೇವ್ನಿ ಮಂದಿರ್‌ಮ ಮಳಿನ್ ಆವ್ತುಹುಯಿನ್, ಇವ್ಣೆ ಇವ್ಣ ಘರ್‌ಮ ರೋಟೊ ತೋಡಿನ್ ಒಟ್‌ಧಿ ಖಾಣು ಖಾತೂಫು. ಇವ್ಣೊ ದಿಲ್ ಮುಷಿಧಿ ಭರ್ಚೆರ್ದೆತೂಫು.

47 ಇವ್ಣೆ ದೇವ್ನಿ ಖರವ್‌ಕರ್ತೂಫು. ಅಜು ಅದ್ಮಿಖಾರಾನು ದಯಾನ ಲಿಲ್ಯಾವವಾಳ ಹುಯಿರ್ದಾಫು. ಹರೇಕ್ ದನ್‌ಬಿ ಘಣು ಘಣು ಅದ್ಮಿಖಾರು ರಕ್ಷಣೆ ಲೇವ್‌ಕರ್ತೂಫು. ಪ್ರಭುನೆ ಇವ್ಣನ ಅಖ್ವಿನ ವಿಶ್ವಾಸಿನಿ ಸಭೆಮ ಮಳಫ್ ಕರ್ತೊಫೊ.

3

ಏಕ್ ಲಂಗೊ ಅಱ್ಣು ಹುಯೊತೆ

1 ಏಕೆದನ್ ಪೇತ್ರಬಿ ಯೋಹಾನ ಧೊಪಾರ್ನ್ ತೀನ್ ಘಂಟಾನ ಚಾಲ್ತಿದೀತೆ ಪ್ರಾರ್ಥನೆನ್‌ಖ್ವಾಜೆ ದೇವ್ನಿಮಂದಿರ್‌ನ ಗಯ.

2 ಪೈದಾಖ್ವ್ ಧಿ ಲಂಗೊ ಧೋತೆ ಏಕೆಅದ್ನಿನ್ ಕೋಣಸ್ಸಿ ಧೋಡುಜಣು ಡೊಯಿಲಿನ್ ಅಯಿನ್; ದೇವ್ನಿಮಂದಿರ್‌ನ ಮಹಿ ಜಾವಾಳಕನ ಧರಮ್ ಮಾಂಗಾನಖ್ವಾಜೆ ಇನ್ 'ಶನ್‌ಗಾರ್ನ್ ದರ್ಟ್ವಾಜು ಕರಿ ಬೋಲ್ವೆಲೇತೆ ಬಾಕಲ್‌ಕನ ಹರ್‌ದನ್ ಬೆಖ್ವಾಡ್‌ತೂಡು.

3 ಇನೆ ದೇವ್ನಿಮಂದಿರ್‌ನ ಮಹಿ ಒಳೆಜಾಯ್ತೆ ಪೇತ್ರನ ಅಜು ಯೋಹಾನನ ದೇಖಿನ್ ಧರಮ್ ದೈವಾನ ಗಿಂಗಾಯು.

4 ಪೇತ್ರ ಯೋಹಾನ ಭೇಜಣ ರರ್‌ಕೈನ್ ದೇಖ್. ಪೇತ್ರನೆ ಇನ್ "ಹಮೂನ ದೇಕ್!" ಕರಿ ಬೋಲ್ಯೊ.

5 ಯೋ ಲಂಗೊ ಇವ್ಣೇಫಿ ಶಾತ್‌ತೋಬಿ ಮಳ್‌ಶೆಕಿ ಶುಕಿ ಕರಿ ಖ್ವಿಯಾಲ್ ಕರಿನ್ ಇವ್ಣಭಣಿ ದೇಖ್.

6 ತದೆ ಪೇತ್ರನೆ, ಪೈಶ ಖೊನ್ನು ಮಾರಕನ ಕೊಯ್ತೆ ಕತೋಬಿ ಮಾರಕನ ಛಾತೆ ಯೊ ತುನ ದೆವ್‌ಸ್. ನಜರೇತ್ತ್ ಯೇಸುಕ್ರಿಸ್ತನ ನಾಮ್‌ಥೀಸ್ ಉರೀನ್ ಚಾಲ್‌ಕರಿ ಬೋಲಿನ್,

7 ಇನೊ ಖಾವೊ ಹಾತ್ ಧರೀನ್ ಉರಾಡ್ಲೊ ತದ್‌ನು ತದೇಸ್ ಇನ್ ಪಕ್ಲೇಳಿಮಾಬಿ, ಪಂಜವ್‌ಮಾಬಿ, ಏಡಿಮಾಬಿ ಶಕತ್ ಆಯು.

8 ಯೊ ಉರೀನ್ ಭೀರಿನ್ ಗೋಡೆಫಿ ಚಾಲಾಲಗೊ; ಯೊ ಚಾಲ್ತೊ ಖೇಲ್ತೊ ದೇವ್ನಿ ಖ್ವಿರಾವ್‌ತೊಹುಯಿನ್ ಇವ್ಣಿಜೋಡ್ತ್ ದೇವ್ನಿಮಂದಿರ್‌ನ ಮಹಿ ಗಯೊ.

9 ಯೋ ಚಾಲ್ತೊಹುಯಿನ್ ದೇವ್ನಿ ಖ್ವಿರಾವ್‌ತೊ ವಳ್ಳಾವಾತೆ ಅದ್ನಿಖ್ವಾರಾನೆ ದೇಖ್.

10 ಆ ಹೈರುತೆ ಮಂದಿರ್‌ನ್ ಶನ್‌ಗಾರ್ನ್ ದರ್ಟ್ವಾಜು ಕರಿ ಬಾಕಲ್‌ಕನ ಬೇಶಿನ್ ಧರಮ್ ಮಾಂಗ್‌ತೊಧೋತೆ ಆಸ್ ಕರಿ ಖ್ವಣೇದ್ ಕರನ್ಯ್. ಯೋಸ್ ಅದ್ನಿಚಾಲೀನ್ ದೇವ್ನಿ ಖ್ವಿರಾವನು ದೇಖಿನ್ ಘಣು ಆಶ್ಚರ್ಯ ಕರನ್ಯ್.

ಪೇತ್ರನು ಉಪದೇಶ್

11 ಅಲ್ಲು ಹುಯುತೆ ಲಂಗ್‌ಡಾನೆ ಪೇತ್ರ ಬಿಜು ಯೋಹಾನನ ಬೋಡ್ಲ ಒಳೆಜಾಯ್ತೆ ತದೆ, ಆಶ್ವರ್ಯ ಕರುಕರ್ತುಧೂತೆ ಅದ್ವಿಖ್ವಾರು ಸೊಲೊಮೋನ್ ಕರಿ ನಾಮ್‌ಲ್ಲತ್‌ಕನ ಎಕ್ಚು ಹುಯಿನ್ ನಾಶಿಆಯು.

12 ಪೇತ್ರ ಅನ ದೇಖಿನ್, ಯೋ ಅದ್ವಿಖ್ವಾರಾನ; ಇಸ್ರಾಯೇಲ್‌ವಾಳವೊ, ಅನ ದೇಖಿನ್ ಶನ ಆಶ್ವರ್ಯ ಹುಯಿರಾಸ್? ತುಮೆ ಹಮೂನ ಶನ ಅಮ್ ದೇಖುಕರಸ್? ಹಮೆ ಹಮಾರಿ ಶೊಂತ್ ಶಕಥಿ ರ್ವೊ, ಹಮಾರಿ ದೇವ್ನಿ ಭಕ್ತಿಥಿ ರ್ವೊ ಅನ ಚಾಲ್ವಾನಿತರ ಕರ್ಚುಕರಿ ನಕೊ ಲಾರ್ಚುಶು?

13 ಅಪ್ಪೊ ಗುರುಗುರಬ್‌ಲ್ಯ ಹುಯಿರೋತೆ ಅಬ್ರಹಾಮ್ ಇಸಾಕ್ ಯಾಕೋಬನೊ ದೇವ್ ಅಜ್ಜು ಅಪ್ಪೊ ಗುರುಗುರಬ್‌ಲ್ಯನೊ ದೇವ್ ಇನೊ ದಾಸಹುಯಿರೊತ್ತೆ ಯೇಸುನ ಮಹಿಮೆ ಕರಿರಾಖೊಸ್. ಕತೋಬಿ ತುಮೆ ಇನ ಪಿಲಾತನ ಹಾತ್ಮ ಮಾರನ ಧರಿನ್ ದಿದಾ; ಬಿಜು ಪಿಲಾತನೆ ಇನ ಛೋಡಾವ್ಣು ಕರಿ ಖೂಜ್ ಕರಾದಿನ್, ಇನಖ್ವಾವ್ಣು ತುಮೆ ಯೇಸು ಹೋಣುಕೊಯ್ನಿ ಕರಿ ಬೋಲ್ಯ.

14 ತುಮೆ ಪರಿಶುದ್ಧನಿ ನೀತಿನೊ ಹುಯಿರೋತೆ ಯೇಸುನ ನಕೊ ಕರಿ ಬೋಲ್ಯ ಇನಬದಲ್ ಹತ್ಯಾರ ಏಕ್ ಚೋರ್‌ನ ಛೋಡ್ಲೆ ದೇವ್ಣು ಕರಿ ಪಿಲಾತನ ಬೋಲಿಲಿದ.

15 ಅಮ್ ತುಮೆ ಜಾನ್‌ದೇವಳಾನಸ್ ಮರೈನಾಖ್. ಕತೋಬಿ ದೇವ್ಣೆ ಇನ ಮರೈಹುಯಾಮಾಥು ಉರಾಡ್ಲೊ; ಅನಿ ಬಾರೇಮ ಹಮೇಸ್ ಸಾಕ್ಷಿಖ್ವಾರು ಹುಯಿರಾಸ್.

16 ತುಮೆ ಶಾತ್ ದೇಖ್ಕಿ ಅಜ್ಜು ತುಮೆ ಶಾತ್ ಖ್ವಮ್‌ಜ್ಯಾಕಿ ಯೋ ಅಖ್ವು ಇನ ನಾಮ್‌ಥೀಸ್ ಹುಯಿರುಸ್. ಯೊ ಲಂಗ್‌ಡಾನೆ ಯೇಸುನ ಉಪ್ಪರ್ ರಾಖಿರಾಖೊತ್ತೆ ವಿಶ್ವಾಸ್‌ಥೀಸ್ ಇನ ಅಲ್ಲು ಹುಯುತೆ ಅನಅಖ್ವು ತುಮೆ ದೇಖಿರಾಖ್.

17 ಇಸ್ರಾಯೇಲ್‌ವಾಳವೊ, ಯೋ ರ್ವಾವಾದೆ ತುಮೆ ಮಾಲುಮ್ ಕರ್ಚುಕೊಂತೆ ಯೇಸುನ; ಅಮ್ ಕರ್ಚುಕರಿ ಮನ ಮಾಲುಮ್ ಛಾ, ತುಮಾರ ಅದಿಕಾರಿ ಜಿನುಬಿ ಮಾಲುಮ್ ಕರೀಲಿದಾಕೊಯ್ನಿ.

18 ಕ್ರಿಸ್ತಯೇಸು ಲತಾಡ ಲಿಶೆ ಕರಿ ದೇವ್ನೆ ಪ್ರವಾದಿಖ್ವಾರಥಿ ಅಗಾಡಿಸ್ ಬೋಲಾಯೋತೆ ವಾತೆ ಅಮ್ಮಿ ಪರಕ್ಮಚಾಲಾಯೊ.

19 ಅನಖ್ವಾಜೇಥಿ ತುಮಾರ ಪಾಪ್‌ಖ್ವಾಜೆ ತುಮೆ ಪ್ರಾಯಶ್ಚಿತ್ ಕರಿಲೀನ್ ದೇವ್‌ಭಣಿ ಫರಿಜಾವೊ. ತದೆ ಯೋ ತುಮಾರಿ ಪಾಪ್ ಕ್ಷಮಾಪಣ್ ಕರಿಲಿಶೆ.

20 ಪ್ರಭು ತುಮೂನ ಆತ್ಮಿಕ ಅರಾಮ್ ದಿಶೆ. ಅಜ್ಜು ದೇವ್ನೆ ಪಹಿಲೇಸ್ ಕ್ರಿಸ್ತಕರಿ ಚೂಣಿರಾಖೊತೆ ಮೆಸ್ಸಿಯಾನ ತುಮಾರಖ್ವಾಜೇಸ್ ಮೋಕಲ್‌ಶೆ.

21 “ಕತೋಬಿ ಅಖ್ವಾಸ್ನ ಬರೋಬರ್ ಕರಾನ ದನ್ ಆವಾಲಗು ಯೊ ಪರಲೋಕ್‌ಮಾಸ್ ರ್ವೇವ್ವುಕರಿ ದೇವ್ ಘಣಾದನ್ನ ಪಾಲ್ಟಳ್ ಇನ ಪವಿತ್ರ ಪ್ರವಾದಿಥಿ ವಾತೆ ಬೋಲಾನಿ ವಖ್ತಮ; ಆ ದನ್ನಿ ಬಾರೇಮ ಬೋಲೊಡೊ.

22 ಮೋಶೆನೆ ಬೋಲೊತೆ ಶಾತ್‌ಕತೊ, ದೇವ್‌ಹುಯಿರ್ರೊತೆ ಪ್ರಭು ಮಾರಿನಿತರ ತುಮಾರ ಅದ್ಮಿಮಾಸ್ ಏಕ್ ಪ್ರವಾದಿನ ತುಮಾರಖ್ವಾಜೆ ಉರಾಡ್‌ಶೆ, ಯೋ ಬೋಲ್‌ಶೇತೆ ಅಖ್ವಿ ವಾತೆನ ತುಮೆ ಖ್ವಮಜ್‌ಣು.

23 ಯೊ ಪ್ರವಾದಿನಿ ವಾತೆನ ಖ್ವಮಜ್‌ಕೊಂತೆ ಹರೇಕ್ ಜಣೊಬಿ ದೇವ್ನ ಅದ್ಮಿಥಿ ಅಲಕ್‌ಹುಯಿನ್ ನಾಶ್‌ಹುಯಿಜಾಶೆ.

24 ಸಮುವೇಲ್‌ಥಿ ಧರೀನ್ ಇಂಥಿ ಪಲ್ಟಲ್ಯ ಪ್ರವಾದಿಖ್ವಾರುಬಿ ಹಮ್ಮೇನಿ ಆ ದನ್ನಿ ಬಾರೇಮ ವಾತೆ ಬೋಲ್ಯು.

25 ಯೊ ಪ್ರವಾದಿಖ್ವಾರು ಬೋಲ್ಯಾತೆ ವಾತೆನ ತುಮೆ ಖ್ವಮಜಿಲಿದ. ದೇವ್ ತುಮಾರ ಗುರುಗುರಬ್‌ಲ್ಯಾನಿ ಜೋಡ್ಡ ಕರೊತೆ ಒಪ್ಪಂದಾನನ ತುಮೆ ಸ್ವೀಕಾರ್ ಕರೀಲಿದಾ. ದೇವ್ ತುಮಾರೊ ಗುರು ಹುಯಿರೋತೆ ಅಬ್ರಹಾಮ್‌ನ, ‘ತಾರಿ ಖಾನ್‌ಧಾನ್‌ಥಿ ಜಮೀನ್‌ಪರ್ ಛಾತೆ ಅದ್ಮಿಖ್ವಾರು ವಾರ್‌ಖೊಲೀಲಿಶೆ ಕರಿ ಬೋಲ್ಯೊ.

26 ದೇವ್ ಪಹಿಲೆ ತುಮಾರಖ್ವಾಜೇಸ್ ಇನ ಸೇವಕ್‌ನ ಮರಣ್‌ಥು ಉರಾಡಿನ ತುಮಾರಕನ ಮೋಕ್‌ಲ್ಯೊ ತುಮೂನ ಆಶೀರ್ವಾದ್

ಕರಾನಖ್ವಾಜಿ ದೇವ್ನ ಯೇಸುನ ಮೋಕ್‌ಲ್ಯೊ ಯೋ ತುಮಾರಮ ಹರೇಕ್ ಭಣಾನಾಬಿ ಇವ್ಣಿ ಇವ್ಣಿ ಖರಾಬ್ ವಾಟ್‌ಥಿ ದೂರ್ ಕರೀನ್ ಆಶೀರ್ವಾದ್ ಕರ್ತೆ.” ಕರಿ ಬೋಲ್ಯೊ.

4

ನ್ಯಾವಾನಿ ಸಭೆನ ಖ್ವಾಮ್ಣೆ ಪೇತ್ರಬಿ ಯೋಹಾನ

¹ ಪೇತ್ರಬಿ ಯೋಹಾನ ಅದ್ಮಿಖ್ವಾರಾನಿ ಜೋಡ್ವಾತ್ ಬೋಲುಕರಾನಿ ವಖ್ವತ್‌ಮಾಸ್ ಹಿಜ್ಜಾ ಥೋಡು ಯಾಜಕ್ ಖ್ವಾರು ದೇವ್ನ ಮಂದಿರನ್ನ ಕಾವ್ಣಿಕರಾವಾಳನೊ ಮೋಟೊಬಿ ಸದ್ವಕಾಯವಾಳು ಇವ್ಣಕನ ಆಯು.

² ಆ ಭೇಜಣ ಅಪೊಸ್ತಲರನ್ನ ಅದ್ಮಿಖ್ವಾರಾನ ಯೇಸುನಿ ಶಕತ್‌ಥಿ ಮರೈಹುಯಾನ ಖ್ವಾರಾನ ಪಾಳ್ತು ಜಿವ್ತುಹುಯಿನ್ ಆವ್‌ಶೆ ಕರಿ ಬೋಧನೆ ಕರುಕರಾತೆ ದೇಖಿನ್ ಇವ್ಣನ ಚಂಡಾಳ್ ಲ್ಲಡ್ಲೊ.

³ ಯೆಹೂದ್ಯರನ ಗಲ್‌ಥಖ್ವಾರಾನೆ ಪೇತ್ರನಾಬಿ ಯೋಹಾನನಾಬಿ ಧರೀನ್ ಖ್ವಾರ್‌ಕೊಟ್‌ಮ ಘಲ್‌ದಿದು. ತದೆ ಅಂಧಾರು ಹುಯಿರಲ್ಲ್ಹು. ಇನಖ್ವಾಜಿ ಇವ್ಣಭೇಜಣಾನ ಇನ ಆಗ್‌ಲ್ಯದನ್‌ಲಗು ಕೋಂಡಿರಾಮ್ಮಿಥು.

⁴ ಕತೋಬಿ ದೇವ್ನಿ ವಚನ್ ಖ್ವಮ್‌ಜಾವಾಳಾಮ ಕೆತ್ಸೂಕಿಜಣು ವಿಶ್ವಾಸ್ ಕರಲ್ಲ್ಯ; ಪರ್ಖ್ವಾನಿ ಗಣ್ತೀಸ್ ಖ್ವಮಾರ್ ಪಾಚ್ ಹಜಾರ್ಥಿ ಜಾಖ್ವತ್ ಹುಯು.

⁵ ಆಗ್‌ಲ್ಯದನ್ನೆ ಯೆಹೂದ್ಯರನ್ನ ಅದಿಕಾರಿಬಿ ಗಲ್‌ಥಖ್ವಾರು, ಬಿಜು ಧರ್ಮ ಬೋಧನೆ ಕರವಾಳು ಯೆರೂಸಲೇಮ್‌ನ ಸಭೆ ಮಳೀನ್ ಆಯು.

⁶ ಹಿಜ್ಜಾ ಅನ್ನಕರಿ ಪ್ರಧಾನ ಯಾಜಕ್‌ಬಿ ಕಾಯಫಬಿ ಯೋಹಾನಬಿ, ಬಿಜು ಅಲೆಕ್ಸಾಂಡರ್‌ಬಿ ಥೊ.ಮಹಾಯಾಜಕನ ಪರಿವಾರ್ ವಾಳಾಮ ಮಳ್ಳುಹುಯು ಅಖ್ವು ಜಣುಬಿ ಹಿಜ್ಜಾ ಥೂ.

⁷ ಅವ್ಣೆಪೇತ್ರಬಿ ಯೋಹಾನನ ಬೀಚ್ಕ್‌ಭೀರಾಖಿನ್ ತುಮೆ ಖಿವಿ ಶಕಡ್ಲಿ ಅಜ್ಜು ಕಿನ ನಾಮ್‌ಥಿ ಆ ಅಖ್ವು ಕರೋಸ್? ಕರಿ ಬೋಲಖ್ವತರ್,

⁸ ತದೆ ಪೇತ್ರನೆ ಪವಿತ್ರಾತ್ಮಧಿ ಭರೈನ್ ಇವ್ಣನ; ಅದ್ಮಿನ ಅದಿಕಾರಿವೊ ಶಾಣವೊ,

9 ಏಕ್ ಲಂಗ್ಡಾನ ಹುಯುತೆ ಮದತ್‌ನಿ ಬಾರೇಮ ಇನ ಆ ಕಿಮ್ ಗುಣ್‌ಹುಯು ಕರಿ ತುಮೆ ಹಮೂನ ಸವಾಲ್ ಬೋಲುಕರಸ್.

10 ತುಮೆ ಶಿಲ್‌ಬೇಪರ್ ಛಡಾಯತೆ ಅಜ್ಜು 'ದೇವ್ ಮರೈಹುಯಮಾಡು ಉಠಾಡ್ಯೊತೆ ನಱರೇತ್‌ನೊ ಯೇಸುಕ್ರಿಸ್ತನ ನಾಮ್‌ಥೀಸ್ ಆ ಲಂಗ್ಡೊಡೊತೆ ಅದ್ತಿ ಅಟ್ಟೊ ಹುಯು. ಬಿಜ್ಜು ತುಮಾರ ಖ್ವಾಪ್ಪೆ ಭಿಯೋಸ್ ಕರಿ ಬೋಲಾನು, ತುಮೂನಾಬಿ ಅಜ್ಜು ಇಸ್ರಾಯೇಲ್ ಅದ್ತಿಖ್ವಾರನ ಆವಾತೆ ಮಾಲುಮ್ ರ್ವಾವಾದೆ.

11 'ಘರ್ ಭಾಂದಾವಾಳ ಹುಯಿರ್ದಾತೆ ತುಮೆ ನಕೊಕರಿ ಮ್ಹೆಂದಿದಾತೆ ಯೊ ಬಂಡೋಸ್ ಯೇಸು. ಯೋಸ್ ಮುಖ್ಯ ಹುಯಿರ್ದಾತೆ ಕೋಣಾನೊ ಬಂಡೊ ಹುಯಿಗಯೊ'.

12 ಆವ್ಣುತೆ ರಕ್ಷಣೆ ಬಿಜ್ಜು ಕಿನಾಮಬಿ ಮಳಾಶೆಕೊಯ್ತು; ಇನ ನಾಮ್‌ಥೀಸ್ ಪಣ್ಣಿ ಆಬ್‌ನ ಹೇಟ್ ಅದ್ತಿನ ದೀರಾಖ್ಯತೆ ಬಿಜ್ಜು ಖೆವ ನಾಮ್‌ಥಿಬಿ ಅಪ್ಪುನ ರಕ್ಷಣೆ ಕೋಲುಷೇನಿ. ಕರಿ ಬೋಲ್ಯೊ.

13 ಪೇತ್ರ ಬಿಜ್ಜು ಯೋಹಾನ, ಭಾಲ್‌ಥಿ ವಾತೆ ಬೋಲಾನು ಯೋ ಅದ್ತಿಖ್ವಾರು ದೇಖಿನ್ ಇವ್ಣೆ ಶನೀಬಿ ಪಡಂತ್ ಕೊ ಶಿಕಿರಾಖ್ಯಾನಿ ತೋಬಿ ಡರೈಕೊಂತೆ ಆ ಕಿಮ್ ಬೋಲಸ್ ಕರಿ ಘಣು ಆಶ್ಚರ್ಯ ಕರೈ ಪೇತ್ರಬಿ ಯೋಹಾನ ಯೇಸುನಿ ಜೋಡ್ಡೊಡೊತೆ ಕರಿ ಖ್ವಣೇದ್ ಧರೈ.

14 ಅಜ್ಜು ಗುಣ್‌ಹುಯುತೆ ಯೊ ಲಂಗ್ಡು ಅದ್ತಿಬಿ ಇವ್ಣಿ ಜೋಡ್ಡು ಭೀಯೂತೆ ದೇಖ್ಕುಯೆಹೂದ್ಯರ್‌ನೆ ಫರೀನ್ ಶಾತ್ತ್ವಿ ಬೋಲಾನ ಕೋ ಹುಯುನಿ.

15 ತದೆ ಯೆಹೂದ್ಯರ್‌ನ ಘಲ್ಡ ಖ್ವಾರಾನೆ ಅಪೊಸ್ತಲರನ್ನ ಭಾರ್ ಮೋಕ್ಲಿನ್,

16 ಇವ್ಣೆ "ಆ ಅದ್ತಿನ ಅಪ್ಪೆ ಶಾತ್ ಕರಿಯೆ? ಅಪ್ಪೆ ಘಣು ಅಪ್‌ರೂಪ್‌ನು ಖ್ವಣೇದ್‌ನು ಕಾಮ್ ಕರಿರಾಖ್ಯತೆ ಯೆರೂಸಲೇಮ್‌ನ ಖ್ವಾರಾನ್ ಅದ್ತಿನ ಮಾಲುಮ್‌ಪಡಿರ್ದಸ್, ಇನ ಝೂಟಿ ಬೋಲಾನ ಕೊಹೊಯ್ತು".

17 ಕತೋಬಿ ಆ ವಾತೆನ ಅದ್ತಿಖ್ವಾರು ಯೇಸುನ ನಾಮ್ ಪಾಡೀನ್ ಬಿಜ್ಜು ಕಿನಿ ಜೋಡ್ಡಾಬಿ ವಾತೆ ನಾಬೋಲ್ವುಕರಿ ಇವ್ಣುನ ಡರಾವ್ಣು ಕರಿ

ಇವೈವಾತೆ ಬೋಲಿಲಿದು.

18 ತದೆ ಅಪೊಸ್ತಲರನ್ನು ಮಹಿ ಬುಲೈನ್, ಯೇಸುನು ನಾಮಾಲೇನ್ ಶಾಸ್ತ್ರಿ ನಾ ಬೋಲೆನು ಬಿಜು ಶಿಕಾಡ್‌ನುನಾ ಕರಿ ಇವ್ವುನ ರೈತಾಯು.

19 ಇನಖ್ವಾಜೆ ಪೇತ್ರಬಿ ಯೋಹಾನಾನೆ; ಇವ್ವುನ, ದೇವ್ನಿ ವಾತೆ ಖ್ವಮ್‌ಜಾಥೀಬಿ ತುಮಾರಿವಾತೆ ಖ್ವಮ್‌ಜಾನು ಬರೋಬರ್‌ಕಿ ಶು? ಯೊ ದೇವ್ನ ಖ್ವಮ್ವೆನ್ಯಾವ್‌ಕಿ ಶು? ಇನ ತುಮೇಸ್ ತೀರ್ಪ್ ಕರಿಲೆವೊ.

20 ಹಮೇತೊ ದೇಖಿನ್ ಖ್ವಮ್‌ಜಿಹುಯಿ ವಾತೆನ ಬೋಲ್‌ಶು ಕೊಂತೆ ರಕ್ತಿಶುಕೊಯ್ನಿ. ಕರಿ ಜವಾಬ್‌ದಿದಾ.

21 ಫಾಲ್ಕುತೆ ಖ್ವಣೇದ್ನ ಕಾಮ್‌ಖಾಜೆ ಅದ್ವಿಖ್ವಾರು ದೇವ್ನ ಖ್ವರವ್‌ಕರ್‌ರುಡು, ಇನಖ್ವಾಜೆ ಅಪೊಸ್ತಲರನ್ನು ಖ್ವತಾವನ ಕಾರಣ್ ಮಳಿಕೊಂತೆ ಇನಖ್ವಾಜೆ ಇವ್ವುನ ಅಜೂಬಿ ರೈತೈನ್‌ಮ್ವೇಲಿದಿದು.

22 ಯೊ ಖ್ವಣೇದ್‌ನು ಕಾಮ್‌ಥಿ ಅಲ್ಪು ಹುಯುತೆ ಲಂಗ್ಡಾನ ಫಾಳಿಖ್ವ್ ವರಖ್‌ಥೀಬಿ ಜಾಖ್ವತ್ ಉಂಬರ್ ಹುಯಿರುಡು.

ಘಟ್ ರಟ್ಟಾವನಖ್ವಾಜೆ ವಿಶ್ವಾಸಿನಿ ಪ್ರಾರ್ಥನೆ

23 ಪೇತ್ರಬಿ ಯೋಹಾನ ಭೇಜಣ ಯೆಹೂದ್ಯರ್‌ನ ಗಲ್‌ಡೆಖ್ವಾರಾನಿ ಸಬೆಮಾಥು ನಿಕ್ಕಿನ್, ಇವ್ವ ರ್ಝೂಂಡ್‌ಮ, ಮಹಾಯಾಜಕ್ ಖ್ವಾರಾನೆ ಬಿಜು ಯೆಹೂದ್ಯರ್‌ನ ಶಾಣಖ್ವಾರಾನೆ ಇವ್ವು ಬೋಲೈತೆ ವಾತೆಖ್ವಾರೀಸ್ ಇವ್ವಿ ರ್ಝೂಂಡ್‌ವಾಳಾನ ಖ್ವಮ್‌ಜಾಡ್.

24 ಅನ ಖ್ವಮ್‌ಜ್ಯುತೆ ಖ್ವಾರು ವಿಶ್ವಾಸಿ ಏಕ್‌ದಿಲ್‌ಥಿ ದೇವ್ನ ಜೋರೇಖ್ವು ಚಿಕ್ರಿನ್ ಅಮ್ ಪ್ರಾರ್ಥನೆ ಕರ್‌ಯ್. ಮಹಾಪ್ರಭು, ಆಬ್ ಧರ್ತಿನ, ದರ್‌ಯಾವ್‌ನಾಬಿ, ಇನಾಮ ಲ್ಲಾತೆ ಖ್ವಾರೂಸ್ ಉಬ್‌ಜಾಯೊಹುಯೊ ತೂಸ್,

25 ಹಮಾರೊ ಗುರು ಹುಯಿರೋತೆ ದಾವೀದ್ ತಾರೊ ಸೇವಕ್ ಹುಯಿರೋಥೊ. ಇನೆ ಪವಿತ್ರಾತ್ಮನಿ ಮದಧ್ಲಿ ಆವಾತೆಖ್ವಾರಿ ಲೀಖ್ವೊ ಯೆಹೂದ್ಯರ್‌ಕಾಹೆತೆ ಅದ್ವಿಖ್ವಾರು ಇರಾದೊ ಶನ ಕರ್ತುಲುಷೆ? ಅಲಕ್ ಜಾತ್‌ಜಮಾತ್‌ಖ್ವಾರು ಶನ ಫಾಯಿದೊಕೊಂತೆ ಸೋಚ್‌ತು ಉಷೆ?

26 ಜಗತ್ತೊ ರಾಜ್‌ಖ್ವಾರು ತಯಾರ್ ಹುಯಿರುಸ್, ಪ್ರಭುನಾಬಿ ಇನೊ ಅಬಿಷೇಕ್ ಕರಿರಾಖೊತೆ ಇನಾಬಿ ವಿರೋದ್ ಹುಯಿನ್ ಅದಿಕಾರಿಖ್ವಾರು ಎಕ್ವ ಹುಯಿರುಸ್. ಕರಿ ಬೋಲೈರಾಖೊಸ್‌ನಿ?

27 ಯೋ ವಾಥಿಸ್ ಹೆರೋದಬಿ ಪೊಂತ್ಯ ಪಿಲಾತಬಿ, ತೊ ಅಬಿಷೇಕ್ ಕರೊತೆ ತಾರೊ ಪವಿತ್ರ ಸೇವಕ್ ಹುಯಿರೋತೆ ಯೇಸುನ ವಿರೋದ್ ಯೆಹೂದ್ಯಾಕಾಹೆತೆ ಖ್ವಾರು ಅಜ್ಜು ಇಸ್ರಾಯೇಲ್‌ನು ಅದ್ಮಿಖ್ವಾರು ಒಟ್ ಹುಯಿನ್ ಭರೈರೊಡ್ಲ.

28 ಯೇಸುನ ವಿರೋದ್ ಎಕ್ವಹುಯಿನ್ ಆಯುತೆ ಆ ಖ್ವಾರು ಅದ್ಮಿನ ತಾರಿ ಖ್ವೊಜ್ ಭಾಲನಿಘೊಣಿ ಕರೊತ್ಲ ತಾರಿ ಶಕಡ್ಲಿ ಅಜ್ಜು ತಾರಿ ಮರ್ಜಿಥೀಬಿ ಆ ಭಾಲ್ಯು.

29 ಪ್ರಭು ಹಮ್ಮೆ ಅವ್ಲೆ ಬೋಲುಕರಾತೆ ಖ್ವೊಜ್ ಇವ್ಲೆ ಹಮೂನ ಡರಾವ್‌ಕರಾತೆ ಇನ ತು ಕಾನ್‌ದೆ. ಪ್ರಭು ಹಮೆ ತಾರಿ ಸೇವಕ್ ಹುಯಿರಾತೆ ತಾರಿ ವಚನ್ನ ಭಾಲಿಥಿ ಬೋಲಾನ ತೂಸ್ ಮದತ್‌ಕರ್.

30 ತಾರ ಹಾತ್ವ ಭಡಾಯೋತೊ, ತಾರ ಸೇವಕ್, ತಾರಿ ವಚನ್ನ ಹಿಮ್ಮಡ್ಲಿ ಬೋಲಾನಿತರ ರಕ್ಷಕ್ ಯೇಸುನ ನಾಮ್‌ಥಿ ಪವಿತ್ರ ಕಾಮ್ ಕರಾನ, ರೋಗ್‌ವಾಳನ ಗುಣ್‌ಕರಾನ ಖ್ವೊಜ್, ಅಶ್ಚರ್ಯ ಅದ್ಭುತ್‌ಕಾಮ್ ಕರಾನ ತಾರೊಹಾತ್ ಫೈಲಾವ್”.

31 ಅಮ್ ವಿಶ್ವಾಸಿಖ್ವಾರು ಪ್ರಾರ್ಥನೆ ಕರಾನಿ ವೇಳ್ತ ಇವ್ಲೆಥಾತೆ ಝಗೊ ಕಾಪಿರೊಹಿಗು. ತದೆ ಇವ್ಲೆ ಖ್ವಾರುಸ್ ಪವಿತ್ರಾತ್ಮಥಿ ಭರೈನ್ ದೇವ್ಲಿ ವಚನ್ನ ಡರ್ ಕೊಯಿನ್ತೆ ಬೋಲ್ಯು.

ವಿಶ್ವಾಸಿಖ್ವಾರನು ಲಾಡ್ನು ಜಿವ್ವು

32 ಅಖ್ವಿ ವಿಶ್ವಾಸಿನೊ ದಿಲ್‌ಬಿ ಜಾನ್‌ಬಿ ಎಕ್ವಸ್ ಹುಯಿರೊಡ್ಲ. ಇವ್ಲೆ ಟೋಳ್‌ಮಾನು ಕೋಣ್‌ಬಿ ರೊವೊ ಇವ್ಲೆನ ಥೂತೆ ಶೊತ್ಮ ಖಿವು ಎಕಾಬಿ ಹಮಾರು ಕರಿ ಬೋಲ್ಯುಡುಕೊಯ್ಲಿ ಇನ ಬದಲ್ ಹರೇಕ್‌ನಾಬಿ ವಾಟಪಾಡಿಲೇತೊಡ್ಲ.

33 ಪ್ರಭು ಹುಯಿರೋತೆ ಯೇಸು ಪಾಲ್ಟುಜಿವೊಹುಯಿನ್ ಉರೀನ್ ಆಯೊಕರಿ ಅಪೊಸ್ತಲರ್ ಘಣ ಶಕಧಿ ಅದ್ವಿಖ್ತಾರಾನ್ ಸಾಕ್ಷಿ ಬೋಲ್ತುರ್ದೆತುಡು. ಅಜ್ಜು ದೇವ್ನಿ ದಯಾ ಜಾಖ್ತುತ್ ಕಾಮ್‌ಕರನ್.

34 ಇವ್ಣೆ ಜರೂರತ್ ಪೂರಹೋತುಡು, ಜಮೀನ್ ಬಿಜು ಘರ್ ರ್ವಾಳು ಹರೇಕ್‌ಜಣು ಯೊ ಖ್ತಾರು ವೇಚಿನ್ ಮಳಾತೆ ಪೈಶಾನ ಲೀನ್ ಆಯ್.

35 ಅಜ್ಜು ಇವ್ಣೆಖ್ತಾರು ಅಪೊಸ್ತಲರನ್ನ ಗೋಡಾಕನ ಲಯಿನ್ ಮ್ಹೇಲ್‌ತೂಡು; ಯೊ ಪೈಶಾನ ಜರೂರತ್ ರ್ವಾಳಾನ್ ವಾಟಪಾಡಿ ದೇತೂಡು.

36 ಅಮ್ಮಿಸ್ ಪರಕ್ ಸೈಪ್ರಸ್ ಗಾಮ್ ಪೈದಹುಯೊತೆ ಲೇವಿ ಹುಯಿರೊಧೋತೆ ಯೋಸೇಫಕರಿ ಏಕ್‌ಜಣೊ ಥೊ. ಇನ್ ಅಪೊಸ್ತಲರನ್ನ ಬಾರ್‌ಬ ಕರಿ ಬೋಲ್ತುಡು. ಇಮ್‌ಕತೊ “ಏಕ್‌ನ ಭಾಲಿ ದೈವವಾಳೊ” ಕರಿ ಅರ್ಥ.

37 ಇನೆ ಇನಧೂತೆ ಜಮೀನ್ನ ವೇಚಿನ್ ಯೊ ಪೈಶಾನ ಅಪೊಸ್ತಲರನ್ನ ಲಯಿನ್ ದಿದೊ.

5

ಅನನೀಯಬಿ ಸಪೈರ

1 ಅನನೀಯಕರಿ ಏಕ್‌ಜಣೊ ಥೊ. ಇನಿ ಬಾವಣ್ಣು ನಾಮ್ ಸಪೈರ. ಅವ್ಣುನ್ ಥೂತೆ ಥೋಡಿ ಜಮೀನ್ನ ವೇಚಿನ್, ಇಂಥಿ ಮಳಾತೆ ಪೈಶಾಮ್,

2 ಇನಿ ಬಾವಣ್ಣಿವಾತ್ ಖ್ವಮ್‌ಜಿನ್ ಏಕ್ ಭಾಗ್ ಲಪಾಡಿನ್, ಬಿಜೇಕ್ ಭಾಗ್ ಅಪೊಸ್ತಲರನ್ನ ಗೋಡಾಕನ ಲಯಿನ್ ಮ್ಹೇಲ್ಯೊ.

3 ತದೆ ಪೇತ್ರನೆ; ಅನನೀಯನ, ತೂ ಯೊ ಜಮೀನ್ ವೇಚ್ಚೊತೆ, ಇನಾಮಾಡು ಥೋಡು ಲಪಾಡಿನ್ ಪವಿತ್ರಾತ್ಮನ ರಗಾವ್ಣು ಕರಿ ಲ್ಲಾ. ಶೈತಾನ್ನ ತಾರ ದಿಲ್ಮಿಭರ್‌ದಿದೊತೆ ಶಾತ್?

4 ವೇಳಾನ್ ಅಗಾಡಿ ಯೋ ಜಮೀನ್ ತಾರೀಸ್ ಹುಯಿರ್ದಯಿಥೀನಿ. ತೂ ವೇಚ್ಚೊತೊಬಿ ಆಯೂತೆ ಪೈಶಾ ತಾರಾಸ್ ಹಕ್‌ಮ ಧು. ಆ ಖರಾಬ್

ಕಾಮ್ ತಾರ ದಿಲ್ಮಶನ ಸೋಚಿಲಿದೊ? ತೂ ಝೂಟಿ ಬೋಲ್ಯೊತೆ ದೇವ್ ಪಣಿ, ಅದ್ವಿನ ಕಾಹೆ ಕರಿ ಪೇತ್ರನೆ ಬೋಲ್ಯೊ.

5 ಆವಾತೆಖ್ವಾರಿ ಖ್ವಮಜ್‌ತಾಸ್ ಅನನೀಯ ಹೇಟ್ ರಡ್ಕಿನ್ ಮರಿಗಯೊ; ಅನ ಖ್ವಮಜ್‌ವಾಳ ಅಖ್ವಾಸ್ನ ಘಣೊ ಡರ್‌ಲಾಗ್ತು.

6 ತದೆ ಜ್ಞಾನ್‌ಜಮಾನ್‌ಖ್ವಾರು ಉರೀನ್ ಇನ ಶರೀರ್‌ನ ಲುಂಗ್ಡಾಮ ಲಪೇಟೆನ್ ಥೋಯಿಲಿಜೈನ್ ಮಖ್ವಾಣ್ಣು ಕರೈ.

7 ಅನವಾರ್ ಖ್ವಮಾರ್ ತೀನ್ ಘಂಟಾನಿ ವೇಳ್ತೆ ಅನನೀಯನಿ ಬಾವಣ್ ಇನ ಮಾಲುಮ್‌ಕೊಂತೆ ಹಿಜ್ಜಾ ಆಯಿ.

8 ತದೆ ಪೇತ್ರನೆ ಸಪೈರನ ದೇಖಿನ್-ತುಮೆ ಯೊ ಜ್ಞಮೀನ್ ವೇಚ್ಯಾತೆ ಖ್ವಾಚಮಾಬಿ ಅತ್ರಾಸ್ ಪೈಶಾನಕಿಶೂ? ತೂ ಮನ ಬೋಲ್‌ಕರಿ ಬೋಲಾನಿ ವೇಳ್ತೆ “ಒಹೊ ಅತ್ರಾಸ್ ಪೈಶಾನ” ಕರಿ ಬೋಲಿ.

9 ತದೆ ಪೇತ್ರ ಇನ-ತುಮೆ ಭೇಜಣ ಮಳಿನ್ ಪ್ರಭುನ ಆತ್ಮಾನ ಶನ ತರೀಪ್ಪಕರೈ”? ಹಂದೇಕ್, ತಾರ ಬಾವಿನ ಗಾಡ್ಯಹುಯ, ಬಾಕಲ್‌ಕನ ಆಯಿನ್ ಭೀಯ. ತುನಾಬಿ ಇವ್ಣೆಸ್ ಥೋಯಿಲೀನ್ ಜಾಶೆ ಕರಿ ಬೋಲ್ಯೊ.

10 ತದೇಸ್ ಯೋಬಿ ಪೇತ್ರನ ಗೋಡಾನ ಖ್ವಾಮ್ಣೆ ಪಡೀನ್ ಮರಿಗೈ. ಯೋ ಜ್ಞಾನ್‌ಜಮಾನ್‌ ಖ್ವಾರಾನೆ ಮಹಿ ಆಯಿನ್ ಯೋ ಮರಿಗೈತೆ ದೇಖಿನ್ ಇನ ಥೋಯಿಲೀಜೈನ್ ಇನ ಬಾವಿನ ಮಖ್ವಾಣ್ಣನ ಭೀಡೆ ಗಾಡಿದಿದು.

11 ಆ ವಾತೆನ ಖ್ವಮ್‌ಜ್ಯುತೆ ಅಖ್ವಿ ಸಬೆನ ಅಜ್ಜು ಖ್ವಾರಾಸ್ ಅದ್ವಿವೊನ ಡರ್‌ಲಾಗ್ತು.

ಖ್ವಣೇದ್‌ನು ಕಾಮ್‌ಅಖ್ವು ಅಜ್ಜು ಅದ್ವುತ್ ಕಾಮ್‌ಅಖ್ವು

12 ಅಪೊಸ್ತಲರ್ ಖ್ವಾರು ಕೈಏಕ್ ಖ್ವಣೇದ್‌ನು ಕಾಮ್‌ಬಿ ಅದ್ವುತ್‌ಕಾಮ್‌ಬಿ ಕರೈ. ಅದ್ವಿಖ್ವಾರು ಯೋ ಕಾಮ್ ದೇಖ್ತು. ಅಜ್ಜು ಅಖ್ವುಜ್ಞು ಎಕ್ಚು ಹುಯಿನ್ ಸೊಲೊಮೋನ್ನ ಲ್ಲತ್‌ಕನ ಮಳಿನ್ ಆವ್ತು.

13 ಇವ್ವ ಜೋಡ್ ರ್ವವಾನ ಬಿಜ್ ಖಿವ ಏಕ್ ಜ್ಞಾನ ಹಿಮ್ಮತ್ ಕೋಢಿನಿ. ಶನಕತೊ ಅದ್ವಿಖಾರು ಇವ್ವನ ಜಾಖತ್ ಖಾರಾವ್ತು ಥು.

14 ರ್ವಯುತೋಬಿ ಕೇತ್ರುಕಿಜ್ಞಣು; ತಯೇಡ ಪರ್ಮೊಖಾರು ಪ್ರಭುನ ನಂಬಾವಾಳು ಹುಯಿನ್ ಇವ್ವ ಟೋಳ್ತ ಮಳಿಜಾತುಥು.

15 ಅಮ್ ರ್ವವಾನಿ ವೇಳ್ತ ಅದ್ವಿಖಾರು ರೋಗ್‌ವಾಳನ ಡೋಲಿಪರ್ ಪಾಡಿಲೀನ್ ಪೇತ್ರ ಆವಾನಿ ವಾಟ್‌ಪರ್ ಲಯಿನ್, ರೋಗ್‌ವಾಳನ ಉಪ್ಪರ್ ಇನಿ ಛಾಳಿಪಡಾದೆ ಕರಿ ವಾಟ್‌ಪರ್ ಮ್ಹೆಲ್ತುಥು. ಪೇತ್ರನಿ ಛಾಳಿ ಪಡಿತೋಬಷ್ ಕರಿ ಅದ್ವಿಖಾರಾನೆ ಸೋಚಿಲಿದು.

16 ಯೆರೂಸಲೇಮ್ಮ ಅಶ್‌ಪಿಶ್ ಖಾರಗಾಮ್‌ನು ಅದ್ವಿ ಆವ್ತುಥು. ಇವ್ವ ರೋಗ್‌ವಾಳನಾಬಿ ಭೂತ್ ಧರಿರಾಖವಾಳನಾಬಿ ಡೊಯಿಲೀನ್ ಆವ್ತುಥು. ಆ ಅಖ್ವೊಸ್‌ಜ್ಞಣು ಗುಣ್‌ಹೋತುಥು.

ಅಪೊಸ್ತಲರನ್ನ ಹುಯೂತೆ ಖ್ವತಾಪ್ಪಿ

17 ಮಹಾಯಾಜಕ್‌ಬಿ ಇನ ಜೋಡ್‌ವಾಳು ಖಾರು, ಸದ್ದುಕಾಯ ಭಣಿವಾಳು ಖಾರು ಘಣು ಬಳಾಪೊ ಕರ್ಯ್.

18 ಇವ್ವೆ ಅಪೊಸ್ತಲರನ್ನ ಅಖ್ವಾನ ಮಾಲುಮ್‌ರ್ವ್ವೆಸ್ತೆ ಖ್ವರ್ಕೊಟ್‌ಮ ಕೊಂಡಿನ್ ಘಾಲಿದಿದು.

19 ಕತೋಬಿ ರಾತ್ ಪ್ರಭುನೊ ಏಕ್ ಧೂತ ಜೇಲ್‌ನು ಬಾಕಲ್‌ಖಾರು ಕಾಡಿನಾಖ್ಯೊ ಯೊ ದೂತನೆ ಅಪೊಸ್ತಲರನ್ನ ಭಾರ್ ಬುಲೈಲಾಯಿನ್,

20 “ತುಮೆ ಜೈನ್ ದೇವ್ವಿಮಂದಿರ್‌ನ ಮಹಿ ಭೀರಿನ್ ಆ ಫಿಂದ್‌ಗೀನಿ ಬಾರೇಮಾನಿ ಹರೇಕ್ ವಾತೇಬಿ ಅದ್ವಿಖಾರಾನ ಬೋಲೊಕರಿ ಬೋಲ್ಯೊ.

21 ಇನಖ್ವಾಜೆ ಇವ್ವೆ ಅಗಲ್ಯದನ್ನೆ ವ್ವಾಣವೇಳಿಸ್ ದೇವ್ವಿಮಂದಿರ್‌ಮ ಜೈನ್ ಬೋಧನೆಕರಲಗ್ಯಾ ಮಹಾಯಾಜಕ್‌ಬಿ ಇನ ಜೋಡ್‌ವಾಳು ದೇವ್ವಿಮಂದಿರ್‌ನ ಆಯ. ಇವ್ವೆ ಯೆಹೂದ್ಯರ್‌ನ ಮೋಟಿಖಾರಾನ ಅಜ್ಜು ಇಸ್ರಾಯೇಲ್‌ವಾಳನ ಘಲ್ಡಾವ್‌ನಿ ನ್ಯಾವ್‌ನಿ ಸಭೆ ಬೇಖ್ವಾಡಿನ. ಅಪೊಸ್ತಲರನ್ನ ಇವ್ವಕನ ಬುಲೈಲಿನ್ ಆವಾನಖ್ವಾಜೆ ಥೋಡಜ್ಞಾನ ಜೇಲ್‌ಕನ ಮೋಕ್‌ಲ್ಯೊ.

22 ದೇವ್ವಿಮಂದಿರ್‌ನು ಸೇವೆ ಕರವಾಳು ಜೇಲ್‌ಮ ಜೈನ್ ದೇಖಾತೊ ಹಿಜ್ಜಾ ಅಪೊಸ್ತಲರ್ ಕೊ ದೆಖಾಯುನಿ. ಇನಖ್ವಾಜೆ ಪಾಲ್ತುಫರಿ ಇವ್ಣೆ ಆಯಿನ್, ನ್ಯಾವ್‌ನಿ ಸಬೆವಾಳನ ಅಮ್ ಬೋಲೊಹುಯಿನ್;

23 “ಜೇಲ್ ಮೂಚ್ಚೆನ್ ಕೀಲಿಲಗ್ಸುಧು. ಕಾವ್ಲಿ ಕರವಾಳು ಬಾಕಲ್‌ಕನ ಭಿಯೂಧು, ಕತೋಬಿ ಹಮೆ ಬಾಕಲ್ ಕಾಡ್ಯತೊ ಮಹಿ ಏಕ್‌ಜಣೂಬಿ ಕೋ ಥೂನಿ!” ಕರಿ ಬೋಲ್ಯು.

24 ದೇವ್ವಿಮಂದಿರ್‌ನು ದಳಪತಿಬಿ ಬಿಜು ಮಹಾಯಾಜಕ್ ಖ್ವಾರು ಆ ವಾತೇನ ಖ್ವಮ್‌ಜಿನ್ ಅನೇಥಿ ಶಾತ್‌ಲುಷೇಕಿ ಕರಿ ಇವ್ವುನ ಆಶ್ವರ್ಯ ಹುಯು.

25 ಅಮರ್‌ದ್ವಾನಿ ವಖ್‌ತೆ ಏಕ್‌ಜಣೊ ಆಯಿನ್ ಇವ್ವುನ, “ಖ್ವಮ್‌ಜೊ! ತುಮೆ ಜೇಲ್‌ಮ ಫಾಲ್ಕಾತೆ ಅದ್ವಿಖ್ವಾರು ಆಯಿನ್ ದೇವ್ವಿಮಂದಿರ್‌ಮ ಭಿರಿನ್ ಶಿಕಾಡುಕರಸ್” ಕರಿ ಬೋಲ್ಯೊ.

26 ತದೆ ಅದಿಕಾರಿ ಟಪಾಲ್‌ನ ಅದ್ವಿನ ಜೋಡೆ ಜೈನ್ ಅಪೊಸ್ತಲರನ್ನ ಪಾಲ್ತು ಬುಲೈಲಾಯೊ. ಕತೋಬಿ ಶಿಪಾಯಿಖ್ವಾರು ಇವ್ವುನ ಜುಲಮ್ ಕರನ್ಕೊಯ್ಲಿ. ಶನಕತೊ ಅದ್ವಿಖ್ವಾರು ಹಮೂನ ಇರಾದೇಥಿ ಬಂಡೊ ಫೇಕಿನ್ ಮಾರಿನಾಕ್‌ಶೆ ಕರಿ ಡರಿಗಯು.

27 ಇವ್ಣೆ ಅಪೊಸ್ತಲರನ್ನ ಬುಲೈಲಿನ್ ನ್ಯಾವ್‌ನ ಸಭೆನಖ್ವಾಮ್ಣೆ ಭೀರಾಖ್ವು. ತದೆ ಮಹಾಯಾಜಕನೆ ಅಪೊಸ್ತಲರನ್ನ ಸವಾಲ್ ಬೋಲ್ಯೊ:

28 “ತುಮೆ ಆ ನಾಮ್‌ಪರ್ ಬೋಧನೆ ನಾಸ್‌ಕರನ್ನ ಕರಿ ತುಮೂನ ಹುಕುಮ್ ಕರನ್ಕಾಣಿ; ರ್ವಯುತೋಬಿ ತುಮೆ ಕರನ್ಕಾತೆಶಾತ್? ಯೆರೂಸಲೇಮ್‌ನ ತುಮಾರಿ ಬೋಧನೆಥಿ ಪೈಲೈದಿದ, ಆ ಮರೈರನ್ವುಧೆ ಅದ್ವಿನ ಹಮೇಸ್ ಜಿಮ್ಮೇದಾರಿ ಕರಿ ಕರಾನ ತುಮೆ ಕೋಶಿಶ್ ಕರುಕರಸ್” ಕರಿ ಬೋಲ್ಯು.

29 ತದೆ ಪೇತ್ರ ಅಜು ಥೂತೆ ಅಪೊಸ್ತಲರ್ ಅಮ್ ಬೋಲ್ಯೊಕಿ, “ಹಮೆ ದೇವ್ವ ವಿಧೇಯ ಉಷು ಪಣ್ಣಿ ಅದ್ವಿನ ಕಾಹೆ.”

30 ತುಮೆ ಶಿಲ್‌ಬೆಪರ್ ರಂಗೈನ್ ಮಾರನ್ಕಾತೆ ಯೇಸುನ ಹಮಾರ ಗುರುಗುರಬ್‌ಲ್ವನ ದೇವ್ವೆ ಮರಣ್‌ಥು ಉತಾಡ್ಯೊ!

31 ದೇವ್ ಇನಾಸ್ ಇಸ್ರಾಯೇಲ್ ಅದ್ಮಿನ ಮನ್ ಫರಾವನಾಬಿ, ಪಾಪ್ಪ ಕ್ಷಮಾ ಕರಾನಖ್ವಾಜೆಬಿ, ದೇವ್ ಇನ ಪ್ರಭು ಕರೀಬಿ ರಕ್ಷಕ್ ಕರೀಬಿ ಇನಿ ಖಾವಿ ಬಾಙುಮ ಬೆಖ್ವಾಡ್ಯೊ.

32 ಆ ಕಾಮ್ ಹಮೇಸ್ ಸಾಕ್ಷಿ; ಹಮೇಸ್ ಕಾಹೆತೆ ವಿಧೇಯ ಹುವಾತೆ ಅಖ್ವಾಸ್ ಅದ್ಮಿನ ದೇವ್ ದೀರಾಖ್ಯೊತೆ ಪವಿತ್ರಾತ್ಮಸ್ ಸಾಕ್ಷಿ ಹುಯಿರೋಸ್” ಕರಿ ಬೋಲ್ಯೊ.

33 ಯೆಹೂದ್ಯಾರನ ಗಲ್‌ಡೊಖ್ವಾರು ಆ ವಾತ್ಸ ಖ್ವಮ್‌ಜಿನ್ ಘಣು ಚಂಡಾಳ್ ಲ್ಲಡಿನ್ ಅಪೊಸ್ತಲರನ್ನ ಮಾರಿನಾಕ್ಟು ಕರಿ ಥೂ.

34 ತದೆ ಅಖ್ವಾ ಅದ್ಮಿನಿ ಮರ್ಯಾದಿಧಿ ನ್ಯಾವಿಸಬೆನೊ ಘಲ್ಯೊ ಗಮಲಿಯೇಲಕರಿ ಏಕ್‌ಙ್ಗಣೊ ಫರಿಸಾಯರ್‌ವಾಳೊ ಘಲ್ಡಿ ಸಭೆಮ ಉರಿಭೀರಿನ್ ಆ ಅದ್ಮಿಖ್ವಾರನ ಜರಘಡಿ ಭಾರ್ ಮೋಕ್ಲೊಕರಿ ಹುಕುಮ್ ದಿದೊ.

35 ತದೆ ಇನೆ ಸಬೆವಾಳನ; ಇಸ್ರಾಯೇಲ್ ಅದ್ಮಿವೊ, ತುಮೆ ಶಾತ್ ಕರ್ನುಕರಿ ಲ್ಲಾಕಿ ಇನಿ ಬಾರೇಮ ಹೊಪಾರ್‌ಧಿ ರ್ವೊವೊ.

36 ಅನೇಧಿ ಅಗಾಡಿ ಥೈದಕರಿ ಏಕ್‌ಙ್ಗಣಾನೆ ಮೇ ಮೋಟೊ ಅದ್ಮಿಕರಿ ಬೋಲಿಲೀದೊ. ಇನಿ ಜೋಡ್ಡ್ ಖ್ವಮಾರ್ ಚಾರ್ ಖ್ವೊ ಅದ್ಮಿ ಮಳಿರ್ವ್ವೊ. ತ್ಯೋಬಿ ಯೋ ಮರ್ಯೆಗಯೊ. ಅಙ್ಗು ಇನ ನಂಬಿಹುಯು ಅಖ್ವಾಸ್ ಎಕ್ಲೋಸ್‌ಏಕ್ ಮಿಲ್ಯೆಗು.

37 ಇನಕೇಡ್‌ಥು ಯೂದಕರಿ ಏಕ್‌ಙ್ಗಣೊ ಗಲಿಲಾಯಮ ಥೊ, ತದೆ ಅದ್ಮಿನಿ ಗಣ್ತಿನ ಹಗಾಮ್ ಹುಯಿರಾಥ. ಯೂದಬಿ ಇನ ನಂಬಾವಳಾನು ಏಕ್ ಝೂಂಡ್ ಭಾಂದ್ಯೊ. ಯೋಬಿ ಮರ್ಯೆಗಯೊ. ಇನ ನಂಬಿಹುಯು ಖ್ವಾರೂಬಿ ಎಕ್ಲೋಸ್‌ಏಕ್ ಮಿಲ್ಯೆಗು.

38 ಇನಖ್ವಾಜೆ ಮೇ ಹಮ್ ತುಮೂನ ಶಾತ್ ಬೋಲಸ್‌ಕತೊ ಆ ಅದ್ಮಿವ್‌ಧಿ ದೂರ್ ರ್ವೊವೊ ಇವ್ವುನ ಮ್ವೇಲಿದೆವೊ; ಶನಕತೊ ಆ ಖ್ವಾಜ್ ನತರ್ ಕಾಮ್ ಅದ್ಮಿಧಿ ಹುಯಿರ್ವ್ವೊ ಉಷೇತೊ ಇನು ಯೋಸ್ ಪಡಿಙ್ಗಾಶೆ.

39 ಕತೋಬಿ ಯೋ ದೇವ್‌ಧಿ ಹುಯಿರ್ವ್ವಾನು ಉಷೇತೊ ಇನ ಹರಾವನ ತುಮಾರೇಧಿ ಕೋಉಷೇನಿ; ತುಮೆ ದೇವ್‌ವಿರುದ್

ಜಂಗ್‌ಭೀಡಾನಿಮತ್ ದೆಖೈಲಿಶು ಕರಿ ಬೋಲ್ಯೊ ಇವ್ಣೆ ಗಮಲಿಯೇಲನಿ ಆ ವಾತೆನ ಮಾನಿಲಿದು.

40 ಅಪೊಸ್ತಲರನ್ನ ಬುಲೈಮಂಗೈನ್, ಮಾರ್‌ಖಡೈನ್, ಯೇಸುನು ನಾಮ್‌ಲೀನ್ ವಾತೆ ನಕೊಬೋಲ್‌ಶು ಕರಿ ಹುಕುಮ್ ದೀನ್ ಇವ್ಣುನ ಮ್ಹೇಲಿದಿದು.

41 ಅಪೊಸ್ತಲರ್ ನ್ಯಾವ್‌ನಿ ಘಲ್ಡಾನಿ ಸಭೆಮಾಥು ನಿಕ್ಕಿನ್ ಚಲೇಗಯ. ಯೇಸುನ ನಾಮ್‌ಖ್ವಾಜೆ ಖ್ವರಮ್ ಕಡೈಲ್ಯಾವಾನ ಹಮೆಯೋಗ್ಯರ್ ಹುಯಾಕರಿ ಖುಷಿಕರ್ಯ್.

42 ಇವ್ಣೆ ಅದ್ವಿಮ ಬೋಧನೆ ಕರಾನು ಭೀರಾಖ್ಯಾಕೊಯ್ನಿ. ಯೇಸುಸ್ ಕ್ರಿಸ್ತಕರಿ ಅದ್ವಿಮ ಸುವಾರ್ತೆ ಶಿಕಾಡನ ಶುರುಕರ್ಯ್. ಇವ್ಣೆ ಹರ್‌ರೋಚ್ ದೇವ್ನ ಮಂದಿರ್‌ಮಾಬಿ, ಘರೂಮಾಬಿ ಬೋಧನೆ ಪೈಲಾಯು.

6

ಖ್ವಾತ್‌ಜಣ ಮದತ್ ಕರಾವಾಳ

1 ಯೋ ದನ್ತ ಯೇಸುನ ಶಿಷ್ಯರ್‌ನಿ ಗಣ್ತಿ ಜಾಖ್ವತ್ ಹೋತು ಆಯು, ಕತೋಬಿ ಯೊ ವಖ್ವತ್‌ಮ ಗ್ರೀಕ್ ಬೋಲವಾಳ ಯೆಹೂದಿ ಶಿಷ್ಯರ್‌ನ್ ಇಬ್ರಿಯ ಬೋಲವಾಳ ಯೆಹೂದಿನಿ ಬಾರೇಮ ಹರೇಕ್ ರೋಚ್ ಶಿಷ್ಯರ್‌ನ್ ದೇವ್ನುಧೂತೆ ತಿನಮಾಥು ಹಮಾರಿ ಮುಂಡಚ್ಚಿಯೆನ ಮಳ್‌ಣುತೆ ಮದತ್ ಬರೋಬರ್‌ಧಿ ಮಳುಕರಕೊಯ್ನಿ ಕರಿ ಭಣ್‌ಕ್ಯು.

2 ತದೆ ಭಾರಜಣ ಅಪೊಸ್ತಲರ್ ಖ್ವಾರು ಅಖ್ವಾಸ್ ಶಿಷ್ಯರ್‌ನ ಟೋಳ್ವ ಸಭೆ ಬುಲೈನ್ ಇವ್ಣುನ, “ದೇವ್ನಿ ವಚನ್ ಬೋಧನೆ ಕರಾನು ಅಪ್ಪು ಕಾಮ್. ಕತೋಬಿ ಯೊ ಕಾಮ್ ಭೀರಿಜಾವಾನು ಬರೋಬರ್ ಕೊಯ್ನಿ; ಅಪ್ಪೆ ಅದ್ವಿಖ್ವಾರನ ಖಾವಪೀಯಾನಿ ಮದತ್‌ಥೀಬಿ ದೇವ್ನಿ ವಚನ್ನು ಬೋಧನೆನ ಅಗಾಡಿ ಭಡಾವನು ಅಲ್ಪು.

3 ಇನಖ್ವಾಜೆ ಭೈಯೇವೊ ತುಮಾರಮ ಸಾಕ್ಷಿಧಿ ಜಿವವಾಳ ಖ್ವಾತ್ ಜಣಾನ ಚೂಣಿಲೇವೊ. ಇವ್ಣೆ ಅದ್ವಿಮ ಪವಿತ್ರಾತ್ಮಧಿ ಭರೈರ್ದವಾಳ

ಹುಯಿರ್ದೇಣು ಅಜ್ಜು ಅಕ್ಕಿ ಹುಯಿರ್ದೇಣು, ಇವುನ ಹಮೆ ಆ ಕಾಮ್ ದಿಯೇಸ್.

4 ತದೆ ಹಮಾರಿ ಖಾರೀಸ್ ವೇಳ್ ಪ್ರಾರ್ಥನೆ ಕರಾನಬಿ ವಚನ್ನ ಬೋಧನೆ ಕರಾನು ಕಾಮ್ ದಿಶು” ಕರಿ ಬೋಲ್ಯು.

5 ಆ ವಾತೆ ಅಖ್ಬಾಸ್ ಝೂಂಡ್‌ವಾಳಾನೆ ಅಛುಕರಿ ಸೋಚ್ಚು, ಇವ್ಣೆ ಪವಿತ್ರಾತ್ಮಧಿ ಭರಾಯೊಹುಯೊ. ಘಣು ವಿಶ್ವಾಸ್‌ವಾಳೊ ಹುಯಿರ್ದೇಣತೆ. ಸ್ತೆಫನನಾಬಿ, ಫಿಲಿಪ್, ಪ್ರೊಖೋರ, ನಿಕನೋರ, ತಿಮೋನ, ಪರ್ಮೇನ, ಯೆಹೂದ್ಯರ್‌ನಿ ಜಾತ್‌ಮ ಮಳಿರ್ದೇಣತೆ, ಅಂತಿಯೋಕ್ಯ ಗಾಮ್‌ವಾಳೊ ನಿಕೊಲಾಯ ಕರಿ ಅವುನ ಚೂಣಿನ್ ಅಪೊಸ್ತಲರನ್ನ ಖಾಮ್ಣೆ ಭಿರಾಮ್.

6 ಅಪೊಸ್ತಲರನ್ನ ಇವ್ಣಾಪರ್ ಹಾತ್ ಮ್ಹೇಲಿನ್ ಪ್ರಾರ್ಥನೆ ಕರೀನ್ ಯೊ ಕಾಮ್‌ಖಾಜೆ ಇವುನ ಖಣೇದ್ ಕರಲ್ಯು.

7 ದೇವ್ನಿ ವಚನ್ ಘಣು, ಘಣು, ಅದ್ಮಿಖಾರಾನ ಪೋಚ್ಚು, ಯೆರೂಸಲೇಮ್ ಶಿಷ್ಯರ್‌ನಿ ಗಣಿ ಘಣು ಭಡ್ತುಗಯು. ಯಾಜಕವ್‌ಮಾಬಿ ಘಣು ಅದ್ಮಿಯೇಸುನ ವಿಶ್ವಾಸ್‌ಮ ಮಳ್ತುಗಯು.

ಸ್ತೆಫನನ ಕೋಂಡ್ಕತೆ

8 ಸ್ತೆಫನ ದೇವ್ನಿ ವಾರ್‌ಖಾಧೀಬಿ ಶಕಡ್ಲಿಬಿ ಭರೈರ್ದೇಣಾಳೊಹುಯಿನ್ ಅದ್ಮಿಖಾರಾಮ ಘಣು ಅದ್ಭುತ್‌ಕಾಮ್‌ಬಿ, ಖಣೇದ್‌ನು ಕಾಮ್‌ಬಿ ಕರ್ತೊಡೊ.

9 ಕತೋಬಿ ‘ಛುಟ್ಕಾರ್ ಹುಯಿರಾಸ್’ ಕರಿ ಸಬೇನು ಸಬೆವಾಳು ಕುರೇನ್ಯವಾಳು, ಅಜ್ಜು ಅಲೆಕ್ಸಾಂಡ್ರಿಯವಾಳು, ಯೆಹೂದ್ಯರ್‌ಖಾರು ಇವ್ಣೆ ಅಜ್ಜು ಥೋಡು ಕಿಲಿಕ್ಯ ಅಜ್ಜು ಏಷ್ಯಾ ತಬರ್‌ಖಾನು ಯೆಹೂದ್ಯರ್ ಉರೀನ್ ಸ್ತೆಫನನಿ ಜೋಡ್ಡ ಅಬ್ಬಾಜಬ್ಬಿ ಬೋಲಲಗ್ನು.

10 ಕತೋಬಿ ಇನಿ ವಾತ್ತ್ ದೆಖಾಯುತೆ ಗ್ಯಾನ್ನಾಬಿ ಪವಿತ್ರಾತ್ಮನಿ ಶಕತ್‌ನಾಬಿ ಅರಾಬರು ಬೋಲಾನ ಇವುನ ಕೋಹುಯುನಿ.

11 “ಸ್ತೆಫನನೆ, ಮೋಶೆನಾಬಿ ದೇವ್‌ನಾಬಿ ಖರಾಬ್‌ವಾತೆ ಬೋಲಸ್ ಯೋ ಅಖ್ವಿ ಹಮೇಸ್ ಖ್ವಮ್‌ಜಿರಾಖ್ಯಸ್” ಕರಿ ಅಖ್ವಾಸ್ನ ಬೋಲ್ವುಕರಿ, ಥೋಡಜಣಾನ ಇವ್ಣೆ ಪೈಶ ದೀನ್ ಮನ್ ಫರಾಯು.

12 ಅದ್ಮಿವ್‌ನಾಬಿ, ಯೆಹೂದ್ಯರ್‌ನ ಗಲ್‌ಥ ಖ್ವಾರಮಾಬಿ, ಅಜ್ಜು ಧರ್ಮಾನು ಬೋಧನೆ ಕರವಾಳನಾಬಿ ಕಲಾವ್ಣಿಕರಾಯು. ಇವ್ಣೆಖ್ವಾರು ಘಣ ಇರಾದೇಠಿ ಅಯಿನ್ ಸ್ತೆಫನನ ಧರಿಲೀನ್ ಯೆಹೂದ್ಯರ್‌ನ ನ್ಯಾವ್‌ನಿ ಸಭೆಮ ಲೀನ್‌ಗಯು.

13 ತದೆ ಇವ್ಣೆ ಥೋಡ ಸಾಕ್ಷಿ ಬೋಲವಾಳಾನ ಬುಲೈಲಾಯಿನ್ “ಆ ಅದ್ಮಿ ಆ ಪವಿತ್ರ ಝಗೋನ ವಿರುದ್ಧಹುಯಿನ್, ಮೋಶೆನಿ ಧರ್ಮಶಾಸ್ತ್ರನ ವಿರೋದ್ ಹುಯಿನ್ ಕದೇಬಿ ಝೂಟಿ ವಾತೆ ಬೋಲಸ್.

14 ನಜರೇತ್‌ವಾಳೊ ಯೇಸು ಆ ದೇವ್‌ಮಂದಿರ್‌ನ ರಡ್‌ಕೈನ್ ಮೋಶೆನಿ ಪದತ್ತಿನ ಅಖ್ವಾನ ಬದ್ಲವ್‌ಕರಸ್, ಕರಿ ಆ ಬೋಲಸ್ತೆ ಹಮೆ ಖ್ವಮ್‌ಜ್” ಕರಿ ಬೋಲ್ವು.

15 ನ್ಯಾವ್‌ನ ಸಭೆಮ ಬೇರುಹುಯು ಖ್ವಾರೂಸ್ ಸ್ತೆಫನನ ಮ್ಹೋಡಾನ ರರ್‌ಕೈನ್ ದೇಖಾತೊ ಇನು ಮ್ಹೋಡು ದೇವ್ನ ದೂತನ ಮ್ಹೋಡಾನಿತರ ದೆಖವ್‌ಕರ್ತುಫು.

7

ಸ್ತೆಫನನಿ ಬೋಧನೆ

1 ತದೆ ಮಹಾಯಾಜಕನೆ ಸ್ತೆಫನನ, “ಆ ಖಬರ್ ಖ್ವಾಚುಕಿ ಶು? ಕರಿ ಬೋಲ್ಯೊ ತದೆ ಇನೆ ಅಮ್ ಜವಾಬ್ ದಿದೊ, ಮಾರ ಬಾ ಭೈಯೇವೊ, ಮಾರಿ ವಾತೇನ ಖ್ವಮ್‌ಜೊ,

2 ಅಪ್ಣೊ ಗುರುಗುರಬ್‌ಲ್ಯೊ ಹುಯಿರುತೆ ಅಬ್ರಹಾಮ್‌ನ ಅಪ್ಣೊ ಮಹಿಮೆನೊ ದೇವ್ ದೇಖಾಯೊ. ಅಬ್ರಹಾಮ್ ಖಾರಾನ್ ಗಮ್ಮ ಜಿವ್ಣು ಕರಾನ ಪಹಿಲೆ ಮೆಸಪಟೋಮಿಯಮ ಥೊ.

3 ದೇವ್ಣೆ ಇನ ತೂ ‘ತಾರ ದೇಖ್‌ನಾಬಿ ಮಾಯಮಾತ್ರನ ಮ್ಹೇಲಿನ್

ಮೇ ವತಾಳುತೆ ದೇಖ್ವಾನ್ ನಿಕ್‌ಳಿ ಜಾ' ಕರಿ ಬೋಲ್ಯೊ.

4 ಇನಖ್ವಾಜೆ ಅಬ್ರಹಾಮ್‌ನೆ ಕಲ್ದಿಯ ದೇಖ್ವಾನ್ ಮ್ಹೇಲಿನ್ ಖಾರಾನ್‌ಮ ಜಿವ್ಣುಕರಾನ್ ಗಯೊ; ಅಬ್ರಹಾಮ್‌ನೊ ಬಾ ಮರಾನ್ ಬಾದ್ಮ ದೇವ್ಣೆ ಇನ್ ಹಮ್ಕೆ ತುಮೆ ಜಿವ್ಣುಕರುಕರಾಸ್ತೆ ಆ ದೇಖ್ವಾನ್‌ಸ್ ಬೋಲಿಮೋಕ್‌ಲ್ಯೊ.

5 ಇಮ್ಕಸ್ ಆ ದೇಖ್ವಾಂಮ ಇನ್ ಹತೇಳಿಯೆತ್ರೆ ಝಗೋಬಿ ಶೊಂತ್‌ಕರಿ ದಿದೊಕೊಂತೆ; ಇನ್ ಲಡ್ಕಾಕೊಂತೆ ತದೇಸ್ ತೂ ಛಾತೆ ದೇಖ್ವಾನ್ ತುನಾಬಿ ತಾರಿ ಆವ್‌ಶೇತೆ ಖ್ವಾಂವ್ಣೆನಿ ಪಿಳ್ಳಿನ್ ಹಾತ್ಮ ದೇವ್‌ಕರೂಸ್‌ಕರಿ ವಾಗ್ಡಾನ್ ಕರಲ್ಯೊ.

6 ಎತ್ರೇಸ್ ಕಾಹೆತೆ ದೇವ್ಣೆ ಇನ್ ಜೋಡ್ಡ ಬೋಲ್ಯೊತೆ ಶಾತ್‌ಕತೊ ತಾರು ಪಿಳ್ಳಿವಾಳು ಬಿಜೇಕ್ ದೇಖ್ವಾಂಮ ಜಿವ್ಣುಕರ್ಶೆ, ಹಿಜ್ವಾನ್ ಅದ್ವಿಖ್ವಾರು ಇವ್ಣುನ್ ಗುಲಾಮ್‌ಕರೀಲಿನ್ ಚಾರ್‌ಖ್ಲೊ ವರಖ್ಲಗು ಖ್ವಿತಾವ್‌ಶೆ.

7 ಕತೋಬಿ 'ತಾರು ಖಾನ್‌ದಾನ್‌ವಾಳು ಗುಲಾಮ್‌ಹುಯಿನ್ ಚಾಕ್ರಿಕರುಕರಾತೆ ಅಲ್ಪಾವ್ ಅದ್ವಿನ್ ಮೇಸ್ ತೀರ್ಪ್ ದೀಶ್‌ಕರಿ ಬೋಲ್ಯೊ. ಅತ್ರೇಸ್ ಕಾಹೆತೆ ದೇವ್ಣೆ ಇನ್‌ಪಾರ್ ಇವ್ಣೆ ಯೊ ದೇಖ್ವಾಂಮಾಡು ಆ ಝಗೋಮ ಐನ್ ಮನ್ ಆರಾದನೆ ಕರ್ಶೆಕರಿ ಬೋಲ್ಯೊ.

8 ಇನ್‌ವಾರ್ ದೇವ್ಣೆ ಅಬ್ರಹಾಮ್‌ಧಿ ಒಪ್ಪಂದ ಕರಿಲಿದೊ. ಯೊ ಖ್ವಣೇದ್ವಿಖ್ವಾಜೆ ಖ್ವತ್ಸಕರಾಯೊ. ಇನೇಥಿಸ್ ಅಬ್ರಹಾಮ್‌ನ್ ಏಕ್ ಛಿಯ್ಯೊ ಹುಯೊ. ಯೊ ಛಿಯ್ಯಾನ್ ಆಟ್ನ ದನ್ಮ ಖ್ವತ್ಸ ಕರಲ್ಯೊ. ಇನ್ ನಾಮ್ ಇಸಾಕ್. ಇಮ್ಕಸ್ ಇಸಾಕಬಿ ಇನ್ ಛಿಯ್ಯೊಯಾಕೋಬ್‌ನ್ ಖ್ವತ್ಸ ಕರಲ್ಯೊ. ಅಜು ಯಾಕೋಬ್‌ನೆ ಇನ್ ಖ್ವಾರಾಸ್ ಪರ್ಖ್ವಾ ಲಡ್ಕಾವ್‌ನ್ ಖ್ವತ್ಸ ಕರಲ್ಯೊ. ಆ ಪರ್ಖ್ವಾ ಲಡ್ಕಾಸ್ ಖ್ವಾಂವ್ಣೆ ಭಾರಜ್ಞ ಗುರುಗುರುಬ್‌ಲ್ಯ ಹುಯು.

9 ಯಾಕೋಬನ್ ಛಿಯ್ಯಾವ್‌ನೇಸ್ ಯೋಸೇಫನ್ ಉಪ್ಪರ್ ಬಳಾಪೊ ಕರಲ್ಯೊ. ಇವ್ಣೆಖ್ವಾರು ಯೋಸೇಫನ್ ಧರೀನ್ ಈಜಿಪ್ಟ್‌ನ್ ಅದ್ವಿನ್

ಗುಲಾಮ್ ಬಣ್ಣೆನ್ ವೇಚಿನಾಖಿದಿದು. ಕತೋಬಿ ದೇವ್ ಯೋಸೇಫನ ಜೋಡ್ತಾನ್ ಥೊ.

10 ಅಜ್ಜು ಇನ ಆಯೂತೆ ಮುಶ್ತಿಲ್‌ಥಿ ಲೋಡ್ತೆನ್. ಈಜಿಪ್ಟ್ ದೇಖ್ವೊನೊ ರಾಜನ ಖ್ವಾಪ್ಪೊ ಅಕ್ಕಲ್‌ವಾಳೋಬಿ ದಯಾಕರವಾಳೋಬಿ ಹುವಾನಿತರ ಕರ್ರೊಫರೋಹನೆ ಯೋಸೇಫನ ಈಜಿಪ್ಟ್ ದೇಖ್ವೊನಪರ್‌ಬಿ ಮಹೇಲ್‌ನಪರ್‌ಬಿ ಅಧಿಕಾರಿಕರಿನ್ ನೇಮ್‌ಶಾಯೊ.

11 ತದೆ ಈಜಿಪ್ಟ್ ಅಜ್ಜು ಕಾನಾನ್ ದೇಖ್ವೊಮ ಕಾಳ್ಳುಕಾಳ್ ಪಡೀನ್ ಜಾಖ್ವತ್ ಅದ್ವಿನ ಖ್ವಿತ್ತಾಪ್ಪಿ ಹುಯು. ಖಾಣುಕೊಂತೆ ಅಪ್ಪ ಗುರುಖ್ವಾರಾನ ಘಣು ಮುಶ್ತಿಲ್‌ಹುಯು.

12 ಕತೋಬಿ ಈಜಿಪ್ಟ್‌ಮ ಅನಾಜ್ ಛಾ ಕರಿ ಬೋಲಾನು ಖಬರ್‌ನ ಖ್ವಿಮ್‌ಜಿನ್ ಯಾಕೋಬನೆ ಪಹಿಲಿಬಾರ್ ಇನ ಛಿಯ್ಯಾವ್‌ನ ಹಿಜ್ಜಾ ಮೋಕ್‌ಲ್ಯೊ.

13 ಅಜ್ಜು ಇವ್ಣೆ ಬೇನಿವಖ್ವತ್ ಮಳಾನ ಗಯ. ತದೆ ಯೋಸೇಫನೆ ಇನಿ ಖ್ವಿಣೇದ್ ಮಳಾನಿತರ ಕರ್ರೊ. ಅಜ್ಜು ಯೋಸೇಫನ ಘರ್‌ವಾಳಾನಿ ಬಾರೇಮ ಫರೋಹನ ಮಾಲುಮ್ ಪಡ್ಚು.

14 ಇನಪಾರ್ ಯೋಸೇಫ ಇನೊ ಬಾ ಹುಯಿರೋತೆ ಯಾಕೋಬ್‌ನಾಬಿ ಅಜ್ಜು ಪಾಚ್‌ಲುಪ್ಪರ್ ಖ್ವಿಡ್‌ತೀನಿಖ್ವ್ ಛಣು ಮಾಯಮಾತ್ರ ಖ್ವಾರಾನ ಈಜಿಪ್ಟ್ ದೇಖ್ವೊಮ ಬುಲೈಲಿದೊ.

15 ತದೆ ಯಾಕೋಬಬಿನ್ ಇನ ಛಿಯ್ಯಾ ಇವ್ಣೆ ಮರಾಲಗೊಬಿ ಈಜಿಪ್ಟ್‌ಮಾಸ್ ಥು.

16 ಇನಪಾರ್ ಇನ ಶರೀರ್‌ನ ಶೇಕೆಮ್ಮ ಲೀನ್ ಜೈನ್, ಹಿಜ್ಜಾ ಅಬ್ರಹಾಮ್‌ನೆ ಹಾಮೋರ್ರ್ ಛಿಯ್ಯಾಕನ ರೂಪಾನ ರಪ್ಯಾದೀನ್ ಮೋಲ್ ಲಿದೊಥೋತೆ ಝಗೋಮ ಮಖ್ವಾಣ್ಕು ಕರ್ರು.

17 ಕತೋಬಿ ದೇವ್ಣೆ ಅಬ್ರಹಾಮ್‌ಥಿ ವಾಗ್ದಾನ ಕರ್ರೊತೆ ವೇಳ್ ಆವಾನಿ ವಖ್ವತ್ ಈಜಿಪ್ಟ್‌ಮ ಅಪ್ಪು ಯೆಹೂದ್ಯರ್ ಭಡೀನ್ ಜಾಖ್ವತ್ ಹುಯು.

18 ತದೆ ಈಜಿಪ್ಟ್‌ಮ ಬಿಜೇಕ್ ರಾಜ ರಾಜ್‌ಭಾರ್ ಕರಾನ ಆಯೊ. ಇನ ಯೋಸೇಫನಿ ಬಾರೇಮ ಶಾತ್ರಿ ಮಾಲುಮ್‌ಕೋಡುನಿ.

19 ಆ ರಾಜನೆ ಅಪ್ಪ ಗುರುಖಾರಪರ್ ಬಳಾಪೊ ಕರೀನ್ ಇವ್ವ ಪೈದಾಖ್ವಿನ ಲಡ್ಕಾವನ್ ಮರ್‌ನಾಕ್ಟಕರಿ ಭಾರ್ ಕಡೈನಾಖ್ವೊ ಅಜ್ಜು ಅಪ್ಪ ಗುರುಖಾರಾನ ಘಣು ಖ್ವಿತಾಯು.

20 ಆ ಹಗಾಮ್‌ಸ್ ಮೋಶೆ ಪೈದಹುಯೊ. ಯೊ ಘಣು ಶನ್‌ಗಾರ್‌ನ್ನೊ ಥೊ ಅಜ್ಜು ಯೊ ಇನ ಬಾನ ಘರ್‌ಮ ತೀನ್ ಮಹಿನಲಗು ಪಳ್ಳೊ.

21 ತದೆ ಇವ್ವೆ ಮೋಶೆನ ಭಾರ್ ಕಾಡ್‌ನಾಖಮ ಫರೋಹನಿ ಛೋರಿ ಇನ ಪಾಡಿಲಿಬೈನ್ ಇನೊ ಶೊಂತ್ ಥಿಯ್ಯಾನಿ ಮತ್ ಪಾಳಿ.

22 ಈಜಿಪ್ಟ್‌ವಾಳು ಮೋಶೆನ ಇವ್ವುನ ಮಾಲುಮ್‌ಥೂತೆ ಹರೇಕ್ ಪಠಂತ್‌ನ ಶಿಕಾಡ್ವು ಯೋ ಅಕ್ಕಲ್‌ಮ ವಾತೆ ಬೋಲಾಮ ಅಜ್ಜು ಕಾಮ್ ಕರಾಮಾಬಿ ಭಾಖ್ವತ್ ಅಕ್ಕಿಹುಯೊ.

23 ಯೊ ಚಾಳಿಖ್ವ್ ವರಖ್ವನೊ ಹುಯೊ ತದೆ ಇನ ಇಸ್ರಾಯೇಲ್ ಬೈಯೇನ ಮಳಾನು ಅಱ್ವುಧು ಕರಿ ದಿಲ್‌ಮಹುಯು.

24 ತದೆ ಈಜಿಪ್ಟ್‌ವಾಳು ಏಕ್‌ಭಣು ಇಸ್ರಾಯೇಲ್‌ವಾಳ ಏಕ್ ಭಣಾನ ಗಲತ್‌ಥಿ ಘಣು ಖ್ವಿತಾಪ್ಪಿ ದೇವ್‌ಕರ್ತುಡ್‌ತೆ ಇನ ಮೋಶೆನೆ ಮಾರಿನ್ ಬದಲ್ ಕಾಡಿದೊ.

25 ಅಮ್ಮಸ್ ದೇವ್ವೆ ಇನ ಹಾತೇಥಿ ಬಚಾವ್‌ಶೆ ಕರಿ ಇನ ಬೈಯೇನ ಮಾಲುಮ್‌ಪಡ್‌ಶೆ ಕರಿ ಲ್ಹಾಯೋಥೊ ಕತೋಬಿ ಇವ್ವೆ ಮಾಲುಮ್ ಕೋ ಕರ್ಯ್‌ಥಾನಿ.

26 ಇನವ್ವಾಣೆ ಮೋಶೆನೆ ಯೆಹೂದ್ಯರ್‌ನ ಬೇಜ್ಞಣ ಮಾರಮಾರಿ ಖಾವಾನು ದೇಖ್ವೊ ಇವ್ವುನ ಖ್ವಿಮ್‌ಜಾಡಾನಟೇಕೆ 'ದೋಸ್ತಿವೊ ಬೈಯೇ ಬೈಯೇಸ್ ಹುಯಿರಾಸ್! ತುಮೆ ಏಕ್‌ಥಿಏಕ್ ರಗಾವಾನು ಶನಕರೋಸ್? ಕರಿ ಇವ್ವುನ ಸಮಾಧಾನ್ ಕರಾನ ಆಯೊ.

27 ಬಿಜೇಕ್ ಜ್ಞಣೊ ಗಲತ್ ಕರಾವಾಳೊ ಏಕ್‌ಜ್ಞಣೊ ಮೋಶೆನ ಪೀರೆ ಧಕೇಲ್‌ತೊ ಹುಯಿನ್, ತುನ ಹಮಾರಪರ್ ಆದಿಕಾರಿ ಕರೀನ್‌ಬಿ, ನ್ಯಾವೊ ಕರೀನ್‌ಬಿ ಮ್ಹೇಲ್ಯುತೆ ಕೋಣ್?

28 ಕಾಲೆ ಯೊ ಈಜಿಪ್ಟ್‌ವಾಳನ ಮಾರ್ಯ್‌ತೆ ತಿಮ್ಮಸ್ ಮನಾಬಿ ಮಾರಿನಾಕ್ಟ ಕರಿ ಛಾಕಿಶು? ಕರಿ ಬೋಲ್ಯೊ.

29 ಅನ ಖ್ವಮ್‌ಜ್ಯೊತೆ ಮೋಶೆ ಡರಿನ್ ಈಜಿಪ್ಪನ್ ಮ್ಹೇಲಿನ್ ಮಿದ್ಯಾನ್ ದೇಖ್ವಮ ಜೈನ್ ಖ್ವಣೇದ್‌ಕೊಂತೆ ಅದ್ವಿನಿತರ ಜಿವ್ವು ಕರಂತ್ಯೊ ಹಿಜ್ಜಾಯೊ ಬೇ ಪರ್ಖ್ವಾ ಲಡ್ಕಾನೊ ಬಾಹುಯೊ.

30 ಚಾಳಿಖ್ವ ವರಖ್ವನೊ ಹುಯೊತದೆ ಸೀನಾಯಿ ಪಹಾಡ್ವ ಖನ್ನೆಥೂತೆ ಜಂಗಳ್‌ನ ಏಕ್ ಕಾಟಾನಿ ಡಾಗ್‌ಮ ಆಗ್‌ನಿ ಝಲ್‌ಪಟ್ ಲಾಗುಕರ್ತುಡುತೆ ಇನಾಮ ದೇವ್‌ನೊ ದೂತ ಇನ ದೆಖಾಯೊ.

31 ಮೋಶೆನೆ ಆಶ್ಚರ್ಯಧಿ ದೇಖಾನ ಖನ್ನೆ ಗಯೊ. ತದೆ ಇನೆ ಪ್ರಭುನೊ ಏಕ್ ಅವಾಙ್ ಖ್ವಮ್‌ಜ್ಯೊ.

32 ದೇವ್ವೆಯಿನ, ಮೇಸ್ ತಾರೊ ಗುರುಗುರಬ್‌ಲ್ಯ ಹುಯಿರಾತೆ ಅಬ್ರಹಾಮ್ ಇಸಾಕ್ ಯಾಕೋಬನೊ ದೇವ್ ಕರಿ ಬೋಲ್ಯೊ ಮೋಶೆ ಡರ್‌ಧಿ ಕಾಪಲಗ್ಲೊ ಯೊ ಟಾಪ್‌ಣ್ಯನಾಬಿ ದೇಖಾನ ಭಾಲಿ ಕೋಥೂನಿ.

33 ಪ್ರಭುನೆ ಇನ ತಾರು ಖೋಖ್ವಡು ಕಾಡಿನಾಖಿದೆ ಹಮ್ಮೆ ತು ಭಿಯೋತೆ ಝಗೊ ಪರಿಶುದ್ ಹುಯಿರುಸ್.

34 ಅದ್ವಿಖ್ವಾರು ಈಜಿಪ್ಪ್ ದೇಖ್ವಮ ಜಾಖ್ವತ್ ಖರಾಬ್ ಹಾಲತ್ ರ್ವವಾನು ಮೆ ದೇಖಿರಾಖ್ಯೊಸ್. ಮಾರ ಅದ್ವಿಖ್ವಾರಾನು ಅಂದ್ರೋಖ್ವನ್ ಮೆ ಖ್ವಮ್‌ಜ್ಯೊ ಮೆ ಇವ್ವುನ ಬಚ್ಚಾಡನಖ್ವಾಜಿ ಉತ್ರಿರಂತ್ಯೊಸ್. ಹಮ್ಮೇಸ್ ಮೆ ತುನ ಈಜಿಪ್ಪಮ ಮೋಕ್ಲಕರುಸ್ ಕರಿ ಬೋಲ್ಯೊ.

35 ಇವ್ವೆ ಖಿವ ಮೋಶೆನ ನಕೊಕರಿ ಝಿಟ್ಕಾರಿನ್, 'ತುನ ಅದಿಕಾರಿ ಕರೀನ್‌ಬಿ, ನ್ಯಾವ್ಣೊ ಕರೀನ್‌ಬಿ ಮ್ಹೇಲ್ಯುತೆ ಕೋಣ್?' ಕರಿ ಕಿನೆ ಬೋಲ್ಯುಕಿ, ಇನಾಸ್ ದೇವ್ ಡಾಗ್‌ಮ ದೆಖ್ವಿನ್ ದೂತಾಧಿ ಅದಿಕಾರಿಬಿ, ಛುಟ್ಕಾರ್ ಕರಾವಾಳನಬಿ ನೇಮಕ್ ಕರಂತ್ಯೊ.

36 ಇನಖ್ವಾಜಿ ಮೋಶೆನೆ ಅದ್ವಿಖ್ವಾರನ ಈಜಿಪ್ಪ್ ದೇಖ್ವಮಾಥು ಬುಲೈಲಿ ಆಯೊ. ಯೊ ಖ್ವಣೇದ್‌ನು ಕಾಮ್‌ಖಾರು, ಅದ್ವುತ್‌ಕಾಮ್‌ಖಾರ್‌ಧಿ ಈಜಿಪ್ಪಮಾಬಿ ಅಜು ಲಾಲ್‌ದರ್‌ವ್ಯಾವ್‌ಮಾಬಿ ಚಾಳಿಖ್ವ ವರಖ್ವ ಜಂಗಳ್‌ಮ ಚಲೈಲಿನ್ ಆಯೊ.

37 ಯೋ ಮೋಶೆನೇಸ್, ದೇವ್ವೆ ಮನ ಉತಾಡಾನಿ ತರಸ್ ತುಮಾರ ಅದ್ಮಿಮಾಸ್ ಏಕ್ ಪ್ರವಾದಿನ ತುಮಾರಮಸ್ ಉತಾಡಾಶೆ, ಕರಿ ಇಸ್ರಾಯೇಲನ್ ಅದ್ಮಿಖ್ವಾರಾನ ಬೋಲ್ಯೊ.

38 ಇನೇಸ್ ಸೀನಾಯಿ ಪಹಾಡ್‌ಮ ಇನಿಜೋಡ್ ವಾತೆಬೋಲ್ಯೊತೆ ದೇವ್ವ ದೂತನಾಬಿ ಅಪ್ಪ ಗುರುಖ್ವಾರಾನಾಬಿ ಜಂಗ್‌ಮ ಥೂತೆ ಸಬೇಮರ್ಟ್ವಿನ್ ಜಾನ್ನಿ ವಚನ್ನ ಲೀನ್ ಅಪ್ಪುನ ದೈವಾಳೊ ಹುಯಿರೋಸ್.

39 ಕತೋಬಿ ಅಪ್ಪೊ ಗುರುಖ್ವಾರು ಇನಿ ವಾತೆನ ಖ್ವಮ್‌ಜಾನ ದಿಲ್‌ಕೊಂತೆ ಇನ ಮ್ಹೇಲಿನ್, ಈಜಿಪ್ಟ್‌ಮ ಪಾಟ್ಲು ಚಲೆಜ್ಜಾವ್ಣು ಕರಿ ದೇಖ್ಣು.

40 ಇವ್ಣೆಖ್ವಾರು ಆರೋನ್ನು 'ಮೋಶೆನೆ ಈಜಿಪ್ಟ್ ದೇಖ್ಣು ಥು ಬುಲೈಲಾಯೊ. ಕತೋಬಿ ಇನ ಶಾತ್ ಹುಯಿಗಯ್ ಕರಿ ಹಮೂನ ಮಾಲುಮ್ ಕೊಹುಯುನಿ. ಇನಖ್ವಾಜಿ ಹಮೆ ಖ್ವಾಮ್ಜೆ ಜಾವಾನಟೇಕೆ ಅಜ್ಜು ಹಮುನ ಚಲಾವನಟೇಕೆ ದೇವ್‌ನು ಮೂರತ್ ಕರಿನ್ ದೇ ಕರಿ ಬೋಲ್ಯು'.

41 ತದೆ ಯೊ ದನ್ಮ ಡಾಂಡನಿಫೊಣಿ ಏಕ್ ಫುತ್‌ಳು ಬಣ್ಣೆನ್ ಇನಖ್ವಾಮ್ಜೆ ಬಲಿದಿದು. ಅಜ್ಜು ಮಿರ್ಚ್‌ವಾನ್ಚಿ ಖಡಾಯು ಯೋ ಅದ್ಮಿಖ್ವಾರು ಮಗನ್ ಹುಯು.

42 ಇನಖ್ವಾಜಿ ದೇವ್ವೆ ಇವ್ಣೆಥಿ ಮ್ಹೊಡು ಫರೈನ್, ಆಬ್‌ನ ಶುಕ್ಕರ್‌ನ ಪೂಜ ಕರಿಲ್ಯವಾದೆಕರಿ ಇವ್ಣುನ ಮ್ಹೇಲಿದಿದೊ. ಅನಿಬಾರೇಮ ಪ್ರವಾದಿನ ಪುಸ್ತಕ್‌ಮ ಅಮ್ ಲೀಖೈರುಸ್; ದೇವ್ ಅಮ್ ಬೋಲಾಸ್, ಇಸ್ರಾಯೇಲನ್ ಖಾನ್‌ದಾನ್‌ವಾಳವೊ! ತುಮೆ ಚಾಳಿಖ್ವಾ ವರಖ್ವಾಲ್‌ಗು ಜಂಗ್‌ಮರ್ಟ್ವಾನಿ ವಖ್ವಾತೆ ತುಮೆ ಮನ ಬಲಿ ಚಡಾಯಾಥಾಕಿ ಶು?

43 ತುಮೆ ತುಮಾರ ಜೋಡ್ತ್ *ಮೋಲೋಖ ದೇವ್‌ನು ಡೇರಾನಾಬಿ ಅಜ್ಜು ರೆಫಾನ್ ದೇವ್ನಿನೊ ಶುಕ್ಕರ್‌ನ ರೂಪ್‌ನು ಫುತ್‌ಳಿನ ಡೊಯಿಲೀನ್ ಆರಾದನೆಕರಾನ ವಳೇಜಾತಥಾತೆ ಇನಖ್ವಾಜಿ ಮೆ ತುಮೂನ ಬಾಬಿಲೋನ್ನು ಖ್ವಾಕೊಟ್‌ಮ ಮೋಕ್ಲಿದಿಶ್‌ಕರಿ

* 7:43 7:43 ಕಾನಾನ್ ದೇಖ್ಣು ದೇವ್

ಲೀಖಿರಾಖ್ವುಸ್.

44 ದೇವ್ ರೆಟ್ಟೊಥೋತೆ ಡೇರೊ ಜಂಗಳ್ ಅಪ್ಪ ಗುರುಖ್ವಾರಾಕನ ಥು. ಮೋಶಿನಿ ಜೋಡ್ತ ವಾತೆ ಬೋಲ್ಯೊತೆ ದೇವ್, ತುನೆ ದೆಖ್ಲೊತೆ ಶಕಲ್ನಿ ಪರಕ್ವಾಸ್ ಇನ ಕರ್ನುಕರಿ ಹುಕುಮ್ ದಿದೊ.

45 ಅಪ್ಪ ಬಾಬ್‌ದಾದ್‌ವೆ ಇನ ಗುರುಗುರಬ್‌ಲ್ಯಾ ಥು ಲಿದು. ಇವ್ಣೆ ಯೆಹೋಶುವನ ಪಾಲನ್ ಕರ್ತು ಅಯಿನ್ ದೇವ್ನ ಧಕೇಲಿ ದಿದಾಹುಯ ಅಲಕ್ ಅದ್ನಿನ ದೇಖ್ವೊನ ಕಬ್‌ಜಾ ಕರಿಲಿದು. ತದೆ ಯೊ ಡೇರಾನ ಘರ್‌ನ ಇವ್ಣ ಜೋಡ್ತಾಸ್ ಪಾಡಿಲಿನ್ ಕಾನಾನ್ ದೇಖ್ವೊಮ ಆಯು. ಅಜ್ಜು ದಾವೀದನು ಹಗಾಮ್ ಲಗೂಬಿ ಯೊ ಹಿಜ್ವಾಸ್ ಥೂ.

46 ದಾವಿದನೆ ದೇವ್ನಿ ಸನ್ನಿಧಿಮ ದಯಾಲೀನ್ ಯಾಕೋಬ್‌ನಿ ಪಿಳ್ಗಿನಖ್ವಾಜೆ ಪ್ರಾರ್ಥನೇನಿ ಮಂದಿರ್ ಭಾಂದನ ಹುಕುಮ್ ದೇವ್ಣ ಕರಿ ದೇವ್ನ ಬಿಂತಿ ಕರಿಲಿದೊ.

47 ಕತೋಬಿ ಸೊಲೊಮೋನ್ನೇಸ್ ಪ್ರಾರ್ಥನೇನು ಮಂದಿರ್‌ನ ಭಂದಾಯೊ.

48 ಪ್ರವಾದಿ ಬೋಲಾತೆತಿಮ್ ಪರಮಂಡಲ್‌ನೊ ದೇವ್ ಅದ್ನಿನ ಭಾಂದಾತೆ ಘರ್‌ಮ ರೆಟ್ಟವಾಳೊ ಕಾಹೆ.

49 ಪ್ರಭುನೆ ಅಮ್ ಬೋಲ್ಯೊ 'ಸೊರ್ಗ ಮಾರು ಸಿಂಹಾಸನ್ ಜಮೀನ್ ಮಾರೊ ಗೋಡಾನೊ ರಚ್ಚೊ ತುಮೆ ಮನ ಕಿಮ್ಮು ಘರ್ ಭಾಂದ್‌ಶು? ಮಾರು ಅರಾಮ್‌ನ ಬರೋಬರ್‌ನಿ ಝಗೊ ಕಿಜ್ವಾಲ್ಟಾ?

50 ಆ ಅಖ್ವು ಮಾರ ಹಾತ್ವೆಸ್ ಬಣಾವಟ್ ಕರ್ಚುನಿ, ಕರಿ ಪ್ರಭುಸ್ ಬೋಲ್ಯೊ.

51 ಸ್ತೆಫನನೆ ಅಮ್ ಬೋಲ್ಯೊಕಿ, "ಮೊಂಡಿಹುಯಿರಾತೆ ತುಮೆ ತುಮಾರ ದಿಲ್ವ ದೇವ್ ಕೋ ದಿದಾನಿ ಇನ ಕಾನ್‌ಲಗಾಡ್ಯಾಬಿ ಕೊಯ್ನಿ. ಪವಿತ್ರ ಆತ್ಮಾನ್ ಕಾಮ್ನ ವಿರುದ್ಧಿ ಚಾಲವಾಳ ಹುಯಿರಾಸ್. ತುಮಾರ ಗುರುಗುರಬ್‌ಲ್ಯ ಕಿಮ್‌ಥಾಕಿ ತುಮೇಬಿ ಇಮ್ಮತ್ ಹುಯಿರಾಸ್.

52 ಜಿವ್ತಾತೆ ಪ್ರವಾದಿಮ ಖ್ವಾರಜ್ಜಣನ ತುಮಾರ ಗುರುಖ್ವಾರು

ಖ್ವಿತಾಯು. ನೀತಿವಾಳೊ ಎಕ್ಕಸ್‌ಜ್ಜಣೊ ಹುಯಿರೋತೆ ಯೊ ಪಹಿಲೆಸ್ ಆವ್‌ಶೆಕರಿ ಖ್ವಿಮ್‌ಜಾಯುಧು. ಕತೋಬಿ ತುಮಾರು ಗುರುಖ್ವಾರು ಯೋ ಪ್ರವಾದಿಖ್ವಾರನ ಮಾರಿನಾಖ್ವು ಹಮ್ಮೆ ತುಮೆ ಧರಿದೀನಸ್ ಇನ ಮರೈನಾಖ್ವು.

53 ತುಮೆ ಸೊರ್ಗ ದೂತರ್‌ಧಿ ನೇಮಕ್ ಹುಯೊತೆ ದೇವ್ನು ಧರ್ಮಶಾಸ್ತ್ರನ ಸ್ವೀಕಾರ್ ಕರ್‌ತ್ಯಾತೋಬಿ ಇನಿನಿತರ ಘಾಲ್ಯಕೊಯ್ತಿ” ಕರಿ ಬೋಲ್ಯೊ.

ಸ್ತೆಫನಪರ್ ಬಂಡೊ ಫೇಕ್ಯುತೆ

54 ಆ ವಾತ್ತ್ ಖ್ವಿಮ್‌ಜ್ಯುತೆ ನ್ಯಾವ್ನಿಸಬೆನು ಘಲ್ವುಖ್ವಾರು ಘಣು ಖಿಜೈನ್ ಸ್ತೆಫನನ ಉಪ್ಪರ್ ದಾತ್‌ಚಾಯು.

55 ಕತೋಬಿ ಯೊ ಪವಿತ್ರ ಆತ್ಮಧಿ ಭರೈನ್ ಸೊರ್ಗಭಣಿ ದೇಖಿನ್, ದೇವ್ನಿ ಮಹಿಮೆನಬಿ, ದೇವ್ನ ಖಾವಿಬಾಜುಮ ಭಿಯೋತೆ ಯೇಸುನಾಬಿ ದೇಖ್ಲೊ.

56 ತದೆ ಇನೆ, “ದೇಖೊ ಪರ್‌ಲೋಕ್ ನಿಕ್‌ಳೈರೊಡ್ತೆ; ಅದ್ಮಿನೊ ಛಿಯೊ ದೇವ್ನ ಖಾವಿಬಾಜುಮ ಭಿಯೋತೆ ಮೆ ದೇಖುಕರುಸ್” ಕರಿ ಬೋಲ್ಯೊ.

57 ತದೆ ಯಹುದ್ಯರ್‌ಖ್ವಾರು ಜೋರೇಧಿ ಚಿಕ್ರಿನ್, ಕಾನ್ನಮೂಚಿಲೀನ್, ಎಕ್ಕುಹುಯಿನ್ ನಾಶಿಆಯಿನ್,

58 ಇನ ನಂಗರನ್ನ ಭಾರ್ ಧಕೇಲಿಜೈನ್ ಮಾರಿನಾಖನ ಇನಪರ್ ಬಂಡೊ ಫೇಕ್ಯು ಇನ ವಿರೋದ್ ಸಾಕ್ಷಿ ಬೋಲ್ಯುತೆ ಇವ್ಣೆ ಇವ್ಣ ಝಗ್ಗಾನ ಕಾಡಿನ್ ಸೌಲಕರಿ ಏಕ್ ಜ್ಜಣಾನ ಗೋಡಾಕನ ಮ್ಹೇಲ್ಯು.

59 ಸ್ತೆಫನನ ಉಪ್ಪರ್ ಬಂಡೊ ಫೇಕುಕರ್ತುಧೂತೆ ತದೆ ಯೋ ಪ್ರಾರ್ಥನೆ ಕರ್ತೊ ಹುಯಿನ್ “ಯೇಸು ಪ್ರಭು, ಮಾರ ಆತ್ಮಾನ ಸ್ವೀಕಾರ್‌ಕರೀಲೆ” ಕರಿ ಬೋಲ್ಯೊ.

60 ಅಜು ಯೊ ಥುಕ್‌ಣ್ಣ ಮಾಂಡೀನ್ ಪ್ರಭು, ಆ ಪಾಪ್ಪ ಅವ್ವಪರ್ ನಕೊ ಲಗಾಡಿಷ್!” ಕರಿ ಜೋರೇಖ್ವು ಚಿಕ್ರಿನ್ ಮರಿಗೊ.

8

ಸೌಲನೆ ಸಭೆನ ಖ್ವತಾಯೊತೆ

1 ಸ್ತೆಫನನ ಮಾರಿನಾಖನ ಸೌಲನ ಒಪ್ಪಿಕೆಡು. ಯೊ ದನ್ತ ಯೆರೂಸಲೇಮಧೂತೆ ಸಬೆವಾಳನ ಮೋಟಿ ಖ್ವತಾಪ್ಪಿ ಪಡ್ಕು. ಅಪೊಸ್ತಲರ್ ನಾಹುಯಿನ್ ಖ್ವಾರೂಸ್, ಯೂದಾಯ ಸಮಾರ್ಯ ತಬರ್‌ಖಾಮ ಛಿಡ್‌ಕ್ಯೆಗಯು.

2 ಥೋಡು ಭಕ್ತರ್ ಖ್ವಾರು ಸ್ತೆಫನನ ಮಖ್ವಾಣ್ಕು ಕರೀನ್ ಇನಖ್ವಾಜೆ ಘಣು ರದನ್ ಕರಯ್.

3 ಕತೋಬಿ ಸೌಲ ಘರ್ ಘರ್‌ಮ ಪೇಶಿನ್ ತಯೇಡ ಪರ್ಖ್ವಾ ಖೀಚಿಲಾಯಿನ್ ಜೇಲ್‌ಮ ಧಕೆಲಿನ್ ಸಬೆನ ಅಖ್ವು ನಾಶ್‌ಕರ್ತೊಥೊ.

ಸಮಾರ್ಯಮ ಸುವಾರ್ತೆ

4 ಛಿಡ್‌ಗರ್‌ಪಡಿಗುತೆ ವಿಶ್ವಾಸಿಖ್ವಾರು ಬಿಜಿಬಿಜಿ ಝಗೊ ಜೈನ್ ಸುವಾರ್ತೆನ ಬೋಲ್ತು ನಿಕ್‌ಳ್ಕು.

5 ಫಿಲಿಪ್ ಸಮಾರ್ಯಕರಿ ಮುಖ್ಯ ಖ್ವಯೇರ್ನ್ ಅದ್ವಿವೊನ ಜೈನ್ ಕ್ರಿಸ್ತನಿ ಬಾರೇಮ ಬೋಲಿವತಾಳ್ಕೊ.

6 ಝೂಂಡ್‌ಥಿ ಭರಾಯಹುಯ ಅದ್ವಿಖ್ವಾರು ಫಿಲಿಪ್ಪನಿ ವಾತ್ಸ ಏಕ್ ಮನ್‌ಥಿ ಖ್ವಮ್‌ಜ್ಕು. ಅಜ್ಜು ಇನೆ ಕರಯ್ತೆ ಖ್ವಣೇದ್ವ ಅಖ್ವಾ ಕಾಮ್ ದೇಖ್ಕು.

7 ಶನಕತೊ ಕೆತ್ರಾಕಿ ಜ್ಞಾನಮಾಥೊ ಭೂತ್‌ಖ್ವಾರು ಜೋರೇಖ್ವು ಅವಾಜ್‌ಕರೀನ್ ಚಿಕರ್ತು ಹುಯಿನ್ ಭಾರ್ ಆಯು; ಬಿಜ್ಜು ಕೆತ್ರಾಕಿ ಲಕ್ಷಾಭರಯ್ ಪಾಂಗ್‌ಳ್ಕು ಗುಣ್‌ಹುಯು.

8 ಇನಖ್ವಾಜೆ ಯೋ ಖ್ವಯೇರ್‌ಮ ಜಾಖ್ವತ್ ಖ್ವಶಿಹುಯು.

9 ಕತೋಬಿ ಥೋಡ ದನ್‌ಥೂ ಯೋ ಖ್ವಯೇರ್‌ಮ ಸೀಮೋನ್‌ಕರಿ ಏಕ್‌ಜ್ಞೊ ಥೊ. ಯೋ ಇನ ಜಾದುಜಮ್ಮರ್‌ಥಿ ಸಮಾರ್ಯನ ಅದ್ವಿನ ಆಶ್ಚರ್ಯ ಕರಾಯೊ. ಸಿಮೋನ್ ಇನು ಯೋಸ್ ಮಹಾತ್ಮಕರಿ ಬೋಲಿಲೇತೊಥೊ.

10 ನ್ವಾನೇಥಿ ಧರೀನ್ ಮೋಟಾಲಗು ಖ್ವಾರು; ಆ ಹೈರೋತೆ ಮಹಾನ್ ಶಕತ್‌ಕರಿ ಬೋಲೈರಂಟ್ಲೆತೆ ದೇವ್‌ನೀಸ್ ಶಕತ್‌ಕರಿ ಬೋಲ್ತುಹುಯಿನ್ ಇನಿವಾತ್ತ್ ಖ್ವಮಜ್‌ತೂಥು.

11 ಘಣಾದನ್‌ಥೂಬಿ ಸೀಮೋನ್ನಿ ಜ್ಞಾದುಜಮ್‌ಕರ್‌ಥಿ ಅದ್ಮಿಖ್ವಾರು ಆಶ್ಚರ್ಯಥಿ ಇನಿ ವಾತ್ತ್ ಖ್ವಮಜ್‌ತೂಥು.

12 ಕತೋಬಿ ಫಿಲಿಪ್ ದೇವ್ನಿ ರಾಜ್ಯನಿ ಬಾರೇಮ ಅಜ್ಜು ಯೇಸುಕ್ರಿಸ್ತನಿ ನಾಮ್ನಿ ಬಾರೇಮಾಬಿ ಅದ್ಮಿಖ್ವಾರಾನ ಸುವಾರ್ತೆ ಬೋಲ್ಯೊ ಪರ್ಖೊ ತಯೇಡ ಖ್ವಾರುಸ್ ಫಿಲಿಪ್ ಬೋಲ್ಯೊತೆ ವಾತೆನ ವಿಶ್ವಾಸ್ ಕರೀನ್ ಬ್ಯಾಪ್ತಿಸ್ಮ್ ಕರ್ಲೆಲಿದು.

13 ತದೆ ಸೀಮೋನ್ನೇಬಿ ವಿಶ್ವಾಸ್‌ಕರಿನ್ ಬ್ಯಾಪ್ತಿಸ್ಮ್ ಕರ್ಲೆಲೀನ್ ಅಜ್ಜು ಫಿಲಿಪ್ಪನಿ ಜೋಡ್ಡುಕದೇಬಿ ರೆವ್ವೆನ್ ಯೋ ಕರಾತೆ ಅದ್ಭುತ್ ಕಾಮ್ನ ಅಜ್ಜು ಖ್ವಣೇಡ್ನ ಕಾಮ್ನ ದೇಖಿನ್ ಆಶ್ಚರ್ಯ ಹೋತೊಥೊ.

14 ಸಮಾರ್ಯವಾಳು ದೇವ್ನಿ ವಚನ್ ಮನಿಲಿದೂತೆ ಸಮಚಾರ್‌ನ ಯೆರೂಸಲೇಮ್ಮ ಥೂತೆ ಅಪೊಸ್ತಲರ್ ಖ್ವಾರು ಖ್ವಮ್‌ಜಿನ್ ಪೇತ್ರ ಯೋಹಾನ ಇವ್ಣಕನ ಮೋಕ್‌ಲ್ಯು.

15 ಅವ್ಣೆ ಹಿಜ್ಜಾ ಆಯಿನ್ ಯೋ ಅದ್ಮಿಖ್ವಾರಾನ ಪವಿತ್ರಾತ್ಮವರನ ಮಳ್‌ಣುಕರಿ ಇವ್ಣಖ್ವಾಜೆ ಪ್ರಾರ್ಥನೆ ಕರ್ಯ್.

16 ಶನಕತೊ ಪವಿತ್ರಾತ್ಮ ಪೇತ್ರ ಯೋಹಾನ ಇವ್ಣ ಏಕ್‌ಜಣಪರಬಿ ಬಿಜೂಬಿ ಕೋ ಆಯಿರಂಥೂನಿ. ಇವ್ಣೆ ಪ್ರಭು ಹುಯಿರಂಟ್ಲೆತೆ ಯೇಸುನ ನಾಮ್‌ಪರ್ ಖಲಿ ಬ್ಯಾಪ್ತಿಸ್ಮ್ ಕರ್ಲೆರಾಖ್ವಥ.

17 ಯೋ ಬೇ ಅಪೊಸ್ತಲರನ್ನ ಇವ್ಣಪರ್ ಹಾತ್ ಮ್ವೇಲಾಖ್ವತರ್ ಇವ್ಣೆ ಪವಿತ್ರಾತ್ಮನ ಲೀಲಿದು.

18 ಅಪೊಸ್ತಲರ್ ಖ್ವಾರು ಅದ್ಮಿಪರ್ ಇವ್ಣ ಹಾತ್ ಮ್ವೇಲಾದಿನ್ ಅದ್ಮಿಖ್ವಾರಾನ ಪವಿತ್ರಾತ್ಮ ಮಳಿರಂಟ್ಲೆತೆ ಸಿಮೋನ್‌ನೆ ದೇಖ್ಯೊ ಇನಖ್ವಾಜೆ ಸೀಮೋನ್ನೆ ಪೈಶಾಲಯಿನ್ ಅಪೊಸ್ತಲರನ್ನ ಖ್ವಾಮ್ಣೆ ಮ್ವೇಲ್ಯೊ.

19 ಅಜ್ಜು “ಮೆ ಕಿನಾಪರ್ ಹಾತ್ ಮ್ವೇಲೂಸ್‌ಕಿ ಇವ್ಣೆ ಪವಿತ್ರಾತ್ಮನ ಲೀಲ್ಯಾವಾನಿತರ ಆ ಅದಿಕಾರ್ ಮನಾಬಿ ದೇವೊ” ಕರಿ ಬೋಲ್ಯೊ.

20 ಕತೋಬಿ ಪೇತ್ರನೆ ಇನ “ತಾರ ಪೈಶ ತಾರಿಜೋಡ್ಡ ನಾಶಹುಯಿಜಾವಾದೆ. ದೇವ್ನಿ ವರಾನ ಪೈಶಾನ ಲಿಯೆಜಾಯ್ ಕರಿ ಲಾರ್ಹೊಕಿ ಶು?” ಕರಿ ಜವಾಬ್ ದಿದೊ.

21 ಆ ಕಾಮ್ ತುನ ಭಾಗ್‌ಬಿ ಕೊಯ್ನಿ ವಾಟೊಬಿ ಕೊಯ್ನಿ; ತಾರೊ ದಿಲ್ ದೇವ್ನಿ ಖ್ವಾಮ್ಣೆ ಬರೋಬರ್ ಕೊಯ್ನಿ.

22 ಇನಖ್ವಾಜೇಧಿ ಆ ತಾರ ಖರಾಬ್ ಕಾಮ್ ಮ್ಹಂದಿನ್ ದೇವ್‌ಭಣಿ ಫರಿಜೈನ್, ಅಜು ಪ್ರಾರ್ಥನೆ ಕರೀಲೆ. ಪ್ರಭು ತಾರ ದಿಲ್ಲಿ ಖ್ವಿಯಾಲ್ನ ಮಾಪ್‌ಕರ್ಶೆ.

23 ಶನಕತೊ ತೂ ಜಾಖ್ತ್ ಕಡ್‌ವಾಟ್‌ನಿ ಬಳಾಪೆಧಿಬಿ ಭರೈರ್ದಾವಾಳೊ, ಝರೇಲಿ ಅನೀತಿಧಿಬಿ ಭರೈರ್ದೊತೆ ಮೇ ದೇಖುಕರುಸ್ ಕರಿ ಬೋಲ್ಯೊ.

24 ಇನ ಸೀಮೋನ ಅಜು ಪೇತ್ರ ಇವ್ಣ ಬೇಜಣಾನ, ‘ತುಮೆ ಬೋಲ್ಯಾತೆ ವಾತೆಮ ಖಿವೊಬಿ ಮಾರಪರ್ ನಾ ಆವ್ಣತೆ ತಿಮ್ ಮಾರಖ್ವಾಜೆ ಪ್ರಭುಮ ತುಮೆ ಪ್ರಾರ್ಥನೆ ಕರೊ’ ಕರಿ ಬೋಲ್ಯೊ.

25 ಅಮ್ ರ್ವಾವಾಪರ್ ಇವ್ಣೆ ಪ್ರಭುನಿ ಸಂದೇಶ್ ಖ್ವಾಚ ದಿಲ್‌ಧಿ ಬೋಲಿಹುವಾದಿನ್ ಯೆರೂಸಲೇಮ್‌ನ ಜೈನ್ ಪಾಲ್ಟು ಫರಿ ಆವಾನಿವಖ್ತೆ ಸಮಾರ್ಯವಾಳನ ಕೆತ್ರಾಕಿ ಗಾಮ್ ಸುವಾರ್ತೆನ ಖ್ವಾಮ್‌ಜಾಡ್ನು.

ಫಿಲಿಪ್ಪ ಅಜು ಇಥಿಯೋಪ್ಯನ ಅಧಿಕಾರಿ

26 ಪ್ರಭುನ ದೂತನೆ ಫಿಲಿಪ್ಪನ ತೂ ಉರೀನ್ ದಕ್ಷಿಣ್ ರುಕ್‌ಮ ಯೆರೂಸಲೇಮ್‌ಡು ಗಾಜ ಗಾಮ್‌ನ ಜಾವಾನಿ ಜಂಗ್‌ಗಳೆನಿ ವಾಟೆ ಜಾಕರಿ ಬೋಲ್ಯೊ.

27 ಇಮ್ಮಿಪರಕ್ಮಾಸ್ ಫಿಲಿಪ್ ಉರೀನ್ ಯೆರೂಸಲೇಮ್‌ನ ಪಾಲ್ಟೊ ಜಾತೊರ್ದವಾನಿ ವಖ್ತೆ ಇಥಿಯೋಪ್ಯವಾಳೊ ಏಕ್ ಅದ್ಮಿನ ದೇಖ್ಲೊ ಯೋ ಹೀಜ್‌ಡೊ ಹುಯಿರ್ದೊಡೊ. ಇಥಿಯೋಪ್ಯನಿ ರಾಣಿ ಕಂದಾಕೆನ ಹಾತ್ ಹೇಟ್‌ಲೊ ಮೋಟೊ ಅಧಿಕಾರಿಬಿ ಬಿಜು ಇನಿ

ಧನ್ ದೌಲತ್ನಿ ಖಜಾನೇನ ದೇಖವಾಳೊ ಹುಯಿರನ್ನೊಡೊ. ಯೊ ಅದ್ನಿ ಆರಾದನೆಕರಾನ ಯೆರೂಸಲೇಮ್‌ನ ಜೈರೋಡೊ.

28 ಅಜ್ಜು ಇನ ಘರೆ ಪಾಟ್ಲೊ ಭಾವಾನಿವಖ್ತೆ ಇನಿ ರಥ್‌ಮ ಬೇಶಿನ್ ಯೆಶಾಯನಿ ಪ್ರವಾದನೆನಿ ದಪ್ತರ್‌ನ ಪಡುಕತೋಡೊ.

29 ಪವಿತ್ರಾತ್ಮನೆ ಫಿಲಿಪ್ಪನ 'ತೂ ಯೋ ರಥ್‌ನ ಖನ್ನೆ ಜೈನ್ ಇನಿ ಬೋಡ್ಡಾಸ್ ಚಾಲ್' ಕರಿ ಬೋಲ್ಯೊ.

30 ಫಿಲಿಪ್ಪ ನಾಶಿಜೈನ್ ಯೋ ಅದ್ನಿ ಯೆಶಾಯ ಪ್ರವಾದಿನು ದಪ್ತರ್‌ನ ಪಡುಕರಾತೆ ಖ್ವಮ್‌ಜಿನ್, 'ತೂ ಪಡುಕರಾತೆ ತುನ ಮಾಲುಮ್ ಪಡುಕರಸ್ತಿ ಶು'? ಕರಿ ಬೋಲ್ಯೊ.

31 ಇನೆ, ಕೋಣ್‌ತೋಬಿ ಮನ ಬರಬರ್ ನಾ ಖ್ವಮ್‌ಜಾಡ್ಯತೊ ಯೋ ಮನ ಕಿಮ್ ಅರ್ಥಪಡ್‌ಶೆ ಕರಿ ಬೋಲಿನ್ ತೂ ರಥ್ ಲ್ಲಡಿನ್ ಮಾರಾಕನ ಬೇಶಿಜಾ ಕರಿ ಫಿಲಿಪ್ಪನ ಬೋಲಿಲಿದೊ.

32 ಯೊ ಪಡುಕತೊ ಥೋತೆ ಪವಿತ್ರ ದಪ್ತರ್‌ಮ ವಚನ್ನುಬಾಗ್ ಖೆವುಕತೊ 'ಕತ್ರಾನ ಲೀಜಾಯಿತೆ ಮೇಂಡಾನ ಚೆಲ್ವನಿತರ ಇನ ಲೀನ್‌ಗಯು; ಅಜ್ಜು ಮೇಂಡು ರುಯಿ ಕತ್ರಾವಾಳನ ಖ್ವಮ್ಜೆ ಖ್ವೊಪ್‌ರ್ದವಾನಿತರ ಇನೆ ಮ್ಹೋಡು ಮ್ಹೆಲ್ಯೊಸ್ ಕೊಯ್ನಿ.

33 ಇನ ಖ್ವರಮ್ ಕಾಡ್ಯ ಇನ ನ್ಯಾವ್ ಮಳ್ಳುಕೊಯ್ನಿ ಇನಿ ಪಿಳ್‌ಗೀನಿ ಬಾರೇಮ ಕೋಣ್ ಬೋಲವಾಳು ಉಷೆ? ಶನಕತೊ ಭಮೀನ್‌ಪರ್ಥು ಇನ ಜಾನ್ ಕಾಡಿನಾಕ್‌ಶೆ ಕರಿ ಬೋಲನುಸ್.

34 ಅದಿಕಾರಿನೆ ಫಿಲಿಪ್ಪನ, ಆ ವಚನ್ನಿ ಬಾರೇಮ ಪ್ರವಾದಿನೆ ಆ ವಾತ್ಸ ಕಿನಿ ಬಾರೇಮ ಬೋಲಿರಾಖ್ಲೊಸ್ತೆ? ಮಾರಿ ಬಾರೇಮಾಕಿ? ಬಿಜೇಕ್ ಜಣಾನಿ ಬಾರೇಮ? ದಯಾಕರೀನ್ ಮನ ಬೋಲ್ವುಕರಿ ಫಿಲಿಪ್ಪನ ಬೋಲ್ಯೊ.

35 ತದೆ ಫಿಲಿಪ್ಪನೆ ಬೋಧನೆ ಕರ್ತೊಹುಯಿನ್ ಯೋಸ್ ವಚನ್ನಿ ಆಧಾರ್ ಕರಿಲಿನ್ ಇನ ಯೇಸುನಿ ಬಾರೇಮಾನಿ ಸುವಾರ್ತೆನ ಖ್ವಮ್‌ಜಾಡ್ಯೊ.

36 ಇವ್ಚೆ ವಳ್ಳಜಾತಥಾತೆ ವಾಟೆ ಪಾಣಿನಿ ಝಗೋಕನ ಆಯ.

ಅಜ್ಜು ಅದಿಕಾರಿನೆ, ಹಂದೇಕ್ ಪಾಣಿ ಹೈರು ಮೇ ಬ್ಯಾಪ್ತಿಸ್ಮ ಲ್ಯಾವಾನ ಅಡ್ಡಿಶಾತ್? ಕರಿ ಬೋಲ್ಯೊ.

37 *ತದೆ ಫಿಲಿಪ್ಪನೆ ಇನ “ತೂ ಖ್ವಾಚ ದಿಲ್‌ಥಿ ವಿಶ್ವಾಸ್ ಕರಾವಾಳೊ ಉಷೇತೊ ಅಡ್ಡಿಪೊಯ್ತಿ” ಕರಿ ಬೋಲ್ಯೊ. ತದೆ ಅದಿಕಾರಿನೆ, “ಯೇಸುಕ್ರಿಸ್ತಾಸ್ ದೇವ್‌ನೊ ಛಿಯೊಕರಿ ವಿಶ್ವಾಸ್ ಕರುಸ್” ಕರಿ ಬೋಲ್ಯೊ.

38 ತದೆ ರಥ್‌ನ ಭೀರಾಕ್ ಕರಿ ಹುಕುಮ್ ದಿದೊ. ಯೊ ವಖ್ತಾಮ ಇವ್ಣೆ ಭೇಜಣ ಪಾಣಿಮ ಉತ್‌ರ್ಯ್ ಫಿಲಿಪ್ಪನೆ ಇನ ಬ್ಯಾಪ್ತಿಸ್ಮ ಕರಾಯೊ.

39 ಇವ್ಣೆ ಪಾಣಿಮಾಥು ಉಪ್ಪರ್ ಆವಾದಿನ್, ಪ್ರಭುನ ಆತ್ಮನೆ ಫಿಲಿಪ್ಪನ ಲೀನ್ ಗಯೊ. ಅದಿಕಾರಿನೆ ಫಿಲಿಪ್ಪನ ಬಿಜು ಕದೇಬಿ ದೇಖೊಸ್ ಕೊಯ್ತಿ. ಯೋ ಘಣು ಖುಷಿಥಿ ಇನಿ ವಾಟ್‌ಧರಿನ್ ಚಲಿಗಯ್.

40 ಅನಕೇಡೆಥು ಫಿಲಿಪ್ಪ ಅಜೋತ್‌ಕರಿ ಖ್ವಯೇರ್‌ಥು ದೆಖ್ತೆನ್ ಹಿಜ್ಜಾಥು ಕೈಸರೈಕರಿ ಖ್ವಯೇರ್‌ಲಗು ಅಖ್ವಾಸ್ ಗಾಮ್ತ ಸುವಾರ್ತೆ ಬೋಲ್ತೊ ಗಯೊ.

9

ಸೌಲ ಬದಲಾವ್ಣಿ ಹುಯೋತೆ

(ಅಪೊ 22:6-16; 26:12-18)

1 ‘ಪ್ರಭುನ ಶಿಷ್ಯರ್ನ್ ಡರಾವನ ಅಜ್ಜು ಮಾರಾನಖ್ವಾಜಿ ಯೆರೂಸಲೇಮ್ಮ ಸೌಲ ಬಿಜ್ಜೂಬಿ ಕೋಶಿಶ್ ಕರುಕರ್ತೊಥೊ. ಇನಖ್ವಾಜೇಥಿ ಯೊ ಗಲ್‌ಥಯಾಜಕ್‌ಕನ ಜೈನ್,

2 ದಮಸ್ಕ ಖ್ವಯೇರ್‌ನ್ ಸಭೆನ ಚಿಟ್ಟಿ ಲೀಖಿನ್ ದಮಸ್ಕಮ ಕ್ರಿಸ್ತಾನ ಮಾರಗ್‌ಮ ಚಾಲವಾಳು ತಯೇಡ ರ್ಲವೊ ಪರ್ಲೊ ರ್ಲವೊ ಇವ್ಣುನ ಬೇಡಿ ಫಾಲಿನ್ ಖ್ವತಾವನ ಯೆರೂಸಲೇಮ್ಮ ಖೇಚಿಲಿ ಆವಾನ ಮನ ಹುಕುಮ್ ದೆವೊ ಕರಿ ಬೋಲಿಲಿದೊ.

* 8:37 8:37 ಥೋಡಿ ಚಿಟ್ಟೇಮ 37 ವಚನ್ ಕೊಯ್ತಿ

3 ಯೊ ದಮಸ್ಕನ ಖನ್ನೆ ಚಾಲ್ತೊಹುಯಿನ್. ಖ್ವಿಯೇರ ಣ್ಣ ಆವಾನಿ ವಖ್ವೆತೆ, ಆಕಾಶ್‌ಮಾಥು ಏಕ್ ಉಜಾಳು ಅಪ್‌ಗುಪ್‌ಥೀಸ್ ಐನ್ ಇನ ಅಶ್‌ಪಿಶ್ ಉಜಾಖ್ವೊಧಿ ಝಮ್‌ಕ್ಯು.

4 ಯೊ ಜಮೀನ್‌ಪರ್ ರಡ್ಕಿಗಯೊ ತದೆ, “ಸೌಲ, ಸೌಲ ಮನ ಶನ ಖ್ವಿತಾವಸ್?” ಕರಿ ಬೋಲಾನಿ ಆವಾಜ್‌ನ ಖ್ವಮ್‌ಜ್ಯೊ.

5 ಸೌಲನೆ, “ಪ್ರಭು ತೂ ಕೋಣ್?” ಕರಿ ಬೋಲ್ಯೊ ಪ್ರಭುನೆ, “ತೂ ಖ್ವಿತವ್‌ಕರಸ್ತೆ ಯೇಸುಸ್ ಮೇ”

6 ಕತೋಬಿ ತೂ ಉರೀನ್ ಖ್ವಿಯೇರ ಣ್ಣ ಮಹಿ ಜಾ, ತೂ ಕರ್ನುತೆ ಅಖ್ವು ಹಿಜ್ಜ ತುಮುನ ಮಾಲುಮ್ ಪಡ್‌ಶೆ” ಕರಿ ಬೋಲ್ಯೊ.

7 ಇನ ಜೋಡೆ ವಳೇಜಾತಥಾತೆ ಇವ್ಣೆ ಯೋ ಆವಾಜ್ ಖ್ವಮ್‌ಜ್ಯು ಪಣ್ಣಿ ಕಿರ್ನಾಬಿ ದೇಖಾನ ಕೋಹುಯುಂತೆ ಮುಕ್ತಪಡಿಗ.

8 ಸೌಲ ಜಮೀನ್‌ಪರ್ಥೊ ಉರೀನ್ ಡೋಳ ಪಾಡಮ ಶಾತ್ರಿ ಕೋ ದೆಖಾಯುನಿ. ಇನಖ್ವಾಜೆ ಇವ್ಣೆ ಇನ ಹಾತ್‌ಧರೀನ್ ದಮಸ್ಕಮ ಬುಲೈಲಿನ್ ಗಯ.

9 ಇನ ತೀನ್ ದನ್ ಡೋಳ ಕೋ ದೆಖಾಯುನಿ, ಅಜ್ಜು ಇನೆ ಶಾತ್ರಿ ಖಾದೊಪೀದೊ ಕೊಂತೆಥೊ.

10 ತದೆ ದಮಸ್ಕಮ ಅನನೀಯಕರಿ ಏಕ್‌ಜಣೊ ವಿಶ್ವಾಸಿಥೊ. ಪ್ರಭುನೆ ದರ್ಶನ್‌ಮ, ‘ಅನನೀಯ’ ಕರಿ ಬೋಲಖ್ವತರ್, ತದೆ ಇನೆ ಮೆ ಹಜ್ಜಾಸ್ ಲೊ ಕರಿ ಬೋಲ್ಯೊ.

11 ಪ್ರಭುನೆ ಅನನೀಯನ, “ತೂ ಉರೀನ್ ಖ್ವಿತ್ತಡ್ ಗಲ್ಲಿಕರಿ ಬೋಲಾನು ನಾಮ್ನಿ ಗಲ್ಲಿಮ ಜಾ. ಹಿಜ್ಜಲ್ಲಾತೆ ಯೂದನ ಘರ್‌ಮ ದೇಖಿನ್ ತಾರ್ಸ್ ಖ್ವಿಯೇರ ಣ್ಣ ಸೌಲನಿ ಬಾರೇಮ ಪೂಲ್ಹಾವ್ ಯೊ ಹಮ್ಮೆ ಪ್ರಾರ್ಥನೆ ಕರುಕರಸ್.

12 ಸೌಲನೆ ಏಕ್ ದರ್ಶನ್ ದೇಖ್ಲೊ ಅನನೀಯಕರಿ ಏಕ್‌ಜಣೊ ಆವಶೆ ಇನ ಪಾಲ್ತು ಡೋಳ ದೇಖಾವನಿತರ ಇನ ಉಪ್ಪರ್ ಹಾತ್ ಮೈಲಾಖ್ವತರ್ ಇನೆ ದೇಖ್ಲೊ ಕರಿ ಬೋಲ್ಯೊ.

13 ತದೆ ಅನನೀಯನೆ ಪ್ರಭು, ಯೆರೂಸಲೇಮ್‌ನು ತಾರ ದೇವ್ವಾಡ್ನಿ

ಖ್ವಾರಾನ ಕೆತ್ತೇಕ್ಕಿ ಖ್ವತಾಪ್ಪಿನ ದಿದೂತೆ ಅನಿ ಬಾರೇಮ ಕೈಯೇಕ್‌ಜ್ಜಣಾಧಿ ಖ್ವಮ್‌ಜಿರಾಖ್ಯೊಸ್.

14 ಅಜ್ಜು ಹಜ್ಜಾಬಿ ಗಲ್‌ಡಯಾಜಕ್‌ಧಿ ಅದಿಕಾರ್ ಲೀರಾಖ್ಯೊಸ್‌ಕಿ, ತಾರ ನಾಮ್ನ ಬೋಲವಾಳಾನ ಬೇಡಿಫಾಲ್ಪುಕರಿ.

15 ಪ್ರಭುನೆ ಅನನೀಯನ “ತೂ ಜಾ; ಯೋ ಅದ್ವಿಖ್ವಾರ ಯೆಹೂದ್ಯಾಕಾಹೆತೆ ಅದ್ವಿವೊನ ರಾಜಾಪ್‌ನ, ಅಜ್ಜು ಇಸ್ರಾಯೇಲ್ ಅದ್ವಿವೊನ ಮಾರ ನಾಮ್ನ ಖ್ವಮ್‌ಜಾಡನಖ್ವಾಜೆ ಮೇ ಭೂಣಿರಾಖ್ಯೊತೆ ಏಕ್ ಜಿನಖ್ವೊಹುಯಿರೊಸ್.

16 ಯೊ ಮಾರ ನಾಮ್ನಖ್ವಾಜೆ ಕೆತ್ತು ಲತಾಡ ಲಿಶೆಕರಿ ಮೇಸ್ ಇನ ವತಾಳಿಶ್.” ಕರಿ ಬೋಲ್ಯೊ.

17 ತದೆ ಅನನೀಯ ಭಾಲ್ತೊ ಯೊ ಫಾರ್‌ಮ ಜೈನ್ ಇನಾಪರ್ ಇನೊ ಹಾತ್ ಮ್ಹೇಲಿನ್, “ಮಾರೊ ಬೈ ಸೌಲ, ತೂ ಆವಾನಿ ವಾಟ್ತು ತುನ ದೆಖಾಯೊತೆ ಪ್ರಭು ಯೇಸು ತುನ ಪಾಲ್ತು ಡೋಳೊ ದೆಖಾವಾನಿಫೊಣಿಬಿ, ತು ಪವಿತ್ರಾತ್ಮಾಧಿ ಭರಾವ್ಣು ಕರೀಬಿ ಮನ ಮೋಕ್ಲಿರಾಖ್ಯೊಸ್” ಕರಿ ಬೋಲ್ಯೊ.

18 ಯೋ ವೇಳ್ವಾಸ್ ಸೌಲನ ಡೋಳೇಧಿ ಪಡದ್ವಿಫೋಣಿ ಶಾತ್ತ್ಕಿ ಹೇಟ್ ನಿಕ್ಕಿ ಪಡೀನ್ ಇನೊ ಡೋಳ ಪಾಲ್ತು ದೆಖಾವಲಗ್ಕು ಯೋ ಉರೀನ್ ಬ್ಯಾಪ್ತಿಸ್ಮ್‌ಲಿದೊ.

19 ಇನಕೇಡೆಧು ಖಾಣು ಖಾವಖ್ವತರ್ ಇನ ಶಕತ್ ಆಯು. ಸೌಲ ಥೋಡದನ್‌ಲಗು ದಮಸ್ಕಮ ಸುವಾರ್ತೆನ ಬೋಲ್ಯೊ ಅಜ್ಜು ವಿಶ್ವಾಸಿನಿ ಬೋಡ್ವಿಫೊ.

ದಮಸ್ಕಮ ಸೌಲನಿ ಬೋಧನೆ

20 ಪೌಲ ತದ್ವುತದೇಸ್, “ಯೇಸು ದೇವ್‌ನೊ ಛಿಯ್ಯೊ” ಕರಿ ಸಭೆ ಮಳಾನಿ ಝಗೋಮ ಬೋಲಾನ ಶುರು ಕರಯ್ಲೊ.

21 ಆ ವಾತೆನ ಖ್ವಮ್‌ಜ್ಜುತೆ ಖ್ವಾರು, “ಯೆರೂಸಲೇಮ್ನ ಆ ಅದ್ವಿಸ್ ಯೇಸುನ ನಾಮ್ನ ವಿಶ್ವಾಸ್ ಕರವಾಳನ ಮಾರಿನಾಖು ಕರ್ತೊಫೋತೆ

ಆಸ್ ಕಾಹೆಕಿ ಶು? ಅಜ್ಜು ಇವ್ಣುನ ಗಲೆಡಯಾಜಕ್‌ಕನ ಧರಿಲೀನ್ ಜಾವ್ಣುಕರೀಸ್ ಆ ಹಜ್ಜ ಐರ್ದೊಸ್ತೆ?” ಕರಿ ಬೋಲಿಲಿದು.

22 ಇನೆ ಅಜ್ಜೂಬಿ ಘಣು ವಚನ್ನು ಆಧಾರ್‌ಥಿ ಯೇಸು ಕ್ರಿಸ್ತಾಸ್ ಜಗತ್ತ್ ಬಚಾಡವಾಳೊಕರಿ ಬೋಲಾನು ಖ್ವಾಚಿಸ್ ಕರಿ ಸೌಲನೆ ದಮಸ್ಕಮಥೂತೆ ಯೆಹೂದ್ಯರ್‌ನ ಸಾಬಿತ್ ಕರಾಯೊ.

23 ಕೆತಾಕಿ ದನ್ನಪಾರ್ ಯೆಹೂದ್ಯವಾಳು ಸೌಲನ ಮಾರಿನಾಕ್ಕುಕರಿ ಖ್ವೊಜ್ ಕರಯ್.

24 ಯೆಹೂದ್ಯರ್‌ವಾಳು ಸೌಲ ಮಳಾನು ದೇಕ್‌ತುಹುಯಿನ್ ನಂಗರ ಖ್ವಾರ ದರ್ದಾಜವ್‌ಕನ ರಾತ್ ದನ್ ಕಾವ್ಲಿ ಥು. ಕತೋಬಿ ಯೋ ಖ್ವಾರ ಸೌಲನ ಮಾಲುಮ್ ಪಡ್ತು.

25 ಏಕ್‌ರಾತ್ ಪೌಲನ ಥೋಡ ಶಿಷ್ಯರ ಣ್ಣಿ ಇನ ಖ್ವಿಯೇರ ಣ್ಣ ಭಾರ್ ಮೋಕ್ಲಾನಟೀಕೆ ಇನ ಏಕ್ ಟೋಕ್ರಾಮ ಬೆಖ್ವಾಡಿನ ಖ್ವಿಯೇರ ಣ್ಣ ಭೀತನ ಉಪ್ಪರ್‌ಥು ಹೇಟ್ ಉತಾರಿದಿದು.

ಯೆರೂಸಲೇಮ್ ಸೌಲ

26 ಸೌಲ ಯೆರೂಸಲೇಮ್ ಜೈನ್ ವಿಶ್ವಾಸಿ ಟೋಳ್ತ ಮಳೀರ್ದೊಣುಕರಿ ಕೋಶಿತ್ ಕರಯ್. ಕತೋಬಿ ಇವ್ಣೆಖ್ವಾರು, ಸೌಲನ ಖ್ವಾಚಮಾಬಿ ಯೇಸುನೊ ಶಿಷ್ಯಕರಿ ನಂಬುಕೊಂತೆ ಇನೇಥಿ ಡರಿಗಯು.

27 ಕತೋಬಿ ಬಾನಬನೆ ಇನ ಮದತ್ ಕರಾನ ಅಪೊಸ್ತಲರ್‌ಕನ ಬುಲೈಲಿನ್ ಆಯೊ. ಸೌಲನೆ ದಮಸ್ಕನ ಮಾರಗ್‌ಮ ಪ್ರಭುನ ದೆಖ್ವೊತೆ ಪ್ರಭು ಸೌಲಥಿ ವಾತೆ ಬೋಲೊತೆ ಅಖ್ವೊಸ್ ಖ್ವಮ್‌ಜಾಡ್ಯೊ. ಕಾಹೆಕೆ ದಮಸ್ಕಮ ಡರ್‌ಕೊಂತೆ ಪ್ರಭು ಯೇಸುನ ನಾಮ್‌ಲೀನ್ ಬೋಧನೆ ಕರಯ್ತೊತೆಯಿನ್ ಇವ್ಣುನ ಬೋಲಿ ಖ್ವಮ್‌ಜಾಡ್ಯೊ.

28 ಇನಬಾದ್ ಸೌಲ ಯೆರೂಸಲೇಮ್ ವಿಶ್ವಾಸಿನಿ ಜೋಡ್ಡ ಮಳಿನ್ ಶಿಕಾಡೊಹುಯಿನ್ ಪ್ರಭುನ ನಾಮ್‌ಥಿ ಡರ್‌ಕೊಂತೆ ಬೋಧನೆ ಕರಾಲಗ್ಯೊ.

29 ಗ್ರೀಕ್ ವಾತೆ ಬೋಲ್‌ತುಧೂತೆ ಯೆಹೂದ್ಯರನ, ಜೋಡ್ಡ ಸೌಲ ಕದೇಬಿ ವಾದ ಕರ್ತೋಥೊ. ಇನಖ್ವಾಜೆ ಇನ ಮಾರಿನಾಕ್ಕುಕರಿ ಕೋಶಿಶ್ ಕರಯ್.

30 ಅನ ಮಾಲುಮ್ ಕರಯ್ತೆ ವಿಶ್ವಾಸಿಖಾರು ಇನ ಕೈಸರೈ ಖ್ವಯೇರನ್ ಬುಲೈಲಿಚೈನ್ ಹಿಜ್ಜಾಡ್ರು ತಾರ್ಸಸ್ ಖ್ವಯೇರನ್ ಮೋಕ್ಕಿದಿದು.

31 ಇನಬಾದ್ರು ಯೂದಾಯ, ಗಲಿಲಾಯ, ಅಜ್ಜು ಸಮಾಯನ್ ತಬರ್‌ಖಾಮ ಥೀತೆ ಖ್ವಾರಿ ಸಭೆಮ ಸಮಾಧಾನ್ ಪಡ್ರು ಸಬೆ ಭಡ್ತುಹುಯಿನ್ ಪ್ರಭುನ ಡರ್‌ಮಾಬಿ ಭಕ್ತಿಮಾಬಿ ಜಿವ್ತುಹುಯಿನ್, ಪವಿತ್ರಾತ್ಮಧಿ ಜಾಖ್ವತ್ ಹೋತುಹುಯಿನ್ ಭಡ್ರು.

ಲುದ್ದ ಅಜ್ಜು ಯೊಪ್ಪಮ ಪೇತ್ರ

32 ಯೆರೂಸಲೇಮ್‌ನು ಅಶ್‌ಪಿಶ್‌ಧೂತೆ ಖ್ವಾರ ಗಾಮ್ ಪೇತ್ರ ಫರ್ತೊಜ್ಜಾವಾನಿ ವಖ್ತೆ ಲುದ್ದಕರಿ ಗಮ್ಮರ್ವಾಳ ದೇವ್ ಅದ್ಮಿಖ್ವಾರಾನ ಮಳ್ಳೊ.

33 ಹಿಜ್ಜಾ ಲಕ್ಕೊಮಾರಿನ್ ಆಟ್ ವರಖ್ವಾ ಥೊ ಬಿಲ್ಲಾವ್ಣಪರ್ ಪಡ್ಯೊಥೋತೆ ಐನೇಯ ಕರಿ ಏಕ್ ಜಣಾನ ದೇಖ್ಲೊ.

34 ಪೇತ್ರನೆ ಯೋ ಅದ್ಮಿನ, “ಐನೇಯ, ಯೇಸು ಕ್ರಿಸ್ತಾಸ್ ತುನ ಅಟ್ಟು ಕರುಕರಸ್. ಉಟ್ ತಾರ ಬಿಲ್ಲಾವ್ಣನ ತೂಸ್ ಬಿಚ್ಚೆಲೇ” ಕರಿ ಬೋಲೊ. ತುರಂತ್ ಯೋ ಉರಿನಿಕ್‌ಳ್ಳೊ.

35 ಲುದ್ದಮ ಅಜ್ಜು ಶಾರೋನ್‌ಮ ರ್ವವಾಳು ಅದ್ಮಿಖ್ವಾರು ಇನ ದೇಖಿನ್ ಪ್ರಭು ಯೇಸುನ ಉಪ್ಪರ್ ವಿಶ್ವಾಸ್ ಕರಯ್.

36 ಯೊಪ್ಪ ಖ್ವಯೇರ್‌ಮ ತಬಿಥಾಬಿ ಯೇಸುನಿ ಏಕ್ ಶಿಷ್ಯೇ ಥಿ. ಗ್ರೀಕ್‌ನಿ ಬೋಲಿಮ ಇನು ನಾಮ್ ‘ದೊರ್ಕ’ ಇನಿ ಮತ್‌ಲಬ್ ‘ಚೀತಳ್‌ಕರಿ’ ಯೋ ಕದೇಬಿ ಅಟ್ಟುಕಾಮ್ ಕರಾವಳಿ ಅಜ್ಜು ದಾನಧರಮ್ ದೈವಾಳಿ ಹುಯಿರ್ದಿಥಿ.

37 ಯೋ ವಖ್ವತ್‌ಮ ಇನ ರೋಗ್ ಅಯಿನ್ ಮರಿಗಯಿ. ಅಜ್ಜು ಇನ ಶರೀರ್‌ನ ಥೊಯಿನ್ ಉಪ್‌ಲ್ಪುಖನ್ನ ಕೋಣಾಮ ಲಯಿನ್ ಮ್ಹೇಲ್ಯ.

38 ಆ 'ಲುಧ್' ಯೊಪ್ಪ ಖ್ವಯೇರ್ನ್ ಖನ್ನೆಸ್ ರ್ವವಾಮ ಪೇತ್ರ ಹಿಜ್ಜಾ ರ್ವವಾನು ಶಿಷ್ಯರನ್ನಿ ಖ್ವಮ್‌ಜಿನ್ "ದಯಾ ಕರೀನ್ ಒಗ್ಗಿಸ್‌ಮ ಹಮಾರ ಗಮ್ತ ಆವ್ತು" ಕರಿ ಬೇಜ್ಜಣಾನ ಬೋಲಿ ಮೋಕ್‌ಲೊ.

39 ಪೇತ್ರ ತಯಾರ್‌ಹುಯಿನ್ ಹಿಜ್ಜಾ ಆಯೊ. ತದೆ ಇನ ಘರಾನ್ ಉಪ್‌ಲ್ಯಖನ್ನ ಕೋಣಾಮ ಬುಲೈಲಿನ್ ಗಯು. ಹಿಜ್ಜಾಧೂತೆ ಮುಂಡಚ್ಚಿಖ್ವಾರು ಪೇತ್ರನ ಅಶ್‌ಪಿಶ್ ರೋವಾತೆಹುಯಿನ್, ಅಜ್ಜು ದೊರ್ಕ ಜಿವ್ತಿಥೀತೆ ತದೆ ಇವ್ವಖ್ವಾಜೇಥಿ ಬಣೈನ್ ದಿದಿಥೀತೆ ಪೇರ್‌ವಾಖ್ವಾ ಅಜ್ಜು ಝುಗ್ಗಾನು ಬಣಾವಟ್ಟ ವತಾಳ್‌ಯೆ.

40 ಅಜ್ಜು ಪೇತ್ರನೆ ಅದ್ಮಿಖ್ವಾರಾನ ಭಾರ್ ಮೋಕ್ಲಿನ್ ಥುಕ್‌ಣ್ಣಮೇಟೆ ಹುಯಿನ್ ಪ್ರಾರ್ಥನೆ ಕರೀ ಶರೀರ್‌ಭಣಿ ಫರೀನ್, "ತಬಿಥಾ, ಉಪ್ಪರ್ ಉಟ್" ಕರಿಬೋಲೊ. ಯೋ ಡೋಳಪಾಡಿನ್ ಪೇತ್ರನ ದೇಕ್‌ಥೀಸ್ ಉರಿ ಭೀರಿಗಯಿ.

41 ಇನೆ ಹಾತ್‌ದೀನ್ ಉಠಾಡಿ ಭೀರಾಖೊ. ತದೆ ವಿಶ್ವಾಸಿಖ್ವಾರು ಅಜ್ಜು ಮುಂಡಚ್ಚಿ ತಯೇಡಾವಾನ್ ಯೊ ಕೋಣಾಮ ಬುಲೈ ಜಿವ್ತುಹುಯಿತೆ ಇನ ಇವ್ವುನ ವತಾಳ್ತೊ.

42 ಯೊಪ್ಪಮ ಹರೇಕ್ ಬಾಜುಮ ಥೂತೆ ಅದ್ಮಿವೋನ ಆ ವಾತೆ ಮಾಲುಮ್ ಪಡ್ಕು. ಯೊ ಅದ್ಮಿಖ್ವಾರಾಮ ಕೆತ್ರೂಕಿ ಭಣು ಪ್ರಭುನ ವಿಶ್ವಾಸ್ ಕರ್ಯೊ.

43 ಪೇತ್ರನೆ ಯೊಪ್ಪಮ ಚಾಂಬ್ಡಾನು ಕಾಮ್‌ಕರವಾಳೊ ಸೀಮೋನ್ನ ಘರಾಮ ಘಣ ದನಾಲಗು ರ್ವಿಯೊ.

10

ಪೇತ್ರ ಅಜ್ಜು ಕೊರ್ನೆಲ್ಯ

1 ಕೈಸರೈ ಖ್ವಯೇರ್‌ಮ ಕೊರ್ನೆಲ್ಯ ಕರಿ ನಾಮ್ನೊ ಏಕ್‌ಜ್ಜಣೊ ಥೊ. ಯೋ ಇಟಲಿನು ಫೊಜ್‌ನೊ ಖ್ವೊಶಿಪಾಯಿನೊ ಅದಿಕಾರಿ ಹುಯಿರೊಡ್ಲೊ.

2 ಯೊ, ಇನು ಕುಟುಂಬವಾಳು ದೇವ್‌ಮ ಡರ್ ಭಕ್ತಿಥೀಬಿ ರಕ್ಷಿನ್ ಜಿವ್ಣು ಕರುಕರ್ತು. ಅಜ್ಜು ಗರೀಬ್‌ನ ಜಾಖ್ತ ದಾನಧರಮ್ ಕರಾವಾಳೊ, ಕದೇಬಿ ದೇವ್ ಪ್ರಾರ್ಥನೆ ಕರಾವಾಳೊ ಹುಯಿರ್ದೊಡೊ.

3 ಏಕ್‌ದನ್ ಧೋಪಾರ್ನ್ ಮ್ಹುಮಾರ್ ತೀನ್ ಘಂಟಾನ ಕೊರ್ನೆಲ್ಯನ ದರ್ಶನ್ ಹುಯು ತದೆ ಏಕ್ ದೇವ್‌ನೊ ದೂತ ಇನಾಕನ ಐನ್, “ಕೊರ್ನೆಲ್ಯ” ಕರಿ ಚಿಕ್ರಾನು ನೇರ್‌ಧಿ ದೇಖ್ಚೊ.

4 ಕೊರ್ನೆಲ್ಯ ಡರಿನ್ ದೇವ್‌ದೂತನ ಠರ್‌ಕೈನ್ ದೇಕ್ಚೊ ಹುಯಿನ್ “ಪ್ರಭು ಆ ಶಾತ್?” ಕರಿ ಬೋಲ್ಚೊ ತದೆ ದೇವ್‌ನೊ ದೂತನೆ ಇನ, ತಾರಿ ಪ್ರಾರ್ಥನೆಬಿ, ತಾರಿ ದಾನ್ ಧರಮ್ ಅಖ್ವು ದೇವ್ನಿ ಸನ್ನಿಧಿಮ ಖ್ವಿಯಾಲ್‌ಧಿ ಪೊಚಿರ್ದೊಸ್;

5 ಹಮ್ಗೆ ತೂ ಧೋಡು ಜಣಾನ ಯೊಪ್ಪನ ಮೋಕ್ಲಿನ್, ಪೇತ್ರಕರಿ ಬೋಲ್ಚಿಲ್ಯವಾಳೊ ಸೀಮೋನನ ಬುಲಾವ್ಣು.

6 ಯೋ ಭಾಂಬ್ವಾನು ಕಾಮ್‌ಕರಾವಾಳೊ ಸೀಮೋನನ ಘರ್‌ಮ ಛಾ. ಇನುಘರ್ ದರ್ಮ್‌ವ್ ಕಿನಾರೆ ಛಾ ಕರಿ ಬೋಲ್ಚೊ.

7 ಕೊರ್ನೆಲ್ಯನೆ ಇನ ಜೋಡ್ಡ್ ವಾತೆಬೋಲ್ಯಾತೆ ದೇವ್‌ನೊ ದೂತ ಚಲೇಗೊತದೆ, ಇನ ಘರ್‌ಮಥಾತೆ ಬೇಜ್ಜಣ ಸೇವಕ್‌ನ ಅಜ್ಜು ಇನಿ ಜೋಡ್ಡ್ ರ್ವವಾಳ ಶಿಪಾಯಿಮ ಏಕ್ ಜಣೊ ದೇವ್‌ಮ ಭಕ್ತಿರ್ದೊಹವಾಳೊ ಶಿಪಾಯಿನ ಬುಲೈನ್,

8 ಇವ್ಣುನ ಕೊರ್ನೆಲ್ಯನೆ, ಆ ಚಾಲ್ಯಾತೆ ಅಖ್ವೊಸ್ ಇವ್ಣುನ ಬೋಲಿನ್ ಯೊಪ್ಪನ ಮೋಕ್‌ಲ್ಚೊ.

9 ಇನ ಅಗಲ್ಯದನ್ನೆ ಯೊ ಅದ್ಮಿಖ್ವಾರು ಯೊಪ್ಪನ ಚಲ್ಯಾವದಿನ್ ತದೆ ದೊಫಾರ್ನಿ ವೇಳ್ ಪೇತ್ರ ಪ್ರಾರ್ಥನೆ ಕರಾನ ಘರ್‌ನ ಉಪ್‌ಲ್ಯ ಛತ್‌ಪರ್ ಗಯೊ.

10 ಪೇತ್ರನ ಘಣು ಭುಕ್‌ಲಾಗಿನ್ ಶಾತ್ತೊಬಿ ಖಾವ್ಣು ಕರಿ ಆಖ್ವೊಕರ್ದೊ, ಯೋ ಖಾಣು ತಯಾರ್ ಕರುಕರಾಸ್ತು ಇನ ಏಕ್ ದರ್ಶನ್‌ಹುಯಿ.

11 ತದೆ ಆಕಾಶ್ ನಿಕ್ಕಿನ್ ಚಾರ್ ಕೋಣಾನ ಭಂದಾಯುಹುಯು ಮೋಟಿ ರೋಳಿನಿತರಾನು ಏಕ್ ಜಿನಖ್ವ್ ಜಮೀನ್‌ಪರ್ ಉತ್ರಿ

ಉಳ್ಳಾವ್‌ತುಧೂತೆ ದೇಖ್ಚೊ.

12 ಇನಾಮ ಅಖ್ವೀಸ್ ಥರಾನು ಜಾನ್ವರ್‌ಖ್ವಾರು ಜಮೀನ್‌ಪರ್ ಖ್ವವಳ್ಳು ಫಾಲಾನು ಕೀಡ್‌ಕಮ್ಮು ಅಜು ಆಬ್‌ಪರ್ ಉಡಂತು ಜಿನಾವರ್ ಖ್ವಾರು ಹಿಜ್ಜಧೂ.

13 ತದೆ, 'ಪೇತ್ರ, ಉರಿನ್, ವ್ಹಾಡಿ ಖಾ' ಕರಿ ಇನ ಏಕ್ ಅವಾಜ್ ಖ್ವಮಜ್‌ಪಡ್ಕು.

14 ಕತೋಬಿ ಪೇತ್ರನೆ, ಇಮ್‌ಕರಾನ ಕೊಹುವಾನಿ ಪ್ರಭು, ಕಚಿಂಡ್ ರಾಟ್ರು ರ್ವೊವೊ ಅಜು ಅಶುದ್ಧ ಹುಯುತೆ ಚೀಞ್‌ನ ಮೆ ಕದೇಬಿ ಖಾದೊಹುಯೊ ಕಾಹೆ" ಕರಿ ಬೋಲ್ಚೊ.

15 ಕತೋಬಿ ಯೊ ಅವಾಜ್ ಬಿಜೇಕ್ ಹಲ್ಲ ಇನ, "ದೇವ್ ಪಾಕ್ ಕರಿರಾಖ್ಚೊತೆ ಅನಅಖ್ವು ಮೈಲುಕರಿ ನಾಬೋಲ್ನು ಕರಿ ಪಾಲ್ಟೊ ಭೇನೆಹಲ್ಲ ಇನ ರವ್‌ಕೊ ಖ್ವಮಜ್‌ಪಡ್ಕು.

16 ಅಮ್ಮಸ್ ತೀನ್‌ಹಲ್ಲ ಹುಯು ಇನ ಬಾದ್ಮ ಯೋ ಜಿನಖ್ವ್ ಸೊರ್ಗಾಮ ಪಡ್ಚೆಲೆವೈಗು.

17 ಪೇತ್ರನೆ, ಇನೆ ದೇಖ್ಚೊತೆ ದರ್ಶನ್ ಶಾತ್‌ರ್ಟ್ವೀಣು ಕರಿ ಸೋಚಾನಿ ವಖ್ತ್‌ಮ ಕೊರ್ನೆಲ್ಯನೆ ಮೋಕ್‌ಲ್ಯೋಥೋತೆ ಅದ್ವಿಖ್ವಾರು ಸೀಮೋನ್ನ್ ಘರ್‌ನ ಪುಲ್ಲಾವ್ತುಹುಯಿನ್ ಖ್ವಣೇದ್ ಧರೀನ್ ಅಜು ಯೋ ಘರ್‌ನ ಬಾಕಲ್‌ನ ಖ್ವಾಮ್ಜೆ ಆಯಿನ್ ಭೀರಲ್ಯ.

18 "ಪೇತ್ರಕರಿ ಬೋಲಸ್ತೆ ಸೀಮೋನ ಹಜ್ಜ ಲ್ಲಾಕಿ ಶು?" ಕರಿ ಬೋಲ್ಚೊ.

19 ಪೇತ್ರ ದರ್ಶನ್ನಿ ಬಾರೇಮ ಬಿಜೂಬಿ ಸೋಚುಕರಾನಿ ವಖ್ತ್‌ಮ ಪವಿತ್ರಾತ್ಮನೆ ಇನ, ಸೀಮೋನ ತೀನ್ ಅದ್ಮಿತುನ ಡೂಂಡ್‌ತುಹುಯಿನ್ ಐರ್ಲ್ಯಸ್.

20 ತೂ ಉರೀನ್ ಹೇಟ್ ಉತ್ರಿನ್ ಶಾಕ್ತಿ ಗುಮಾನಿ ನಾಕರ್ಲ್ಯತೆ ಇವ್ಚಿ ಬೋಡ್ಡುಜಾ ಅಜು ಪಾಲ್ಟೊ ಧಕೀಶ್ ನಕೊ. ಮೇಸ್ ಇವ್ಚುನ್ ತಾರಕನ ಮೋಕ್ಸಿರಾಖ್ಚೊಸ್" ಕರಿ ಬೋಲ್ಚೊ.

21 ಪೇತ್ರ ತದೆ ಹೇಟ್ ಉತ್ರಿನ್ ಯೋ ಅದ್ಮಿವ್‌ಕನ ಜೈನ್, "ತುಮೆ ಡೂಂಡುಕರಾಸ್ತೆ ಯೊ ಅದ್ಮಿ ಮೇಸ್, ತುಮೆ ಹಜ್ಜ ಶನ ಆಯಾ? ಕರಿ

ಪುಲ್ಲಾಯೊ.

22 ತದೆ ಇವ್ವೆ “ಕೊರ್ನೆಲ್ಯಕರಿ ಖ್ವೊಶಿಪಾಯಿನೊ ಮೋಟೊ ಲ್ಲಾ. ಯೋ ನೀತಿಮ ಭಾಲವಾಳೊ; ದೇವ್‌ಧಿ ಡರಾವಾಳೊ ಅಜ್ಜು ಯೆಹೂದ್ಯರನ್ನ ಅದ್ವಿ ಖ್ವಾರು ಇನ ಮರ್ಯಾದಿ ದೇಸ್. ತುನ ಇನ ಘರೆ ಬುಲೈನ್ ತೂ ಬೋಲಾನಿ ವಾತೇನ ಖ್ವಮಜ್ಞಣುಕರಿ ದೇವ್‌ನೊ ದೂತಧಿ ಕೊರ್ನೆಲ್ಯನ ಬೋಲಿರಾಖ್ಯೊಸ್” ಕರಿ ಬೋಲ್ಯು.

23 ಪೇತ್ರನೆ ಇವ್ವುನ ಮಹಿ ಬುಲೈನ್, ಸತ್ಕಾರ್ ಕರೀನ್ ಯೋ ರಾತ್ ಹಿಜ್ವಾಸ್ ರ್ವವಾನಿತರ ಕರೈಯೊ ಇನವ್ವಾಣೆ ಪೇತ್ರ ತಯಾರ್‌ಹುಯಿನ್ ಇವ್ವ ಬೋಡ್ಡು ಗಯೊ. ಯೊಪ್ಪನು ವಿಶ್ವಾಸಿಮ ಥೋಡುಭಣು ಇನ ಜೋಡೆಗಯು.

24 ಇನ ಅಗ್ಲದನ್ನೆ ಇವ್ವೆ ಕೈಸರೈನಂಗರನ್ನ ಪೋಚ್ಚುತದೆ ಕೊರ್ನೆಲ್ಯನೆ ಇವ್ವ ಮಾಯಮಾತ್ರಾನಾಬಿ ಅಜ್ಜು ಸಾಧೀನ ದೋಸ್ತನ ಬುಲೈಲಿನ್ ಪೇತ್ರನಖ್ವಾಜೆ ಟಿವೈರೈಯೊ.

25 ತದೆ ಪೇತ್ರ ಘರ್‌ಕನ ಆವಖ್ವತರ್ ಕೊರ್ನೆಲ್ಯನೆ ಗೋಡಾಪರ್ ಪಡೀನ್ ಖ್ವಲಾಮ್ ಕರೈಯೊ.

26 ಕತೋಬಿ ಪೇತ್ರನೆ, “ಉರೀನ್ ಭೀರೆ ಮೇಬಿ ತಾರಿನಿತರ ಅದ್ವಿ” ಕರಿಬೋಲ್ಯೊ.

27 ಅಜ್ಜು ಇನ ಉರಾಡೀನ್ ವಾತೆ ಬೋಲ್ವೊಹುಯಿನ್ ಮಹಿ ಗಯೊ. ಹಿಜ್ವಾಘಣು ಅದ್ವಿನಿ ಝೂಂಡ್ ಭರೈರೈತೆ ಇನೆ ದೇಖ್ಯೊ.

28 ಪೇತ್ರನೆ ಇವ್ವುನ, “ಯೆಹೂದ್ಯವಾಳವೊ ಏಕ್ ಭಣೊ ಅಲಕ್‌ಅದ್ವಿಧಿ ಮಳೀನ್ ರ್ವವಾನುರೈವೊ, ಇವ್ವಿಜೋಡೆ ರ್ವವಾನು ಯೆಹೂದ್ಯರನ ಪದತ್ತಿನ ವಿರೋದ್ ಹುಯಿರೈಯೊಸ್ ಕರಿ ತುಮೂನ ಮಾಲುಮ್ ಲ್ಲಾ. ಕತೋಬಿ ಖಿವಿ ಅದ್ವಿನಾಬಿ ಕಮ್‌ಶಿಲ್‌ವಾಳೊ, ಅಪವಿತ್ರವಾಳೊ ಕರಿ ನಾ ಬೋಲ್‌ನು ಕರಿ ದೇವ್ ಮನ ವತಾಳಿರಾಖ್ಯೊಸ್.

29 ಇನಖ್ವಾಜೆ ತುಮೆ ಮನ ಬುಲಾವ್ವುಕರಿ ಆವಾನಿ ವಖ್ವತ್‌ಮ ಏಕ್ ವಾತ್‌ಬಿ ಬೋಲ್ವೊಕೊಂತೆ ಆಯೊ. ಕತೋಬಿ, ತುಮೆ ಶನ

ಬುಲಾಯಧಾ ಕರಿ ಹಮ್ಮೆ ತುಮೆ ಬೋಲೊ” ಕರಿ ಬೋಲೊ.

30 ತದೆ ಕೊರ್ನೆಲ್ಯನೆ, “ತೀನ್ ಚಾರ್ ದನ್ನ ಅಗ್ಗಳ್ ಮೇ ಮಾರ ಘರ್‌ಮ ಪ್ರಾರ್ಥನೆ ಕರಾನ ಧೋಪಾರ್ ತೀನ್ ಘಂಟಾನ ಅಪ್‌ಗುಪ್‌ಥೀಸ್ ಉಜಾಖ್‌ನು ಲುಂಗ್ಡು ಫೇರಿರಾಖೊಧೋತೆ ಏಕ್‌ಭಣೊ ಮಾರ ಖ್ವಾಪ್ಪೆ ಭೇರಿಗೊ.

31 ಇನೆ ಬೋಲೊ ಕೊರ್ನೆಲ್ಯ ದೇವ್ ತಾರಿ ಪ್ರಾರ್ಥನೆನ ಖ್ವಮ್‌ಜಿರಾಖೊಸ್. ತೂ ಗರೀಬ್‌ನ ದಾನ್ ಧರಮ್ ಕರಾನು ದೇಖಿನ್ ತುನ ಪಸಂದ್ ಕರಿರಾಖೊಸ್.

32 ಇನಖ್ವಾಜೆ; ತೂ ಕಿನಾತೋಬಿ ಯೊಪ್ಪನ ಮೋಕ್ಲಿನ್ ಪೇತ್ರಕರಿ ಬೋಲೈಲ್ಯವಾಳೊ ಸೀಮೋನನ ಬುಲಾವ್ಪು ಯೋ ಚಾಂಬ್ಡಾನು ಕಾಮ್‌ಕರಾವಾಳೊ ಸಿಮೋನನ ಘರ್‌ಮ ಲ್ಹಾ. ಯೋ ಘರ್ ದರ್ಯ್ವ ಕಿನಾರೆ ಲ್ಹಾ ಕರಿ ಬೋಲೊ.

33 ಇಮ್ಮಸ್ ಮೇ ಒಗ್ಗಿಸ್‌ಮ ತುನ ಬುಲಾವನ ಮೋಕ್‌ಲೊ.ತುಮೆ ಹಜ್ಜಾ ಆಯೋತೆ ಅಟ್ಟುಹುಯು. ಹಮೂನ ಬೋಲಾನು ಕರಿ ಹುಕುಮ್ ದೀರಾಖೊಸ್ತೆ ಅಮ್ಮಿಸ್ ಹಮೆ ಖ್ವಮ್‌ಜ್‌ಣು ಕರಿ ಪ್ರಭುನಿ ಝಗೋಮ ಮಳಿರ್ದಾಸ್.” ಕರಿ ಬೋಲೊ.

ಪೇತ್ರನಿ ಬೋಧನೆ

34 ಪೇತ್ರನೆ ಉಪದೇಶ್ ಬೋಲೊಹುಯಿನ್ ಅಮ್ ಬೋಲೊ, “ದೇವ್‌ಮ ಖ್ವಾರುಜಣು ಎಕ್ಕ್‌ಸ್ ಕರಿ ಬೋಲಾನು ಖ್ವಾಚಿ ಕರಿ ಮನ ಹಮ್ಮೆ ಸೋಚಾಯು.

35 ಇನ ಆರಾದನೆ ಕರಾಮ ಖಿವು ಅದ್ವಿನರ್ದವೊ ನೀತಿಥಿ ಅಜ್ಜು ಇನಾಮ ಡರಿನ್ ಚಾಲಸ್ಕಿ ಇವ್ಣುನ ದೇವ್ ಪಸಂದ್ ಕರಾಸ್‌ಕರಿ ಬೋಲಾನು ಮನ ಹಮ್ಮೆ ಗುಮಾನಿಕೊಂತೆ ಮಾಲುಮ್‌ಪಡುಕರಸ್. ಯೊ ಪಿವ ಭಾತ್ಲಮಾತ್ ಕರಿ ಬೋಲಾನು ಹಜ್ಜಾ ಖ್ವಾಯಿಕೊಯ್ತಿ.

36 ದೇವ್ ಇಸ್ರಾಯೇಲ್‌ನ ಅದ್ವಿನ ಜೋಡ್ ಬೋಲೊಧೊ ಯೋಸ್ ಖ್ವಾರುಜಣನ ಪ್ರಭು ಹುಯಿರ್ದೊಸ್.ಯೊ ಯೇಸು ಕ್ರಿಸ್ತಾಥೀಸ್

ಸಮಾಧಾನ್ ಆವ್‌ಶೆಕರಿ ಬೋಲಾನು ಸುವಾರ್ತೆನ ದೇವ್ನೆ ಇವ್ಣುನ ಮೋಕ್‌ಲೊ.

37 ಬ್ಯಾಪ್ತಿಸ್ಮ ಕರ್ತೆಲೇವ್ಣುಕರಿ ಯೋಹಾನನೆ ಬೋಲಿ ಖ್ವಮ್‌ಜಾಡ್ಯೊತೆ ಇನಕೇಡೆಥು ಆ ವಚನ್ ಗಲಿಲಾಯಥು ಧರಿನ್ ಯೂದಾಯ ತಬರ್‌ಖಾಮ ಫೈಲು.

38 ದೇವ್ನ್ ನಜರೇತ್‌ನ ಯೇಸುನಿ ಬಾರೇಮ ಮಾಲುಮ್. ಇನ ಪವಿತ್ರಾತ್ಮಧಿಬಿ ಶಕಧಿ ಅಬಿಷೇಕ್ ಕರ್ಚೊ ಯೊ ಅಖ್ವೀಸ್ ಬಾಙೂಮ ಫರ್ತೊಹುಯಿನ್ ಅದ್ಮಿಖ್ವಾರನ ಅಘ್ಣು ಕರ್ಚೊ. ಭೂತ್ ಧರಿರ್ಲ್ಲ್ವಾವಳನಬಿ ಗುಣ್‌ಕರ್ಚೊ. ಶನಕತೊ ದೇವ್ ಇನಿ ಜೋಡ್ಡ ಛಾಕರಿ ಬೋಲಾನು ವತಾಳಿದಿದೊ.

39 ಯೆಹೂದ್ಯವಾಳನ ತಬರ್‌ಖಾಮ ಅಙ್ಣು ಯೆರೂಸಲೇಮ್ಮ ಯೇಸುನೆ ಕರ್ಚೊತೆ ಅಖ್ವಾಸ್ ಕಾಮ್ ಹಮೆ ದೇವ್ನ್. ಇನ ಹಮೆ ಸಾಕ್ಷಿ ಹುಯಿರ್ಲ್ಲ್ವಾಸ್ ಕತೋಬಿ ಯೇಸು ಮರ್ತ್ಯೆಗಯೊ. ಇವ್ಣೆ ಇನ ಶಿಲ್‌ಬೆಪರ್ ಮೇಕೆಮರಾಯು.

40 ಕತೋಬಿ ದೇವ್ನೆ ಇನ ತೀನ್‌ದನ್‌ಮ ಮರಣ್‌ಥು ಜಿವ್ತೊ ಉಠಾಡ್ಯೊ. ನೇರ್ ದೇಖಾನ ಪಾಛೊದಿದೊ.

41 ಕತೋಬಿ ಯೇಸು ಖ್ವಾರಸ್ ಅದ್ಮಿನ ದೆಖಾಯೊ ಕೊಯ್ನಿ ದೇವ್‌ಥಿ ಪಹಿಲೇಸ್ ಸಾಕ್ಷಿಹುಯಿ ಚೂಣ್ಣೆರ್ಲ್ಲ್ವೊತೆ ಇವ್ಣೆಖಲಿ ಇನದೇಖ್ಣು. ಯೇಸು ಮರಣ್‌ಥಿ ಜಿವ್ತೊಹುಯಿನ್ ಉಠೀನ್ ಆವಾನಿ ವಖ್ವಾತೆ ಅಪ್ಣೆ ಇನಿ ಜೋಡ್ಡ ಖಾಣು ಖಾದ ಅಙ್ಣು ಪಾಣಿ ಪೀದ.

42 ಅಙ್ಣು ಯೋಸ್ ಜಿವ್ತುರ್ಲ್ಲ್ವಾವಳನ, ಮರಿರ್ಲ್ಲ್ವಾವಳನ ದೇವ್‌ಥಿ ನ್ಯಾವ್‌ನೊ ಅಧಿಪತಿಹುಯಿನ್ ಚೂಣಾಯೊಹುಯೊ ಕರಿ ವತಾಳನಖ್ವಾಜೆ ಸಾಕ್ಷಿ ಬೋಲ್‌ನು ಕರಿ ಅಪ್ಣುನ ಹುಕುಮ್ ದಿದೊ.

43 ಇನ ನಂಬಾವಾಳನು ಹರೇಕ್‌ಜಣು ಪಾಪ್ ಇನ ನಾಮ್‌ಥಿ ಕ್ಷಮಾಪಣ್ ಮಳ್‌ಶೇತೆ. ಆ ಖ್ವಾಚಸ್‌ಕರಿ ಪ್ರವಾದಿಖ್ವಾರು ಸಾಕ್ಷಿ ಬೋಲಿರಾಖ್ಯುಸ್” ಕರಿ ಬೋಲೊ.

ಯೆಹೂದ್ಯರ್ ಕಾಹೆತೆ ಇವ್ಣೆ ಪವಿತ್ರಾತ್ಮನ ಲಿದೂತೆ

44 ಪೇತ್ರ ಬಿಜೂಬಿ ಇಮ್ಮಸ್ ಬೋಲಾತೆ ವಚನ್ ಖ್ವಮ್‌ಜುಕರಾತೆ ತದೇಸ್ ಇನಿ ವಚನ್ ಖ್ವಮ್‌ಜುತೆ ಅಖ್ವಾನ ಉಪ್ಪರ್ ಪವಿತ್ರಾತ್ಮ ಉತ್ರಿನ್ ಆಯು.

45 ಯೆಹೂದ್ಯರ್‌ಕಾಹೆತೆ ಅದ್ವಿಖ್ವಾರಾನ ಉಪ್ಪರ್ ಪವಿತ್ರಾತ್ಮನು ವರ ಉತ್ರಿ ಆವಾನು ದೇಖಿನ್ ಪೇತ್ರನಿಜೋಡ್ಕ ಯೊಪ್ಪಥು ಆಯುತೆ ಯೆಹೂದ್ಯರ್ ವಿಶ್ವಾಸಿಖ್ವಾರು ಆಶ್ಚರ್ಯಕರಂ.

46 ಶನಕತೊ ಇವ್ಣೆ ಅಲಕ್ ಅಲಕ್ ಬೋಲಿನಿ ವಾತೇಮ ದೇವ್ ಆರಾದನೆ ಕರಾನು ಯೊ ಯೆಹೂದ್ಯರನ್ನು ವಿಶ್ವಾಸಿಖ್ವಾರು ಖ್ವಮ್‌ಜು.

47 ತದೆ ಪೇತ್ರನೆ ವಾತೆ ಬೋಲೊಹುಯಿನ್, “ಆ ಅದ್ವಿಬಿ ಪವಿತ್ರಾತ್ಮದಿ ಭರಾಯು ಅವ್ಣನ ಪಾಣಿಮ ಬ್ಯಾಪ್ತಿಸ್ತ ಕರಾವನ ಶನೀಬಿ ಅಡ್ಡಿಕೊಯ್ನಿ?” ಕರಿ ಬೋಲೊ.

48 ಅನಖ್ವಾಜೆ ಇವ್ಣನ ಕ್ರಿಸ್ತನ ನಾಮ್‌ದಿ ಬ್ಯಾಪ್ತಿಸ್ತ ಲೇವ್ಣಕರಿ ಹುಕುಮ್ ದಿದೊ. ತದೆ ಇವ್ಣೆ ಪೇತ್ರನ ಥೋಡ ದನ್ ಹಮಾರ ಜೋಡ್ಕ ರಡ್ವೆವ್ಣಕರಿ ಬೋಲಿಲಿದು.

11

ಯೆರೂಸಲೇಮ್ಮಿ ಸಭೆನ ಪೇತ್ರನೆ ಬೋಲೊತೆ

1 ಯೆಹೂದ್ಯರ್‌ಕಾಹೆತೆ ವಿಶ್ವಾಸಿಖ್ವಾರು ದೇವ್‌ನಿ ವಚನ್‌ನ ಸ್ವೀಕಾರ್‌ಕರಂ ಕರಿ ಅಪೊಸ್ತಲರ್‌ವಾಳನಾಬಿ ಯೂದಾಯಮ ಥೂತೆ ವಿಶ್ವಾಸಿನ ಮಾಲುಮ್‌ಹುಯು.

2 ಪೇತ್ರ ಯೆರೂಸಲೇಮ್ಮಿ ಆಯೊತೆ ತದೆ ವಿಶ್ವಾಸಿಖ್ವಾರನ ಜೋಡ್ಕ ಖ್ವತ್ನಾನಿ ಬಾರೇಮ ವಾದ ಕರ್ತುಹುಯಿನ್;

3 ತೂ, “ಯೆಹೂದ್ಯರ್ ಕಾಹೆತೆ ಇವ್ಣಕನಾಬಿ ಅಜು ಖ್ವತ್ನ ಕರಾಯುಕೊಂತೆ ಇವ್ಣ ಘರೇಬಿ ತುನೆ ಇವ್ಣಿಜೋಡ್ಕ ಜೈನ್ ಖಾಣುಬಿ ಖಾದೊ ಕರಿ ಬೋಲ್ಯು.

4 ಇನಖ್ವಾಜೆ ಪೇತ್ರನೆ ಹಿಜ್ವಾ ಶಾತ್ ಚಾಲ್ಯುಕಿ ಯೊ ಅಖ್ವು ಬೋಲೊಹುಯಿನ್;

5 ಪೇತ್ರನೆ ಇವ್ವುನ, ಮೆ ಯೊಪ್ಪ ಖ್ವಯೇರ್ಮ ಪ್ರಾರ್ಥನೆ ಕರಾನಿ ವಖ್ವಾತೆ “ಮನ ಏಕ್ ದರ್ಶನ್ ದೆಖಾಯು. ಯೋ ಶಾತ್‌ಕತೊ ಆಕಾಶ್‌ಥು ಚಾರ್ ಕೋಣಾನ ಶಿಂದ್ರೂಭಂದ್ಯೆನ್ ಉತ್ರಿವಳ್ಳಾವ್ತು ಧೂತೆ ಯೋಳಿನಿತರಾನು ಏಕ್ ಜಿನಖ್ವ್ ಮಾರಕನಾಸ್ ಉತ್ರಿ ಆಯು.

6 ಮೆ ಇನಾಮಹಿ ದೇಖ್ಚೊ ಇನಾಮ ಧರ್ತಿನು ಜಾನ್ವರ್ ಅಜು ಅಖ್ವು ಛಂಡಾಳಿ ಜಾನ್ವರ್, ಖ್ವವಳ್ಳು ಚಾಲಾನು ಕೀಡ್‌ಕಮ್ಮು ಅಖ್ವು ಆಬ್‌ಪರ್ ಉಡಂತು ಜಿನಾವರ್ ಖ್ಬಾರು ಹಿಜ್ಜಧೂ.

7 ತದೆ ‘ಪೇತ್ರ, ಉರಿನ್, ವ್ಹಾಡಿ ಖಾ’ ಕರಿ ಬೋಲಾನೊ ಏಕ್ ಆವಾಙ್ ಮನ ರವ್‌ಕೊ ಖ್ವಮ್‌ಜ್ಯೊ.

8 ತದೆ ಮೆ, ‘ಮೆ ಇಮ್‌ಕರಾನ ಕೊಹುವಾನಿ ಪ್ರಭು’ ಕಚಿಂಡ್ ರಾಟ್ರು ರ್ವವೊ ಅಜು ಅಶುದ್ಧ ಹುಯುತೆ ಚೀಙ್‌ನ ಮೆ ಕದೇಬಿ ಖಾದೊಕೊಯ್ನ್ ಕರಿ ಬೋಲ್ಚೊ.

9 ಇನಖ್ವಾಜೆ, ಆ ಅಖ್ವಾನ ದೇವ್ನೆ ಪಾಕ್ ಕರಿರಾಖ್ಚೊತೆ ಅನಅಖ್ವು ಮೈಲುಕರಿ ನಾಬೋಲ್ನು ಕರಿ ಬೇನೆಹಲ್ಲಬಿ ಆಬ್‌ಮಾಥು ರವ್‌ಕೊ ಬೋಲಾಯು.

10 ಅಮ್ಕಸ್ ತೀನ್‌ಹಲ್ಲ ಹುಯು. ಇನಪಾರ್ ಯೊ ಅಖ್ವು ಜಿನಖ್ವ್ ಸೊರ್ಗಾಮ ಪಡ್ಚೆಲೆವ್ಕೆಗು.

11 ಯೋಸ್ ವೇಳ್ ಮೇ ಥೋತೆ ಘರ್‌ನ ಖ್ವಾಮ್ಚೆ ತೀನ್‌ಜಣ ಆಯಾ ಯೊ ತೀನ್‌ಜಣಾನ ಕೈಸರ್ಚೆ ಖ್ವಯೇರ್ಮ ಮಾರಕನ ಮೋಕ್‌ಲೆರ್‌ದ್.

12 ಪವಿತ್ರಾತ್ಮನೆ ಮನ ಬೋಲ್ಚೊಗುಮಾನಿ ನಾಕರ್‌ನ್ತೆ ಇವ್ಚಿ ಜೋಡ್ಡ ಜಾ ಕರಿ ಬೋಲ್ಚೊ. ಆ ಥೋ ಜಣ ಭೈಯೇ ಮಾರಿಜೋಡ್ಡ ಆಯಾ ಹಮೆ ಕೊರ್ನೆಲ್ಯನ ಘರೆಗಯ.

13 ತದೆ ಇನೆ ದೇವ್‌ನೊ ದೂತ ಮಾರ ಘರ್‌ಮ ಭಿಯೊಥೋತೆ ಇನ ಬಾರೇಮ ಮನ ಬೋಲ್ಚೊ. ಯೊ ದೇವ್‌ನೊ ದೂತನೆ ಕೊರ್ನೆಲ್ಯನ, ತೂ ಥೋಡ ಜಣಾನ ಯೊಪ್ಪನ ಮೋಕ್ಲಿನ್ ಪೇತ್ರಕರಿ ಬೋಲ್ಚೆಲ್ಯವಾಳೊ ಸೀಮೋನನ ಬುಲೆಲೆ.

14 ಯೊ ತುಮಾರಿ ಜೋಡ್ಡ ಉಪದೇಶ್ ಬೋಲ್‌ಶೆ ಯೊ ಬೋಲ್‌ಶೇತೆ ಬೋಧನೆಥಿ ತುನಾಬಿ ತಾರ ಪರಿವಾರ್‌ನಾಬಿ ರಕ್ಷಣೆಮಳ್‌ಶೆ

ಕರಿ ಬೋಲ್ಯೊ

15 'ಮೇ ಮಾರಿ ಉಪದೇಶ್‌ನ ಶುರುಕರೊ ತದೆ, ಶುರೂಮ ಪವಿತ್ರಾತ್ಮ ಉತ್ರಿನ್ ಆಯು. ಇಮ್ಮಸ್ ಇವ್ವ ಉಪ್ಪರ್‌ಬಿ ಆಯೊ.

16 ತದೆ ಮೆ ಪ್ರಭುನಿ ವಾತೆನ ಖ್ವಿಯಾಲ್‌ಕರಿಲಿದೊ; ಇನೆ 'ಯೋಹಾನನೆ ಅದ್ಮಿವ್‌ನ ಪಾಣಿಥಿ ಬ್ಯಾಪ್ತಿಸ್ಮ ಕರಾಯೊ ಕತೋಬಿ ತುಮೆ ಪವಿತ್ರಾತ್ಮದಿಬಿ ಬ್ಯಾಪ್ತಿಸ್ಮ ಕರೈಲಿಶು' ಕರಿ ಬೋಲಿರಾಖೊಡೊ.

17 ಪ್ರಭು ಯೇಸುಕ್ರಿಸ್ತಮ ವಿಶ್ವಾಸ್‌ರಾಖ್ಯಾತೆ ಆಪ್ಣುನ ದಿದೋತೆ ವರನಾಸ್ ದೇವ್ವ ಆ ಅದ್ಮಿವೋನಾಬಿ ದಿದೊ. ಅಮರ್ತ್ವಾನಾಪರ್ ಮೆ ದೇವ್ವ ಕಾಮ್ ಭೀರಾಖಾನ ಮೇ ಕೋಣ್? ಕರಿ ಬೋಲ್ಯೊ

18 ಆ ವಾತೆನ ಇವ್ವೆ ಖ್ವಮ್‌ಜಿನ್ ರಿಟ್ಕಾರ್ ಕರಾನು ಮ್ಹಂದಿನ್; ಇಮ್‌ಕತೊ ದೇವ್ ಯೆಹೂದ್ಯರ್‌ಕಾಹೆತೆ ಇವ್ವುನಾಬಿ ಜಾನ್‌ದೇವ್ವುಕರಿ ಇವ್ವ ದಿಲ್ವ ಇನಾಭಣಿ ಫರಾಯೊ ಕರಿ ದೇವ್ವ ಖ್ವರಾಯು.

ಅಂತಿಯೋಕ್ಯ ಖ್ವಯೇರ್‌ಮ ಕ್ರಿಸ್ತನಿ ಸಭೆ

19 ಸ್ತೆಫನನ ಮರ್‌ನಾಖ್ಯಾತೆ ತದೆ ಹಿಜ್ಜಾ ಹುಯಿತೆ ಖ್ವತಾಪ್ಪಿಥಿ ಥೋಡುಜಣು ವಿಶ್ವಾಸಿಖ್ವಾರು ಛಿದ್ರಯ್‌ಗಯು, ಇವ್ವೆ ಘಣಾದೂರ್‌ನಿ ಝಗೊಹುಯಿರಿಥೀತೆ ಫೊಯಿನಿಕೆ, ಸೈಪ್ರಸ್ ಅಜು ಅಂತಿಯೋಕ್ಯನ ಗಯು. ವಿಶ್ವಾಸಿಖ್ವಾರು ಆ ಝಗೋಮ ಖಲಿ ಯೆಹೂದ್ಯರ್‌ನ ಸುವಾರ್ತೆನ ಬೋಲ್ಯು.

20 ಆ ವಿಶ್ವಾಸಿಮ ಥೋಡುಜಣು ಸೈಪ್ರಸ್ ಅಜು ಸಿರೇನ್ ಝಗೊವಾಳ ಹುಯಿರಾಡ. ಆ ಅದ್ಮಿಖ್ವಾರು ಅಂತಿಯೋಕ್ಯನ ಆಯುತೆ ತದೆ ಇವ್ವೆ ಪ್ರಭು ಹುಯಿರೋತೆ ಯೇಸುನಿ ಬಾರೇಮ ಸುವಾರ್ತೆನ ಹಿಜ್ಜಾ ಥೋಡ ಗ್ರೀಕ್ ಅದ್ಮಿವೋನ ಬೋಲ್ಯು.

21 ಪ್ರಭುನೊ ಹಾತ್ ಇವ್ವಪರ್ ಥು, ಅಜು ಅದ್ಮಿಖ್ವಾರು ಕೈಏಕ್ ಜಣು ಪ್ರಭುಮ ಭರೋಖೊಕರನ್.

22 ಆ ವಾತೆ ಯೆರೂಸಲೇಮ್‌ಥೂತೆ ಸಬೆನ ಪೋಚ್ಚು ಇನಖ್ವಾಜಿ ಬಾರ್‌ಬನ ಅಂತಿಯೋಕ್ಯನ ಬೋಲಿ ಮೋಕ್‌ಲ್ಯು.

23 ಬಾರ್ನಬ ಅಂತಿಯೋಕ್ಯನ ಪೋಚಾನಿವಖ್ವತೆ ದೇವ್ವ ಅದ್ವಿಪೋನ ವಿಶ್ವಾಸ್ ಭಡಾವ್ತೊ ಹುಯಿನ್ ಪ್ರಭುಮ ಹುಮ್ಮಖ್ವ ಕರಾಯೊ.

24 ಬಾರ್ನಬ ಯೋ ಏಕ್ ಅಲ್ಟೊಅದ್ವಿ ಹುಯಿರೋಥೊ. ಯೊ ಪವಿತ್ರಾತ್ಮಧಿ ಭರಾಯೊಹುಯೊ ಪೂರ ವಿಶ್ವಾಸ್ತೊ ಅಭು ಘಣ ಅದ್ವಿನ್ ಪ್ರಭುಭಣಿ ಬುಲೈಲಾಯೊ.

25 ಇನಕೇಡೆಥು ಬಾರ್ನಬನೆ ಸೌಲಾನ ಡೂಂಡೊಹುಯಿನ್ ತಾರ್ಸಸ್ ಖ್ವಯೇರ್ನ್ ಗಯೊ.

26 ಬಾರ್ನಬನೆ ಸೌಲಾನ ಹಿಜ್ಜಾ ದೇಖಿನ್ ಇನ ಅಂತಿಯೋಕ್ಯನ ಬುಲೈಲಿನ್ ಆಯೊ. ಸೌಲಾಬಿ ಅಭು ಬಾರ್ನಬನೆ ಅಂತಿಯೋಕ್ಯಮ ಏಕ್ ವರಖ್ವಾಖ್ವು ಸಬೆನ ಜೋಡ್ಹಾಸ್ ರ್ಹೀನ್ ಕೈಏಕ್ ಭಣಾನ ಶಿಕಾಡ್. ಆ ವಿಶ್ವಾಸಿನ ಪಹಿಲಿಬಾರ್ “ಕ್ರೈಸ್ತರ್” ಕರಿ ನಾಮ್ ಆಯುತೆ ಅಂತಿಯೋಕ್ಯಮಾಸ್.

27 ಯೋ ಹಗಾಮ್ವ ಥೋಡುಭಣು ಪ್ರವಾದಿಖ್ಬಾರು ಯೆರೂಸಲೇಮ್‌ಥು ಅಂತಿಯೋಕ್ಯನ ಗಯು.

28 ಆ ಪ್ರವಾದಿಖ್ಬಾರಾಮ “ಅಗಬ” ಕರಿ ಏಕ್‌ಜಣೊ ಥೊ. ಅಗಬನೆ ಅಂತಿಯೋಕ್ಯಮ ಪವಿತ್ರಾತ್ಮನಿ ಖ್ವಿಯಾಲ್‌ಥಿ, “ಹಿಡಿ ಜಗತ್‌ನಾಸ್ ಕಾಳ್ತುಕಾಳ್ ಆವಾಶೆ” ಕರಿ ಬೋಲ್ಯೊ ಯೋ ಕಾಳ್ತುಕಾಳ್‌ನ ಹಗಾಮ್ ಕ್ಲೊದಿಯ ರಾಜನು ಹಗಾಮ್ವ ಆಯು.

29 ಯೂದಾಯಮ ರ್ಹ್ವಾಳು ಬೈಯೇ ಭೇನೆವೊನ ಮದತ್‌ಕರಾನ ಶಿಷ್ಯರ್‌ನೆ ನಿರ್ಧಾರ್ ಕರ್ಯ್. ವಿಶ್ವಾಸಿಮ ಹರೇಕ್ ಜಣುಬಿ ಇವ್ಣೇಥಿ ಕೆತ್ತುಹುಯೂಕಿ ಇವ್ಣುನ ಬೋಲಿ ಮೋಕ್ಲಿನ್ ಖ್ವಿಯಾಲ್ ಕರ್ಯ್.

30 ಇವ್ಣೆ ಪೈಶಾನ ಭಮಕರೀನ್ ಇನ ಬಾರ್ನಬ ಅಭು ಸೌಲನ ಹಾಥಿ ಯೂದಾಯಮ ಥೂತೆ ಸಭೆನ ಗಲ್‌ಥಾವ್ವಲಯಿನ್ ದಿದಾ.

12

ಘಣು ಖ್ವಿತಾಪ್ಪಿ

1 ಯೋ ವೇಳ್ತ ರಾಜ್ತ ಹುಯಿರೊಥೋತೆ ಹೆರೋದನೆ ಸಬೆವಾಳಾಮ ಥೋಡಭಣಾನ ಖ್ವತಾಪ್ಪಿ ದ್ಯಾವಲಗ್ಯೊ

2 ಯೋಹಾನನೊ ಬೈಥೋತೆ ಯಾಕೋಬನ ತಲ್ವಾರ್‌ಥಿ ಮರೈನಾಖ್ಯೊ

3 ಅನೇಥಿ ಯೆಹೂದ್ಯರ್‌ನ ಪಸಂದ್ ಹುಯಿರಲ್ವಾಕರಿ ಜಾಣಿನ್, ಪೇತ್ರನಾಬಿ ಧರೈನ್ ಖ್ವಾರ್‌ಟ್‌ಮ ಘಲಾಯೊ. ಯೋ ಹಗಾಮ್ ಯೆಹೂದ್ಯರ್‌ನಿ ಪಸ್ಸ ಪೂಜ್ತ ಚಾಲುಕರ್ತೂಢು. ಪಸ್ಸಕತೊ ಖಾಟುಕೊಂತೆ ರೋಟಾನಿ ಪೂಜ್ತ.

4 ತದೆ ಇನೆ ಪಸ್ಸಪೂಜ್ತ ಹುಯಿಗು ತದೆ ಅದ್ಮಿವೋನ ಖ್ವಾಮ್ಪೆ ಪೇತ್ರನ ಭೀರಾಕಣುಕರಿ ಸೋಚ್‌ಕರಿನ್ ಜೇಲ್‌ಮ ಘಲೈನ್ ಇನ ಕಾವ್ಲಿ ಕರಾನ ಚಾರ್‌ಜಣ ಶಿಪಾಯ್ತು ಚಾರ್ ಟೋಳ್ತ ನೇಮಕ್ ಕರಯ್ತೊ.

5 ಪೇತ್ರ ಜೇಲ್‌ಮ ಫಾಲ್ತು ತದೆ ಸಬೇನು ಅದ್ಮಿಖ್ವಾರು ಇನಖ್ವಾಜಿ ದೇವ್ವ ದಿಲ್‌ಲಗಾಡಿನ್ ಪ್ರಾರ್ಥನೆ ಕರಯ್ತೊ.

ಪೇತ್ರನ ಖ್ವಾರ್‌ಟ್‌ಢು ಛುಟಾರ್

6 ಹೆರೋದನೆ ಇನ ಅದ್ಮಿವೋನ ಖ್ವಾಮ್ಪೆ ಲ್ಯಾವ್ವುಕರಿ ಕರಯ್ತೊತೆ ಪಾಲ್ಲಿರಾತೆ, ಖ್ವಾರ್‌ಟ್‌ಮ ಬೇ ಖ್ವಿಕ್‌ಳಿಥಿ ಇಡ್‌ಕೈನ್ ತದೆ ಪೇತ್ರ ಬೇಜಣ ಶಿಪಾಯಿನ ಬೀಚ್ತ ಖ್ವಿತೋಥೊ. ಶಿಪಾಯಿಖ್ವಾರು ಜೇಲ್‌ನ ದರಲ್ವಾಜನ ಕಾವ್ಲಿ ಕರಿರಾಖ್ತುಢು.

7 ಅಪ್‌ಗುಪ್‌ಥೂಸ್ ಪ್ರಭುನೊದೂತ ಪೇತ್ರನ ಖ್ವಾಮ್ಪೆ ಭೀರಿಗೊ. ಉಜಾಳು ಉಜಾಖ್ವಾಥಿ ಕೋಣಾಮ ಅಖ್ವು ಭರೈಗು. ತದೆ ದೇವ್ವದೂತನೆ ಪೇತ್ರನ ಭುಜ್ಞನ ಧಕ್ಕೋದಿನ್ ಇನ ಬೋಲ್ಯೊ, “ಒಗ್ಗಿಲಟ್” ಕರಿ ಬೋಲ್ಯೊ. ತದ್ವುತದೇಸ್ ಇನ ಹಾತ್ತ್ ಭಂದೈರಿಥೀತೆ ಖ್ವಿಕ್‌ಳಿಯೇ ಛುಟಿಪಡಿಗಯೇ.

8 ದೇವ್ವದೂತನೆ, “ಲುಂಗ್ಡಾನ ಫೇರಿಲಿನ್ ತಾರ ಕೊಖ್ವಾಡಾನ ಫಾಲಿಲೆ” ಕರಿ ಬೋಲ್ಯೊ. ಪೇತ್ರನೆ ಇಮ್ಮಸ್ ಕರಯ್ತೊ. ತದೆ ದೇವ್ವದೂತನೆ, “ತಾರ ಝಗ್ಗಾನ ಲಪೇಟಿಲೀನ್ ಮಾರಿ ಜೋಡ್ತ ಆವ್”. ಕರಿ ಬೋಲ್ಯೊ.

9 ಇನೆ ಭಾರ್ ಆಯಿನ್ ದೇವ್ವದೂತನ ಪೀರೆ ಜಾತೊಹುಯಿನ್, ದೇವ್ವದೂತಾಧಿ ಚಾಲ್ಯುತೆ ಇನ ಖ್ವಾಚು ಕರಿ ಮಾಲುಮ್‌ಕೊಂತೆಸ್ ಯೋ ಖ್ವೊಣ್ಣು ದೇಖುಕರುಸ್ ಕರಿ ಇನೆ ಸೋಚಿರಾಖ್ಯೊಧೊ.

10 ಪೇತ್ರನೆ ಪಹಿಲ ಅಜು ಬೇನ ಕಾವ್ಲಿಕರವಾಳನ ಕಾಡಿಮ್ಪೊದೀನ್ ಖ್ವಿಯೇರನ್ನ ಜಾವಾನು ಲ್ವೊಡಾನ ಬಾಕಲ್‌ಕನ ಆಯೊತೆ ತದೆ, ಯೊ ಬಾಕಲ್ ಇನೇಧಿ ಯೋಸ್ ನಿಕ್ಕಿಗಯೊ. ಪೇತ್ರಬಿ ದೇವ್ವ ದೂತ ಬಾಕಲ್‌ಮಾಥು ನಿಕ್ಕಿನ್ ಭಾರ್‌ಆಯಿನ್, ಯೋ ಗಲ್ಲಿನ ಮ್ವೇಲಿನ್ ನಿಕ್‌ಳ್ಳ ತದೆ ಅಪ್‌ಗುಪ್‌ಥೀಸ್ ದೇವ್‌ನೊ ದೂತನೆ ಇನ ಮ್ವೇಲಿನ್ ಚಲೇಗೊ.

11 ತದೆ ಪೇತ್ರನೆ ಮಾಲುಮ್‌ಕರ್ಲಿನ್, “ಪ್ರಭುನೆ ಖ್ವಾಚಮಾಸ್ ಇನ ದೂತನ ಮೋಕ್‌ಲ್ಯೊತೆ ಮನ ಹಮ್ಗೆ ಮಾಲುಮ್ ಪಡ್ಚು ಯೊ ಮನ ಹೆರೋದನ ಹಾಧಿ ಛೋಡ್ವೆನ್‌ಮ್ಪೆಲ್ಯೊ ಮನ ಕೇಡ್ ಕರ್ನುಕರಿ ಯೆಹೂದ್ಯರವಾಳನೆ ಸೋಚಿರಾಖ್ಯೊ, ಪ್ರಭುನೆ ಆ ಅಖ್ವಿ ಕೇಡ್‌ಮಾಥು ಮನ ಬಚ್ಚಾಡ್ಲೊ” ಕರಿ ಇನೆ ಮಾಲುಮ್‌ಕರ್ಲಿದೊ.

12 ಯೋ ಅನ ಮಾಲುಮ್‌ಕರ್ಲಿದೊ ತದೆ, ಮಾರ್ಕಕರಿ ಬೋಲೈಲ್ಯಾವಾಳೊ ಯೋಹಾನ್ನಿ ಆಯಾ ಮರಿಯನ ಘರೆ ಆಯೊ. ಹಿಜ್ಜಾಘಣುಜಣು ಮಳಿನ್ ಪ್ರಾರ್ಥನೆ ಕರುಕರ್ತುಧು.

13 ಪೇತ್ರನೆ ಬಾಕಲ್‌ಕನ ಆಯಿನ್ ಖಟ್‌ಖಟಾಯೊ ತದೆ ಯೊ ಕೋಣ್ ಕರಿ ಮಾಲುಮ್ ಕರಾನಖ್ವಾಜೆ ರೋದೆಕರಿ ಸೇವಕಿ ಆಯಿ.

14 ಇನೆ ಪೇತ್ರನಿ ಆವಾಜ್‌ನ ಖ್ವಣೇದ್‌ಕರೀನ್ ಇನ ಘಣು ಖ್ವಶಿಹುಯು. ನಾಶಿಚ್ಚೆನ್, “ಪೇತ್ರ ಬಾಕಲ್‌ಕನ ಭಿಯೋಸ್!” ಕರಿ ಬೋಲಿ.

15 ಹಿಜ್ಜಾಘೂತೆ ಅಖ್ವುಜಣು, “ಅನ ದಿವಾನು ಧರಾಖ್ಯುಸ್” ಕರಿ ಬೋಲ್ಚು. ಕತೋಬಿ ಮೆ ಆ ಬೋಲುಕರುತೆ ಖ್ವಾಚೆಸ್ ಕರಿ ಇನೆ ಪಾಲ್ತು ಇವ್ವುನ ಬೋಲಿ, ಇನಖ್ವಾಜೆ ಇವ್ವೆಅಖ್ವು, “ಯೊ ಪೇತ್ರನೊ ದೂತ ರ್ಲೆವ್ವುಕರಿ ಬೋಲ್ಚು.

16 ಕತೋಬಿ ಪೇತ್ರ ದರ್ಜಾಜನ ಖಟ್‌ಖಟಾವ್ ಕರ್ತೊಧೊ. ತದೆ ಇವ್ವೆ ಬಾಕಲ್ ಕಾಡಖ್ವತರ್, ಪೇತ್ರನ ದೇಖಿನ್ ಆಶ್ಚರ್ಯ ಹುಯು.

17 ಪೇತ್ರನೆ ಇವ್ವುನ ಶೋಪೊರ್ದೊವೊ ಕರಿ ಹಾತ್‌ನೊ ಇಷಾರ್‌ಕೊ ಕರೀನ್, ಪ್ರಭುನೆ ಇನ ಜೇಲ್‌ಮಾಥು ಕಿಮ್ ಛೋಡಾಯೊ ಕರಿ ಯೋ ಬಾರೇಮ ಇವ್ವುನ ಅಖ್ವು ಬೋಲಿ ಒತಾಳ್ವೊ. “ಯಾಕೋಬ್‌ನಾಬಿ ಅಜ್ಜು ವಿಶ್ವಾಸಿವೊನಾಬಿ ಆ ಸಮಚಾರ್‌ನ ಬೋಲೊ” ಕರಿ ಬೋಲ್ವೊ. ಇನಕೇಡೆಥು ಪೇತ್ರ ಬಿಜಿ ಝಗೊ ನಿಕ್ಕಿಗಯೊ.

18 ಇನವ್ವಾಣೆ ಪೇತ್ರ ಶಾತ್‌ಹುಯೊ ಕರಿ ಶಿಪಾಯಿ ಖ್ವಾರಾಮ ಮೋಟಿ ಘುಂಜ್‌ಳಾವ್ಣಿ ಉರಿ.

19 ಹೆರೋದನೆ ಇನ ಡೂಂಡ್ವಾಯೊ ಪೇತ್ರನ ದೇಖಾನ ಕೋ ಹುಯುನಿ ಇನಖ್ವಾಜೆ ಹೆರೋದನೆ ಕಾವ್ಲಿ ಕರವಾಳನ ವಿಚಾರ್‌ಕರಿನ್ ಇವ್ವುನ ಅಖ್ವು ಮರಣ್ಣಿ ದಂಡಣೆನ ದಿನಾಖ್ವೊ. ಹೆರೋದನೆ ಥೋಡ ಹಗಾಮ್ ಯೂದಾಯಥೊ ಜೈನ್ ಕೈಸರ ಖ್ವಯೇರ್‌ಮ ರ್ದಿಯೊ.

ರಾಜ್ ಹೆರೋದಾನಿ ಮರಣ್

20 ತೂರ್ ಅಜ್ಜು ಸಿದೋಮ್ ಖ್ವಯೇರ್ನ್ನ ಅದ್ಮಿವೋನ ಉಪ್ಪರ್ ಹೆರೋದನೆ ಭಾಖ್ತತ್ ಇರಾದೊ ಕರಿರಾಖ್ವೊಸ್‌ಕರಿ, ಯೊ ಅದ್ಮಿಖ್ವಾರು ಹೆರೋದನ ಮಳಾನ ಜಮಹುಯಿನ್ ನಿಕ್‌ಳ್ವೊ. ಇವ್ವೆ ರಾಜ್‌ನೊ ಮಹೇಲ್‌ನದೇಖಿಲ್ವಾವಾಳೊ ಮೋಟೊ ಅದಿಕಾರಿ ಹುಯಿರೊಥೋತೆ ಬ್ಲಾಸ್ತನನ ಪೊಖ್ವೊಲ್ವೊನ್ ಮದತ್‌ಕರ್ ಕರಿ ರಾಜ್ ಇವ್ವಿ ಜೋಡ್ಡ್ ಶಾಂತಿಹುಯಿನ್ ಮಳಿಭಾವ್ಣುಕರಿ ಹೆರೋದನ ಬೋಲಿಲಿದು. ಶನಖ್ವಾಜೆ ಕತೊ ಇವ್ವ ಮುಲಕ್ಕ್ ಹೆರೋದನ ಮುಲಕ್‌ಥು ಖಾಣಾನು ಜಿನಖ್ವೊ ಮಂಗೈಲೆವ್ವುಥು.

21 ಇವ್ವುನ ಮಳಾನಖ್ವಾಜೆ ಹೆರೋದನೆ ಏಕ್ ದನ್ ಗೊತ್‌ಕರೀನ್ ಮ್ಹೇಲ್ವೊ. ತದೆ ಹೆರೋದಾನೆ ಇನ ರಾಜ್‌ನು ಪೆರ್ವಾಖ್ವೊಫೇರಿಲಿನ್ ಇನೆ ಸಿಂಹಾಸನ್ನ ಉಪ್ಪರ್ ಬೇಶಿನ್ ಅದ್ಮಿವೋನ ಉಪದೇಶ್ ಕರ್ದೊ.

22 ಹಿಜ್ಜಾ ಅದ್ಮಿಖ್ವಾರು ಆ ಹೈರುತೆ ಅದ್ಮಿನು ಟಿಹುಕೊ ಕಾಹೆ. ಆ ದೇವ್‌ನೊ ಟಿಹುಕೊ ಕರಿ ಕೂಘಾಟಿ ಕರ್ದೊ.

23 ಪ್ರಭುನ ದೂತನೆ ತುರಂತ್ ಹೆರೋದನ ದಂಬೇಡಿ ಹೇಟ್‌ನಾಖ್ಯೊ; ಯೋ ದೇವ್ ಮರ್ಯಾದಿ ಕೊದಿದೊಂತೆ ಇನಖ್ವಾಜೆ ಯೊ ಕೀಡೊ ಪಡೀನ್ ಮರಿಗೊ.

24 ಕತೋಬಿ ದೇವ್ನಿ ವಚನ್ ಭಡ್ಯು ಅಜು ಜಾಖ್ವತ್ ಹುಯು.

25 ಬಾರ್ನಬಬಿ ಸೌಲನೆ ಇವ್ಣೆ ಕರ್ನುಧೂತೆ ಸೇವೆನ ಕಾಮ್ ಖ್ವರ್ತಿಕರಿನ್ ಮಾರ್ಕಕರಿ ಬೋಲೈಲಿದೊತೆ ಯೋಹಾನಕನ ಬುಲೈಲಿನ್ ಯೆರೂಸಲೇಮ್‌ಥು ಪಾಠು ಅಂತಿಯೋಕ್ಯನ ಆಯ.

13

ಬಾರ್ನಬ ಅಜು ಸೌಲನ ಪ್ರವಾದಿನೆ ಚೂಣಿನ್ ಮೋಕ್‌ಲ್ಯು

1 ಅಂತಿಯೋಕ್ಯಮ ಥೂತೆ ಸಬೆಮ ಖ್ವಾರು ಪ್ರವಾದಿಬಿ ಬೋಧಕರಾಬಿ ಥೂ; ಇವ್ಣೆ ಕೋಣ್‌ಕತೊ, ಬಾರ್ನಬ, ನೀಗರ್‌ಕರಿ ಬೋಲೈಲಾವಳೊ ಸಿಮೆಯೋನ್, ಕುರೇನ್ಯನೊ ಲೂಕ್ಯಹೆರೋದ ರಾಜನಿ ಜೋಡ್ತಪಳೊತೆ ಮೆನಹೇನ, ಅಜು ಸೌಲ.

2 ಅವ್ಣೆಖ್ವಾರು ಪ್ರಭುನಿ ಸೇವೆ ಕರುಕರ್ತುಥು ಅಜು ಉಪವಾಸ್ (ಪಾರ್) ಕರುಕರ್ತುಥು. ಪವಿತ್ರಾತ್ಮನೆ ಇವ್ಣುನ “ಮೇ ವಿಶೇಷ್ ಕಾಮ್‌ಖ್ವಾಜೆ ಬಾರ್ನಬ ಅಜು ಸೌಲನ ಚೂಣಿಲಿದೊ ಯೋ ಕಾಮ್‌ಖ್ವಾಜೆ ಇವ್ಣುನ ಅಲಕ್‌ಕಾಡ್ಯೊ” ಕರಿ ಬೋಲೈಯೊ.

3 ಇನಖ್ವಾಜೆ ಸಬೆವಾಳು ಉಪವಾಸ್ ರ್ಡ್ವೀನ್ ಪ್ರಾರ್ಥನೆ ಕರಿನ್ ಬಾರ್ನಬ ಸೌಲನ ಉಪ್ಪರ್ ಹಾತ್‌ಮ್ವೇಲಿನ್ ಇವ್ಣುನ ಬೋಲಿ ಮೋಕ್‌ಲ್ಯು.

ಸೈಪ್ರಸ್‌ಮ

4 ಬಾರ್ನಬ ಬಿಜು ಸೌಲ ಪವಿತ್ರಾತ್ಮನೇಸ್ ಬೋಲಿಮೋಕ್‌ಲೈಯೊ ಇವ್ಣೆ ಸೆಲ್ಯೂಕ್ಯ ಖ್ವಯೇರ್ನ್ ಜೈನ್, ಹಿಜ್ಜಾಥ ಸೈಪ್ರಸ್ ಟಾಪನ ಜಹಾಜ್‌ಮ ಗಯ.

5 ಬಾರ್ನಬ ಅಜು ಸೌಲ ಸಲಾಮಿಸ್ ಕರಿ ಖ್ವಯೇರ್ನ್ ಜಾವಾದಿನ್, ಯೆಹೂದ್ಯರ್ನ್ ಸಬಾ ಮಂದಿರ್‌ಮ ದೇವ್ನಿ ಭೋದನೆನ ಬೋಲ್ಯ.

ಮಾರ್ಕಕರಿ ಬೋಲ್ಪಿರೊಡ್ತೆ ಯೋಹಾನ ಇನ ಸೇವೆ ಕರಾನಖ್ವಾಜೆ ಇನಿ ಜೋಡ್ತೊ.

6 ಇವ್ಣೆ ಯೋ ಟಾಪಾನಿ ಅಖ್ವಿಬಾಜು ಜಾತಹುಯಿನ್ ಪಾಪೋಸ್ ಕರಿ ಗಾಮನಗಯ. ಇವ್ಣೆ ಜಾದುಜಮಕರ್ ಕರಾವಾಳ ಏಕ್ ಯೆಹೂದ್ಯವಾಳನ ಪಾಪೋಸ್ತ ದೇಖ್ತೆ. ಇನು ನಾಮ್ 'ಬಾರ್‌ಯೇಸು' ಯೋ ಏಕ್ ಝೂಟುಪ್ರವಾದಿ ಹುಯಿರೊಡ್ತೊ.

7 ಸೆರ್ಗ್ ಪಾಲಕರಿ ನಾಮ್‌ವಾಳೊ ದೋಸ್ತ ಆ ರಾಜ್ಯಪಾಲನ್ ಖನ್ನೆಸ್ ಕದೇಬಿ ರೆಡ್ಲೆತೊಡ್ತೊ. ಸೆರ್ಗ್ ಪಾಲ ಅಕ್ಕಲ್‌ವಾಳೊ ಹುಯಿರೊಡ್ತೊ. ಯೋ ದೇವ್ನಿ ವಚನ್ ಖ್ವಮ್‌ಜಾನ ಬಾರ್‌ಬ, ಸೌಲನ ಬುಲಾಯೊ.

8 ಕತೋಬಿ ಯೊ ಮಂತ್ರವಾದಿ ಹುಯಿರೋತೆ ಎಲುಮ (ಎಲುಮಕರಿ ನಾಮ್ನೊ ಮಂತ್ರವಾದಿ) ವಿರೋದ್ ಹುಯಿರೊಡ್ತೊ. ರಾಜ್ಯಪಾಲನೆ ಕ್ರಿಸ್ತಮ ವಿಶ್ವಾಸ್ ನಾ ಕರ್ನುತೆ ತಿಮ್ ಎಲಿಮನೆ ಕೋಶಿಶ್ ಕರೊ.

9 ತದೆ ಪಾಲಕರಿ ಬೋಲ್ಪೆಲ್ಯಾವಾಳೊ ಸೌಲ ಪವಿತ್ರಾತ್ಮಧಿ ಭರೈನ್, ಎಲಿಮ ರಕ್ ದೇಖಿನ್;

10 ಇನೆ "ತೂ ಶೈತಾನ್ನೊ ಛಿಯೊ! ಹರ್ ಏಕ್ ಅಲ್ಟಾನಾಬಿ ತೂ ವಹೇರೊ" ತು ಖರಾಬ್ ಚಾಲ್‌ಥೀಬಿ ಝೂಟೆಥೀಬಿ ಭರೈರೊಡ್ತೊ. ಅಖ್ವಿ ನೀತಿನಾಬಿ ವಿರೋದ್ ಕರವಾಳೋಸ್ ತೂ, ಪ್ರಭುನ ಖ್ವಾಜಾನ, ಝೂಟೆಕರಿ ಬದ್ಲಾವನ ತೂ ಕದೇಬಿ ಕೋಶಿಶ್ ಕರ್ತೊರೊಡ್ತೊ.

11 ಹಂದೇಕ್ ಪ್ರಭು ತಾರಿ ವಿರೋದ್ ಹಾತ್‌ಪಾಡಿರಾಖೊಸ್. ತೂ ಕಾಣೊಹುಯಿಶ್ ಥೋಡದನ್ ಶಾತ್ಪಿ ದೇಖಿಶ್ ಕೊಯ್ತೆ; ಚಾಂದ್‌ನು ಉಜಾಳುಬಿ ದೇಖಿಶ್‌ಕೊಯ್ತೆ." ಕರಿ ಬೋಲ್ಪೊ ತದೆ ಎಲಿಮನ ಅಖ್ವಾಸ್ ಅಂಧಾರುಹುಯಿಗು. ಇನ ಕೋಣ್‌ತೋಬಿ ಹಾತ್‌ಧರಿ ಚಲಾವಾದೆಕರಿ ಯೋ ಡೂಂಡೊಹುಯಿನ್ ಫರುಕರ್ತೊಡ್ತೊ.

12 ಅನ ದೆಖೊತೆ ರಾಜ್ಯಪಾಲನೆ ಪ್ರಭುಪರ್ ವಿಶ್ವಾಸ್‌ಕರಿನ್ ಪ್ರಭುನಿಬಾರೆನು ಶಿಕಾಡನು ಖ್ವಮ್‌ಜಿನ್ ಆಶ್ಚರ್ಯ ಕರೊ.

ಪಿಸಿದ್ವನು ಅಂತಿಯೋಕ್ಯಮ

13 ಪೌಲ ಅಜ್ಜು ಇನ ಜೋಡ್‌ವಾಳು ಪಾಫೋಸ್‌ಧು ಜಹಾಜ್‌ಪರ್ ನಿಕ್ಕಿನ್, ಪಂಫುಲ್ಯ ತಬರ್‌ಖಾನು ಪೆರ್ಗೆಕರಿ ಖ್ವಿಯೇರ್ನ್ನ ಇವ್ಣೆ ಆಯು. ಕತೋಬಿ ಯೋಹಾನ ಇವ್ಣುನ ಮ್ಹೇಲಿನ್ ಯೆರೂಸಲೇಮ್‌ನ ಪಾಟ್ಲೊ ಫರಿಗಯೊ.

14 ಇವ್ಣೆ ಪೆರ್ಗೆ ಗಾಮ್‌ಥ ನಿಕ್ಕಿನ್ ಪಿಸಿದ್ಯ ತಬರ್‌ಖಾನು ಮಳ್ಳುಹುಯು ಅಂತಿಯೋಕ್ಕನ ಆಯ. ಇವ್ಣೆ ಸಬ್ಬತ್ ದನ್ಮ ಯೆಹೂದ್ಯರನ್ನ ಸಬಾಮಂದಿರ್ಮ ಜೈನ್ ಬೇಶಿಗಯ.

15 ಮೋಶೆನ ಧರ್ಮಶಾಸ್ತ್ರಕನ ಅಜ್ಜು ಪ್ರವಾದಿಖ್ವಾರನ ದಪ್ತರ್‌ನ ಪಡ್ವೆ ಹುಯಿಜ್ಜಾವಾದಿನ್ ಸಬಾಮಂದಿರ್ಮನೊ ಗಲ್‌ಡಖ್ವಾರಾನೆ ಪೌಲ ಬಾರ್‌ನಬ, “ಬೈಯೇ ಭೇನೆವೊ, ಅದ್ವಿಖ್ವಾರಾನ ಮದತ್ ಹುವಾನಿತರ ಶಾತ್ನೋಬಿ ಭಾಲಿನಿವಾತೆ ಬೋಲ್ವುಕರಿ ಉಷೇತೊ ತುಮೆ ಬೋಲೊ” ಕರಿ ಇವ್ಣಕನ ಬೋಲಿ ಮೋಕ್‌ಲ್ಯು.

16 ತದೆ ಪೌಲನೆ ಉರಿಭೇರಿನ್ ಇನಿವಾತ್ ಖ್ವಿಮಜ್‌ಞುಕರಿ ಅದ್ವಿಖ್ವಾರಾನ ಹಾತ್‌ನೊ ಝಾಲೊದೀನ್ ಶಾತ್‌ಬೋಲ್ಯೊಕತೊ; ಮಾರ ಯೆಹೂದ್ಯ ಬೈಯೇವೊ, ಖ್ವಾಚ ದೇವ್ನ ಆರಾದನೆ ಕರಾವಾಳು ಅದ್ವಿವೊ ಮಾರಿವಾತೆನ ಕಾನ್‌ದೇವೊ!

17 ಅಪ್ಪೊ ಇಸ್ರಾಯೇಲ್‌ನೊ ದೇವ್ ಹಮಾರ ಗುರುಗುರಬ್‌ಲ್ಯನ ಚೂಣಿಲಿದೊ. ಈಜಿಪ್ತಮ ಜಿವ್ಣುಕರುಕರ್ತುಫೂತೆ ಇನ ಅದ್ವಿಖ್ವಾರಾನ ದೇವ್ ಮದತ್‌ಕರಿನ್ ಮೋಟೊ ದೇಖ್ವೊಕರಿ ಭಡಾಯೊ. ದೇವ್ ಇನಿ ಮೋಟಿಶಕಥಿ ಇವ್ಣುನ ಯೊ ದೇಖ್ವೊಮ ಚಲಾಯೊ.

18 ಯೊ ಖ್ವಿಮಾರ್ ಚಾಳಿಖ್ವ್ ವರಖ್ವ್ ಲಗು ಜಂಗಳ್‌ಮ ಇವ್ಣುನ ಖ್ವಿಮಾಳಿಲಿದೊ.

19 ಕಾನಾನ್ ದೇಖ್ವೊಮ ಥೂತೆ ಅಲ್ವಾತ್ ಅದ್ವಿವೋನು ಖ್ವಾತ್ ಮುಲಕ್ಶನಾಶ್‌ಕರಿನ್, ಯೋ ಝುಗೋನ ಇವ್ಣುನ ವಾಗ್ವಾನ್ ಕರಿದಿದೊ.

20 ಆ ಖ್ವಾರು ಖ್ವಿಮಾರ್ ಚಾರ್ ಖ್ವೊ ಅಡೈವಿಖ್ವ್ ವರಖ್ವ್ ಘಟಿಗಯು. ಇನಕೇಡೆಧು ಪ್ರವಾದಿಹುಯಿರೋತೆ ಸಮುವೇಲನ ಹಗಾಮ್‌ಲಗು ದೇವ್ ಅಪ್ಪ ಅದ್ವಿನ ನ್ಯಾವ್‌ನೊ ಅದಿಪತಿನ ದಿದೊ.

21 ಆ ಹುವಾದಿನ್ ಅದ್ಮಿಖ್ವಾರು ಇವ್ವುನ ರಾಜ್ ಹೋಣುಕರಿ ಬೋಲಿದಿದು. ದೇವ್ ಇವ್ವುನ ಕೀಷಾನೊ ಛಿಯೊ ಸೌಲನ ದಿದೊ. ಸೌಲ ಬೆನ್ಯಾಮೀನ್ ಮೂಮ್‌ವಾಳೊ ಯೋ ಭಾಳಿಖ್ವ್ ವರಖ್ವ್ ರಾಜ್ ಹುಯಿರೋಫೊ

22 ದೇವ್ ಸೌಲನ ಕಾಡಿನಾಖನಪಾರ್ ದಾವೀದನ ಇವ್ವೊ ರಾಜ್ ಬಣಾಯೊ, “ಇಷಯನೊ ಛಿಯೊ ದಾವೀದ ಮನ ಮಳ್ಳೊ ಯೋ ಮಾರಾ ದಿಲ್ವ ಲಾಗ್ನೊಹುಯೊ, ಯೊ ಮಾರಿ ಆಖ್ವ್‌ನಿತರಾಸ್ ಕಾಮ್ ಕರಸ್. ಕರಿ ದೇವ್ ದಾವೀದ್‌ನಿ ಬಾರೇಮ ಸಾಕ್ಷಿ ಬೋಲಿರಾಖ್ವೊಸ್.

23 ದೇವ್ ಇನಿ ವಾಗ್ವಾನಿಫೋಣಿಸ್ ದಾವೀದ್‌ನಿ ಖಾನ್‌ದಾನ್‌ಮಾಥು ಏಕ್‌ಭಣಾನ ಇಸ್ರಾಯೇಲ್‌ವಾಳನೊ ರಕ್ಷಕ್ ಕರಿ ಮೋಕ್ಲಿರಾಖ್ವೊಸ್, ಯೋಸ್ ಯೇಸು.

24 ಯೇಸು ಆವಾನ ಅಗಾಡಿ ಯೋಹಾನ ಇಸ್ರಾಯೇಲ್ ಅದ್ಮಿಖ್ವಾರಾನ, ‘ತುಮಾರಿ ಪಾಪ್‌ಖ್ವಾಜೆ ಪಶ್ಚತ್ತಾಪ್ ಕರಿನ್ ದೇವ್‌ಭಣಿ ಫರಿಜೈನ್ ಬ್ಯಾಪ್ತಿಸ್ಮ್ ಕರೈಲೇವೊ’ ಕರಿ ಬೋಧನೆ ಕರೈವೊ.

25 ಮೇ ಕೋಣ್‌ಕರಿ ತುಮೆ ಸೋಚೊಸ್? ಮೆ ಕ್ರಿಸ್ತಕಾಹೆ, ಯೋ ಮಾರ ಪಾಲ್ಚಳ್ ಆವ್‌ಶೆ ಇನಿ ಖೋಖ್ವ್‌ಡಾನಿ ಡೋರಿನಾಬಿ ಛೋಡಾನಾಬಿ ಮೇ ಲ್ಹಾಯೇಕ್‌ಕೊಯ್ನಿ’ ಕರಿ ಯೋಹಾನ ಇನು ಕಾಮ್‌ಕರಿನ್ ಖರ್ತಿಕರಾನಿ ವೇಳ್ವ ಬೋಲಿರಾಖ್ವೊಸ್.

26 ಮಾರ ಭೈಯೇವೊ, ಅಬ್ರಹಾಮ್‌ನಿ ಖಾನ್‌ದಾನ್‌ವಾಳವೋ, ಖ್ವಾಚ ದೇವ್ ಆರಾದನೆ ಕರುಕರಾತೆ ಯೆಹೂದ್ಯರ್‌ಕಾಹೆತೆ ಅದ್ಮಿವೊ, ಖ್ವಮ್‌ಜೊ! ಆ ರಕ್ಷಣೆನು ವಚನ್ ಮೋಕ್‌ಲೈರೈತೆ ಅಪ್ಪಖ್ವಾಜೇಸ್.

27 ಯೆರೂಸಲೇಮ್ ಜಿವ್ವು ಕರುಕರ್ತುಫಾತೆ ಅದ್ಮಿಖ್ವಾರು ಇವ್ವು ಅದಿಕಾರಿ ಖ್ವಾರುಬಿ ಯೋ ರಕ್ಷಕ್ ಕರಿ ಖ್ವಣೇದ್ ಕರಿಲಿದುಕೊಯ್ನಿ. ಪ್ರವಾದಿಖ್ವಾರು ಯೇಸುನಿ ಬಾರೇಮ ಲೀರಾಖ್ವುಫಾತೆ ವಾತೆಖ್ವಾರಿ ಮಾಲುಮ್ ಕೊ ಹುಯುನಿ ಹರೇಕ್ ಸಬ್ಬತ್ ದನ್ವ ಇವ್ವೆ ಫಡ್‌ತುಫಾತೆ ವಾತೆ ಪೂರಹುಯು. ಕತೋಬಿ ಇವ್ವೆ ಮಾಲುಮ್ ಕರಿಲಿದುಕೊಯ್ನಿ. ಯೋ ಯೆಹೂದ್ಯರ್ ಖ್ವಾರು ಯೇಸುನ ಅಪರಾದಿಕರಿ ತೀರ್ಪ್‌ದಿದು.

ಅಮ್ ಕರಾಧಿ ಪ್ರವಾದಿಖ್ವಾರಾನಿ ವಾತೆನ ಚಾಲಖ್ವರ್ಕು ಕರನ್ಯ್.”

28 ಯೇಸುನ ಮರಣ್ಣಿ ದಂಡನೆ ದೈವಾನ ಬರೋಬರ್‌ನಿ ಕಾರಣ್ ನಾಮಳ್ಳುತೋಬಿ ಇನ ಮರಾವ್ಣುಕರಿ ಪಿಲಾತನ ಬೋಲಿಲಿದು.

29 ಪವಿತ್ರ ಪುಸ್ತಕ್‌ಮ ಲೀಖ್ಪಿರುತೆ ಪರಕ್ಮಯೇಸುನ ಹುವಾನುಧೂತೆ ಅಖ್ವೀಸ್ ಖ್ವತಾಪ್ಪಿನ ಯೆಹೂದ್ಯರ್‌ನೆ ಇನ ದಿದು. ಇನಪಾರ್ ಇವ್ಣೆ ಶಿಲ್‌ಬೆಪರ್‌ಥು ಯೇಸುನ ಹೇಟ್ ಉತಾರಿನ್ ಘವಿಮ ಘಾಲ್ಯು.

30 ಕತೋಬಿ ದೇವ್ಣೆ ಇನ ಮರನ್ಯ್‌ಹುಯಮಾಥು ಜೂತೊ ಕರೀನ್ ಉತಾಡ್ಲೊ.

31 ಆ ಹುಯಿಗು ತದೆ ಗಲಿಲಾಯಥು ಯೇಸುನಿ ಜೋಡ್ಲೆ ಯೆರೂಸಲೇಮ್ ಆಯುಧೂತೆ ಇವ್ಣೆ ಕೈಫಕ್ ದನ್‌ಲಗು ಇನದೇಖ್ವು ಹಮ್ಣೆ ಇವ್ಣೆಸ್ ಅಪ್ಪ ಅದ್ಮಿಖ್ವಾರಾನ ಸಾಕ್ಷಿಹುಯಿರನ್ವ್.

32 ದೇವ್ ಹಮಾರ ಗುರುಗುರಬ್‌ಲ್ಯನ ಕರನ್ಯ್‌ತೆ ವಾಗ್ವಾನ್ಣಿ ಬಾರೇಮ ಸುವಾರ್ತೆನ ಹಮೆ ತುಮೂನ ಬೋಲಿಯೇಸ್.

33 ತುಮೆ ಇವ್ಣಖಾನ್‌ದಾನ್‌ವಾಳ ಹುಯಿರನ್ವ್. ದೇವ್ ಯೇಸುನ ಮರನ್ಯ್‌ಹುಯಮಾಥು ಜೂತೊಕರೀನ್ ಉತಾಡಾಧಿ ಯೋ ವಾಗ್ವಾನ್ಣ ಅಪ್ಪಖ್ವಾಜೆ ಚಲೈರಾಖ್ಯೊಸ್. ಅನಿ ಬಾರೇಮ ಬೇನಿ ಕೀರ್ತನೇಮ ಅಮ್ ಲೀಖ್ಪಿರನ್ವ್. ‘ತೂ ಮಾರೊ ಛಿಯೊ ಹಮ್ಣೆಸ್ ಮೇ ತುನ ಬಾ ಹುಯಿರನ್ವ್.’

34 ದೇವ್ ಯೇಸುನ ಮರನ್ಯ್‌ಹುಯಮಾಥು ಜೂತೊಕರೀನ್ ಉತಾಡ್ಲೊತೆ ಇನಖ್ವಾಜೆ, ಯೋ ಬಿಜು ಕದೇಬಿ ಮಖ್ವಾಣ್ಯಮ ಪೇಶಿನ್ ಖ್ವಡ್‌ಶೆಕೊಯ್ಣಿ ಕರಿ ಬೋಲಾನಿ ಬಾರೇಮ ದೇವ್ಣೆ ಅಮ್ ಬೋಲಿರಾಖ್ವುತೆ ಶಾತ್‌ಕತೊ; ಮೇ ಖ್ವಚ್ಚೆಂಬಿ ದಾವೀದನ ಕರನ್ಯ್‌ತೆ ವಾಗ್ವಾನ್ಣ ವಾರ್ವಾ ಅಖ್ವಾನ ತುಮುನಾಬಿ ದೆವುಸ್.” ಯೊ ವಿಶ್ವಾಸ್‌ನುಸ್ ಕರಿ ಬೋಲೆಜಾಯ್.

35 ‘ತೂ ತಾರ ವಿಶ್ವಾಸ್‌ನೊ ಸೇವಕ್‌ನ ಮಖ್ವಾಣ್ಯನ ಖ್ವಡ್ವಾನ ಮ್ಹೇಲಿಶ್‌ಕೊಯ್ಣಿ’ ಕರಿ ಬೋಲಿರಾಖ್ಯೊಸ್.

36 ದಾವೀದನೆ ಜಿವೊಥೋತೆ ದನ್‌ಖ್ವಾರು ದೇವ್ನಿ ಚಿತ್ತಾನಿಘೋಣಿ ಜಿವೊ, ಇನಪಾರ್ ಯೊ ಮರಿಗಯೊ, ದಾವಿದನ ಇನ ಗುರುಖ್ವಾರಾನಿ ಜೋಡ್ಡಮಖ್ವಾಣ್ಣು ಕರನ್ಯ. ಇನಿ ಶರೀರ್ ಖ್ವಡಿಗಯು.

37 ಕತೋಬಿ ದೇವ್ ಮರಣ್‌ಥು ಜಿವೊಹುಯಿನ್ ಉಲೊತೆ ಯೇಸುನು ಶರೀರ್ ಮಖ್ವಾಣ್ಣುಮ ಖ್ವಡೈಗಯುಕೊಯ್ನಿ.

38 ಮೋಶೆನ ಧರ್ಮಶಾಸ್ತ್ರಧೀಸ್ ತುಮೆ ಛುಟ್ಕಾರ್ ಹುಯಿನ್ ನೀತಿವಾಳಕೊಯ್ನಿ ಕರಿ ಬೋಲೈರ್ದಾಸ್. ಇನಖ್ವಾಜೆ ಭೈಯೇವೊ, ಆ ತುಮೂನ ಮಾಲುಮ್ ರ್ದವಾದೆ; ಯೇಸುಧೀಸ್ ತುಮಾರಿ ಪಾಪ್ ಕ್ಷಮಾಪಣ್ ಮಳೆಕರಿ ಬೋಲುಸ್.

39 ಅನಖ್ವಾಜೆಸ್ ಯೇಸುಮ ವಿಶ್ವಾಸ್ ಕರಾವಾಳ ಹರೇಕ್‌ಜ್ಞಾನ ಇನೇಧಿಸ್ ಇವ್ಣ ಅಖ್ವಾಪಾಪ್‌ನ ಕ್ಷಮಾಪಣ್ ಮಳೆಕರಿ. ಧರ್ಮಶಾಸ್ತ್ರಧಿ ತುಮಾರಿ ಪಾಪ್ ಛೋಡಾವನ ಹುವಾಕೊಯ್ನಿ.

40 ಇನಖ್ವಾಜೆ ಪ್ರವಾದಿಖ್ವಾರನ ದಪ್ತರಮ ಬೋಲೈರ್ದಾತೆ ತುಮೂನ ನಾಚಾಲ್ನು ತಿಮ್ ದೇಖಿಲೇವೊ. ಯೋ ಶಾತ್‌ಕತೊ;

41 'ಹಂದೇಖೊ ಚಿಂಫಾವವಾಳವೊ, ಆಶ್ಚರ್ಯ ಕರ್ತಹುಯಿನ್ ನಾಶ್‌ಹುಯಿಚಾವೊ. ತುಮಾರ ಹಗಾಮ್ ಮೇ ಏಕ್ ಕಾಮ್ ಕರೀಶ್; ಬಿಜೆಕ್‌ಜ್ಞೊ ಇನ ಛೋಡಿವತಾಳೊ ತೋಬಿ ಇನ ತುಮೆ ವಿಶ್ವಾಸ್ ಕರ್ತು ಕೊಯ್ನಿ!' ಕರಿ ಬೋಲೊ.

42 ಪೌಲ, ಬಾರ್ನಬ ಸಬಾಮಂದಿರ್‌ಮಾಥು ಚಾವಾನಿ ವಖ್ವೆತೆ ಆ ವಾತೆನಿ ಬಾರೇಮ ಬಿಚ್ಚೂಬಿ ಚಾಖ್ವತ್ ಹಮೂನ ಬೋಲಿ ದ್ವವಾನಖ್ವಾಜೆ ಅಗ್ಲ ಸಬ್ಬತ್ ದನಾಲಗು ಪಾಲ್ಚಿ ಆವ್ಣಕರಿ ಅದ್ವಿಖ್ವಾರಾನೆ ಇವ್ಣನ ಬೋಲಿಲಿದು.

43 ಸಭೆ ಖ್ವತ್ತಮ್ ಹುವಾದಿನ್ ಕೈಏಕ್ ಯೆಹೂದ್ಯರ್ ಖ್ವಾರು ಹಿಚ್ಚಾಡೂತೆ ಬಾರ್ನಬನ ಪೀಲೆಗಯು. ಯೆಹೂದ್ಯನಿ ಚಾತ್ಮಮಳ್ಳುಹುಯು ಅಚ್ಚು ಯೆಹೂದ್ಯರ್‌ಕಾಹೆತೆ ಇವ್ಣೆ ಇನಿ ಜೋಡ್ಡಧು. ಚಾಡ್ಲಿ ಚಾತ್ ಬದಲ್ಪುಹುಯು ಇವ್ಣೆಜಿನೂಬಿ ಖ್ವಾಚದೇವ್ ಆರಾದನೆ ಕರ್ತುಧು. ಪೌಲ ಬಾರ್ನಬ ಇವ್ಣಿ ಜೋಡ್ಡ ವಾತ್ ಬೋಲಿನ್, ದೇವ್ನಿ

ವಾರ್ಖ್ವಮಾಸ್ ವಿಶ್ವಾಸ್‌ರಾಖಿನ್ ಅಗಾಡಿ ಭಡ್ಡುಕರಿ ಇವ್ವುನ ಹುಮ್ಮಖ್ವ್ ಕರನ್ಯ.

44 ಅಗಲ್ಯ ಸಬ್ಬತ್ ದನ್ನೆ ಪ್ರಭುನು ವಚನ್ ಖ್ವಮ್‌ಜಾನಖ್ವಾಜೆ ಘಣುಜಣು ಖ್ವಯೇರನ್ನ ಅದ್ಮಿಖ್ವಾರು ಆಯಿನ್ ಭರಾಯು.

45 ಅನದೆಖ್ಯತೆ ಯೆಹೂದ್ಯರ್ ಖ್ವಾರಾನೆ ಘಣು ಬಳಾಪೊಕರಿನ್ ಪೌಲನೆ ಬೋಲ್ಯೊತೆ ವಾತೆನ ವಿರೋದ್ ಹುಯಿನ್ ಅಬ್ಬಾಜ್ಬಿಧಿ ದೂಷಣೆನಿ ವಾತೆಬೋಲ್‌ತು ರನ್ವಿಯು.

46 ಕತೋಬಿ ಪೌಲ, ಬಾರ್ನಬನೆ ಜಾಖ್ವತ್ ಹಿಮ್ಮಡ್ಲಿ ವಾತೆಬೋಲಿನ್, “ಹಮೆ ದೇವ್ನಿ ವಚನ್ ಯೆಹೂದ್ಯರ್ ಹುಯಿರಾತೆ ತುಮೂನ ಪಹಿಲೆ ಬೊಲ್ವುಸ್ ಬೋಲ್ವುಧು. ಕತೋಬಿ ತುಮೆ ಇನ ಧಕೇಲಿದಿನ್ ಹರ್‌ಹಮೇಶಾನಿ ಜಿಂಧಾಗಿ ಕೋ ಮಳ್‌ಶೇನಿಕರಿ ತೀರ್ಪ್ ಕರಿಲಿದಾತೆ ಇನಖ್ವಾಜೆ, ಹಮೆ ಅಲ್ಹಾವ್ ಜಾತ್‌ವಾಳಭಣಿ ಜಯೇಸ್.

47 ಶನಕತೊ ಪ್ರಭುನೆ ದಿದೋತೆ ಹುಕುಮ್ ಅಮ್ ಛಾ, ‘ಜಗತ್ತೊ ಖ್ವರ್ತಿಲಗು ಛಾತೆ ಅದ್ಮಿಖ್ವಾರಾನ ತೂ ರಕ್ಷಕ್ ಹುಯಿರನ್ವೆವ್ವು ಕರಿ ಮೇ ತುನ ಯೆಹೂದ್ಯರ್‌ಕಾಹೆತೆ ಅದ್ಮಿನ ಉಜಾಳು ಕರಿ ಬಣೈರಾಖ್ವೊಸ್.”

48 ಪೌಲನಿ ಆ ವಾತೆನ ಖ್ವಮ್‌ಜ್ಯತೆ ಅಲ್ಹಾವ್ ಅದ್ಮಿಖ್ವಾರು ಘಣು ಖುಷಿಕರೀನ್ ಪ್ರಭುನಿ ವಾತೇನಖ್ವಾಜೆ ಸ್ತುತಿ ಕರನ್ಯ. ಹಮೇಶಾನಿ ಜಿಂಧಾಗಿ ಲೀಲ್ಯಾವನ ಚೂಣೈರನ್ವೆತೆ ಖ್ವಾರೂಸ್ ವಿಶ್ವಾಸ್ ಕರನ್ಯ.

49 ಪ್ರಭುನಿ ವಚನ್ನ ಯೋ ಖ್ವಯೇರನ್ನ ಅಖ್ವಿಸ್‌ಬಾಜು ಫೈಲಾಯು.

50 ಕತೋಬಿ ಯೆಹೂದ್ಯರ್ ಖ್ವಾರು ಥೋಡಿ ಇವ್ವಿ ಜಾತ್ನಿ ಭಕ್ತೆ ಶೌಕಾರ್ ತಯೇಡಾವ್‌ನ ಅಜು ಖ್ವಯೇರನ್ನ ಗಲ್‌ಡಖ್ವಾರು ದೇವ್ನ ಆರಾದನೆ ಕರುಕರ್ತುಧು. ಇವ್ವೆ ಖ್ವಾರು ಮಳಿನ್ ಪೌಲ ಬಾರ್ನಬನ ಉಪ್ಪರ್ ಇರಾದೊ ಕರ್ನುತೆ ತಿಮ್ ಇವ್ವುನ ವಹೇರನ್ವೆ ಬಣ್ಣುತೆ ತಿಮ್ ಕರೀನ್, ಪೌಲ ಬಾರ್ನಬನ ಯೊ ತಬರ್‌ಖಾಧು ಭಾರ್ ನಖ್ವಾಡಿದಿದು.

51 ಇನಖ್ವಾಜೆ ಪೌಲ, ಬಾರ್ನಬನೆ ಇವ್ವುನ ರೈತೈನ್ ಇವ್ವು ಗೋಡಾನಿ ಧೂಳೆನ ಝಟ್ಟಿನಾಖಿದೀನ್, ಇಕೋನ್ಯ ಖ್ವಯೇರನ್ನ ಗಯ.

52 ಅಂತಿಯೋಕ್ಯಮ ಥೂತೆ ವಿಶ್ವಾಸಿಖ್ವಾರು ಖ್ವಶಿಧಿ ಥು. ಬಿಜು

ಪವಿತ್ರಾತ್ಮಧಿ ಭರೈರೂಧು.

14

ಇಕೋನ್ಯ ಖ್ವಯೇರ್ಮ ಪೌಲಬಿ ಅಙ್ಲು ಬಾರ್ನಬ

1 ಪೌಲಬಿ ಬಾರ್ನಬ ಇಕೋನ್ಯ ಖ್ವಯೇರ್ಮ ಜೈನ್, ಹರೇಕ್ ಖ್ವಯೇರ್ಮ ಇವ್ಣೆ ಕರ್ತಧಾತೆ ತಿಮ್ಮಸ್ ಹಜ್ಜಾಬಿ ಯೆಹೂದ್ಯರನ್ನ ಸಬಾಮಂದಿರ್ಮ ಜೈನ್ ಅದ್ಮಿಖ್ವಾರಾನ ಬೋಧನೆ ಕರ್ಯಾ ಪೌಲ, ಬಾರ್ನಬನಿ ಶನ್‌ಗಾರ್ನ್ ಬೋಧನಿನ ಖ್ವಮ್‌ಜಿನ್ ಕೈಯೇಕ್ ಯೆಹೂದ್ಯರ್ ಅಙ್ಲು ಗ್ರೀಕ್‌ವಾಳು ಯೇಸುಕ್ರಿಸ್ತನ ವಿಶ್ವಾಸ್‌ಕರ್ಯ.

2 ಕತೋಬಿ ವಿಶ್ವಾಸ್ ಕರ್ಯಕೊಂತೆ ಯೆಹೂದ್ಯರ್‌ನೇ ಅಲ್ಹಾವ್ ಅದ್ಮಿಖ್ವಾರಾನ ವಿಶ್ವಾಸಿ ಭೈಯೇನ ವಿರೋದ್ ಉಠಾಡಿ ಭೀರಾಖ್ಯ.

3 ಅಮ್‌ರಾಪಮ ಇವ್ಣೆ ಘಣಾದನ್ ರಡ್ವೀನ್ ಪ್ರಭುನಿ ಬಾರೇಮ ಹಿಮ್ಮಡ್ಲಿ ವಾತೆಬೋಲ್ಯು ಪ್ರಭು ಇವ್ಣಹಾತೆ ಖ್ವಣೇದ್‌ನು ಕಾಮ್ ಬಿಙ್ಲು ಅದ್ಭುತ್‌ಕಾಮ್‌ಅಖ್ವು ಕರೀನ್ ಇನಿ ವಾರ್‌ಖ್ವಾನಿ ವಚನ್ನ ವತಾಳಿಲಿದೊ.

4 ಇನಖ್ವಾಜೆ ದೇವ್ನ ಉಪ್ಪರ್ ಭರೋಖ್ವೊ ರಾಖಿನ್ ಹಿಮ್ಮಡ್ಲಿ ವಾತೆಬೋಲ್ತು. ತದೆ ಯೊ ಖ್ವಯೇರ್ಮ ಅದ್ಮಿಮ ಥೋಡು ಯೆಹೂದ್ಯರ್‌ನಿ ವಾತೆನಾಬಿ ಬಿಙ್ಲು ಥೋಡುಙ್ಗಣು ಅಪೊಸ್ತಲ ಭಣಿವಾಳಾನಿ ವಾತೆನಾಬಿ ವಿಶ್ವಾಸ್ ಕರ್ತುಥೂತೆ ಇನಖ್ವಾಜೆ ಇವ್ಣಮಾಸ್ ಬೇ ಭಾಗ್‌ಹುಯು.

5 ಅಲ್ಹಾವ್ ಅದ್ಮಿಬಿ ಯೆಹೂದ್ಯರ್‌ಮಾನು ಥೋಡುಙ್ಗಣು ಇವ್ಣ ಅದಿಪತಿ ಖ್ವಾರನಿ ಜೋಡ್ಡ ಮಳಿನ್, ಪೌಲಬಿ ಬಾರ್ನಬನ ಬಂಡೊ ಫೇಕಿನ್ ಮಾರ್ಕ್‌ಕರಿ ಥು.

6 ತದೆ ಪೌಲ, ಬಾರ್ನಬನೆ ಅನ ಮಾಲುಮ್ ಕರಿಲಿನ್ ಯೋ ಖ್ವಯೇರ್ಮ ಮ್ಹೇಲಿದಿನ್ ಲುಕವೋನ್ಯಮ ಥೂತೆ ಲುಸ್ತ್ರ ಅಙ್ಲು ದರ್ಬೆಕರಿ ಖ್ವಯೇರ್‌ನಾಬಿ,

7 ಅಙ್ಲು ಯೋ ಖ್ವಯೇರ್ಮ ಅಶ್‌ಪೀಶ್‌ನು ತಬರ್‌ಖಾನ ಜೈನ್ ಹಿಙ್ಲ್ವಾ ಇವ್ಣೆ ಸುವಾರ್ತೆ ಖ್ವಮ್‌ಜಾಡ್ಯು.

ಲುಸ್ತಾಮ ಪೌಲಬಿ ಅಜು ಬಾರ್ನಬ

8 ಲುಸ್ತಾಖ್ವಿಯೇರ್ಮ್ ಗೋಡಾವ್‌ಮ ಶಕತ್‌ಕೊಂತೆ, ಪೈದಾಖ್ವಿಡ್ಡು ಲಂಗೊ ಹುಯಿರೋತೆ ಏಕ್‌ಜಣೊ ಬೆರೋಡೊ.

9 ಕದೇಬಿ ಚಾಲ್ತೊಡೊಕೊಂತೆ ಯೋ ಅದ್ಮಿ ಬೇರು ಬೇರು ಪೌಲನಿ ವಾತೆನ ಪೌಲನಿ ವಾತೆನ ಖ್ವಮ್‌ಜು ಕರ್ತುಡು. ಪೌಲನೆ ಇನ ರರ್‌ಕ್ಯೆನ್ ದೇಖಿನ್, ದೇವ್ ಗುಣ್‌ಕರ್ಶೆ ಕರಿ ಬೋಲಾನಿ ವಿಶ್ವಾಸ್ ಇನಾಮಧೂತೆ ಇನ ಮಾಲುಮ್ ಕರಿಲಿನ್,

10 ಯೋ ಲಂಗ್ಲಾನ್ “ಉಟ್ ಗೋಡಟೇಕಿ ಭೀರೆ!” ಕರಿ ಜೋರೇಖ್ವು ಬೋಲ್ಯೊ ತದೇಸ್ ಯೋ ಅದ್ಮಿ ಕೂದಿ ಭೀರಿನ್ ಚಾಲಲಗ್ಸು.

11 ಪೌಲನೆ ಕರ್ರೊತೆ ಆ ಕಾಮ್ ದೇಖಿನ್ ಹಿಜ್ಜಾನ್ ಅದ್ಮಿಖ್ವಾರಾನೆ, “ದೇವ್ ಖ್ವಾರು ಅದ್ಮಿನು ರೂಪಾಲೀನ್ ಅಪ್ಪಣ ಕನ ಉತ್ರಿನ್ ಆಯ” ಕರಿ ಇವ್ಚೆ ಲುಕವೋನ್ಯ ವಾತೆಮ ಚಿಕ್ರಾಣ್ ಮ್ಹೇಲ್ಯು!

12 ಅದ್ಮಿಖ್ವಾರಾನೆ, ಬಾರ್ನಬನ ‘ದ್ರೌಸ್’ ದೇವ್‌ಕರಿಬಿ, ಮುಖ್ಯ ಬೋಧನೆ ಕರಾವಾಳೊ ಥೋತೆ ಪೌಲನ ‘ಹೆರ್ಮೆ’ ದೇವ್‌ಕರಿಬಿ ಬೋಲ್ಯು.

13 ದ್ರೌಸ್‌ಕರಿ ಥೂತೆ ದೇವ್ನಿ ಘುಡೀನಿ ಖ್ವಾಮ್ಪೆನಿ ಝಗೋಮ ಪೂಜಾರಿನೆ ಥೋಡ ಥಾಂಡನಾಬಿ, ಪುಲ್ವ ಹಲ್ಡಾನಾಬಿ ಗಾಮ್‌ಬಾಕಲ್‌ಕನ ಲೀನ್ ಖ್ವಾರಾಅದ್ಮಿನಿ ಜೋಡೆ ಆಯಿನ್ ಪೌಲ ಬಾರ್ನಬನ ಖ್ವಾಮ್ಪೆ ಬಲಿ ಛಡಾವ್‌ಣುಕರಿ ಥು.

14 ಅನ ಖ್ವಮ್‌ಜ್ಯಾತೆ ಅಪೊಸ್ತಲ ಹುಯಿರಾತೆ ಪೌಲ, ಬಾರ್ನಬನೆ ಇವ್ಚ ಲಂಗ್ಲಾನ್ ಫಾಡಿಲೀನ್, ಅದ್ಮಿನಿ ಝೂಂಡ್‌ಮ ಪೇಶಿನ್, ಅಮ್ ಚಿಕ್ರಿನ್ ಬೋಲ್ಯು:

15 ಲೋಗ್ ತುಮೆ ಅಮ್ ಶನ ಕರುಕರಸ್ತೆ? ಹಮೇಬಿ ತುಮಾರಿನಿ ತರಾಸ್ ಅದ್ಮಿ ತುಮುನ ಸುವಾರ್ತೆ ಬೋಲಾನ ಆಯಾತೆ, ತುಮೆ ಅಥ್ರಾನು ಫಾಯಿದೊಕೊಂತೆ ಕಾಮ್ ಮ್ಹೇಲಿನ್ ಆಬ್ ಧರ್ತಿನ, ದರ್ರಾವ್‌ನಾಬಿ, ಇನಾಮ ಛಾತೆ ಖ್ವಾರೊಸ್ ಉಬ್‌ಜಾಯೋತೆ ಜಿವ್ವೊಜಾನ್ ರ್ವಾವಾಳೊ ದೇವ್ನಿ ಸುವಾರ್ತೆನ ಬೋಲಾನ ಹಮೆ

ಆಯಾತೆ.

16 ಖ್ಹತ್ತಮ್ ಹುಯಿಗೂತೆ ಹಗಾಮ್ಮ ದೇವ್ನ್ ಖ್ಹಾರ ಅದ್ಮಿವೋನ ಇವ್ವಿ ಇವ್ವಿ ಮರ್ಜಿಥಿ ಇವ್ವುನ ಹೋಣುತೆ ಮಾರಗ್‌ಪರ್ ಫಾಲಾನ ಮ್ಹೆಲಿದಿದೊ.

17 ಕತೋಬಿ ಇನಿ ಬಾರೇಮ ಸಾಕ್ಷಿದಿದೊಕೊಂತೆ ಕೊಯ್ಚಿ; ಮದತ್ ಕರ್ತೊಆಯೋತೆ ಇನೇಸ್ ತುಮೂನ ಸೊರ್ಗಫೊ ಪಾಣಿನಾಬಿ ಖ್ಹುಗ್ಗೀನ ದನ್‌ಬಿ ಅನಾಜ್ ದೀನ್ ತುಮಾರ ದಿಲ್ವ ಖುಷಿಥಿ ಭರ್ರ್ಯೊ ಕರಿ ಬೋಲ್ಯೊ.

18 ಇವ್ವೆಆ ವಾತೆ ಬೋಲ್ಯೊತೋಬಿ ಅದ್ಮಿಖ್ಹಾರು ಇವ್ವುನಖ್ಹಾರು ಬಲಿ ಚ್ಚಡಾವಾನು ವಿರೋದ್ ಹುಯು.

19 ಇನಕೇಡೆಥು ಥೋಡು ಯೆಹೂದ್ಯರ್, ಅಂತಿಯೋಕ್ಯಥೂಬಿ ಅಜ್ಜು ಇಕೋನ್ಯಥು ಐನ್ ಪೌಲನ ವಿರೋದ್ ಅದ್ಮಿಖ್ಹಾರಾನ ಭೀರಾಖಿನ್, ಪೌಲನಪರ್ ಬಂಡೊಫೇಕಿನ್ ಯೋ ಮರಿಗಯೊಕರಿ ಲಾರ್ಪಿನ್ ಖ್ಹುಯೇರ್‌ಥಿ ಭಾರ್ ಖೇಚಿಲಾಯಿ ನಾಖೀದಿದು.

20 ಕತೋಬಿ ಶಿಷ್ಯರ್ ಇನ ಅಶ್‌ಪಿಶ್ ಭರ್ರೆನ್ ಆಯ. ತದೆ ಯೋ ಉರೀನ್ ಖ್ಹುಯೇರ್‌ಮ ಗಯೊ. ಇನವ್ಹಾಣೆ ಬಾರ್‌ಬನಿ ಜೋಡೆ ದೆರ್ಬೆ ಖ್ಹುಯೇರ್ನ್ ಗಯ.

ಸಿರಿಯಾನು ಅಂತಿಯೋಕ್ಯನ ಪಾಲ್ಗ ಗಯಾತೆ

21 ಪೌಲಬಿ ಬಾರ್‌ಬನೆ ಯೋ ಖ್ಹುಯೇರ್‌ಮ ಸುವಾರ್ತೆ ಬೋಲಿನ್ ಕೈಯೇಕ್ ಜಣಾನ ಶಿಷ್ಯರ್ ಬಣ್ಣೆನ್ ಹುಯಿಗು ತದೆ, ಪಾಲ್ಗ ಫರೀನ್ ಲುಸ್ತನಾಬಿ ಇಕೋನ್ಯನಾಬಿ ಅಂತಿಯೋಕ್ಯ ಖ್ಹುಯೇರ್ನ್ ಗಯ.

22 ಹಿಜ್ಜಾನ್ ಶಿಷ್ಯರ್ನ್ ಭಾಲಿದೀನ್ ವಿಶ್ವಾಸ್ತ ಘಟ್ ಭೀರಾವನ ಹಿಮ್ಮತ್ ದಿದಾ. “ಅಪ್ಪಿ ದೇವ್ನಿ ರಾಜ್ಯನ ಘಣು ಮುಶ್ಕಿಲ್‌ನ ಮಹಿಕರಿ ಜ್ಞಾವ್ವಪಡಸ್” ಕರಿ ಬೋಲಿಲಿದ.

23 ಪೌಲ, ಬಾರ್‌ಬನೆ ಹರೇಕ್ ಸಭೆನ ಇವ್ವಿ ಹುಕುಮ್‌ಲೀನ್ ಯೋ ಸಬೆನಖ್ಹಾಜೆ ಕರಿ ಶಾಣಖ್ಹಾರಾನ ಚೂಣ್ಯ ಇವ್ವೆ ಉಪವಾಸ್ ರ್ಹೀನ್

ಪ್ರಾರ್ಥನೆ ಕರೀನ್ ಇವ್ಣೆ ವಿಶ್ವಾಸ್ ಕರಿರಾಖ್ಯಾತೆ ಶಾಣಾಖಾರನ ಪ್ರಭುನ ಹಾತ್ಮ ದಿದಾ.

24 ಪೌಲ, ಬಾರ್ನಾಬ ಪಿಸಿದ್ಯ ತಬರ್‌ಖಾಥು ಪಂಫುಲ್ಯ ತಬರ್‌ಖಾನ ಜೈನ್,

25 ಇನ ಮಳಿರೊಡ್ ಪೆರ್ಗೆ ಖ್ವಯೇರಮ ಪ್ರಭುನಿ ವಚನ್ ಬೋಲಿನ್ ಹಿಜ್ಜಾಥು ಅತ್ತಾಲಿಯ ಖ್ವಯೇರ್ಮಗಯ.

26 ಹಿಜ್ಜಾಥು ಇವ್ಣೆ ಸಿರಿಯ ಅಂತಿಯೋಕ್ಯನ ದರ್ಯಾನ್ ಮಾರಗಾಥಿ ಗಯ. ಹಜ್ಜಾಲ್‌ಗು ಇವ್ಣೆ ಕರೀನ್ ಖತಮ್ ಕರ್ಯಾತೆ ಸೇವೆನ ಕಾಮ್‌ಖಾಜೆ, ಇವ್ಣುನ ದೇವ್ಣೆ ವಾರ್‌ಖೊಕ್ರೀನ್ ಮೋಕ್‌ಲ್ಯಾಡೂತೆ ಕಾಮ್ ಆಸ್ ಖ್ವಯೇರಮ ಪೂರ ಹುಯೂತೆ.

27 ಪೌಲ, ಬಾರ್ನಾಬ ಅಂತಿಯೋಕ್ಯನ ಆಯಿನ್ ಹಿಜ್ಜಾನಿ ಸಬೆವಾಳನ ಎಕ್ಚು ಕರಿನ್, ದೇವ್ಣೆ ಇವ್ಣಿಜೋಡೆ ರ್ಲೀನ್ ಕರೊಡ್ತೆ ಅಖ್ಯಾಕಾಮ್ನಿ ಬಾರೇಮ ಇವ್ಣುನ ಖ್ವಮ್‌ಜಾಡ್ಯ ಬಿಜು “ಯೆಹೂದ್ಯರ್‌ಕಾಹೆತೆ ಇವ್ಣೆಬಿ ವಿಶ್ವಾಸ್ ಕರಾನಿತರ ದೇವ್ ಬಾಕಲ್ ಉಖ್ವಿರಾಖ್ಯೋಸ್!” ಕರಿ ಬೋಲಿವತಾಳ್ಳೊ.

28 ಹಿಜ್ಜಾ ಪೌಲ, ಬಾರ್ನಾಬ ವಿಶ್ವಾಸಿನ ಜೋಡೆ ಘಣಾದನ್ ರ್ಲಯ.

15

ಯೇರೂಸಲೇಮ್‌ಸಭೆ ಮಳ್ಳುತೆ

1 ತದೆ ಥೋಡು ಅದ್ಮಿಖಾರು ಯೂದಾಯಥು ಅಂತಿಯೋಕ್ಯ ಖ್ವಯೇರ್ಮ ಆಯು. ‘ಮೋಶೆನಿ ದಪ್ತರಮ ಬೋಲೈರ್ದಯುತೆ ಪರಕ್ ತುಮೆ ಖ್ವತ್ತ್ ನಾ ಕರಾಯತೊ ತುಮೂನ ರಕ್ಷಣೆ ಕೊಲುಷೇನಿ’ ಕರಿ ಯೆಹೂದ್ಯರ್‌ಕಾಹೆತೆ ಬೈಯೇನ ಬೋಲಿ ಒತಾಳು ಕರ್ತುಡು.

2 ಪೌಲ, ಬಾರ್ನಾಬನೆ ಆ ಉಪದೇಶ್‌ನ ವಿರೋದ್ ಕರಿನ್ ಇವ್ಣಿಜೋಡೆ ಅಬ್ಬಾಜಬ್ಬಿ ಬೋಲ್ಯ ಆ ವಿವಾದ್ನಿ ಬಾರೇಮ ಅಪೊಸ್ತಲರ್ಮ್ ಜೋಡೆ ಬಿಜು ಗಲ್‌ಥಾವ್‌ನಿಜೋಡೆ ವಾತ್‌ಚೀತ್ ಕರಾನ

ಪೌಲ,ಬಾರ್ನಾಬ ಬಿಜು ಅಲಕ್ ಥೋಡಜ್ಜಣಾನ ಯೆರೂಸಲೇಮ್ಮ ಮೋಕ್ಲಾನ ಸಬೆವಾಳು ನಿರ್ಧಾರ್ ಕರೃ.

3 ಸಬೆವಾಳು ಇವ್ವುನ ಮೋಕ್ಲಿ ಹುಯಿಜ್ಜಾವಾದಿನ್ ಇವ್ವೆ ಫೊಯಿನಿಕೆ, ಸಮಾರ್ಯ ತಬರ್‌ಖಾನಿ ವಾಟೆ ಜಾವಾನಿ ವಖ್ತಮ್ ಅಲಕ್ ಅದ್ಮಿಖ್ವಾರು ದೇವ್‌ಭಣಿ ಫರೃತೆ ಬಾರೇಮ ಹಿಜ್ಜಾಥೂತೆ ಭೈಯೇ ಖ್ವಾರಾನ ಏಕೇಕ್ ವಾತ್ಸಬಿ ಛೋಡಿ ಬೋಲಿವತಾಳಿನ್ ಇವ್ವಖ್ವಾರಾನ ಘಣು ಖ್ವಶಿಕರಾಯು.

4 ಪೌಲ,ಬಾರ್ನಾಬ ಯೆರೂಸಲೇಮ್‌ನ ಐನ್ ಸಬೆವಾಳನ ಅಪೊಸ್ತಲರ್ ಖ್ವಾರಾನ ಸಬೇನು ಗಲ್‌ಥವ್‌ಖ್ವಾರಾನ ಜೋಡ್ ಮಳಿಜೈನ್ ದೇವ್ ಇವ್ವಜೋಡೆ ರೃಯಿನ್ ಕರೃತೆ ಕಾಮ್‌ಖ್ವಾರಾನ ಪೌಲ,ಬಾರ್ನಾಬನೆ ಇವ್ವುನ ಬೋಲಿ ವತಾಳ್ಳು.

5 ಹಿಜ್ಜಾ ಥೂತೆ ವಿಶ್ವಾಸಿ ಖ್ವಾರಾಮ ಥೋಡು ಫರಿಸಾಯರ್‌ನ ಝೂಂಡ್‌ವಾಳುಬಿ ಥೂ. ಇವ್ವೆ ಉರಿಭೀರಿನ್ ವಿಶ್ವಾಸಿಕೊಂತೆ ಖ್ವಾರು ಖ್ವತ್ ಕರೈಲೇವ್ವು ಮೋಶೆನ ಧರ್ಮಶಾಸ್ತ್ರಕನ ಖ್ವಾವ್ವೆ ಮುಡ್‌ಕ್ಕು ಝುಕಾವ್ವುಕರಿ ಅಪ್ಪೆ ಇವ್ವುನ ಬೋಲ್‌ನು” ಕರಿ ಬೋಲ್ವು.

6 ತದೆ ಅಪೊಸ್ತಲರ್ ಖ್ವಾರು ಬಿಜು ಗಲ್‌ಥಖ್ವಾರು ಆ ವಾತೆನ ಬಾರೇಮ ಸೋಚಾನಖ್ವಾಜೆ ಎಕ್ವು ಹುಯು.

7 ಘಣಿ ವಖ್ತಲಗು ವಾತ್‌ಚೀತ್ ಹುವಾನ ಬಾದ್ ಪೇತ್ರ ಉರಿಭೀರಿನ್ ಇವ್ವುನ, “ಮಾರ ಭೇನೆ ಭೈಯೇವೊ, ಯೆಹೂದ್ಯರ್‌ಕಾಹೆತೆ ಅದ್ಮಿಖ್ವಾರಾನ ಸುವಾರ್ತೆ ಬೋಲಾನಖ್ವಾಜೆ ತುಮಾರ ಬೀಚ್ಛಾಥು ದೇವ್‌ಮನ ಘಣದನ್ನಪಾರಸ್ ಚೂಣಿರಾಖ್ಯೊಸ್, ಅಜು ಇವ್ವೆ ಮಾರೇಥಿ ಸುವಾರ್ತೆ ಖ್ವಮ್‌ಜಿನ್ ದೇವ್ ವಿಶ್ವಾಸ್ ಕರೃ ತುಮುನ ಮಾಲುಮ್‌ಛಾ.

8 ಖ್ವಾರ ಅದ್ಮಿನಿ ಸೋಚ್ ಖ್ವಮಜ್ಯೊಹುಯೊ ದೇವ್ ಕಿಮ್ ಪವಿತ್ರಾತ್ಮನ ವರಾನ ಅಪ್ಪುನ ದೀರಾಖ್ಯೊಕಿ ತಿಮ್ ಇವ್ವುನಾಬಿ ದೀನ್ ಸಾಕ್ಷಿದಿದೊ.

9 ಅತ್ರೇಸ್ ಕಾಹೆತೆ, ದೇವ್ ಅಪ್ಪುನಾಬಿ ಇವ್ವುನಾಬಿ ಶನೂಸ್

ಗುಮಾನಿ ಕರೊಕ್ಕೊಂತೆ ಇವ್ವ ದಿಲ್ವ ವಿಶ್ವಾಸ್‌ಧೀಸ್ ಶುದ್ಧಕರೊಕ್ಕೊ.

10 ಅಮ್‌ರ್ದವಾಪರ್, ಅಲ್ಟಾವ್ ವಿಶ್ವಾಸಿ ಶನ ಬೈಯೇವ್ವ ಖಾಂದಪರ್ ವಜನ್ನೊ ಭೋಜೊ ಶನ ಡೊವಾಡೊಸ್? ತುಮ ದೇವ್ವ ಇರಾದೊ ಲ್ಲಡಾವಾನಿ ಕೋಶಿಶ್ ಕರುಕರಾಸ್ತಿ ಶು? ಹಮೂನ ರ್ಡವೊ ಹಮಾರ ಗುರುಖ್ವಾರಾನರ್ದವೊ ಆ ಭೋಜೊ ಡೊವಾಡಯೆತ್ರೆ ಶಕತ್ ಕೋಧಿನಿ.

11 ಇನಖ್ವಾಜೆ ಹಮೆರ್ದವೊ ಅವ್ಣೆ ರ್ಡವೊ ರಕ್ಷಣೆ ಲೀಲ್ಯಾವಾನು, ಪ್ರಭುಹುಯಿರ್ದೊಂತೆ ಯೇಸುನಿ ಗೋರ್‌ಧೀಸ್ ಕರಿ ಹಮೆ ವಿಶ್ವಾಸ್ ಕರಿಯೇಸ್” ಕರಿ ಬೋಲ್ಯೊ.

12 ತದೆ ಝೂಂಡ್ ಭರೈರ್ದೊಂತೆ ಖ್ವಾರಾಸ್‌ನೆ ಆ ವಾತೆಖ್ವಾರಿ ಖ್ವಮ್‌ಜಿನ್ ಶೊಪೊ ಪಡೀಗು. ಬಾರ್‌ಬ ಅಜು ಪೌಲಧಿ, ದೇವ್ವೆ ಅಲ್ಟಾವ್ ಅದ್ಮಿಮ ಕರೊಕ್ಕೊಂತೆ ಖ್ವಾರು ಖ್ವಣೇದ್‌ನು ಕಾಮ್‌ಬಿ, ಅದ್ಭುತ್‌ಕಾಮ್‌ನಾಬಿ ಬೋಲ್ಯುತೆ ಇನ ಕಾನ್‌ದೀನ್ ಖ್ವಮ್‌ಜ್ಯು.

13 ಇವ್ಣೆ ವಾತ್ ಬೋಲಾನು ಭೀರಾಖಾದಿನ್ ಯಾಕೋಬನೆ, “ಮಾರ ಭೇನೆ ಬೈಯೇವೊ ಮಾರಿ ವಾತೆ ಖ್ವಮ್‌ಜೊ,

14 ಯೆಹೂದ್ಯರ್‌ಕಾಹೆತೆ ಅದ್ಮಿನ ದೇವ್ವೆ ದೇಕ್‌ಭಾಲ್ ಕಿಮ್ ಕರೊಕ್ಕೊಕರಿ ಸಿಮೋನನೆ ಖ್ವಮ್‌ಜಾಡಿರಾಖೊಸ್. ಪಹಿಲಿಬಾರ್ ಯೆಹೂದ್ಯರ್‌ಕಾಹೆತೆ ಅದ್ಮಿನ ಏಕ್ ಜಣಾನ ದೇವ್ವೆ ಇನಿ ಕೃಪೆಧಿ ಸ್ವೀಕಾರ್ ಕರರಾಖೊಸ್, ಇವ್ಣುನ ಇನು ಅದ್ಮಿಕರಿ ಕರಿಲಿದೊ.

15 ಪವಿತ್ರ ದಪ್ಪರ್‌ಮ ಅಮ್ ಲಿಖೈರ್ದೊಸ್ ಪ್ರವಾದಿಖ್ವಾರಾನಿ ವಾತೇಬಿ ಇನ ಮಾನಿಲೇವ್ ಕರಸ್ ಕಿಮ್‌ಕತೊ,

16 ಆ ಹುವಾದಿನ್ ಮೇ ಫರಿನ್ ದಾವೀದನ ರಾಜ್ಯನ ಪಾಲ್ಟೊ ಭಾಂದುಸ್. ಯೋ ರಡ್ಕಿಗಯೂತೆ ರಾಜ್ಯನ ಟುಕ್ಡಾವ್‌ನ ಮೇ ಪಾಲ್ಟೊ ಏಕ್ಕುಕರೀನ್ ಘಟ್‌ಧಿ ನವು ಬಣವುಸ್.

17 ತದೆ ಜಗ್‌ಜಾತ್‌ಮ ಉಭೈರ್ದೊಂತೆ ಅದ್ಮಿಮ ಥೋಡು ಜಣು ಕತೊ ದೇವ್‌ನು ಅದ್ಮಿಕರಿ ಬೋಲ್ಯೆರ್ದೊಂತೆ ಖ್ವಾರೊಸ್ ಜಗ್‌ಜಾತ್‌ಬಿ ಪ್ರಭುನ

ಡೂಂಡವಾಳು ಹುಯಿರುಸ್, ಯೆಹೂದ್ಯರ್‌ಕಾಹೆತೆ ಅದ್ವಿನ ಮಾರು ಶೊಂತ್ ಕರೀಶ್.

18 ಶುರುಮಾಥು ಆ ಖ್ವಾರು ಕಾಮ್ ಖ್ವಾಮ್‌ಭಾಡ್ಯೊತೆ ಪ್ರಭು ಬೋಲುಕರಸ್, ಕರಿ ಲೀಖ್ವಿರ್ವ್ವಸ್.

19 “ಅಮ್‌ರ್ದವಾಪರ್ ದೇವ್‌ಭಣಿ ಫರಾವಾಳ ಯೆಹೂದ್ಯರ್‌ಕಾಹೆತೆ ಅದ್ವಿವೊನ ಅಡ್ವಿನಾಕರನ್ನ ಆ ಮಾರಿ ಖ್ವಾಜ್.

20 ಇನ ಬದಲ್‌ಥಿ ಅಪ್ಪೆ ಇವ್ಣುನ ಏಕ್ ಚಿಟ್ಟಿ ಲೀಖ್ವಿ; ಯೊ ಶಾತ್‌ಕತೊ ಮೂರತ್ನ ಝಾಳ್ ಉತಾರಹುಯನಾಬಿ, ವ್ಯಬಿಚಾರ್‌ಥಿಬಿ, ಬಿಜು ಲೋಯಿನಾಬಿ, ನ್ಹೆಟಿ ಭೀಚಿನ್ ಮಾರ್ಚ್ಯಹುಯ ಜಿನಾವರ್‌ನಬಿ ನಾಖಾವ್ಣು ಕರಿ ಅಕ್ಕ್‌ಲ್ ದೇವ್ಣು.

21 ಶನಕತೊ ಪೂರತ್ ಕಾಲಥು ಅಖ್ವಾ ಖ್ವಯೇರಮ ಮೋಶೆನ ದಪ್ತರ್‌ನ ಬೋಧನೆ ಕರಾವಾಳು ಖ್ವಾರು ಛಾ. ಕೈಏಕ್ ವರಖ್ವಾಥು ಹರ್ ಸಬ್ಬತ್ ದನ್ಯ ಸಬಾಮಂದಿರಮ ಮೋಶೆನಿ ವಾತೆಖ್ವಾರಿ ಫಡವ್‌ಕರಸ್.” ಕರಿ ಬೋಲ್ಯೊ.

ಯೆಹೂದ್ಯರ್ ಕಾಹೆತೆ ವಿಶ್ವಾಸಿಯೇನ ಚಿಟ್ಟಿ

22 ತದೆ ಅಪೊಸ್ತಲರಾಬಿ ಸಬೆನ ಗಲ್‌ಥಖ್ವಾರಾಬಿ ಬಿಜು ಸಬೇನು ಖ್ವಾರೂಸ್, ಪೌಲ ಬಾರ್‌ನಬನಿ ಜೋಡೆ ಇವ್ಣುಮಾಥುಸ್ ಥೋಡುಅದ್ವಿನ ಚೂಣಿನ್ ಅಂತಿಯೋಕ್ಯ ಖ್ವಯೇರನ್ನ ಮೋಕಲ್ನುಕರಿ ತೀರ್ಮಾನ್ ಕರನ್ಯ. ಇನಖ್ವಾಜೆ ಬಾರ್‌ಸಬ ಕರಿ ಬೋಲೈರ್ರೊಡೆತೆ ಯೂದನಾಬಿ, ಸೀಲನಾಬಿ ಚೂಣಿನ್, ಯೋ ಖ್ವಾರಾನ ಮುಖ್ಯಖ್ವಾರು ಕರನ್ಯ.

23 ಇವ್ಣು ಹಾತ್ಮ ಲೀಖಿನ್ ದೀರಾಖ್ಯುಥೂತೆ ಶಾತ್‌ಕತೊ, ಭಯೇಖ್ವಾರ ಹುಯಿರಾತೆ ಅಪೊಸ್ತಲರನ್ನೇಬಿ ಗಲ್‌ಥಖ್ವಾರಾನೇಬಿ ಅಂತಿಯೋಕ್ಯ ಸಿರಿಯ, ಕಿಲಿಕ್ಯ ತಬರ್‌ಖಾಸ್‌ಮ ಛಾತೆ ಯೆಹೂದ್ಯರ್‌ಕಾಹೆತೆ ಭೈಯೇ ಭೇನೇನ ಹಮಾರಿ ಖ್ವಲಾಮ್;

24 ಹಮಾರಕಂಥು ಆಯುತೆ ಥೋಡಜ್ಜಣಾನೆ ಹಮಾರೇಥಿ ಖಿವಿ ಹುಕುಮ್‌ನ ಮಾನ್ಯುಕೊಂತೆ ಇವ್ಣಿ ವಾತೆಥಿ ತುಮರಾಮ

ಸಮಾಧಾನ್‌ಕೊಂತೆ ಕರಿನಾಖಿನ್, ತುಮಾರ ದಿಲ್ವ ಕಲಾವ್ಣಿ ಕರಯ್ಕರಿ ಹಮೂನ ಮಾಲುಮ್ ಪಡ್ಕು.

25 ಇನಖ್ವಾಜೆ ಹಮೆಖ್ವಾರಾಸ್ ಎಕ್ವಹುಯಿನ್ ಥೋಡಭಣಾನ ಚೂಣಿನ್ ಪ್ಯಾರ್‌ನ ಬೈಯೆ ಪೌಲ, ಬಾರ್‌ನಬನ ಜೋಡ್ಡ ತುಮಾರಕನ ಮೋಕ್ಲ ಕರಿಯೇಸ್.

26 ಪೌಲ, ಬಾರ್‌ನಬನೆ ಅಪ್ಪೊ ಪ್ರಭು ಹುಯಿರೋತೆ ಯೇಸುಕ್ರಿಸ್ತನ ನಾಮ್‌ಥಿ ಸೇವೆನಖ್ವಾಜೆ ಇವ್ವಜಿವ್ವನಾಸ್ ದಿನಾಖ್.

27 ಇನಖ್ವಾಜೆ ಹಮೆ ಯೂದನ ಬಿಜು ಸೀಲನ ಇವ್ವಿ ಜೋಡೆ ಮೋಕ್ಲಿರಾಖ್ಯೊಸ್. ಆ ಅಖ್ವು ತುಮೂನ ಮೋಡಾನಿ ವಾತೆಥಿ ಖ್ವಮ್‌ಜಾಡ್‌ಶೆ.

28 ಆ ಹೋಣುತೆ ಖಾನುಲ್‌ನ ಮ್ಹೇಲಿನ್ ತುಮಾರಪರ್ ಬಿಜು ಖಿವೂಬಿ ಭೋಜ್‌ನ ನಾಕ್ಟನಾತೆ ತಿಮ್ ಪವಿತ್ರಾತ್ಮ ಅಜು ಹಮೆ ಮಾನಿರಾಖ್ಯೊಸ್.

29 ಯೋ ಅಖ್ವು ಖಿವುಕತೊ; ಮೂರತ್ನ ಝಾಳ್ ಉತಾರಹುಯನಾಬಿ, ಲ್ಹೋಯಿನಾಬಿ, ನ್ಹೇಟೆ ಭೀಚಿನ್ ಮಾರ್‌ಹುಯ ಜಿನಾವರ್‌ನಬಿ ನಾಖಾವ್ವು. ಅಜು ವ್ಯಬಿಚಾರ್‌ನ್ನ ಪಾಪ್ಪಕಾಮ್‌ಥಿ ತುಮುನ ಬಚಾಡಿಲೆವೊ. ಆ ಅಖ್ವು ನಾಕರನ್ತೆ ತಿಮ್ ಹೊಷಾರ್‌ಥಿ ರ್ಹಯಾತೊ ತುಮೆ ಅಲ್ಫು ಕರ್ತು. ತುಮುನ ಅಲ್ಫು ಹುವಾದೆ.

30 ಅಮ್ ಪೌಲ, ಬಾರ್‌ನಬ ಬಿಜು ಯೂದ, ಸೀಲ, ಯೆರೂಸಲೇಮ್‌ಥು ಅಂತಿಯೋಕ್ಯ ಖ್ವಯೇರ್‌ನ್ನ ಜೈನ್ ಹಿಜ್ಜ ವಿಶ್ವಾಸಿಯೆವ್ವಿ ಸಭೆನ ಭರೈನ್, ಯೋ ಚಿಟ್ಟಿ ಇವ್ವುನ ದಿದು.

31 ತದೆ ಇನ ಜೋರೇಖ್ವು ಪಥೀನ್ ಅಜು ಯೊ ಭಾಲಿನಿ ವಾತೆ ಖ್ವಮ್‌ಜಿನ್ ಇವ್ವೆ ಘಣು ಖುಷಿಕರಯ್.

32 ಯೂದ ಬಿಜು ಸೀಲಬಿ ಪ್ರವಾದಿ ಹುಯಿರ್‌ಡ್ಹಾತೆಖ್ವಾಜೆ ಇವ್ವಿ ಕೈಯೆಕ್ಲಿ ಥರಾನಿ ವಾತೆ ಖ್ವಮ್‌ಜಿನ್ ಭೇನೆ ಬೈಯೇವ್‌ಖ್ವಾರಾನ ಹಿಮ್ಮತ್ ಆಯು.

33 ಯೂದ ಸೀಲ ಥೋಡದನ್ ಹಿಜ್ಜರ್‌ಡ್ಹೀನ್ ಭಯೇಥಿ ಸಮಾಧಾನ್ನಿ

ಆಶೀರ್ವಾದ್ ಲೀಲಿದ. ಅನಪಾರ್ ಇವ್ಣೆ ಪಾಲ್ಲ ಯೆರೂಸಲೇಮ್‌ನ ಇವ್ಣುನ ಮೋಕ್‌ಲ್ಯಥಾತೆ ವಿಶ್ವಾಸಿಕನ ಗಯ.

34 * ಕತೋಬಿ ಸೀಲನ ಹಿಜ್ಜಾಸ್ ರ್ವಯೂತೊ ಅಲ್ಫುಕರಿ ಮಾಲುಮ್‌ಕರ್ರೊ.

35 ಕತೋಬಿ ಪೌಲ, ಬಾರ್ನಬ ಅಂತಿಯೋಕ್ಯಮಾಸ್ ರ್ವೀನ್, ಅಜ್ಜು ಕೈಯೇಕ್ ಜಣಾನಿ ಜೋಡೆ ಮಳಿನ್ ಸುವಾರ್ತೆ ಬೋಲ್ತಹುಯಿನ್ ಬಿಜ್ಜು ಪ್ರಭುನಿ ವಚನ್ನ ಅದ್ಮಿಖ್ವಾರಾನ ಶಿಕಾಡ್ಕು.

ಪೌಲ ಬಾರ್ನಬ ಅಲಕ್ ಹುಯಾತೆ

36 ಥೋಡದನ್ ಹುವಾದಿನ್ ಪೌಲನೆ, “ಬಾರ್ನಬನ ಅಪ್ಪೆ ಕೈಯೇಕ್ ಖ್ವಯೇರ್ಮ ಪ್ರಭುನಿ ವಚನ್ನ ಖ್ವಮ್‌ಜಾಡ್ಕ. ಯೋ ಅಖ್ವಾ ಖ್ವಯೇರ್ಮ ಲಾತೆ ಅಪ್ಪ ಬೈ ಭೇನೆನ ಮಳಿನ್ ಇವ್ಣೆ ಕಿಮ್ ಲಾಕಿ ದೇಖಿನ್ ಐಯ್ಕೆ” ಕರಿ ಬೋಲ್ಯೊ.

37 ಬಾರ್ನಬನೆ ಮಾರ್ಕಕರಿ ಬೋಲ್ತೆರ್ರೊತೆ ಯೋಹಾನ ಇವ್ಣಿ ಜೋಡ್ಕ ಬುಲೈಲಿ ಜಾವ್ಣುಕರಿ ಬೋಲ್ಯೊ.

38 ತದೆ ಪೌಲನೆ, ಅಪ್ಪಿ ಜೋಡ್ಕ ಸೇವೇನ ಕಾಮ್ ಕೋ ಆಯೋನಿತೆ, ಪಂಫುಲ್ಯ ಗಾಮ್ ಅಪ್ಪುನ ಮ್ಹೇಲಿನ್ ಜಾವಾಳನ ಬುಲೈಲಿನ್ ಜಾವಾನು ಬರೋಬರ್ ಕೊಯ್ನಿಕರಿ ದಿಲ್ಕ ಕರ್ರೊ.

39 ಇನಿ ಬಾರೇಮ ಪೌಲ, ಬಿಜ್ಜು ಬಾರ್ನಬಮ ಘಣು ಅಬ್ಬಾಜ್ಜಿ ವಾತೆಹುಯಿನ್ ಇವ್ಣೆ ಬೇಜ್ಜಣ ಅಲಕ್‌ಹುಯಿಗ. ಬಾರ್ನಬ ಮಾರ್ಕನ ಬುಲೈಲಿನ್ ದರ್ರ್ಯಾವ್‌ನ ಮಾರ್ಗೆ ಸೈಪ್ರಸ್ ಟಾಪನ ಗಯೊ.

40 ಪೌಲನೆ ಇನಜೋಡೆ ಸೀಲನ ಬುಲೈಲಿನ್ ಗಯೊ. ಅಂತಿಯೋಕ್ಯನ ಭಯೇಖ್ವಾರಾನೆ ಪೌಲನ, ಪ್ರಭುನ ವಾರ್‌ಖ್ವೇಥಿ ಹಿಜ್ಜಾಡ್ಕು,

41 ಇವ್ಣೆ ಸಿರಿಯ ಬಿಜ್ಜು ಕಿಲಿಕ್ಯ ತಬರ್‌ಖಾವ್‌ಮ ಕರಿ ಪಡ್ತಹುಯಿನ್ ಹಿಜ್ಜಾನಿ ಅಖ್ವಿ ಸಬೆನ ಘಟ್ ಕರ್ರೊ.

* 15:34 15:34 ಆ ವಚನ್ ಥೋಡ ಲೀಖಾಪಟ್‌ನ ಪುಸ್ತಕ್‌ಮ ಬೋಲ್ತೆರನ್ನ ಕೊಯ್ನಿ.

16

ಪೌಲಬಿ ಸೀಲಾನಿ ಜೋಡ್ಡು ತಿಮೋಥೆ

¹ ಪೌಲನೆ ದೆರ್ಬೆ ಅಜ್ಜು ಲುಸ್ತಕರಿ ಖ್ವಿಯೇರಮ ಗಯೊ. ಹಿಜ್ಜಾ ತಿಮೋಥೆಕರಿ ಏಕ್‌ಜಣೊ ಕ್ರಿಸ್ತನೊ ವಿಶ್ವಾಸಿ ಥೊ. ತಿಮೋಥೆನಿ ಆಯ ಯೆಹೂದ್ಯವಾಳಿ ಹುಯಿರ್ದೊಡ್ಡಿ ಅಜ್ಜು ಬಾ ಗ್ರೀಕ್‌ವಾಳೊ ಹುಯಿರ್ದೊಡ್ಡಿ.

² ಲುಸ್ತ ಅಜ್ಜು ಇಕೋನ್ಯ ಖ್ವಿಯೇರನ್ನು ವಿಶ್ವಾಸಿಖ್ವಾರು ತಿಮೋಥೆನ ಮರ್ಯಾದಿ ದೇತುಡು. ಅಜ್ಜು ಇನಿ ಬಾರೇಮ ಅಫ್ಲೂಸ್ ಬೋಲ್ತುಡು.

³ ಪೌಲ ತಿಮೋಥೆನ ಇನಕೇಡೆ ಬುಲೈಲಿನ್ ಜಾವ್ತುಕರಿ ಇಷ್ಟಕರೊಯೊ ಝಗೋಮ ಥೋತೆ ಯೆಹೂದ್ಯರನ ತಿಮೋಥೆನೊ ಬಾ ಗ್ರೀಕ್‌ನೊಕರಿ ಮಾಲುಮ್‌ಥೂತೆ ಇನಖ್ವಾಜೆ ಇನ ಖ್ವತ್ಸ ಕರಾಯೊ.

⁴ ಇನಕೇಡೆಡು ಪೌಲ ಅಜ್ಜು ಇನ ಜೋಡೆ ರ್ವಾಳುಖ್ವಾರು ನಂಗರಾಧಿ ನಂಗರ್ ಫರನ್ನು ಯೆರೂಸಲೇಮ್‌ಥೂತೆ ಅಪೊಸ್ತಲರನ್ನಿ ಅಜ್ಜು ಗಲಾಡವಾನಿ ಖ್ವಾಜ್‌ನ ಇವ್ಣೆ ವಿಶ್ವಾಸಿಖ್ವಾರನ ಬೋಲಿನ್ ಇನ ಪಾಡೀನ್ ಚಾಲ್‌ನುಕರಿ ಬೋಲ್ಯೊ.

⁵ ಅಮ್ಮಸ್ ಕ್ರಿಸ್ತನು ಸಬೆಖ್ವಾರು ದನ್‌ಧಿ ದನ್ ವಿಶ್ವಾಸ್ತ ಭಡಾಲಗ್ಗು ಸಬೆಖ್ವಾರು ವಿಶ್ವಾಸ್ತ ಘಟ್‌ಧಿ ಭೀರಿನ್ ವಿಶ್ವಾಸಿ ದನ್‌ಪರ್ ದನ್ ಜಾಖ್ವತ್ ಹುವಾಲಗ್ಗು.

ತ್ರೊವಾಸ್‌ಮ ಪೌಲನ ಹುಯೂತೆ ದರ್ಶನ್

⁶ ಏಷ್ಯಾ ಮುಲಕ್‌ಮ ಪೌಲ ಇವ್ಣೆಖ್ವಾರು ಸುವಾರ್ತೆನ ಬೋಲಿನ್ ನಾ ವತಾಳ್ತುಕರಿ ಪವಿತ್ರಾತ್ಮನೆ ಖ್ವಮ್‌ಜಾಡಿರಾಖ್ಲೊಡ್ಡಿ. ಇನಖ್ವಾಜೆ ಇವ್ಣೆ ಫ್ರಿಜಿಯ, ಅಜ್ಜು ಗಲಾತ್ಯ ತಬರ್‌ಖಾನಿ ವಾಟೆ ಗಯ.

⁷ ಪೌಲ ಅಜ್ಜು ತಿಮೋಥೆ ಇವ್ಣೆ ಮುಸಿಯ ನಂಗರನ್ನು ಖನ್ನೆ ಗಯ. ತದೆ ಇವ್ಣೆ ಬಿಡೂನ್ಯ ನಂಗರಮ ಜಾವ್ತುಕರಿ ಥಾ. ಕತೋಬಿ ಯೇಸುನ ಆತ್ಮನೆ ಹಿಜ್ಜಾಬಿ ಜಾವಾನ ಕೊ ಮ್ಹೆಲ್ಯುನಿ.

8 ಇನಖ್ವಾಜೆ ಇವ್ಣೆ ಮುಸಿಯ ನಂಗರ್‌ಪರ್ ಕರಿ ನೇರ್ ತ್ರೋವ ಖ್ವಯೇರ್‌ಮ ಆಯ.

9 ಯೋ ರಾತ್ತ್ ಪಾಲನ ಏಕ್ ದರ್ಶನ್‌ಹುಯು. ಮೆಕೆದೋನ್ಯನೊ ಏಕ್‌ಜಣೊ ಹಿಜ್ಜಾಬೀರಿನ್; ಮೆಕೆದೋನ್ಯಮ ಐನ್ ಹಮೂನ ಮದತ್ ಕರ್” ಕರಿ ಗಿಂಗೈಲಿದೊ.

10 ಪಾಲನೆ ಯೋ ದರ್ಶನ್ ದೇಖಿನ್, ತದ್‌ನು ತದೇಸ್ ಹಿಜ್ಜಾನ ಅದ್ವಿನ ಸುವಾರ್ತೆನ ಖ್ವಮ್‌ಜಾಡಾನಖ್ವಾಜೆ ದೇವ್ಣೆ ಹಮೂನ ಬುಲೈರಾಖ್ಯೊಸ್ ಕರಿ ಮಾಲುಮ್ ಕರಿಲಿನ್ ಮೆಕೆದೋನ್ಯನ ಜಾವಾನ ಇವ್ಣೆತಯಾರ್ ಹುಯ.

ಫಿಲಿಪ್ಪಿಮ ಲಿಡಿಯಾನಿ ದಿಲ್ ಬದಲಾವ್ಣಿ

11 ಹಮೆ ತ್ರೋವಧು ಜಹಾಜ್ ಚರ್ಥಿನ್ ಸಮೊಥ್ರಾ ಐನ್, ಬಿಜೇಕ್ ದನ್ನೆ ನೆಯಾಪೊಲಿ ಖ್ವಯೇರ್ ಪೋಚಿನ್ ಹಿಜ್ಜಾಧ ಫಿಲಿಪ್ಪಿನ ಆಯ.

12 ಫಿಲಿಪ್ಪಿಕರಿ ಬೋಲಾನು ಮೆಕೆದೋನ್ಯನು ಖ್ವಯೇರ್ ಹುಯಿರ್ಲ್ಲ್ಯಧು. ರೋಮ್‌ವಾಳಾನು ರ್ವಾನು ಝಗೋ ಹುಯಿರ್ಲ್ಲ್ಯಧಿ. ಹಜ್ಜಾ ಥೋಡ ದನ್ ರ್ಲ್ಯಯ.

13 ಖ್ವಯೇರ್ ಭಾರ್ ಥೂತೆ ನದ್ದಿನ ಕನಾರಿನ ಖನ್ನೆ ಯೆಹೂದ್ಯರನ್ನ ಪ್ರಾರ್ಥನೆನಿ ಝಗೊರಲ್ವುಕರಿ ಸಬ್ಬತ್ ದನ್ಮ ಹಿಜ್ಜಾಗಯಾಧ. ಹಿಜ್ಜಾ ಥೋಡಿ ತಯೇಡ ಅಯಿರ್ಲ್ಲ್ಯಧಿ. ತದೆ ಹಮೆ ಬೇಶಿನ್ ಇವ್ಣೆಧಿ ವಾತೆ ಬೋಲ್ಯ.

14 ಹಮಾರಿ ಬೋಧನೆ ಖ್ವಮ್‌ಜ್ಯುತೆ ತಯೇಡಾವ್ಣೆ ಲಿಡಿಯಾಬಿ ಏಕ್‌ಜಣಿ. ಆ ಹೈರಿತೆ ಥುವತ್ಯೆರ ಖ್ವಯೇರ್‌ವಾಳಿ; ಹೈರಿತೆ ರಾಯಿಜಾಮಣ್ಣ ರಂಗ್ಣು ಲುಂಗ್ಣು ವೇಚಿನ್ ಧಂದೊ ಕರಾವಾಳಿ ಹುಯಿರ್ಲ್ಲ್ಯಧಿ. ಆ ಖ್ವಾಚ ದೇವ್ಣೆ ಆರಾದನೆ ಕರ್ತೀಧಿ. ಪಾಲನ ಬೋಧನೆನ ಕಾನ್‌ಜೋಡಿ ಖ್ವಮ್‌ಜಾನಿತರ ಪ್ರಭುನೆ ಇನ ದಿಲ್ನ ಛೋಡಾಯೊ. ಪಾಲನೆ ಬೋಲ್ಯೊತೆ ಖ್ವಾರು ಇನೆ ವಿಶ್ವಾಸ್‌ಕರಿ.

15 ಲಿಡಿಯ ಅಜು ಇನ ಘರ್‌ಮಥೂತೆ ಖ್ವಾರುಜಣು ಬ್ಯಾಪ್ತಿಸ್ತ ಕರ್ತಲಿದು. ಇನೆ, “ಪ್ರಭುನಿ ಖ್ವಾಚ ವಿಶ್ವಾಸಿಕರಿ ತೀರ್ಮಾನ್ ಕರ್ತ

ಉಷೇತೊ, ಹಮಾರ ಘರಮ ಐನ್ ರ್ಹವೊ” ಕರಿ ಗಿಂಗೈನ್ ಹಮೂನ ಜುಲಮ್‌ಕರಿ.

ಖ್ವಾರ್ಕೊಟ್‌ಮ ಪಾಲಬಿ ಸೀಲ

16 ಏಕಹಲ್ಲ, ಹಮೆ ಪ್ರಾರ್ಥನೆ ಝಗೋನ ಜಾವಾನಿ ವೇಳ್ತೆ ಗಾರೋಡಿನಿ ಏಕ್‌ಜಣಿ ದಾಸಿ ಹಮಾರ ಖ್ವಾಮ್ಚೆ ಆಯಿ. ಯೋ ಫಾಲ್‌ಬೋಲ್‌ಥೀತೆ ಇನೇಥಿ ಇನೊ ಯಜಮಾನ್ನ ಘಣು ನಪ್ಪೊ ಹೋತುಡು.

17 ಪಾಲಬಿನ್ ಹಮೆ ಜಾವನಿವಖ್ತೆ, ಯೊ ಚಿಕ್ರಿ ಬೋಲ್ತಿಹುಯಿನ್, “ಆ ಅದ್ಮಿಖ್ವಾರು ಘಣೊಲೂಚೊ ದೇವ್ನು ಸೇವಕ್ ಹುಯಿರ್ಲ್ಹಾಸ್; ತುಮಾರ ಜಾನ್ನ ರಕ್ಷಣೆನು ಮಾರಗ್‌ನ ಅಪ್ಲೆ ಬೋಲುಕರಸ್” ಕರಿ ಬೋಲ್ತಿರ್ಲೆತಿಥಿ.

18 ಕೈಏಕ್ ದನ್‌ಲಗೂಬಿ ಅಮ್ಮಸ್ ಬೋಲುಕರ್ತಿಥಿ. ಇನಖ್ವಾಜೆ ಪಾಲ ಬೇಜಾರ್ ಹುಯಿನ್, ಯೊ ತಯೇಡಾಮ ಛಾತೆ ಖರಾಬ್‌ಆತ್ಮ ‘ಮೈಂದಿನ್ ನಿಕ್ಕಿಜಾ’ ಕರಿ ಯೇಸುಕ್ರಿಸ್ತನ ನಾಮ್‌ಥಿ ಹುಕುಮ್ ದೆವುಸ್ ಕರಿ ಬೋಲ್ಯೊ ಯೋ ವಖ್ವತ್‌ಮಾಸ್ ಯೋ ಖರಾಬ್‌ಆತ್ಮ ಇನ ಮೈಲಿನ್ ಚಲಿಗಯು.

19 ಯೋ ದೆಖ್ಯೊತೆ ದಾಸಿನೊ ಯಜಮಾನ್ನ ರಪ್ಪ ಕಮಾವನು ಉಷೆ ಕೊಯ್ತಿಕರಿ ಮಾಲುಮ್ ಕರಿಲಿನ್, ಪಾಲನಾಬಿ ಸೀಲನ ನಂಗರ್ನ್ಯಾವ್ನ ಅಧಿಕಾರಿಕನ ಖೇಚಿಲಿಗು.

20 ಹಿಜ್ವಾ ಪಾಲನಾಬಿ ಸೀಲನ ಅಧಿಕಾರಿನ ಖ್ವಾಮ್ಚೆ ಇವ್ಣುನ ಬುಲೈಲಿಜೈನ್ “ಆ ಅದ್ಮಿಖ್ವಾರು ಯೆಹೂದ್ಯರ್ ಹುಯಿರುಸ್, ಅಪ್ಲೆ ಖ್ವಾಯೇರ್ನ್ ಕಲಾವ್ಣಿಕರಿನ್ ಗಲಾಟ್ ಉರಾಡುಕರಸ್.”

21 ರೋಮ್‌ವಾಳ ಹುಯಿರಾತೆ ಅಪ್ಲೆ ನಿಯಮ್‌ನಿ ವಿರೋದ್‌ನು ಕಾಮ್ ಅಪ್ಲೆ ಅದ್ಮಿಖ್ವಾರಾನ ಬೋಲುಕರಸ್ ಕರಿ ಬೋಲ್ಯು.

22 ತದೆ ಅದ್ಮಿಖ್ವಾರು ಪೌಲಬಿನ ಸೀಲನ ವಿರೋದ್ ಹುಯಿರನ್ನಧು ತದೆ ಅಧಿಕಾರಿನೆ ಪೌಲ ಸೀಲನ ಲುಂಗ್ಡಾವನ ಫಾಡಿನ ಇವ್ವಭೇಜ್ಜಣಾನ ಲರೇಂಥಿ ಭಾಖ್ವತ್ ಮಾರ್ ದೇವಾಡ್ವಕ್ಕರಿ ಹುಕುಮ್‌ಕರನ್ನೊ.

23 ಇವ್ವುನ ಘಣೇಂಥಿ ಮಾರ್‌ಖಡೈನ್ ಹುಯಿಗು ತದೆ ಜೇಲ್‌ಮ ಘಲೈನ್ “ಇವ್ವುನ ಘಣು ಹೊಷಾರ್‌ಥಿ ಜೇಲ್‌ನ ಕಾವ್ಲಿಕರನ್ನ ಕರಿ ಅಧಿಕಾರಿನ ಹುಕುಮ್ ದಿದೊ.

24 ಇನೆ ಯೊ ಹುಕುಮ್‌ನ ಪಾಡಿನ ಇವ್ವುನ ಜೇಲ್‌ನ ಮಹಿನ ಕೋಣಾಮ ಫಾಲಿನ್ ಇವ್ವು ಗೋಡಾವನ ಲಾಕ್ವಾನ ಫಣಾಶಿನ ಇಚ್ಚಮ ಫಾಲಿನ್ ಖ್ವಂಕಳಂಥಿ ಜ್ಜಡ್‌ಕಾಯು.

25 ಅಧಿರಾತ್ಮ ಪೌಲಬಿ ಸೀಲನೆ ಪ್ರಾರ್ಥನೆ ಕರ್ತಹುಯಿನ್ ದೇವ್ವ ಸ್ತುತಿನು ಗೀದ್ ಬೋಲುಕರ್ತಾಧ. ಹಿಜ್ಜಾಧೂತೆ ಖೈದಿಖ್ವಾರು ಖ್ವಮ್‌ಜುಕರ್ತುಧು.

26 ತದೆ ಅಪ್ಪರ್‌ಥೂಸ್ ಮೋಟು ಭೂಕಂಪ್ ಹುಯು; ಖ್ವಾರ್ಕೊಟ್‌ನು ಹದಿಪಾಯ ಹಲಿರನ್ನಿಗು. ಯೋಸ್ ವೇಳ್ವ ಬಾಕಲ್‌ಅಖ್ವು ನಿಕ್ಕಿಗಯು, ಅಖ್ವಾಸ್ ಖೈದಿನು ಖ್ವಂಕಳಂಖ್ವಾರು ಛುಟಿ ಪಡಿಗಯು.

27 ಜೇಲ್‌ನೊ ಅಧಿಕಾರಿ ನಿಂದರ್‌ಥಿ ಹೊಷಾರಿಹುಯಿನ್, ಬಾಕಲ್ ಅಖ್ವು ನಿಕ್ಕಿರನ್ನಧೂತೆ ದೇಖಿನ್ ಖೈದಿಖ್ವಾರು ಮಿಲೈಚ್ಚಲಿಗೂ ಕರಿ ಲ್ಲಯಿನ್ ತಲ್ವಾರ್‌ಥಿ ಭೋಕ್ಕೈನ್ ಮರಿಜಾವ್ವು ಕರಿ ಥೊ.

28 ಕತೋಬಿ ಪೌಲನೆ ಊಚಿ ಆವಾಜ್‌ಥಿ ಚಿಕ್ರಿನ್ ಇನ; ತೂ ಶಾತ್ತ್ವಿ ಲುಕ್ವಾನ್ ನಕೊ ಕರಿಲಿಶ್. ಹಮೆ ಅಖ್ವಾಸ್‌ಜ್ಜಣ ಹಜ್ಜಾಸ್ ಥಿಯೆ ಕರಿ ಬೋಲ್ಯೊ.

29 ಖ್ವಾರ್ಕೊಟ್‌ನೊ ಅಧಿಕಾರಿನೆ ಚಿಮ್ಮಿನ ಮಂಗಾವೊಹುಯಿನ್ ಒಗ್ಗಿಸ್‌ಮ ಮಹಿ ಜೈನ್ ಡರ್‌ಥಿ ಕಾಪೊಹುಯಿನ್ ಪೌಲ ಅಜ್ಜು ಸೀಲನ ಗೋಡಾಪರ್ ಆಡ್‌ಪಡ್ಲೊ.

30 ಅಜ್ಜು ಇವ್ವುನ ಭಾರ್ ಬುಲೈಲಿನ್ ಐನ್, “ಮಾಲಿಕ್ ರಕ್ಷಣೆ ಮಳ್‌ಣುಕತೊ ಮೆ ಶಾತ್ ಕರನ್ನ?” ಕರಿ ಬೋಲ್ಯೊ.

31 ಇವ್ವೆಇನ, “ಪ್ರಭು ಯೇಸುಪರ್ ವಿಶ್ವಾಸ್ ಕರ್ ತದೆ ತುನಾಬಿ ತಾರ

ಘರ್‌ವಾಳಾನಾಬಿ ರಕ್ಷಣೆ ಮಳ್‌ಶೆ” ಕರಿ ಬೋಲ್ಯೊ.

32 ಯೋ ಅಧಿಕಾರಿನಾಬಿ ಇನ ಘರ್‌ವಾಳ ಅಖ್ವಾಸ್ ಪ್ರಭುನಿ ವಚನ್ ಖ್ವಿಮ್‌ಜಾಡ್.

33 ಇನಕೇಡೆಥು, ಯೋಸ್ ರಾತ್ರಿ ವಖ್ವತ್‌ಮ ಬುಲೈಲಿಜೈನ್ ಇವ್ನ್ ಘಾವ್ನ್ ಧೋಯೊ. ತದೇಸ್ ಯೋಬಿ ಇನ ಘರ್‌ವಾಳಾನ ಖ್ವಿಮೇದ್ ಬ್ಯಾಪ್ತಿಸ್ಮ್ ಕರೈಲಿದೊ.

34 ಇನಪಾರ್ ಪೌಲ ಅಜು ಸೀಲನ ಇನ ಘರೆ ಬುಲೈಲಿಜೈನ್ ಖಾಣು ಖಡಾಯೊ. ಯೋ ಇನ ಘರ್‌ವಾಳಾನ ಜೋಡ್ತ್ ದೇವ್ ನಂಬಿನ್ ಶಂತೋಖ್ ಪಡ್ಲೊ.

35 ಇನವ್ಣಾಣೆ ಅಧಿಕಾರಿನ ಮೋಟಾನೆ ರೋಮ್‌ನ ಖ್ವಾರ್ಕೊಟ್‌ನ ಅಧಿಕಾರಿನ, “ಆ ಅದ್ಮಿಖ್ವಾರಾನ ಮ್ಹೇಲಿದೆ” ಕರಿ ಧೋಡ ಶಿಪಾಯಿಧಿ ಬೋಲಿಮೋಕ್‌ಲೊ.

36 ಖ್ವಾರ್ಕೊಟ್‌ನೊ ಅಧಿಕಾರಿನೆ ಪೌಲನ, “ಹಮಾರೊ ಮೋಟಾ ಅಧಿಕಾರಿನೆ, ತುಮೂನ ಮ್ಹೆಲಿದ್ಯವಾದೆ ಕರಿ ಬೋಲಿ ಮೋಕ್‌ಲೈರಾಖ್ಯೊಸ್. ಇನಖ್ವಾಜೆ ತುಮೆ ಸಮಾಧಾನ್‌ಧಿ ಚಲೆಜಾವೊ” ಕರಿ ಬೋಲ್ಯೊ.

37 ಪೌಲನೆ ಇನ, “ಹಮೆ ಕರ್ಯಾತೆ ಖರಾಬ್ ಕಾಮ್ ಶಾತ್‌ಕರಿ ಬೋಲ್ಯೊಕೊಂತೆ; ಹಮೂನ ಅಖ್ವಾನ ಖ್ವಾಮ್ಣೆ ಮಾರಿನ್ ಜೇಲ್‌ಮ ಘಲಾಯು; ಹಮೆ ರೋಮ್‌ನ ಪ್ರಜೇಸ್ ಹಮ್ಚೆ ಹಮೂನ ಲಪಾಡಿನ್ ಭಾರ್ ಮೋಕ್ಲಸ್‌ಕೀ ಶು? ಇಮ್ ನಾಹೋಣು; ಯೋಸ್ ಐನ್ ಹಮೂನ ಭಾರ್ ಬುಲೈಲಿ ಜಾವ್ಣು” ಕರಿ ಬೋಲ್ಯೊ.

38 ಶಿಪಾಯಿಖ್ವಾರನೆ, ಅಧಿಕಾರಿಖ್ವಾರನ ಬೋಲಖ್ವತರ್ ಪೌಲನೆ ಹಮೆ ರೋಮ್‌ನ ಪ್ರಜೆಕರಿ ಬೋಲ್ತಾನ ಇನ ಅಧಿಕಾರಿಖ್ವಾರು ಡರಿಗಯು.

39 ಇನಖ್ವಾಜೆ ಪೌಲ ಅಜು ಸೀಲನ ಪೊಖ್ಲೆಲ್ಯೆ ವಾತೆ ಬೋಲ್ತುಹುಯಿನ್ ಇವ್ಣುನ್ ಭಾರ್ ಬುಲೈಲಿಗಯು. ತುಮೆ ಆ ಖ್ವಿಯೇರ್ನ್ ಮ್ಹೇಲಿದಿನ್ ಚಲೆಜಾವೊ ಕರಿ ಬೋಲಿಲಿದು.

40 ಕತೋಬಿ ಪಾಲಬಿ ಸೀಲನೆ ಜೇಲ್‌ಥು ನಿಕ್ಕಿನ್ ಲಿಡಿಯಾನ ಘರೆಗೆಯ. ಹಿಜ್ಜಾ ಇವ್ಣೆ ಥೋಡ ವಿಶ್ವಾಸಿನ ದೇಖಿನ್ ಇವ್ಣುನ ಭಾಲಿದೀನ್ ಹಿಜ್ಜಾಥ ಚಲೇಗೆಯ.

17

ಥೆಸಲೋನಿಕಮ ಪಾಲಾನಿ ಸೇವೆ

1 ಪಾಲ ಅಜ್ಜು ಸೀಲನೆ ಅಂಫಿಪೊಲಿ ಅಜ್ಜು ಅಪೊಲೋನ್ಯನಿ ವಾಟೆಕರಿ ಚಾಲ್ತಹುಯಿನ್ ಥೆಸಲೋನಿಕ ಖ್ವಿಯೇರಮ ಆಯ. ಹಿಜ್ಜಾ ಯೆಹೂದ್ಯರನಿ ಏಕ್ ಸಬಾಮಂದಿರ್ ಥು.

2 ಪಾಲನೆ ಕದೆ ಕದೇಬಿ ಜಾತೊಥೋತೆ ಇಮ್ಮತ್ ಯೆಹೂದ್ಯರನ ಮಳಾನಖ್ವಾಜೆ ಸಭೆಮ ಗಯೊ. ಇನೆ ತೀನ್ ವಾರ ಸಬ್ಬತ್ ದನ್ತ ಯೆಹೂದ್ಯರನ ಜೋಡೆ ದೇವ್ನಿ ವಚನ್ನಿ ಆಧಾರ್‌ಥಿ ಬೋಲಿವತಾಳ್ಳೊ.

3 ಜಗತ್ತ್ ಉದ್ಧಾರ್ ಕರಾವಾಳೊ, ಖ್ವತಾಪ್ಪಿನ ಲೇವ್ಣುಸ್ ಪಡ್ಕುಥು. ಅಜ್ಜು ಮರಿಜೈನ್ ಪಾಲ್ಟು ಉಟ್ಟುಸ್ ಪಡ್ಕುಥು ಕರಿ ಮೇ ಬೋಲುಕರುಸ್ತೆ ಯೋ ಕ್ರಿಸ್ತ” ಕರಿ ಮಾಲುಮ್ ಕರಾಯೊ.

4 ಇವ್ಣಾಮ ಥೋಡಜ್ಜಣು ದೇವ್ನು ಭಕ್ತರ್ ಹುಯಿರುತೆ ಗ್ರೀಕ್‌ನು ಮೋಟು ಝೂಂಡ್ ಅಜ್ಜು ಮುಖ್ಯ ತಯೇಡಾಮ ಕೈಯೆಕ್‌ಜ್ಜಣಿ ಪಾಲ ಅಜ್ಜು ಸೀಲಾನಿ ಜೋಡೆ ಮಳಿಗಯು.

5 ಕತೋಬಿ ನಂಬ್ತುಕೊಂತೆ ಯೆಹೂದ್ಯಖ್ವಾರು ಬಳಾಪೊ ಕರನ್ಯ್ ಇವ್ಣೆ ಖ್ವಿಯೇರಮ ಥೂತೆ ಥೋಡ ಖರಾಬ್ ಅದ್ಮಿಪೋನ ಪೈಶಾದೀನ್ ಬುಲೈಮಂಗೈನ್ ಗಮ್ಮ ಗಲಾಟ್ ಕರೈನ್, ಪಾಲಬಿನ್ ಸೀಲನ ಖ್ವಿಯೇರನ್ನ ಸಭೆನ ಖ್ವಾಪ್ಪೆ ಲೀನ್ ಆವ್ಣುಕರಿ ಯಾಸೋನನ ಘರ್‌ನ ಘೇರ್ತುಹುಯಿನ್ ಆಯು.

6 ಕತೋಬಿ ಇವ್ಣೆ ಹಿಜ್ಜಾ ದೆಖಾಯುಕೊಂತೆ ಇನಖ್ವಾಜೆ ಇವ್ಣೆ ಯಾಸೋನನಾಬಿ ಥೋಡ ವಿಶ್ವಾಸಿಖ್ವಾರಾನ ನಂಗರನ್ನ ಅಧಿಕಾರಿನ ಖ್ವಾಪ್ಪೆ ಪೀಚಿಲೈನ್; ಆ ಅದ್ಮಿಖ್ವಾರು ಜಗತ್ತಿಅಖ್ವಿನ್ ಬಾಜು ಗಲಾಟ್ ಉರಾಡೀನ್ ಹಮ್ಮೆ ಹಜ್ಜಾಬಿ ಏರ್ಡ್ಲಾಸ್.

7 ಯಾಸೋನನೆ, ಇನ ಘರ್‌ಮಾಸ್ ಇವ್ವುನ ರಾಖಿರಾಖ್ಯೋಸ್. ಅಜ್ಜು ಇವ್ವೆಖ್ವಾರು ಯೇಸುಕರಿ ಬಿಜೇಕ್‌ಭಣೊ ರಾಜ್ ಛಾಕರಿ ಬೋಲಿನ್, ಕೈಸರಾನಿ ಹುಕುಮ್‌ನ ವಿರೋಧ್‌ಧಿ ಫಾಲುಕರಸ್ ಕರಿ ಚಿಕ್‌ರನ್ನ.

8 ಆ ವಾತೆ ಖ್ವಮ್‌ಜ್ಯತೆ ಖ್ವಯೇರ್‌ವಾಳು ಅಜ್ಜು ಖ್ವಯೇರ್‌ನ್ನ ಅಧಿಕಾರಿನ ಘಣು ಕಲಾಪ್ಪಿ ಹುಯಿನ್

9 ಯಾಸೋನಧೀಬಿ ಬಿಜ್ಞ ಥೋಡ ವಿಶ್ವಾಸಿಧೀಬಿ ಭಾಮೀನ್‌ಲೀನ್ ಇನ ಪಾಲ್ಚಳ್ ಇವ್ವುನ ಮ್ಹೇಲಿದಿದು.

ಬೆರೋಯ ಖ್ವಯೇರ್‌ಮ ಪೌಲಬಿ ಸೀಲ

10 ಯೋಸ್ ರಾತ್ತ್ ವಿಶ್ವಾಸಿಖ್ವಾರು ಪೌಲ ಸೀಲನ ಬೆರೋಯ ಕರಿ ಬೋಲಾನು ಬಿಜೇಕ್ ಖ್ವಯೇರ್‌ನ್ನ ಮೋಕ್‌ಲ್ಯಾ ಬೆರೋಯಮ ಪೌಲ ಸೀಲನ ಯೆಹೂದ್ಯರ್‌ನ ಸಭೆಮ ಗಯ.

11 ಆ ಯೆಹೂದ್ಯವಾಳು ಥೆಸಲೋನಿಕನ ಯೆಹೂದ್ಯರ್‌ಧಿಬಿ ಪೌಲ ಸೀಲನೆ ಬೋಲ್ಯಾತೆ ಅಲ್ಪಿ ಸಂದೇಶ್ ಮುಲ್ಲ ದಿಲ್‌ಧಿ ಘಣು ಶಂತೋಖ್ತ್ ಧಿ ಖ್ವಮ್‌ಜ್ಯ ಅಜ್ಜು ಯೋ ವಾತೆ ಖ್ವಾಚುಸ್‌ಕರಿ ಬೋಲಾನು ಮಾಲುಮ್ ಕರಿಲ್ಯವಾನಖ್ವಾಜೆ ಪವಿತ್ರ ಪುಸ್ತಕನ ಹರೇಕ್ಕೆ ಬರೋಬರ್ ಫಡ್ಯತೆ ಇನಖ್ವಾಜೆ ಥೆಸಲೋನಿಕ ವಾಳೇಧಿಬಿ ಅಲ್ಪಿಗುಣ್‌ವಾಳು ಹುಯಿರ್‌ನ್ನ

12 ಅಮ್‌ರನ್ವಾವಮ ಕೈಯೆಕ್ಕಿ ಜಣು ನಂಬ್ಯು ಅಜ್ಜು ಗ್ರೀಕ್‌ನಿತಯೇಡ ಪರ್ವ್ವಾ ವಿಶ್ವಾಸ್ ಕರನ್ನ.

13 ಕತೋಬಿ ಪೌಲ ಬೆರೋಯಮ ದೇವ್ನ್ ವಚನ್ನ ಬೋಲುಕರಸ್ ಕರಿ ಬೋಲಾನು ಖ್ವಮ್‌ಜಿನ್ ಥೆಸಲೋನಿಕನು ಯೆಹೂದ್ಯಮಾಬಿ ಬೆರೋಯಮಾಬಿ ಐನ್ ಹಿಜ್ಜಾನ ಅದ್ಮಿಖ್ವಾರಾನ ಕಲಾಪ್ಪಿಕರಿನ್ ಗಲಾಟ್ ಉತಾಡ್ತು.

14 ಇನಖ್ವಾಜೆ ವಿಶ್ವಾಸಿಖ್ವಾರು ತದ್‌ನು ತದೇಸ್ ಪೌಲನ ದರನ್ಯವ್ವ ಕನಾರಲಗು ಮೋಕ್ಲಿದಿದು. ಕತೋಬಿ ಸೀಲ ಅಜ್ಜು ತಿಮೊಥೆ ಇವ್ವೆ ಬೆರೋಯಮಾಸ್ ರಣ್ಣಿಗ.

15 ಪೌಲನ ಮ್ಹೇಲಿದ್ಯವಾನ ಗಯುಥೂತೆ ಖ್ವಾರು ಇನ ಜೋಡ್ಡ ಅಥೇನ್ನಲಗು ಗಯು. ಸೀಲನಾಬಿ ತಿಮೊಥೆಯನಾಬಿ ಮಳಿಹುಯಿಗುತೊ ತದೇಸ್ ಒಗ್ಗಿಸ್ ಇನಕನ ಆವುಕ್ಕರಿ ಪೌಲನಿ ಹುಕುಮ್‌ಥಿ ಪಾಲ್ಲ ಆಯ.

ಅಥೇನ್ಸ್‌ಮ

16 ಪೌಲ ಇವ್ವಖ್ವಾಜೆ ಅಥೇನ್ಸ್‌ಮ ಟಿವೈರ್ದವಾನಿ ವೇಳ್ ಯೋ ಖ್ವಿಯೇರ್‌ಮ ಕಿಜ್ಜಕಿಜ್ಜಾಬಿ ಮೂರತ್ತಸ್ ಅಖ್ಪು ರ್ದವಾನು ದೇಖಿನ್ ಇನೊ ಮನ್ ಉಕ್ಕಿರ್ದಿಗು.

17 ಇನಖ್ವಾಜೆ ಇನೆ ಸಭೆಮ ಜೈನ್ ಯೆಹೂದ್ಯರ್ ಅಜ್ಜು ದೇವ್ವಿ ಭಕ್ತಿರ್ದವಳು ಗ್ರೀಕ್‌ವಾಳಾನಿ ಜೋಡೆ ಅಜ್ಜು ಖ್ವಿಯೇರ್‌ಮ ಬೇಪಾರ್‌ಕರಾನಿ ಝಗೋಮ ದೇಖವಾಳಾನಿ ಜೋಡ್ಡ ಹರೇಕ್ ದನ್ ಚರ್ಚೆ ಕರಾಲಗ್ನು.

18 ಎಫಿಕೂರಿಯವಾಳು ಅಜ್ಜು ಸ್ತೋಯಿಕ ಕರಿ ನವಿ ಸೋಚ್ಚಿ ಬಾರೇಮ ಬೋಲಾವಳು ಥೋಡುಜ್ಜಣು, “ಆ ಅದ್ಮಿನ ಯೋ ಶನಿಬಾರೇಮ ವಾತೆ ಬೋಲುಕರಸ್ತೆ ಕರಿ ಬೋಲಾನು ಖ್ವಾಚಮಾಬಿ ಮಾಲುಮ್ ಕೊಯ್ನಿ. ಯೋ ಶಾತ್ ಬೋಲ್ವುಕರಿ ಛಾ? ಕರಿ ಬೋಲ್ವು. ಯೇಸು ಮರ್ಮಾಧು ಪಾಳ್ತುಜಿವ್ವೊಹುಯಿನ್ ಉರಿನ್ ಐರ್ದೊಸ್ ಕರಿ ಬೋಲಾನಿ ಸುವಾರ್ತೆನ ಪೌಲ ಬೋಲುಕರ್ತೊಥೊ. ಅಜ್ಜು ಥೋಡುಜ್ಜಣು ‘ಆ ಹುಯಿರುತೆ ಬಹಾರ್‌ಲ್ಯ ದೇವ್ವಿ ಬಾರೇಮ ಬೋಲಾನಿತರ ದೇಖಾವಸ್; ಕರಿ ಬೋಲ್ವು.

19 ಇವ್ವೆ ಪೌಲನ ಅರಿಯೊಪಾಗನಿ ನ್ಯಾವ್‌ನಿ ಸಭೆಮ ಬುಲೈಲಿಗಯು. ಅವ್ವೆ ಇನ “ತೂ ಶಾತ್ ಬೋಲಿ ವತಾಳ್ಳು ಕರಿ ಛಾಕಿ ಯೊ ನವಿ ಬೋಧನ್ನಿ ನಿಯಮ್ಮ ಹಮುನಾಬಿ ವತಾಳ್.

20 ತೂ ಬೋಲುಕರಾತೆ ಅಖ್ವಿವಾತೆ ಹಮೂನ ನೌಖು ಹುಯಿರ್ದೊಸ್.

21 ಅಥೆನ್ಸ್‌ನ ಅಖ್ವೊಸ್ ಅದ್ವಿ ಅಜ್ಜು ಹಿಜ್ಜಾ ಜಿವ್‌ಕರ್ತುಧೂತೆ ಬಿಜ್ಜ ದೇಖ್ವಾವಾಳು ನವ ಸೋಚ್ಚಿ ಬಾರೇಮ ಬೋಲನಾಬಿ ಅಜ್ಜು ಖ್ವಿಮ್‌ಜಾನಾಬಿ ಘಣು ಇಷ್ಟಕರನ್ಯ.

22 ತದೆ ಪೌಲನೆ ಅರಿಯೊಪಾಗನ ನ್ಯಾವ್‌ನಿ ಸಭೆನ ಖ್ವಾಪ್ಪೆ ಉರಿಭೀರಿನ್ ಅಮ್ ಬೋಲ್ಯೊ “ಅಥೆನ್ಸ್‌ನ ಅದ್ವಿವೊ ತುಮೆ ಅಖ್ವೀಸ್ ಥರಮಾಬಿ ದೇವ್ವ ಜಾಖ್ವತ್ ಭಕ್ತಿ ಕರಾವಾಳ ಕರಿ ಮನ ದೇಖಾವಸ್.

23 ಮೆ ತುಮಾರ ಖ್ವಯೇರಾಮ ಚಾಲಿನ್ ವೇಳ್ತ ತುಮೆ ಪೂಜಕರಾತೆ ದೇವ್ವಿನು ಮೂರತ್ತ್ ದೇಖಾನಿವಖ್ವೊತೆ ಏಕ್ ಚಾಚರ್‌ಪರ್ ‘ಮಾಲುಮ್‌ಕೊಂತೆ ದೇವ್ವ ಕರಿ ಲೀಖ್ಪಿರೊಡ್ಲ. ಇನಖ್ವಾಜೆ ತುಮೆ ಖೆವಾನ ಮಾಲುಮ್‌ಕೊಂತೆ ಪೂಜಕರಸ್ಚಿ ಇನಾಸ್ ತುಮೂನ ಮಾಲುಮ್ ಕರಾವುಸ್ ಖ್ವಿಮ್‌ಜೊ” ಕರಿ ಬೋಲ್ಯೊ.

24 ಜಗತ್ವಾಬಿ ಇನಾಮಲ್ಲಾತೆ ಅಖ್ವಾನಾಬಿ, ಬಣಾಯೋತೆ ದೇವ್ ಆಬ್ ಧರ್ತಿನ ಯಜಮಾನ್ ಹುಯಿರೊಡ್ಲೆತೆ ಇನಖ್ವಾಜೆ ಯೋ ಹಾತೇಖ್ವು ಭಾಂದಿಹುಯು ದೇವಳ್ ಜಿವ್ವು ಕರಾವಾಳೊ ಕಾಹೆ;

25 ಯೋಸ್ ಹರೇಕ್ ಜಾನೊರಾವೊ ಅಜ್ಜು ಜಿವಾನಖ್ವಾಜೆ ಹೋಣುತೆ ಖ್ವಾರುಸ್‌ದ್ಯವಾಳೊ ಯೋಸ್; ಇಮ್ಮಸ್ ಅದಮ್‌ಜಮಾನೊ ಇನಖ್ವಾಜೆ ಮ್ಹಿನತ್‌ಕರಾನು ಕಾಮ್ ಇನ ಶಾತ್ಪಿಕೊಯ್ಚಿ.

26 ದೇವ್ವೆ ಏಕ್ ಅದ್ವಿನ ಬಣಾವತೊ ಹುಯಿನ್ ಅದಮ್‌ಜಮಾನಾನು ಝೂಂಡ್ ಶುರುಕರೊ. ಇನೇಥಿ ಬಿಜ್ಜು ಅಖ್ವೊಸ್ ಅದ್ವಿನ ಜಗತ್‌ನು ಕಿಜ್ಜಕಿಜ್ಜಾಬಿ ಇವ್ಚೆ ಜಿವ್ವು ಕರಾನಿತರ ಕರೊ. ಇವ್ಚೆ ಕದೆ ಅಜ್ಜು ಕಿಜ್ಜಕಿಜ್ಜಾ ರ್ವೆವ್ವು ಕರಿ ಬೋಲಾನು ನಿರ್ಧಾರ್ ಕರೊ.

27 ಏಕ್ ವೇಳ್ ಇವ್ಚೆ ಧೀರ್‌ಥಿ ತೋಬಿ ಮಾಲುಮ್ ಕರಿಲಿಶೆಕರಿ ಇನ ಥುಂಡಾನಿತರ ಕರೊ. ಕತೋಬಿ ದೇವ್ ಅಪ್ಪಾಮ ಕಿನಾಬಿ ಜಾಖ್ವತ್ ದೂರ್ ಕೊಯ್ಚಿ.

28 ಶನಕತೊ ಇನಾಸ್ತ ಅಪ್ಪೆ ಜಿವ್‌ಕರಿಯೇಸ್. ಚಾಲುಕರಿಯೇಸ್ ಅಜ್ಜು ರ್ವೆಯೇಸ್. ತುಮಾರ ಗೀದ್ ಲಿಖವಾಳಮ ಥೋಡುಜಣು,

“ಹಮೆ ಇನ ಸಂತಾನ್‌ವಾಳಸ್” ಕರಿ ಬೋಲಿರಾಖ್ತಾಸ್.

29 ಅಷ್ಟೆ ದೇವ್ನ ಲಡ್ಡ ಹುಯಿರ್ಯವಾಪರ್, ಅದ್ವಿಖ್ವಾರು ಸೋಚಾನಿ ಪರಕ್ ಬಣಾವಟ್ಟಿ ಮೂರತ್ ಪರಕ್ ರ್ವೊ ದೇವ್ ಛಾಕರಿ ತುಮೆ ಖ್ವಿಯಾಲ್ ನಾಕರನ್ನ. ಯೊ ರೂಪು ಖೊನ್ನು ಅಜು ಬಂಡಾನಿ ಶಕಲ್ಮ ಕೊಯ್ತಿ.

30 ಗಯೂತೆ ಹಗಾಮ್ ಅದ್ವಿಖ್ವಾರು ದೇವ್ನ ಮಾಲುಮ್ ಕರಯ್ಕೊಯ್ತಿ. ಕತೋಬಿ ದೇವ್ನ ಯೊ ಶಾತ್ರಿ ಕರಯ್ಕೊಯ್ತಿ. ಹಮ್ಮೆತೋಬಿ ಜಗತ್ತಿ ಅಖ್ವಿಬಾಜುಮ ರ್ವಾವಾಳು ಅದ್ವಿಖ್ವಾರು ಖರಾಬ್ ಮಾರಗ್‌ನ ಮ್ಹೇಲಿನ್ ಇನಾಭಣಿ ಫರ್‌ನುಕರಿ ಹುಕುಮ್ ದೆವುಕರಸ್.

31 ಜಗತ್ತ್ ಅದ್ವಿಖ್ವಾರಾನು ನ್ಯಾಯನ ಫೆಡಾವನಖ್ವಾಜೆ ದೇವ್ನ ಏಕ್‌ದನ್ನ ಖ್ವಣೇದ್ ಕರಿರಾಖ್ಲೊಸ್. ತದೆ ನ್ಯಾವ್‌ನ ಫೇಡಾವನಖ್ವಾಜೆ ಇನೆ ಏಕ್‌ಞ್ಣಾನ ಕೇತ್ರಾಕಿ ವರಖ್ವನ್ ಪಾರಸ್ ಚೂಣಿರಾಖ್ಲೊಸ್. ಅನ ಹರೇಕ್‌ಞ್ಣಾನ ಮಾಲುಮ್ ಕರಾವನಖ್ವಾಜೆ ಆ ಏಕ್‌ಞ್ಣಾನ ಮರ್ಯಹುಯಮಾಥು ಜಿವ್ತು ಉಠಾಡಿರಾಖ್ಲೊಸ್.

32 ಯೇಸು ಮರ್ಯಹುಯಮಾಥು ಪಾಳ್ತುಜಿವ್ತೊಹುಯಿನ್ ಉಠೀನ್ ಐರಯ್ಲೊಸ್‌ಕರಿ ಬೋಲಾನಿ ವಾತೆನ ಖ್ವಮ್‌ಜ್ಯೊತೆ ಅದ್ವಿಮ ಥೋಡುಞ್ಣು ನಕ್ಕೆ ಕರಯ್ತು. ಅಜು ಥೋಡುಞ್ಣು “ಆ ವಾತೆನಿ ಬಾರೇಮ ತೂ ಬಿಜೇಕ್‌ಹಲ್ಲ ಬೋಲೆಞಾಯ್ ತದೆ ಹಮೆ ಖ್ವಮಞ್ಶು” ಕರಿ ಬೋಲ್ತು.

33 ಇನಖ್ವಾಜೆ ಪೌಲನೆ ಇವ್ವಕಂಥು ನಿಕ್ಕಿ ಚಲೆಗಯೊ.

34 ಕತೋಬಿ ಯೋ ಅದ್ವಿಖ್ವಾರಾಮ ಥೋಡುಞ್ಣು ಪೌಲನ ವಿಶ್ವಾಸ್ ಕರಿನ್ ಇನಕೇಡೆ ಎಕ್ಚು ಹುಯು. ನಂಬ್ಯತೆ ಅದ್ವಿಖ್ವಾರಾಮ ಅರಿಯೊಪಾಗ ನ್ಯಾವ್‌ನಿ ಸಭೆವಾಳೊ ದಿಯೊನುಸ್ಯಬಿ, ದಾಮರಿ ಕರಿ ಏಕ್‌ಞ್ಣಣಿ ಥಿ, ಇಮ್ಮತ್ ಅಜೂಬಿ ಥೋಡುಞ್ಣು ಥೂ.

1 ಇನಕೇಡೆಥು ಪೌಲನೆ ಅಥೇನ್ಸನ ಮ್ಹೇಲಿನ್ ಕೊರಿಂಥ ಖ್ಹಿಯೇರ ಲ್ಲ ಗಯೊ.

2 ಪೊಂತಾಮ ಪೈದಾಹುಯಿರೊಥೋತೆ ಆಕ್ಟಿಲ ಕರಿ ಏಕ್‌ಜಣೊ ಯೆಹೂದ್ಯನ ಹಿಜ್ಜಾ ದೇಖ್ತೊ. ಚಕರ್‌ವರ್ತಿ ಕ್ಲೌದಿಯನೆ ರೋಮ್ ಖ್ಹಿಯೇರ ಲ್ಲ ಮ್ಹೇಲಿಜಾವ್ಣುಕರಿ ಹುಕುಮ್ ದೀರಾಖ್ತೊಥೋತೆ ಖ್ಹಾಜೆ ಆಕ್ಟಿಲಬಿನ್ ಇನಿ ಬಾವಣ್ ಹುಯಿರ ಲ್ಲಿತಿ ಪ್ರಿಸ್ಕಿಲ್ಲ ಥೋಡದನ್ನ ಅಗ್ಗಳಸ್ ಇಟಲಿ ದೇಖ್ತೊ ಥು ಹಿಜ್ಜಾ ಐರ ಲ್ಲಿಥು. ತದೆ ಪೌಲನೆ ಇವ್ಣುನ ದೇಖಾನ ಗಯೊ.

3 ತದೆ ಇವ್ಣೆ ಪೌಲನಿ ಫೋಣಿಸ್ ಡೇರಾನುಫರ್ ಬಣಾವಾಳು ಹುಯಿರ ಲ್ಲಿಥೂತೆ ಇನಖ್ಹಾಜೆ ಇವ್ಣಕೇಡೆ ರ ಲ್ಲಿನ್, ಇವ್ಣ ಜೋಡೆ ಕಾಮ್‌ಕರ್ತೊ ಆಯೊ.

4 ಹರೇಕ್ ಸಬ್ಬತ್ ದನ್ತ ಯೊ ಸಭೆನಿ ಝಗೊ ಯೆಹೂದ್ಯರಾನಿ ಜೋಡೆಬಿ ಗ್ರೀಕ್‌ವಾಳಾನಿ ಜೋಡೆಬಿ ಚರ್ಚೆಕರೀನ್ ಇವ್ಣುನ ಮಳಾವೊಡೊ.

5 ಇಮ್ತಸ್ ಮೆಕೆದೋನ್ಯಮ ಥಾತೆ ಸೀಲ ಅಜ್ಜು ತಿಮೊಥೆ ಇವ್ಣೆ ಪೌಲಕನ ಆಯ. ಇನಪಾರ್ ಅದ್ಮಿಖ್ಹಾರಾನ ಇವ್ಣಿವಾತೆನ ಬೋಲಿ ಖ್ಹಿಮ್‌ಜಾಡಮ ಪೌಲನೆ ಇನಿ ವಖ್ತತ್‌ಖ್ಹಾರು ಕಾಡಿನಾಖ್ತೊ. ಯೇಸುಸ್ ಮೆಸ್ಸಿಯಕರಿ ಬೋಲಾನು ಇನೆ ಯೆಹೂದ್ಯರಾನ ದೇಖಾಡಿದಿದೊ.

6 ಕತೋಬಿ ಯೆಹೂದ್ಯರ್ ಪೌಲನಿ ಬೋಧನೆನ ಝಿಟ್ಯಾರಿನ್ ಅಜ್ಜು ಚಿಂಫಾವ್ಣಿ ಕರ ಲ್ಲ. ಇನಖ್ಹಾಜೆ ಪೌಲನೆ ಇನ ಲುಂಗ್ಡಾನ ಧೂಳ್ಳ ಝಿಟ್ಯಾಕಿನ್ ಇವ್ಣುನ, ತುಮಾರಿ ನಾಶ್‌ನ ತುಮೇಸ್ ಜಿಮ್ಮೆದಾರಿ, ಮೇ ಶುದ್ಧ ಹುಯಿರ ಲ್ಲಿನ್. ಮೆ ಹಮ್ಕೆಥೊ ಅಲಕ್ ಅದ್ಮಿವೋಕನ ಜವುಸ್” ಕರಿ ಬೋಲೊ.

7 ತದೆ ಪೌಲನೆ ಸಭೆನಿ ಝಗೊ ಮ್ಹೇಲಿನ್ ಇನಭೀಡೆಸ್ ಥೂತೆ ತೀತ ಯುಸ್ತ ಕರಿ ಏಕ್ ಜಣಾನ ಫರ್ ಗಯೊ. ಯೊ ಅದ್ಮಿ ಖ್ಹಾಚ ದೇವ್ನು ಆರಾದನೆ ಕರಾವಾಳೊ ಹುಯಿರ ಲ್ಲಿಥೊ.

8 ಯೊ ಸಬಾಮಂದಿರ್‌ನೊ ಯಜಮಾನ್ ಕ್ರಿಸ್ತಕರಿ ಏಕ್ ಜಣೊ ಅಜ್ಜು ಇನ ಫರ್‌ಮ ರ ಲ್ಲವಾಳು ಖ್ಹಾರುಜಣು ಪ್ರಭುನ ವಿಶ್ವಾಸ್ ಕರ ಲ್ಲ.

ಕೊರಿಂಥನು ಬಿಜೂಬಿ ಕೆತ್ತುಕ್ಕಿ ಅದ್ಮಿ ಪಾಲನ ಬೋಧನೆನ ಖ್ವಮ್‌ಜಿನ್ ನಂಬ್ಬ ಅಜು ಬ್ಯಾಪ್ತಿಸ್ಮಲಿದು.

9 ಏಕ್‌ದನ್ ರಾತ್ತ್ ಪಾಲನ ದರ್ಶನ್ ಹುಯು. ಪ್ರಭುನೆ ಇನ, “ಡರ್‌ನಕೊ ಬೋಲ್ಟೋಸ್ ರೆಪ್ಪಿಶೊಪ್‌ನಕೊ ರೆಪ್ಪಿಶ್,

10 ಮೇಸ್ ತಾರಿ ಜೋಡ್ಡ್ ಲ್ಲೊ. ಕೋಣ್‌ಬಿ ತುನ ಖರಾಬ್ ಕರಾನ ಕೊಲುಷೇನಿ. ಆ ಖ್ವಯೇರ್‌ಮ ಮಾರಭಣಿಥು ಕೆತ್ತುಕ್ಕಿ ಭಣು ಲ್ಲಾ” ಕರಿ ಬೋಲ್ಟೊ.

11 ಇಮ್ಮೆಸ್ ಡೋಡ್‌ವರಖ್ತ್ ಲಗು ಹಿಜ್ಜಾರ್‌ಪ್ಪಿನ್ ದೇವ್ನಿ ವಚನ್ನ ಅದ್ಮಿಖ್ವಾರಾನ ಬೋಧನೆ ಕರಲ್ಟೊ.

12 ಗಲ್ಲಿಯೋಕರಿ ಏಕ್‌ಜಣೊ ಅಖಾಯ ಮುಲಕ್‌ನೊ ರಾಜ್ಯಪಾಲ್ ಹುಯಿರಲ್ಟವಾನ ಖ್ವಾಜಿ ಯೆಹೂದ್ಯರ್ ಪಾಲನಿ ವಿರೋದ್ ಎಕ್ಲಹುಯಿನ್ ಇನ ಧರಿನ್ ನ್ಯಾಪ್ಪಿರುಗೊ ಲೀನ್‌ಗಯು.

13 ಅಜು “ದೇವ್ ಅದ್ಮಿಖ್ವಾರಾನ ಅಪ್ಪ ಧರ್ಮಶಾಸ್ತ್ರ ಕನ ವಿರೋದ್‌ಥಿ ಆರಾದನೆ ಕರ್ನುಕರಿ ದಿಲ್‌ಬದ್ಲಾವನ ಕೋಶಿಶ್ ಕರುಕರಸ್” ಕರಿ ಬೋಲ್ಟು.

14 ಪಾಲ ಪಾಫೊ ಫರಿನ್ ವಾತೆ ಬೋಲ್ಟೊ ರಲ್ಟವಾನಿವಖ್ತ್‌ಗೆ ಗಲ್ಲಿಯೋನನೆ ಯೆಹೂದ್ಯರ್‌ನ, “ಏಕ್ ವೇಳ್ ಆ ಮೋಟಿ ಅಪರಾದ್ ಹುಯಿರಲ್ಟಹೊತ್ತೊ ಅನ ಮೇ ಜಿಮ್ಮೇದಾರ್ ಲೀನ್ ಖ್ವಮ್‌ಜೊಹೊತ್.

15 ಕತೋಬಿ ಆ ಹರೇಕ್ ಥರಾನು ವಿವಾದ್ ಬೋಧನೆನಾಬಿ, ನಾಮ್‌ಬಾಬಿ, ತುಮಾರಿ ಧರ್ಮಶಾಸ್ತ್ರನಿ ಘೋಣಿಸ್ ಲ್ಲಾ. ಇನ ತುಮಾರಿ ಪಸಂದ್‌ನಿತ್ರ ತುಮೇಸ್ ತೀರ್ಪ್ ಕರಿರಾಖ್ಯಸ್, ಅಥ್ರಾನಿ ವಾತೆನ ಮನ ನ್ಯಾಪ್ ತೀರ್ಪ್ ಕರಾನ ಕೊಹುವ್ವಾನಿ.ಕರಿ ಬೋಲಿನ್

16 ಇವ್ವುನ ನ್ಯಾಪ್‌ನಿ ಝಗೊಮಾಥು ಭಾರ್ ಮೋಕ್‌ಲ್ಟೊ.

17 ತದೆ ಅದ್ಮಿಖ್ವಾರು ಸಬಾಮಂದಿರಾನೊ ಅದ್ಯಕ್ಷ ಹುಯಿರಲ್ಟಿಥೋತೆ ಸೋಸ್ಥೆನಾನ ಧರಿಲೀನ್ ನ್ಯಾಪ್‌ಪಂಚ್‌ಕೋಟ್ಮಾಸ್ ಮಾರಲಗ್ಗು ಗಲ್ಲಿಯೋನನೆ ಇನಾಮ ಏಕ್‌ಬಿ ಮಜೂರ್ ಕೊ ಕರಲ್ಟೊನಿ.

ಅಂತಿಯೋಕ್ಯನ ಪಾಟ್ಲೊಫರ್ರೋತೆ

18 ಪೌಲ ಕೈಏಕ್ ದನ್‌ಲಗು ವಿಶ್ವಾಸಿ ಭಯೇನಿ ಜೋಡ್ತಾಸ್ ಥೊ. ಅನಕೇಡೆಥು ಪ್ರಿಸ್ಕಿಲ್ಲ ಅಜು ಅಕ್ವಿಲನ ಜೋಡೆ ಜಹಾಜ್ ಚಡೀನ್ ಸಿರಿಯಾನ ನಿಕ್‌ಘ್ಯೊ ಇನ ದೀಕ್ಷೆಥೂತೆ ಇನಖ್ವಾಜೆ ಕೆಂಖ್ರಿಯ ಖ್ವಿಯೇರ್‌ಮ ಮುಡ್‌ಕ್ಯಾನ ಕೇಖ್ಡ್ ಕಡಾಯೊ. ಶನಕತೊ ಯೋ ಶಪತ್ ಕರಿರಾಖ್ಯೊಥೊ.

19 ಎಫೆಸಮ ಆವಖ್ತರ್ ಇನಿ ಜೋಡ್ಡ ರ್ಹವಾಳಾನ ಹಿಜ್ವಾಸ್ ಮ್ಹೆಂದಿನ್ ಪೌಲ ಸಬೆನಿ ಝಗೊಕನ ಜೈನ್, ಯೆಹೂದ್ಯರ್‌ಥಿ ವಾದಕರ್ರೊ.

20 ಇವ್ಣೆಖ್ವಾರು ಇನ ಅಜೂಬಿ ಥೋಡದನ್ ಇವ್ಣಿ ಜೋಡ್ಡ ರ್ಹೇವ್ಣಕರಿ ಬೋಲಿಲಿದು. ಕತೊಬಿ ಇನೆ ಮಾನ್ಯೊಕೊಯ್ನಿ.

21 ಅನಬದಲ್ ಇನೆ ಇವ್ಣನ “ದೇವ್ನಿ ಮರ್ಜಿ ರ್ಹಿಯಿತೊ ಮೆ ತುಮಾರಕನ ಪಾಟ್ಲೊ ಐಶ್”. ಕರಿ ಬೋಲ್ತೊಹುಯಿನ್ ಎಫೆಸಥು ಜಹಾಜ್‌ನಿ ಫಾಲ್ ಕರ್ರೊ.

22 ಯೊ ಕೈಸರೈನ ಆವಾನಿ ವಖ್ಡತೆ ಹಿಜ್ವಾಡ್ತು ಯೆರೂಸಲೇಮ್‌ಜೈನ್ ಸಬೆನ ಮಳಿನ್ ಅಂತಿಯೋಕ್ಯನ ಗಯೊ.

23 ಪೌಲನೆ ಅಂತಿಯೋಕ್ಯಮ ಥೋಡದನ್ ರ್ಹೀನ್ ಫಾಚೊ ಹಿಜ್ವಾಡ್ತು ನಿಕ್ಕಿನ್ ಗಲಾತ್ಯಬಿ ಪ್ರಜಿಯ ತಬರ್‌ಖಾಮ ಫರ್ತೊಹುಯಿನ್ ಹಿಜ್ವಾನ ವಿಶ್ವಾಸಿಖ್ವಾರನ ಘಟ್‌ಥಿ ಭೀರಾಖ್ಯೊ.

ಎಫೆಸ ಅಜು ಕೊರಿಂಥಾಮ ಅಪೊಲ್ಲೋಸ

24 ಎತ್ರಾಮ ಅಲೆಕ್ಸಾಂಡ್ರಿಯಮ ಪೈದಹುಯೊತೆ ಅಪೊಲ್ಲೋಸ ಕರಿ ಯೆಹೂದ್ಯ ಏಕ್‌ಜಣೊ ಎಫೆಸಮ ಆಯೊ. ಯೋ ವಾತ್ಮ ಪುರ್‌ಗುಲ್‌ಬಿ ಅಜು ಧರ್ಮಶಾಸ್ತ್ರನ ಅಟ್ಟಿನಿತರ ಮಾಲುಮ್ ಕರಿರಾಖ್ಯೊಥೊ.

25 ಅಜು ಯೊ ಘಣು ಮನ್‌ಲಗಾಡಿನ್ ಪ್ರಭು ಯೇಸುನಿ ಮಾರಗ್‌ನ ಬಾರೇಮ ಅಟ್ಟಿನಿತರ ಬೋಧನೆ ಕರ್ತೊಥೊ, ಅಜು

ಶಿಕಾಡುಕರ್ತೋಧೊ. ಕರ್ತೋಬಿ ಯೋಹಾನ ಕರಾಯೋತೆ ಬ್ಯಾಪ್ತಿಸ್ಮನಿ ಬಾರೇಮ ಖಲಿಮಾಲುಮ್ ಧು.

26 ಅಪೊಲ್ಲೋಸನೆ ಸಬಾಮಂದಿರ್‌ಮ ಭಾಲಿಧಿ ಬೋಧನೆ ಕರಯೊತೆ ಖ್ಮಮ್‌ಜ್ಯಾತೆ ಪ್ರಿಸ್ಕಿಲ್ಲ ಅಜು ಅಕ್ವಿಲನೆ ಇವ್ಣೆ ಇನ ಘರೆ ಬುಲೈಜೈನ್ ಅಜು ದೇವ್ ಮಾರಗ್‌ನ ಇನ ಬಿಜೂಬಿ ಭಾಖ್ತತ್ ಅಲ್ಫಿನಿತರ ಬೋಲಿವತಾಳ್ಕು.

27 ಇನಕೇಡೆಧು ಅಖಾಯನ ಭಾವುಕ್ತರಿ ಇನ ಮನ್‌ಲಗಾಖ್ತರ್ ವಿಶ್ವಾಸಿ ಭಯೇಖ್ವಾರು ಇನ ಮದತ್‌ಕರಿನ್ ಹಿಜ್ಜಾಧೂತೆ ವಿಶ್ವಾಸಿವ್‌ನ ಚಿಟ್ಟಿಲೀಖಿನ್ ಅಪೊಲ್ಲೋಸನ ಮಳ್ಳೆಲೇವ್ಣು ಕರಿ ಬೋಲಿಲಿದು.ಯೊ ಹಿಜ್ಜಾ ಭಾವಾನಿ ವಖ್ತೆ ದೇವ್ನಿ ಕೃಪಾಧಿ ವಿಶ್ವಾಸ್ ಕರವಾಳನ ಏಕ್ ಮೋಟು ಮದತ್ ಹುಯೊ.

28 ಶನಕತೊ ಯೊ ಘಣಿ ಶಕ್ಕಡ್ಲಿ ಅಬ್ಬಾಜಬ್ಬಿ ಕರ್ತೊಹುಯಿನ್ ಆಖ್ಬಾನಖ್ವಾಪ್ಣೆ ದೇಖಾವನಿತರ ಯೆಹೂದ್ಯರ್‌ನ ಧರ್ಮಶಾಸ್ತ್ರಧಿ ಯೇಸುಸ್ ಕ್ರಿಸ್ತಕರಿ ಸಬೂತ್‌ಕರೀನ್ ಇವ್ಣುನ ಹರಾಯೊ.

19

ಎಫೆಸಮ ಪೌಲ

1 ಅಪೊಲ್ಲೋಸ ಕೊರಿಂಥಮ ಥೊ ತದೆ ಪೌಲನೆ ಪಹಾಡ್ ಪರ್ಬತ್ತಕರಿ ಚಾಲ್ತೊಹುಯಿನ್ ಎಫೆಸಮ ಪೋಚ್ಚೊ ಹಿಜ್ಜಧೋಡ ಶಿಷ್ಯರ್ದ್ ದೇಖಿನ್,

2 “ತುಮೆ ವಿಶ್ವಾಸ್‌ಕರಯೊತೆ ತದೆ ಪವಿತ್ರಾತ್ಮನ ಲೀಲಿದಾಕಿ ಶು”? ಕರಿ ಇವ್ಣುನ ಬೋಲಖ್ತರ್ ಇವ್ಣೆ ಇನ, ಕೊಯ್ನಿ ಪವಿತ್ರಾತ್ಮಕರಿ ಬೋಲಾನಿ ಬಾರೇಮ ಖ್ಮಮ್‌ಭಾಸ್‌ಕೊಯ್ನಿ ಕರಿ ಬೋಲ್ಕು.

3 ಪೌಲನೆ ಇವ್ಣುನ “ತುಮೆ ಖಿವಿ ಥರಾನು ಬಾಪ್ತಿಸ್ಮಲೀರಾಖ್ವಾಸ್? ಕರಿ ಬೋಲಖ್ತರ್, ಇವ್ಣೆ ಯೋಹಾನನು ಬ್ಯಾಪ್ತಿಸ್ಮ ಕರ್ತೊಲಿದ” ಕರಿ ಬೋಲ್ಕು.

4 ಇನ ಪೌಲನೆ; ಯೋಹಾನನೆ ಪಶ್ಚಾತ್ತಾಪ್ ಕರೀನ್ ದೇವ್‌ಭಣಿ ಫರಿಜೈನ್ ಬ್ಯಾಪ್ತಿಸ್ಮ ಕರ್ತೊಲೀನ್. ಇನ ಪಾಲ್ಲಳ್ ಆವಾಳಾನ ವಿಶ್ವಾಸ್ ಕರ್ನುಸ್ ಕರ್ನುಕರಿ ಬೋಲ್ಯೊಧೊ, ಯೊ ಯೇಸುಮಾಸ್.

5 ಇನ ಇವ್ಣೆ ಖ್ವಮ್‌ಜಿನ್ ಪ್ರಭುಹುಯಿರನ್ನೊತೆ ಯೇಸುನ ನಾಮ್‌ಥಿ ಬ್ಯಾಪ್ತಿಸ್ತ ಕರ್ತೊಲಿದು.

6 ಪೌಲನೆ ಇವ್ಣಪರ್ ಹಾತ್‌ಮ್ವೇಲಾಮ ಪವಿತ್ರಾತ್ಮ ಇವ್ಣಪರ್ ಉತ್ರಿನ್ ಆಯೊ. ಇವ್ಣೆ ಕೈಏಕ್ ಥರಾನಿ ಬೋಲಿನಬೋಲಲಗ್ಲು ಪ್ರವಾದ್‌ನೆಬೋಲ್ಯು.

7 ಇವ್ಣೆ ಖ್ವಮಾರ್ ಭಾರಜಣ ಪರ್ವಾಥ.

8 ಯೊ ಖ್ವಯೇರಮ ಪೌಲನೆ ಸಬಾಮಂದಿರ್‌ನ ಮಹಿ ಜೈನ್ ತೀನ್ ಮಹಿನಲಗು ಹಿಜ್ವಾಸ್ ದೇವ್ನಿ ರಾಜ್ಯನಿ ವಾತೆನಿ ಬಾರೇಮ ಫೇಡ್ ಬೋಲ್ತೊಹುಯಿನ್ ಅದ್ಮಿಖ್ವಾರನ ದಿಲ್ವ ಜೀತಾನ ಕೋಶಿಶ್ ಕರನ್ಯೊ.

9 ಥೋಡುಜಣು ಇವ್ಣ ಮನ್ನ ಕರಣ್ ಕರನ್ಲಿನ್ ಪ್ರಭುನ ಮಾರಗ್‌ನ ಖರಾಬ್ ಕರಿ ಬೋಲ್ಯು. ಇನಖ್ವಾಜೆ ಪೌಲನೆ ಇವ್ಣುನ ಮ್ವೇಲಿನ್ ವಿಶ್ವಾಸಿವ್‌ನ ಇನ ಜೋಡೆ ಬುಲೈಲಿನ್ ಗಯೊ ಅಜು ಇವ್ಣುನ ತುರನ್ನಕರಿ ಬೋಲ್ತೊಲವಾಳಾನಿ ತರ್ಕಕರಾನಿ ಪಾರಶಾಲಾಮ ಬುಲೈಲಿಜೈನ್ ಹರೇಕ್ ದನ್ ಚರ್ಚೆಕರ್ತೊಥೊ.

10 ಅಮ್ಮ್ ಬೇ ವರಖ್ವ್ ನಿಕ್ಕಿಗಯ. ಏಷ್ಯಾಮ ಜಿವ್ಣು ಕರುಕರ್ತುಥೂತೆ ಖ್ವಾರು ಯೆಹೂದ್ಯರಾಬಿ ಗ್ರೀಕ್‌ವಾಳುಬಿ, ಪ್ರಭುನಿ ಉಪದೇಶ್‌ನ ಖ್ವಮ್‌ಜ್ಜು.

ಸ್ತೇವಾನ ಪರ್ವಾಲ್‌ಡ್

11 ದೇವ್ನೆ ಪೌಲನ ಹಾತೇಮ್ಮಿ ಬೋಲಾನುಕೊಂತೆ ಎತ್ತು ಅದ್ಭುತ್‌ಖ್ವಾರು ಕರಾವ್‌ತೊಥೊ.

12 ಇನಖ್ವಾಜೆ ಅದ್ಮಿಖ್ವಾರು, ಇನ ಹಾತ್ಮನು ಚೌಕೊ ಅಜು ಆಂಗ್‌ಪರನ್ನ ಪಿಫೋಡಿಬಿ ಪಳ್ಳಿಜೈನ್ ರೋಗ್‌ವಾಳನ ಉಪ್ಪರ್ ನಾಖ್ಯತೊ ಇವ್ಣು ರೋಗ್‌ಅಮ್ಮಿ ಪರಿಹಾರ್‌ಹುಯಿನ್ ಅಜು ಭೂತ್‌ಖ್ವಾರು ನಾಶಿ ಭವ್‌ಕರ್ತುಥು.

13 ಭೂತ್ ನಖ್ವಾಡವಾಳ, ಕರಿ ಬೋಲಿಲಿನ್ ಫರುಕರ್ತುಥೂತೆ ಥೋಡು ಯೆಹೂದ್ಯರಾಬಿ ಪ್ರಭು ಯೇಸುನ ನಾಮ್‌ಥಿ ಭೂತ್ ಫೋಡಾವನ ಕೋಶಿಶ್ ಕರನ್ಯೊ. ಅಜು ಅವ್ಣೆ ಭೂತ್‌ನ, “ಪೌಲ

ಬೋಲುಕರಸ್ತೆ ಯೇಸುನ ನಾಮ್‌ಥಿ ಹುಕುಮ್ ದೆವುಕರೇಸ್ ಕರಿ ಬೋಲುಕರ್ತುಫಠು.

14 ಸ್ತೇವಕರಿ ಏಕ್ ಯೆಹೂದ್ಯ ಗಲ್‌ಡಯಾಜಕ್‌ನ ಲಡ್ಡಾ ಹುಯಿರಾತ್ತೆ ಖ್ವಾತ್‌ಜಞ ಭೈಯೇಬಿ ಅಮ್ಮಸ್ ಕರುಕರ್ತಫಠು.

15 ಕತೋಬಿ ಏಕ್‌ಹಲ್ಲ ಭೂತ್‌ನೆ ಇವ್ವುನ, ಮನ ಯೇಸುಬಿ ಮಾಲುಮ್ ಪೌಲಬಿ ಮಾಲುಮ್ ಕತೋಬಿ ತುಮೆ ಕೋಣ್‌ಕರಿ ಫರೈನ್ ಬೋಲ್ಯು.

16 ತದೆ ಭೂತ್ ಧರಿರಾಖ್ಯೊಥೋತೆ ಯೊ ಅದ್ವಿನೆ ಯೆಹೂದ್ಯರಾನ್ ಘಣು ಚಂಡಾಳಾಥಿ ಇವ್ವುನ ಖ್ವಪ್‌ಡೈಲಿದು. ಯೊ ಯೆಹೂದ್ಯರಾಥಿಬಿ ಘಣೊ ಶಕತ್‌ವಾಳೊ ಹುಯಿರುಥೂತೆ ಇನಖ್ವಾಜೆ ಇವ್ವುನ ಮಾರ್ ಪೀಟ್‌ಕರನ್ಯು ಇವ್ವೆ ಫಾವ್ ಹುಯಿನ್ ಉಫಾಡು ಹುಯಿನ್ ಘರ್‌ಮಾಥು ನಾಶಿಚಲಿಗು.

17 ಎಫೆಸಮ ಥೂತೆ ಯೆಹೂದ್ಯರ್ ಅಜು ಯೆಹೂದ್ಯರ್‌ಕಾಹೆತೆ ಘಣುಜಞ ಖ್ವಮ್‌ಜ್ಯುತೆ ಇವ್ವೆ ಡರಿನ್ ಗೌರವ್ ದಿದು ಅಜು ಪ್ರಭು ಯೇಸುನ ನಾಮ್ನ ಘಣು ಖ್ವರಾಯು.

18 ಇನ ವಿಶ್ವಾಸ್ ಕರನ್ಯುತೆ ಕೈಯೇಕ್‌ಜಞ ಇವ್ವೆ ಕರನ್ಯಾಥಾತೆ ಪಾಪ್ಪಕಾಮ್ನ ಬಾರೇಮ ಅದ್ಮಿವ್‌ನ ಖ್ವಾಮ್ನೆ ಬೋಲಿಲಿದು.

19 ಯೋಬಿಕೊಂತೆ ಜ್ಞಾದು ಮಂತರ್ ಕರವಾಳಾಮ ಕೈಯೇಕ್‌ಜಞ ಇವ್ವ ಫಾಲ್ ಪುಸ್ತಕ್ ಭಮ ಕರಿಲೈನ್ ಅಖ್ವಾನ ಖ್ವಾಮ್ನೆ ಬಾಳಿನಾಖ್ಯು ಯೋ ಅಖ್ವಾನು ಮೋಲ್ ಗಣ್ಣಿ ಕರನ್ಯುತೊ ಖ್ವಮಾರ್ ಅಡೈವಿಖ್ವಿ ರೂಪಾನ ಪೈಶಾಯೆತ್ತು ಹುಯು.

20 ಆ ಪರಕ್ಮ ಪ್ರಭುನಿ ವಚನ್ ಭಡ್ತುಜೈನ್ ಘಣೇಥಿ ಘಣ ಜಞಾಮ ಪೈಲಾಯು. ಯೊ ಘಣಿ ಶಕತ್ನು ಹುಯು.

ಎಫೆಸಮ ಜಂಗ್

21 ಆ ಹುಯುತೆ ಇನಕೇಡೆಥು ಪೌಲ ಮೆಕೆದೋನ್ಯ ಅಜು ಅಖಾಯ ದೇಖ್ವಾನಿ ವಾಟಿ ಯೆರೂಸಲೇಮ್ಮ ಜ್ಞಾವಾನಿ ಮನ್‌ಕರನ್ಯೊ ಹಿಜ್ಜಾ

ಮೇ ಜ್ಞಾವಾನಿ ವಖ್ವತ್‌ಮ ರೋಮ್ ನಂಗರ್‌ನಾಬಿ ಮಳ್‌ಣು” ಕರಿ ಬೋಲ್ಯೊ.

22 ಕತೋಬಿ ಇನೆ ತಿಮೊಥೆ ಅಜ್ಜು ಎರಸ್ತ ಕರಿ ಬೇಞ್‌ಣು ಪೌಲನ ಮದತ್ ಕರಾವಾಳನ ಪೌಲನೆ ಇವ್ವುನ ಪಹಿಲೇಸ್ ಮೆಕೆದೋನಿಯನ ಮೋಕ್ಲಿದೊ.ಅಜ್ಜು ಯೊ ಬಿಞ್ಞೂಬಿ ಥೋಡದನ್ ಏಷ್ಯಾಮಾಸ್ ರಕ್ಷೆಗಯೊ.

23 ಯೊ ಹಗಾಮ್ತ ಎಫೆಸಮ ಕ್ರಿಸ್ತನಿ ಮಾರಗ್‌ನ ಮಾಲುಮ್ ಕರಾನಿ ಬಾರೇಮ ಜ್ಞಾಖತ್ ಗಲಾಟ್ ಹುಯು.

24 ಯೋ ಕಿಮ್‌ಕತೊ ದೇಮೇತ್ರಿ ಕರಿ ಏಕ್‌ಜಣೊ ಖೊನ್ನಾರ್‌ನೆ; ರೂಪಾಧಿ ಅರ್ತೆಮೀ ದೇವ್ತಿನಿ ಘುಥೀನಿ ಶಕಲ್ನಿ ನ್ಹಾನಿ ನ್ಹಾನಿಘುಡಿ ಕರಿನ್ ಯೋ ಕಾಮ್ ಕರಾವಾಳ ಅಖ್ವಾನ ಘಣು ನಫೊಕರಿ ದೆವ್‌ಕರ್ತೊಥೊ.

25 ಇನೆ ಯೋ ಕಾಮ್‌ಕರಾವಾಳ ಅಖ್ವಾಸ್ತ ಎಕ್ಚ ಕರಿನ್ ಇವ್ವುನ, “ಅದ್ಮಿವೊ, ಆ ಕಾಮ್‌ಧಿ ಅಪ್ಪುನ ಕೆತ್ತುಕ್ಕಿ ನಫೊ ಮಳುಕರಸ್, ಯೊ ತುಮೂನ ಮಾಲುಮ್.

26 ಕತೋಬಿ ಹಾತೇಮ್ತುಕರಾನು ಮೂರತ್ ದೇವ್ ಕಾಹೆಕರಿ, ಪೌಲನೆ ಎಫೆಸಮ ಕಾಹೆತೆ ಕಮ್‌ಶಿಕಮ್ ಏಷ್ಯಾ ತಬರ್‌ಖಾನು ಘಣ ಅದ್ಮಿನ ಮನ್ನ ಖೇಚಿನ್ ಫರೈನಾಖ್ಯೊ ಕರಿ ಬೋಲಾನು ತುಮೆ ದೇಖುಕರಸ್ ಖ್ವಮ್‌ಜ್ಞೂಬಿ ಕರಸ್.

27 ಅನೇಧಿ ಅಪ್ಪ ಧಂದಾನ ಅಟ್ಟಣ್ ಉಷೆ ಅಜ್ಜು ಯೋ ಕೊಂತೆ ಅರ್ತೆಮೀ ಮಹಾದೇವಿನ ಮಂದಿರ್ ಮಜೂರ್ ಕೊಂತೆ ಹುಯಿಜಾಶೆ. ಇಮ್ಮಸ್ ಖ್ವಾರು ಏಷ್ಯಾಮುಲಕ್‌ಬಿ, ಜಗತ್‌ಖ್ವಾರು ಪೂಜಕರಾನ ಆ ದೇವಿನು ವೈಭೋಗ್ ಅಖ್ವು ಮಟಿಜಾವನಿತರ ಲ್ಹಾ, ಕರಿ ಬೋಲ್ಯೊ.

28 ಇವ್ವೆಖ್ವಾರು ಆ ವಾತೆ ಖ್ವಮ್‌ಜಿನ್ ಅದ್ಮಿವ್‌ನಿ ಝೂಂಡ್ ಖಿಞ್ಞಾವ್ತುಹುಯಿನ್ ಎಫೆಸನು ಅರ್ತೆಮೀನಿ ದೇವಿಸ್ ಊಚಿ ಕರಿ ಚಿಕ್ರಾಣ್ ಮ್ಹೇಲ್ಯು.

29 ತದೆ ಖ್ವಯೇರ್‌ಮ ಕಿಜ್ಜ ಕಿಜ್ಜಾಬಿ ಪೈಲಾಯು.ಅಜ್ಜು ಪೌಲನಿ ಜೋಡ್ತ ಚಾಲ್ಯಫಂಡ್‌ಥಾತೆ ಮೆಕೆದೋನಿಯನು ಗಾಯೋಸಬಿ

ಅರಸ್ತಾರ್ಕಬಿ ಇವ್ವುನ ಅದ್ಮಿಖ್ವಾರು ಧರೀನ್ ಅಖ್ವುಜ್ಞಣು ಮಳಾನಿರ್ದುಗೋಮ ಧಕೇಲಿನ್ ಪೇಶಿಗಯು.

30 ಅನ ಮಾಲುಮ್ ಕರಯ್ತೆ ಪಾಲನೆ ಮಹಿ ಪೇಶಿನ್ ಅದ್ಮಿಖ್ವಾರಧಿ ವಾತೆ ಬೋಲ್ವುಕರಿ ಕರಯ್ತೆ ಕತೋಬಿ ವಿಶ್ವಾಸಿಖ್ವಾರು ಇನ ಜಾವಾನ ಕೋ ಮ್ಹೆಲ್ವುನಿ.

31 ಅತ್ರೇಸ್ ಕಾಹೆತೆ ಏಷ್ಯಾ ಮುಲಕ್ ಅಧಿಕಾರಿಮ ಥೋಡುಜ್ಞಣು ಪಾಲನ ದೋಸ್ತಿ ಹುಯಿರಲ್ವಡೂತೆ ಇನಖ್ವಾಜೆ ಇನಾಕನ ಅದ್ಮಿನ ಮೋಕ್ಲಿನ್; ತೂ ಯೋ ನಾಟಕ್‌ನಮಾಳ್‌ಮ ನಕೊ ಜಾಕರಿ ಗಿಂಗೈಲಿದು.

32 ಅದ್ಮಿವೋನ ಟೋಳ್ಳು ಗುಂಝಲಾಲ್ವಿ ಹುಯು. ಥೋಡುಜ್ಞಣು ಏಕ್ ಧರಾನಿ ಚಿಕ್ರಾಣ್ ಮ್ಹೆಲ್ವುತೊ ಅಜ್ಜು ಥೋಡುಜ್ಞಣು ಬಿಜೇಕ್‌ತರ ಚಿಕ್ರುಕರ್ತುಧು. ಹಿಜ್ಜಾಡೂತೆ ಘಣಾಜ್ಞಣನ ಇವ್ವೆ ಮಳಿನ್ ಐರಲ್ವಾತೆ ಶನಖ್ವಾಜೆ ಕರಿ ಬೋಲಾನು ಮಾಲುಮ್ ಕೊ ಥೂನಿ.

33 ಯೆಹೂದ್ಯರ್ ಅಲೆಕ್ಸಾಂಡರ್‌ನ್ ಖ್ವಾಮ್ಹೆ ಧಕೇಲಿನ್ ಝೂಂಡ್‌ಮ ಥೋಡುಜ್ಞಣು ಇನ ಇಷಾರ್ಕೊ ಕರಯ್ತೆ ತದೆ ಅಲೆಕ್ಸಾಂಡರ್‌ನ್ ಇನಭಣಿಧು ಹಾತ್‌ನೊ ಝಾಲೋದೀನ್ ಭರೈರಲ್ವಾತೆ ಅದ್ಮಿಖ್ವಾರಾನ ಶಾಂತಿಧಿ ರ್ವವಾನ ಬೋಲ್ತೊ ಹುಯಿನ್ ಜವಾಬ್ ದೇವ್ವುಕರಿ ಥೊ.

34 ಕತೋಬಿ ಯೋ ಯೆಹೂದ್ಯರ್‌ನೊ ಕರಿ ಮಾಲುಮ್ ಕರಖ್ವಾರ್ ಇವ್ವೆಖ್ವಾರು ಎಕ್ಸಸ್ ದಮ್‌ಪರ್; ಎಫೆಸವಾಳಾನಿ ಅರ್ತೆಮೀ ದೇವಿಸ್ ಮಹಾದೇವಿ, ಕರಿ ಕೂಘಾಟಿ ಮ್ಹೆಲ್ವು.

35 ಖ್ವರ್ತಿಮ ಖ್ವಯೇರ್ನ್ ಯಜಮಾನ್ನೆ ಅದ್ಮಿನಝೂಂಡ್‌ನ ಸಮಾಧಾನ್ ಕರೀನ್ ಇವ್ವುನ “ಎಫೆಸನು ಅದ್ಮಿವೊ ಆಕಾಶ್‌ಧು ಪಡ್ವುತೆ ಅರ್ತೆಮೀ ಮಹಾದೇವಿನ ಮಂದಿರ್ನ್ ಅಜ್ಜು ಇನಿ ಮೂರತ್ವ ಜತನ್ ಕರುಕರಸ್ತೆ ಎಫೆಸ ನಂಗರಸ್ ಕರಿ ಹಿಡಿ ಜಗತ್‌ನಾಸ್ ಮಾಲುಮ್ ಥಾನಿ?

36 ಆ ಸಮಾಚಾರ್ ಖ್ವಾಙ್ಕುಕರಿ ಕೋಣ್ ಬೋಲಾನ ಕೊ ಹುವಾನಿ ಇನಖ್ವಾಜೆ ಸಮಾಧಾನ್‌ಧಿ ಶೊಪೊರಲ್ವೆವೊ ಅಜ್ಜು ದುಡ್ಡಿನ್ ಶಾಪ್ತಿ ನಾ ಕರಯ್ತೆ.

37 ತುಮೆ ಧರೀನ್ ಲೈರಾಖ್ಯತೆ ಆ ಅದ್ಮಿಖ್ವಾರು ದೇವ್ನಿಮಂದಿರ್‌ನ ಚೋರ್ ಕರವಾಳು ಕಾಹೆ, ಅಪ್ಲದೇವಿನ ದೂಷಣೆ ಕರಾವಾಳುಬಿ ಕಾಹೆ.

38 ಇನಖ್ವಾಜೇಥಿ ದೇಮೇತ್ರಿಯನಾಬಿ ಇನಾಭಣಿ ರ್ಲಾವವಾಳಾನ ಕಿನಾಪರ್ತೋಬಿ ಗಲತ್ ಲಗಾಡನು ಉಷೇತೊ ನಯೊಬಿ ಛಾ ಅಜು ಮೋಟು ನ್ಯಾವ್‌ನಿ ಝಗೊಬಿ ಛಾ ಹಿಜ್ಜಾಫೆಡೈಲ್ಯಾವದೆ.

39 ಶಾತ್ರೋಬಿ ಘಣು ಪೂಚ್‌ತಾಚ್ ಕರ್ನುಕತೊ ಯೊ ನ್ಯಾವ್‌ಥಿ ಭರಿಸಬೆಮ ತೀರ್ಮಾನ್ ಹೋಣುಪಡ್ಕು.

40 ಆ ದನ್ನೆ ಚಾಲ್ಯುತೆ ಸಮಾಚಾರ್ನ್ ಎಕ್ವಹುಯಿರ್ಲಾತೆ ತುಮೂನ ಮೆ ಶನ ಬೋಲುಕರುಸ್‌ಕತೊ ಹಮ್ಮೇನು ಝಗ್‌ಡಾನ ದೇಖ್ಯಾತೆ ಥೋಡು ಅದ್ಮಿಖ್ವಾರು ಹಮೆ ಝಗ್‌ಡೊ ಉರಾಡಿರಾಖ್ಯಸ್ ಕರಿ ಗಲತ್ ಲಗಾಡನಿತರ ಥೂ. ಆ ಗಲಾಟ್‌ನ ಬಾರೇಮ ಬೋಲ್ಯುತೊ ಹಮೆ ಝಗ್‌ಡಾನ ಮಾನಿಲ್ಯವಾನ ಕೋ ಹುವಾನಿ ಕರಿ ಬೋಲ್ಯೊ.

41 ತದೆ ಖ್ವಿಯೇರನ್ನೊ ಅದಿಕಾರಿ ಆ ಖ್ವಾರಿವಾತೆನಿ ಬೋಧನೆ ಹುಯಿಜಾವದಿನ್ ಘರೆ ಜಾವೊಕರಿ ಖ್ವಮ್‌ಜಾಡ್ತೊ ಹುಯಿನ್ ಸಬೆನ ಖತಮ್ ಕರನ್ನೊ.

20

ಮೆಕೆದೋನ್ಯ ಅಜು ಅಕಾಯಮ

1 ಗಲಾಟ್ ಭೀರಲ್ಯಾವನ ಬಾದ್ಮ ಪೌಲನೆ ಯೇಸುನ ವಿಶ್ವಾಸಿವ್‌ನ ಏಕ್ ಬಾಜು ಬುಲೈಮಂಗೈನ್ ಇವ್ಣುನ ಭಾಲಿದೀನ್ ಜೈನ್ ಆವುಸ್ ಕರಿ ಹಿಜ್ಜಾಥೊ ಮೆಕೆದೋನಿಯನ ನಿಕ್ಕಿಗಯೊ.

2 ಯೋ ತಬರ್‌ಖಾಮ ಚಾಲ್‌ಕುಚ್ ಕರ್ತೊಹುಯಿನ್ ಹಿಜ್ಜಾವಾಳನ ಕೈಏಕ್ ವಾತೇಥಿ ಭಾಲಿ ದೇತೊಹುಯಿನ್ ಗ್ರೀಸ್ ದೇಖ್ವ್‌ನ ಗಯೊ.

3 ಹಿಜ್ಜಾ ತೀನ್ ಮಹಿನ ಕಾಡಾನ ಬಾದ್ಮ ಸಿರಿಯ ದೇಖ್ವ್‌ನ ದರಲ್ಯಾವ್‌ನ ಮಾರ್ಗೆ ಜಾವ್ಣುಕರಿ ರ್ಲವಾನಿ ವಖ್ವತ್‌ಮ, ಥೋಡ ಯೆಹೂದ್ಯವಾಳನೆ ಪೌಲನಿ ವಿರೋದ್ ಗಪ್ಲಥಿ ಖರಾಬ್ ಕಾಮ್ ಕರಲ್ಯತೆ

ಮಾಲುಮ್‌ಹುಯಿನ್ ಯೋ ಪಾಟ್ಲೊ ಫರೀನ್ ಮೆಕೆದೋನಿಯಾಥೊ ಸಿರಿಯನ್ ಜಾವ್ವುಕರಿ ಖ್ವಿಯಾಲ್ ಕರಿಲಿದೊ.

4 ತದೆ ಇನಿ ಜೋಡೆ ಬೆರೋಯ್‌ಖ್ವಿಯೇರನ್ನೊ ಪುರ್ರನ್ನೊ ಛಿಯೊ ಸೋಪತ್ರಾಬಿ, ಥೆಸಲೋನಿಕ ಖ್ವಿಯೇರನ್ನೊ ಅರಿಸ್ತಾರ್ಕ್, ಅಜ್ಜು ಸೆಕುಂದ, ದರ್ಬೆ ಖ್ವಿಯೇರನ್ನೊ ಗಾಯ ಅಜ್ಜು ತಿಮೋಥೆ, ಯೋ ಕಾಹೆತೆ ಏಷ್ಯಾನ್ ತಬರ್‌ಖಾಮ ತುಖಿಕಬಿ, ತ್ರೊಫಿಮಾಬಿ, ಏಷ್ಯಾ ತಬರ್‌ಖಲಗೂಬಿ ಇನ್ ಜೋಡೆಗಯ್.

5 ಇವ್ಣೆ ಹಮಾರೇಥಿ ಅಗಾಡಿಸ್ ಜೈನ್, ಹಮಾರ್‌ಖ್ವಾಜೆ ತ್ರೋವ ಖ್ವಿಯೇರಮ ಟಿವೈರನ್.

6 ಯೆಹೂದ್ಯರನ್ನ ಪುಗಕೊಂತೆ ರೋಟಾನಿ ಪೂಜ್ಜ ಹುವಾದಿನ್ ಹಮೆ ಫಿಲಿಪ್ಪಿ ಖ್ವಿಯೇರನ್ನಿ ಜಹಾಜ್ ಛಡಿಸ್, ಪಾಚ್ ರೋಜ್‌ಕೇಡೆ ತ್ರೋವಮ ಇವ್ಣುನ್ ಮಳ್ಳ ಹಿಜ್ಜಾ ಖ್ವಾತ್‌ದನ್‌ಲಗು ಥಾ.

ತ್ರೋವನ್ ಪೌಲನಿ ಅಂತಿಮ್ ಭೆಟ್ಟಿ

7 ವಾರಾನೊ ಸಬ್ಬತ್‌ನ್ ದನ್ನೆ ಹಮೆಖ್ವಾರು ಪ್ರಭುನು ರಾತ್ನುಬೋಜನ್‌ನ್ ಖ್ವಾಜೇಥಿ ಎಕ್ವು ಹುಯಿನ್ ಆಯ್. ತದೆ ಸಭೆ ಭರಾಯತೆ ಅದ್ವಿಖ್ವಾರಾನಿ ಜೋಡೆ ವಾತೆ ಬೋಲಿನ್ ಇನ್‌ವಾಣೆ ಹಿಜ್ಜಾಥೊ ಜಾವ್ವುಕರಿ ಪೌಲ ಖ್ವಿಯಾಲ್‌ಕರನ್ನೊ ಇನ್‌ಖ್ವಾಜೆ ಅಧಿರಾತ್‌ಲಗೂಬಿ ವಾತ್ ಬೋಲುಸ್ ಕರ್ತೊಥೊ.

8 ಹಮೆಖ್ವಾರು ಬೇರಥಾತೆ ಘರ್‌ನ್ ಉಪ್ಲಿಬಾಜುನ್ ಕೋಣಾಮ ಕೈಯೇಕ್ ದಿವೋ ಲಾಗುಕರ್ತುಥು.

9 ಯೂತಿಖ ಕರಿ ಏಕ್‌ಜಣೊ ಜವಾನಿ ಛೋಕ್ರು ಕಿಟಕಿಕನ್ ಬೇಶಿನ್ ಭರ್ ನಿಂದರ್‌ಮ ಝುಕಾರ್ನ್ ಮಾರುಕರ್ತೊಥೊ. ಪೌಲ ಬಿಜ್ಜೂಬಿ ಬೋಧನೆ ಕರುಕರಾನಿ ವಖ್ವತ್‌ಮ ಯೊ ಜವಾನಿ ನಿಂದರ್‌ಥಿ ಘಣಿ ಝುಕಾರ್ನ್ ಮಾರಿನ್ ತೀನ್ನಿ ಮಹಡಿಪರ್ಥೊ ಹೇಟ್ ರಡ್ಕಿಗೊ; ಇನ್ ಉತಾಡನ್ ಗಯುತೆ ತದೆ ಯೋ ಮರಿರನ್ನೊಥೊ.

10 ಕರ್ತೋಬಿ ಪೌಲನೆ ಉತ್ತಿಜೈನ್, ಇನ್ ಪಾಡಿಸ್ ಬಡ್ವೆನ್; ವೇಚ್‌ಣೆ ನಕೊಕರೊ, ಯೋ ಜಿವ್ವೊ ಛಾಕರಿ ಬೋಲ್ಯೊ.

11 ಪೌಲ ಪಾಟ್ಲೊ ಉಪ್ಪರ್ ಜೈನ್ ರೋಟಾನ ತೋಡಿ ಖೈನ್ ಘಣಿ ವಖ್ತಾಲಗು ವಾತೆ ಬೋಲ್ಯೊ ಎತ್ರಾಮ ವ್ಹಾಣುಹುಯು ತದೆ ಪೌಲ ಚಲೆಗಯೊ.

12 ಇವ್ಚೆ ಜಿವ್ತೊಹುಯೂತೆ ಯೋ ಭವಾನಿ ಛೋಕ್ರಾನ ಬುಲೈಲಿನ್ ಭಾವನಿವಖ್ತೆ ಇವ್ಚುನ ಘಣು ಸಮಾಧಾನ್ ಹುಯು.

ತೋವಧು ಮಿಲೇತ

13 ಹಮೆ ಅಗಾಡಿಸ್ ಜಹಾಜ್‌ಮ ಅಸ್ಸೊಸಿಕರಿ ಖ್ವಯೇರ್ನ್ ಗಯ. ಹಮೆ ಪೌಲಾನ ಜೋಡ್ತ ಜಹಾಜ್‌ಪರ್ ಜಾಶುಕರಿ ಥಾ. ಇನೇಸ್ ಗೋಡಾನಿ ವಾಟೇಥಿ ಚಾಲಿನ್ ಹಿಜ್ಜಾಥೊ ಒಳೆಜಾತೊಥೊ.

14 ಇಮ್ಮಸ್ ಹಮೆ ಆವಾನಿ ವಖ್ತೆ ಪೌಲ ಅಸ್ಸೊಸಿ ಖ್ವಯೇರ್‌ಮ ಹಮೂನ ಮಳ್ಳೊ ಹಿಜ್ಜಾಥೊ ಹಮೆಖ್ವಾರು ಜಹಾಜ್‌ಪರ್ ಮಳಿನ್ ಮಿತಿಲೇನ ಖ್ವಯೇರ್ನ್ ಗಯ.

15 ಇನ ಅಗ್‌ಲ್ಯದನ್ನೆ ಹಮೆ ಹಿಜ್ಜಾಥ ಜಹಾಜ್‌ಪರ್ ಖಿಯೋಸ್ ಟಾಪನ ಖ್ವಾಮ್ಪೆಥೂತೆ ಏಕ್ ಝಗೊಕನ ಆಯ, ಇನ ಅಗ್‌ಲ್ಯದನ್ನೆ ಸಾಮೋಸ್ ಟಾಪನ ಕಾಡಿನ್ ಇನ ಅಗ್‌ಲ್ಯದನ್ನೆ ಮಿಲೇತ ಖ್ವಯೇರ್ನ್ ಜೈನ್ ಪೋಚ್ಕ.

16 ಪೌಲನೆ ಪಂಚಶತ್ತಮ ಪೂಜಾನ ದನ್ನ ಯೆರೂಸಲೇಮ್ಮ ರ್ವೇವ್ಣಕರಿ ಉತ್ವಾಳಿ ಕರುಕರ್ತೊಥೋತೆ ಇನಖ್ವಾಜೆ ಏಷ್ಯಾ ತಬರ್‌ಖಾಮ ದನ್ ಕಾಡನ ಇಷ್ಟಕೊಂತೆ ಎಫೆಸ ಖ್ವಯೇರ್ನ್ ಮ್ಹೇಲಿನ್ ಜಾವಾನ ಖ್ವಾಜ್‌ಕರ್ಯೊ.

ಪೌಲನೆ ಎಫೆಸ ಸಬೆನ ಗಲ್‌ಥಾವ್‌ನ ಬೋಲ್ಯೊತೆ ಖರ್ತಿ ನಿ ವಾತೆ

17 ಪೌಲನೆ ಮಿಲೇತಥೊ ಎಫೆಸ ಖ್ವಯೇರ್ನ್ ಸಬೆನ ಗಲ್‌ಥವ್‌ಖ್ವಾರಾನ ಏಕ್ ಸಂದೇಶ್ ಬೋಲಿಮೋಕ್ಲಿನ್ ಇವ್ಚುನ ಬುಲೈಮಂಗಾಯೊ.

18 ಯೋ ಗಲ್‌ಡಖ್ವಾರಾನ, ಪೌಲನೆ, “ಮೇ ಏಷ್ಯಾ ತಬರ್‌ಖಾಮ ಐನ್ ಗೋಡೊಮ್ವೇಲ್ಯೊ ತಪ್‌ಥೂಬಿ ತುಮಾರ ಇಚ್‌ಮ ಅಖ್ಪಿ ವೇಳ್‌ಮಾಬಿ ಕಿಮ್ ಭಾಲಿಲಿದೊ ಕರಿ ತುಮುನಾಸ್ ಮಾಲುಮ್.

19 ಯೆಹೂದ್ಯರ್ ಖ್ವಾರಾನಿ ಮಶ್ಲೆಥಿ ಮೆ ಘಣು ಖ್ವತಾನು ಪಡ್ಕುಧು. ಕೈಏಕ್ ವಖ್ವತ್ ಆಂಝು ನಾಕ್ಟಪಡ್ಕು ಕತೋಬಿ ಮೇ ಖ್ವಮಾಳಿನ್ ಕದೇಬಿ ಪ್ರಭುನು ಸೇವೆ ಕರೊಕ್ಕರಿ ತುಮೂನ ಮಾಲುಮ್.

20 ಮೇ ತುಮೂನ ಖ್ವಾರಾನ ಖ್ವಾಮ್ವೆಬಿ ಅಜು ತುಮೂನ ಘರೂಮಾಬಿ ಐನ್ ತುಮುನ ಮದತ್ ಹುವಾನು ಶಿಕಾಡನಾಬಿ ಪೀಠೆ ಹಟ್ಟೊಕೊಯ್ನಿ ಯೊ ತುಮೂನ ಮಾಲುಮಸ್ ಲಾ.

21 ಯೆಹೂದ್ಯರ್‌ನ ಅಜು ಗ್ರೀಕ್‌ವಾಳು ಪಾಪ್ ಮ್ವೇಲಿನ್ ದೇವ್‌ಭಣಿ ಫರಿಜಾವ್ಣು ಅಜು ಪ್ರಭು ಯೇಸುನ ನಾಮ್‌ಪರ್ ವಿಶ್ವಾಸ್ ರಾಕ್ಟುಕರಿ ಮೇ ಬೋಲಿರಾಖೊಸ್.

22 ಅಜು ಹಮ್ ಮೇ ಪವಿತ್ರಾತ್ಮನ ಖ್ವಾಮ್ವೆ ಮುಡ್‌ಕ್ಯು ಝುಕ್ಯೆನ್, ಯೆರೂಸಲೇಮ್ ವಳೆಫವುಸ್. ಹಿಜ್ಜಾಮನ ಶಾತ್ ಉಶೇಕಿ ಮಾಲುಮ್‌ಕೊಯ್ನಿ.

23 ತುನ ಬೇಡಿಬಿ ಖ್ವತಾಪ್ಪಿಖ್ವಾರು ಮಾರಖ್ವಾಜೆ ಟಿವೈರೊಸ್‌ಕರಿ ಪವಿತ್ರಾತ್ಮನೆ ರ್ಪೀತ್ಯೆನ್ ಹರೇಕ್ ಖ್ವಯೇರ್‌ಮಾಬಿ ಮನ ಬೋಲುಕರಸ್ತೆ, ಮಾಲುಮ್ ಪಡುಕರಸ್.

24 ಮೇ ಮಾರ ಶೊಂತ್ ಜಾನ್ನಿ ಬಾರೇಮ ಸೋಚುಕೊಯ್ನಿ ಪ್ರಭು ಹುಯಿರೊತ್ತೆ ಯೇಸುನೆ ಮನ ದೀರಾಖೊತ್ತೆ ಕಾಮ್ ಪೂರ ಕರಾನುಸ್ ಮನ ಖ್ವಾರೇಥಿ ಮುಖ್ಯ ಯೊ ದೇವ್ನ ವಾರ್‌ಖ್ವಾನಿ ಬಾರೇಮಾನಿ ಸುವಾರ್ತೆನ ಸಾಕ್ಷಿನ್ ಕಾಮ್ ಹುಯಿರೊಸ್.

25 ದೇಖೊ ತುಮಾರಿ ಜೋಡೆಥೂತೆ ಖ್ವಾರಿ ವಖ್ವತ್‌ಮ ದೇವ್ನಿ ರಾಜ್ಯನಿ ಬಾರೇಮಾನಿ ಸುವಾರ್ತೆನ ಮೆ ತುಮೂನ ಬೋಲಿ ಖ್ವಮ್‌ಘಾಡ್ಲೊ ಹಮ್ ತುಮಾರಮ ಏಕ್‌ಘಣೂಬಿ ಮಾರ ಮ್ಹೊಡಾನ ಬಿಜು ಕದೇಬಿ ದೇಕ್‌ಶು ಕೊಯ್ನುಕರಿ ಮನಮಾಲುಮ್.

26 ಇನಖ್ವಾಜೆ ಹಮ್ ಮೆ ತುಮೂನ ಖ್ವಾಚ್‌ಮಾಬಿ ಬೋಲಾನಿ ಏಕ್ ವಾತೆ ಶಾತ್‌ಕತೊ; ತುಮಾರಮ ಕೋಣ್‌ತೋಬಿ ನಾಶ್‌ಹುಯುತೊ ಇನ

ಮೇ ಜಿಮ್ಮಿದಾರಿ ಕಾಹೆ.

27 ಶನಕತೊ ಏಕ್‌ಬಿ ಲಪಾಡ್ಯೊಕೊಂತೆ ದೇವ್ನಿ ಖ್ವೊಜ್‌ನ ತುಮೆ ಖ್ವೊಮ್‌ಜಿಲೇವ್ಣುತೆ ಪರಕ್ಮ ಹರೇಕ್ ವಾತೆನಾಬಿ ಮೇ ತುಮೂನ ಖ್ವೊಮ್‌ಜಾಡ್ಯೊ.

28 ಇನಖ್ವಾಜೆ ತುಮಾರಿ ಬಾರೇಮಾಬಿ ಪವಿತ್ರಾತ್ಮನೆ, ತುಮೂನ ದೆಖಾವಾನ ದೀರಾಖ್ಯೊತೆ ಮೇಂಡಾನಿ ಮಂಧಾನಿ ಬಾರೇಮಾಬಿ ಹೊಷಾರ್‌ಥಿ ರ್ವೊವೊ. ಅಜ್ಜು ಸಬೆನ ತುಮೆ ಕುರುಬಹುಯಿರ್ಲ್ಹಾಸ್. ಶನಕತೊ ದೇವ್ ಇನ ಛಿಯ್ಯಾನ ಲ್ಹೊಯಿಥಿ ಮೋಲ್ ಲೀರಾಖ್ಯೊಸ್.

29 ಮೇ ಚಲ್ಯೊಜಾವದೀನ್ ಖರಾಬ್ ಜರಕ್‌ಖ್ವಾರು ತುಮಾರಕನ ಆವಾಶೆಕರಿ ಮನ ಮಾಲುಮ್. ಯೊ ಮಂಧಾನ ಗೋರ್ ಕರ್ತೆಕೊಯ್ನಿ.

30 ಆ ನಾಹುಯಿನ್ ತುಮಾರಿ ಸಬೆಮಾಸ್ ಥೋಡುಜಣು ದುರ್ಬೊಧನೆ ಕರವಾಳು ಹುಯಿನ್ ಯೇಸುನ ವಿಶ್ವಾಸಿವ್ ಥೋಡಜಣಾನ ಖ್ವಾಜೇಥಿ ದೂರ್ ಚಲಾವಾಪೆ.

31 ಇನಖ್ವಾಜೆ ಡೋಳಾನು ಆಂಧ್ಲು ನಾಕ್ಲೊ ಹುಯಿನ್ ಮೇ ತೀನ್ ವರಖ್ ದನ್ ತುಮಾರಿ ಜೋಡೆರ್ಟ್ವೀನ್ ಮೇ ತುಮೂನ ರ್ಟ್ವೀಣ್‌ದನ್ ಶಿಕಾಡ್ತೊಹುಯಿನ್ ತುಮೂನ ಹೊಷಾರ್ ಕರ್ಟ್ವೊತೆ ಯಾದ್ಕರಾಖೊ.

32 “ಮೇ ಹಮ್ಮೆ ತುಮೂನ ದೇವ್‌ನಾಬಿ ಇನ ವಾರ್‌ಖ್ವಾನಿ ವಚೆನ್ನಾಬಿ ದೆವುಕರೂಸ್. ಯೊ ತುಮಾರಮ ಭಕ್ತಿನ ಭಡಾವನಾಬಿ, ಪರಿಶುದ್ಧಿ ತುಮೂನ ಹಕ್ಮ ದೈವಾನಾಬಿ ಶಕತ್‌ವಾಳೊ ಹುಯಿರೋಸ್.

33 ಮೇ ತುಮಾರಿ ಜೋಡೆ ರ್ವೊವಾನಿ ವಖ್ವತ್, ಖ್ವೊನ್ನು ರೂಪು, ಲುಂಗ್ಡಾವ್‌ನ ದೇಖಿ ಹರಖ್ವೊಯೊ ಕೊಯ್ನಿ.

34 ಮೇ ಮಾರ ಶೊಂತ್ ಹಾತೇಖ್ವು ಕಮಾವ್‌ತೋಥೊ. ಕದೇಬಿ ಮಾರಖ್ವಾಜೆ ರ್ವೊವೊ, ಮಾರಿಜೋಡೆ ರ್ವೊವಳಾನಖ್ವಾಜೆ ಹೋಣುತೆ ಜರೂರತ್ವ ಪೂರಕತೋಥೊ.

35 ಅಖ್ಬೀಸ್ ಬಾರೇಮ ಮೇಸ್ ತುಮೂನ ಚಾಲಿನ್ ವತಾಳಿರಾಖ್ಯೊಸ್. ತುಮೇಬಿ ಇಮ್ಮಸ್ ಮ್ಹಿನ್‌ತೆಕರಿನ್ ತಾಖತ್‌ಕೊಂತೆ ಇವ್ಣುನ ಮದತ್ ಕರನ್ನ ಅಜ್ಜು ಲ್ಯಾವಥೀಬಿ ದೇವಾಮ ಘಣು

ವಾರ್‌ಖೊ ಲ್ಲಾಕರಿ ಪ್ರಭು ಹುಯಿರೊಡ್ಲೆತೆ ಯೇಸುನಿ ವಾತೆನ ಅಪ್ಪೆ
ಖ್ವಿಯಾಲ್ಮ ರಾಖೊಕರಿ ಬೋಲ್ಯೊ.

36 ಆವಾತೆಖ್ವಾರಿ ಯೊ ಬೋಲಿ ಹುಯಿಜಾವಾದಿನ್ ಇವ್ಣೆಖ್ವಾರಾನಿ
ಬೋಡ್ಲಡ್ಡುಕ್‌ಣ್ಯಮೇಟೆ ಹುಯಿನ್ ಪ್ರಾರ್ಥನೆಕರೊ.

37 ಇನಕೇಡೆಥು ಪೌಲನೆ, ತುಮೆ ಮಾರ ಮ್ಹೋಡಾನ ಅಜ್ಜು
ಕದೇಬಿ ದೇಕ್‌ಶುಕೊಯ್ನಿ ಕರಿ ಬೋಲಖ್ವಾರ್ ಇವ್ಣೆಖ್ವಾರು ರೊಯಿನ್
ಆಂಝುನಾಖ್ಯು ಅಜ್ಜು ಇನ ಬಧಾಯು ಅಜ್ಜು ಬುಚ್ಚಾದೀನ್
ಜೈನ್‌ಆಯೇಸ್ ಕರಿ ಬೋಲ್ಯು.

38 ಇನೆ ಮಾರ ಮ್ಹೋಡಾನ ಬಿಜುಪಾಱು ದೇಕ್‌ಶು ಕೊಯ್ನಿಕರಿ
ಬೋಲ್ಯೊತೆ ವಾತೆನ ಇವ್ಣೆಘಣು ದುಖ್‌ಪಡ್ಕು ಅಜ್ಜು ಇನ ಜಹಾಜ್‌ಲಗು
ಜೈನ್ ಮ್ಹೇಲಿನ್ ಆಯು.

21

ಪೌಲ ಯೆರೂಸಲೇಮ್ ಗಯೇತೆ

1 ಹಮೆ ಇವ್ಣುನ ಮೋಕ್ಲಿನ್ ಇನಪಾರ್ ಜಹಾಜ್‌ಪರ್ ಲ್ಲಡೀನ್
ಕೋಸ್ ಟಾಪಾಮ ಆಯ. ಪಾಲ್ಟೊಲ್ಯದನ್ನೆ ರೋದ ಟಾಪನ ಜೈನ್
ಹಿಜ್ಜಾಥ ಪತರ ಖ್ವಿಯೇರನ್ನ ಆಯ.

2 ಹಿಜ್ಜಾಫೊಯಿನಿಕೆ ಜಾವಾನಿ ಜಹಾಜ್‌ನ ದೇಖಿ ಇನಾಪರ್ ಚಡೀನ್
ಗಯ.

3 ಖ್ವಾಮ್ಣೆ ಕುಪ್ರ ಟಾಪು ದೆಖಾಯು. ಇನ ಡಾವಿಬಾಜು ಮ್ಹೊಂದಿನ್
ಸಿರಿಯ ದೇಖ್ವೊ ಭಣಿಕರಿ ಚಾಲ್ತಹುಯಿನ್ ತೂರ್ ಖ್ವಿಯೇರನ್ನ ಐನ್
ಉತ್‌ರನ್ ಶನಕತೊ ಹಿಜ್ಜಾ ಜಹಾಜ್‌ನು ಜಿನಖ್ವೊ ಅಖ್ವು ಉತಾರನ್ನ
ಥೂ.

4 ಹಿಜ್ಜಾ ವಿಶ್ವಾಸಿಖ್ವಾರನ ಡೊಂಡಿಕಾಡೀನ್ ಖ್ವಾತ್‌ದನ್ ರ್ವಿಯ. ಇವ್ಣೆ
ಪವಿತ್ರಾತ್ಮನಿ ಖ್ವಿಯಾಲ್‌ಥಿ ಪೌಲನ, “ತೂ ಯೆರೂಸಲೇಮ್ ಗೋಡೊ
ನಕೊ ಮ್ಹೇಲಿಶ್” ಕರಿ ಬೋಲ್ಯು.

5 ಕತೋಬಿ ಹಮಾರಿ ಭೇಟಿ ಖ್ವತಮ್ ಕರೀನ್, ಹಿಜ್ಜಾಥ ನಿಕ್ಕಾನಿ
ವಖ್ವತಮ ಯೊ ವಿಶ್ವಾಸಿ ಖ್ವಾರು ಖ್ವಿಯೇರನ್ನ ಭಾರ್‌ಲಗು ಐನ್ ಇವ್ಣು

ಬಾವಣ್ ಲಡ್ಕಾವ್‌ನಿ ಜೋಡ್ಡ ಮ್ಹೇಲಾನ ಆಯು. ಅಜು ಹಮೆ‌ಖ್ವಾರು ದರನ್ಯಾವ್‌ನಿ ಕನಾರೆ ಡುಕ್‌ಣ್ಯಮೇಟೆ ಹುಯಿನ್ ಪ್ರಾರ್ಥನೆ ಕರೀನ್,

6 ಬಾದ್ಡ ಹಮೆ ಏಕ್‌ಥಿ ಏಕ್ ಖ್ವರ್ತಿನಿ ಖ್ವಲಾಮ್ ಕರೀನ್ ಜಹಾಜ್ ಚಡೀನ್ ಇವ್ಣೆ ಪಾಲ್ತುಪರಿ ಇವ್ಣೆ ಘರೆಗಯು.

7 ಹಮೆ ತೂರ್ ಖ್ವಯೇರ್‌ಥಿ ನಿಕ್ಕಿನ್ ಪೊಲೆಮಾಯ ಖ್ವಯೇರ್‌ನ್ನಿನ್ ದರನ್ಯಾವ್‌ನಿ ಚಾಲ್ ಖ್ವತಮ್ ಕರನ್ಯಾ. ಹಿಜ್ಜಾಡೂತೆ ವಿಶ್ವಾಸಿಖ್ವಾರನ ಖ್ವಲಾಮ್ ಕರೀನ್, ಇವ್ಣಿ ಜೋಡೆ ಏಕ್‌ರೋಜ್ ರಡ್ವೀನ್,

8 ಇನವ್ಣಾಣೆ ನಿಕ್ಕಿ ಕೈಸರೈನು ಖ್ವಯೇರ್‌ನ್ನ ಆಯ. ಹಿಜ್ಜಾ ಹಮೆ ಫಿಲಿಪ್ಪನ ಘರಮ ರ್ವಯು. ಸುವಾರ್ತೆ ಖ್ವಮ್‌ಜಾಡನೂಸ್ ಫಿಲಿಪ್ಪನು ಕಾಮ್ ಹುಯಿರನ್ವು. ಹೈರೋತೆ ಸೆಜರೇಯಮ ಮದತ್ ಕರಾವಾಳ ಖ್ವಾತ್‌ಜಣಾಮ ಆಬಿ ಏಕ್‌ಜಣೊ ಹುಯಿರೋಫೊ.

9 ಇನ ಚಾರ್‌ಜಣಿ ಕವಾರಿ ಫೋರಿಯೇಥಿ. ಇವ್ಣೆ ಖ್ವಾರಿಜಣಿ ದೇವ್ ವಾತೇನ ಪ್ರವಾದನೆ ಕರಾವಳಿಯೆ ಹುಯಿರ್ದಿದಿ.

10 ಹಮೆ ಹಿಜ್ಜಾ ಫೋಡದನ್ ರ್ವವಾನವಾರ್ ಅಗಬ ಕರಿ ಏಕ್ ಪ್ರವಾದಿ, ಯೂದಾಯಫೊ ಮಾರಕನ ಆಯೊ.

11 ಯೊ ಹಮಾರಕನ ಐನ್ ಪೌಲನು ಕಂಬರ್‌ನು ಕಷ್ಟಬಂದ್‌ನ ಪಾಡೀನ್ ಇನ ಹಾತ್‌ಗೋಡಕೇಡೆ ಭಾಂದಿಲೀನ್; ಆ ಕಷ್ಟಬಂದ್ ಕಿನೂಕಿ ಇನ ಯೆಹೂದ್ಯರ್‌ನ ಖ್ವಾರು ಅಮ್ಮಸ್ ಯೆರೂಸಲೇಮ್ಮ ಭಾಂದಿನ್ ಯೆಹೂದ್ಯರ್‌ಕಾಹೆತೆ ಇವ್ಣೆ ಹಾತ್ತ್ ದಿಶೆಕರಿ ಪವಿತ್ರಾತ್ತ್ ಬೋಲುಕರಸ್ ಕರಿ ಬೋಲೊ.

12 ಕದೆ ಆ ವಾತೆನ ಖ್ವಮ್‌ಜ್ಯಾಕಿ ಹಮೇಬಿ ಯೋ ಗಾಮ್‌ವಾಳುಬಿ ತೂ ಯೆರೂಸಲೇಮ್‌ನ ನಕೊ ಜಾಕರಿ ಪೌಲನ ಗಿಂಗೈಲಿದ.

13 ಇನಖ್ವಾಜಿ ಪೌಲನೆ, “ತುಮೆ ಆಂಧ್ರುನಾಖಿನ್ ತುಮೆ ಶನ ಮಾರು ದಿಲ್‌ತೋಡಾವೊಸ್? ಮೆ ಯೇಸುನ ನಾಮ್‌ಖ್ವಾಜಿ ಯೆರೂಸಲೇಮ್ಮ ಭಂದಿಹುವಾನು ಕಾಹೆತೆ ಪ್ರಭುನಖ್ವಾಜಿ ಮರನಾಬಿ ತಯಾರ್ ಲೊ” ಕರಿ ಬೋಲೊ.

14 ಯೋ ಖ್ವಮ್‌ಜ್ಯೊಕೊಂತೆ ದೇಖಿನ್ ಪ್ರಭುನಿ ಮರ್ಜಿ ಕಿಮ್ ಲಾಕಿ

ತಿಮ್ ಭಾಲಾದೆ ಕರಿ ಹಮೆ ಖೊಪ್ ರ್ಲೆಗಯ.

15 ಆ ಖ್ವಾರದನ್ ಹುವಾನಪಾರ್ ಹಮೆ ಖ್ವದ್ರೀನ್ ಯೆರೂಸಲೇಮ್ಮ ನಿಕ್‌ಳ್ಳೆ.

16 ಕೈಸರೈಥು ಥೋಡ ಶಿಷ್ಯರ್ ಹಮಾರಿ ಜೋಡ್ತ ಏನ್, ಮ್ಹಾಸೋನಕರಿ ಏಕ್‌ಜಣಾನ ಘರ್‌ಮ ಹಮೂನ ರ್ಲವಾನಖ್ವಾಜೆ ಬುಲೈಲಿನ್ ಗಯು. ಯೋ ಕುಪ್ರಥು ಆಯುತೆ ಪಹಿಲ ಶಿಷ್ಯರ್‌ಮ ಏಕ್‌ಜಣೊ ಥೊ.

ಪೌಲ ಯಾಕೋಬ್‌ನ ಮಳ್ಳೋತೆ

17 ಹಮೆ ಯೆರೂಸಲೇಮ್ ಆವಾದಿನ್ ವಿಶ್ವಾಸಿಖ್ವಾರು ಹಮೂನ ಖುಷಿಥಿ ಬುಲೈಲಿದಾ.

18 ಅಗಲ್ಯದನ್ನೆ ಪೌಲನೆ ಹಮುನಖ್ವಾರನ ಬುಲೈಲಿನ್ ಯಾಕೋಬನ ಮಳಾನ ಗಯ. ತದೆ ಸಬೇನು ಖ್ವಾರಾಸ್ ಗಲ್‌ಡಬಿ ಹಿಜ್ಲಾಸ್ ಥಾ.

19 ಪೌಲನೆ ಇವ್ಣುನ ಖ್ವಲಾಮ್‌ಕರೀನ್ ಇನಿ ಸೇವೆಥಿ ದೇವ್ಣೆ ಕರೈತೆ ಪೂರ ಕಾಮ್ನ ಯೆಹೂದ್ಯರ್‌ಕಾಹೆತೆ ಅದ್ಮಿಖ್ವಾರಾನ ಬೀಚ್ಚೆ ಯೊ ಬೋಲಿವತಾಳ್ಳೊ.

20 ಇವ್ಣೆ ಯೋಖ್ವಾರು ಖ್ವಮ್‌ಜಿನ್ ದೇವ್ಣೆ ಖ್ವರಾಯು. ತದೆ ಇವ್ಣೆ ಪೌಲನ, “ಬೈ ಹಜ್ಲಾರೊ ಅದ್ಮಿ ಯೆಹೂದ್ಯರ್‌ಖ್ವಾರು ವಿಶ್ವಾಸಿ ಹುಯಿರಲ್ತೆ ತೂ ದೇಖಾಸ್ಸಿ ಇವ್ಣೆಖ್ವಾರು ಧರ್ಮಶಾಸ್ತ್ರನ ದಿಲ್‌ಲಗಾಡವಾಳು ಹುಯಿರಲ್ತೆ.

21 ಯೆಹೂದ್ಯರ್‌ಕಾಹೆತೆ ಅದ್ಮಿನ ಬೀಚ್ಚೆ ರ್ಲವಾಳು ಖ್ವಾರಾಸ್ ಯೆಹೂದ್ಯರ್‌ನ, “ತುಮೆ ತುಮಾರ ಲಡ್ಕಖ್ವಾರನ ಖ್ವತ್ತ್ ನಾಕರಾವ್ಣು ಇವ್ಣು ಪದತ್ತಿನಿಘೋಣಿ ನಾಚಾಲಿಲೇವ್ಣು ಕರಿ ಮೋಶೆ ಧರ್ಮಶಾಸ್ತ್ರನಿ ಘೋಣಿ ನಾಚಾಲ್ತುಕರಿ ಬೋಲಾನು ಶಿಕಾಡುಕರಸ್ ಕರಿ ತಾರಿ ಬಾರೇಮ ಬೋಲುಕರಸ್.

22 ಅಮ್ ರ್ಲವಾನಪರ್ ಶಾತ್ ಕರಲ್ತೆ? ತೂ ಹಜ್ಜ ಅಯಿರಲ್ತೆತೆ ವಾತೆ ಇವ್ಣುನ ಕಿಮ್‌ತೋಬಿ ಮಾಲುಮ್ ಪಡ್‌ಶೆ.

23 ಇನಖ್ವಾಜಿ ಹಮೆ ತುನ ಬೋಲ್‌ಯೇತೆ ಕಾಮ್ ಕರ್, ಹಮಾರಮ ಶಪತ್ ಕರೈಹುಯು ಚಾರ್ ಅದ್ವಿಛಾ.

24 ತೂ ಇವ್ಣುನ ಬುಲೈಲಿ ಜೈನ್ ಇವ್ಣಿಜೋಡ್ ತುನಾಬಿ ಶುದ್ಧಿಕರೀನ್, ಇವ್ಣಿ ಇವ್ಣಿ ಮುಡಪ್ ಖ್ವತಮ್ ಕರಾನಖ್ವಾಜೇಥಿ ತೂ ಪೈಶಾ ಖರ್ಚಿಕರ್, ಅಮ್ ಕರೈತೊ ಖ್ವಾರುಞ್ಣುಬಿ ತಾರಿಬಾರೇಮ ಇವ್ಣಿ ಖ್ವಮ್‌ಜುತೆ ಖಬರ್ ಖ್ವಾಜು ಕಾಹೆಕರೀಬಿ, ತೂಬಿ ಮೋಶೇನು ಧರ್ಮಶಾಸ್ತ್ರ ಪಾಡೀನ್ ಚಾಲವಾಳೊಕರಿ ಮಾಲುಮ್ ಕರ್ಚೆ.

25 ಯೆಹೂದ್ಯರ್‌ಕಾಹೆತೆ ಅದ್ವಿಮ ಯೇಸುನ ವಿಶ್ವಾಸ್ ಕರವಾಳನಿ ಬಾರೇಮಾತೊ, ಮೂರತ್ನ ಝಾಳ್ ಉತಾರಹುಯನಾಬಿ, ಲೋಯಿನಾಬಿ, ನ್ವೇಟಿ ಭೀಚಿನ್ ಮಾರ್ಕುಹುಯ ಜಿನಾವರ್‌ನಬಿ ನಾಖಾವ್ಣು ಅಜು ವ್ಯಬಿಚಾರ್‌ಥಿ ದೂರ್ ರಕ್ಷೆವ್ಣುಕರಿ ಹಮೆ ನ್ಯಾವ್ ಕರೈತೆ ಲೀಖ್ ಕರಿ ಬೋಲ್ಯು.

26 ತದೆ ಪೌಲನೆ ಯೋ ಖ್ವಾರ ಅದ್ವಿನ ಅಗ್‌ಲ್ಯದನ್ನೆ ಬುಲೈಲಿನ್ ಇವ್ಣಿಜೋಡೆ ಇನು ಯೋ ಶುದ್ಧಿಕರೀನ್, ಮುಡಪ್‌ನ ದನ್ ಖ್ವತಮ್ ಹುಯಿಗುಕರಿ ಖ್ವಮ್‌ಜಾಡ್ತೊ ಹುಯಿನ್ ದೇವ್ವಿಮಂದಿರ್‌ಮ ಗೆಯೊ. ಹರೇಕನ್‌ಖ್ವಾಜಿ ಕದೆ ಬಲಿದೇವ್ಣುಕರಿ ಹಿಜ್ವಾ ಮಾಲುಮ್ ಕರಾಯೊ.

ಪೌಲನ ಸಬಾಮಂದಿರ್‌ಮ ಧರೈನ್ ಕೊಂಡಾಯೊತೆ

27 ಯೊ ಖ್ವಾತ್‌ದನ್ ಖ್ವತಮ್ ಹುವಾನಿ ವಖ್ವತ್‌ಮ ಏಷ್ಯಾ ತಬರ್‌ಖಾಥು ಆಯಿರೈದ್ವಾತೆ ಯೆಹೂದ್ಯರ್‌ನೆ ಪೌಲನ ದೇವ್ವಿಮಂದಿರ್‌ಮ ದೇಖಿನ್, ಝೂಂಡ್ ಭರೈರೈದ್ವಾತೆ ಅದ್ವಿಖ್ವಾರಾನ ಎಕ್ಸೋಸ್‌ಏಕ್ ಕರಿನ್ ಇನ ಧರೀನ್,

28 “ಇಸ್ರಾಯೇಲ್‌ನ ಅದ್ವಿವೊ, ಹಮೂನ ಮದತ್ ಕರೊ, ಅಪ್ಪ ಅದ್ವಿನಾಬಿ, ಧರ್ಮಶಾಸ್ತ್ರನಾಬಿ ಆ ಝುಗೋನಾಬಿ ವಿರೋದ್ ಹುಯಿನ್ ಖ್ವಾರಾಸ್ ಅದ್ವಿನ ಬೋಧನೆ ಕರಾವಾಳೊ ಯೋ ಅದ್ವಿ ಆಸ್! ಅತ್ರೇಸ್ ಕಾಹೆ, ಆ ಗ್ರೀಕ್‌ವಾಳಾನ ದೇವ್ವಿಮಂದಿರ್‌ಮ ಬುಲೈಲಾಯಿನ್ ಹೈರಿತೆ ಪವಿತ್ರಝುಗೋನ ಮೈಲು ಕರಿನಾಖ್ಯೊ.” ಕರಿ ಚಿಕ್‌ರೈ.

29 ಇವ್ವೆ ಪಹಿಲೆ ಖ್ವಿಯೇರಮ ಎಫೆಸವಾಳೊ ತ್ರೊಫಿಮಕರಿ ಏಕ್‌ಭಣೊ ಪೌಲನಿ ಜೋಡ್ನ್ ರ್ಲವಾನು ದೇಖ್ತುಧೂತೆ ಇನಖ್ವಾಜೆ ಪೌಲನೆ ಹಮ್ಮೆ ಇನ ದೇವ್ತಿಮಂದಿರಮ ಬುಲೈರಾಖ್ಯೊ ಉಷೆಕರಿ ಲ್ಹಾಜ್ಯೊ.

30 ತದೆ ಅಖ್ವೀಸ್ ಬಾಜು ಕಲಾವ್ಣಿ ಹುಯಿನ್ ಪೈಲೈಗಯು. ಅಜು ಅಖ್ವಾಸ್ ಖ್ವಿಯೇರಧು ನಾಶಿ ಐನ್ ಪೌಲನ ಧರಿಲೀನ್ ದೇವ್ತಿಮಂದಿರಮಾಧು ಭಾರ್ ಖೇಚಿಲಾಯಿನ್ ತದ್ತುತದೇಸ್ ಬಾಕಲ್ ಮೂಚಿನಾಖ್ಯು.

31 ಇವ್ವೆ ಇನ ಮಾರಿನಾಕ್ಲಕರಿ ಕೋಶಿಶ್ ಕರುಕರಾನಿ ವಖ್ತಾಮ ಯೆರೂಸಲೇಮ್ಮ ಖ್ವಾರಿಸ್ ಬಾಜು ಗಲಿಬಿಲಿ ಹುಯುಕರಿ ಹಿಜ್ಜಾಧೂತೆ ರೋಮ್ಮ ಹಜಾರ್ ಶಿಪಾಯಿನ ಮೋಟಾನ ಖಬರ್ ಆಯಿ.

32 ಇನೆ ತದ್ತುತದೇಸ್ ದಂಡುಡಳವೈನ ಲೀನ್ ಅದ್ವಿನ ಝೂಂಡ್‌ಕನ ನಾಶಿಆಯೊ. ಇವ್ವೆ ಖ್ವೋಶಿಪಾಯಿನೊ ಮೋಟಾನ ಅಜು ಶಿಪಾಯಿಖ್ವಾರಾನ ದೇಖಿನ್ ಪೌಲನ ಮಾರಾನು ಭೀರಾಖ್ಯು.

33 ಶಿಪಾಯಿನೊ ಮೋಟೊ ಖನ್ನೆ ಐನ್ ಇನ ಧರೀನ್ ಬೇ ಖ್ವಿಂಕ್‌ಳಿಧಿ ಭಾಂಡ್‌ಣುಕರಿ ಹುಕುಮ್ ದೀನ್; ಇವ್ವುನ ಬೋಲ್ಯೊ ಆ ಕೋಣ್, ಅನೆ ಶಾತ್‌ಕರ್ರೊ? ಕರಿ ಪುಲಾಯೊ.

34 ತದೆ ಝೂಂಡ್‌ಮಧೂತೆ ಥೋಡುಜಣು ಏಕ್‌ಥರ ಬಿಜು ಥೋಡುಜಣು ಬಿಜೇಕ್‌ತರ ಚಿಕ್ರುಕರ್ತುಧು. ಯೋ ಗಲಾಟ್‌ಧಿ ಖ್ವಾಳುಶಾತ್ ಕರಿ ಹಜಾರ್ ಶಿಪಾಯಿನ ಮೋಟಾನ ಖ್ವಿಮ್‌ಜಾನ ಕೋ ಹುಯುನಿ ಇನಖ್ವಾಜೆ ಪೌಲನ ಖ್ವಾರ್‌ಕೊಟ್‌ಮ ಲೀನ್ ಜಾವಾನ ಹುಕುಮ್ ದಿದೊ.

35 ಪೌಲ ಪಾಯಿರಿಯೇಕನ ಆವಾದಿನ್ ಅದ್ವಿಖ್ವಾರಾನಿ ಧಕ್ಕಾಮುಕ್ಕಿಧಿ ಶಿಪಾಯಿಖ್ವಾರನೆ ಇನ ಥೊಯಿಲೀನ್ ಜಾವಾನು ಪಡ್ತುಧು. ಶನಕತೊ ಹಿಜ್ಜಾನು ಅದ್ವಿನು ಝೂಂಡ್ ಜಾಖ್ತ್ ಚಂಡಾಳ್‌ವಾಳು ಹುಯಿರ್ದುಧು.

36 ಇನಖ್ವಾಜೆ ಧಕೇಲೆತು ವಳ್ಳಾವ್‌ತುಧೂತೆ ಅದ್ವಿನು ಝೂಂಡ್, ಇನ ಮಾರಿನಾಖೊಕರಿ ಚಿಕ್ರುಕರ್ತುಧು.

ಪೌಲ ಇನುಯೋಸ್ ಭರೋಖ್ವೊ ಹುಯಿರ ಲ್ಲೊಥೊ

37 ಶಿಪಾಯಿಖ್ವಾರು ಪೌಲನ ಖ್ವಾರ್ಕೊಟ್‌ಮ ಲೀಜಾವನಿ ವಖ್ವತ್‌ಮ ಇನ ಶಿಪಾಯಿನೊ ಮೋಟಾನ, “ಮೇ ತಾರಿ ಜೋಡೆ ದರ್ರಾಶಿ ವಾತೆ ಬೋಲಾನ ಹುಕುಮ್ ಮಳ್‌ಶೇಕಿ ಶು?” ಕರಿ ಪುಲ್ಲಾವದೀನ್ ಇನೆ ತುನ ಗ್ರೀಕ್‌ವಾತೆ ಆವಸ್ಕಿ ಶು?

38 ಇಮ್‌ಕತೊ ಥೋಡದನ್ನಪಾರ್ ಲಡೈಲುತಾಡೀನ್ ಚಾರ್ ಹಚಾರ್ ಡಾಕುನ ಜಂಗಳ್‌ಮ ಬುಲೈಲಿನ್ ಗಯೋತೆ ಈಜಿಪ್ಟ್‌ವಾಳೊ ತೂಸ್ ಕಾಹೆಕಿ ಶು? ಕರಿ ಬೋಲೈಯೊ.

39 ಇನ ಪೌಲನೆ, “ಮೆ ಏಕ್ ಯೆಹೂದ್ಯವಾಳೊ ಅಜು ಕಿಲಿಕ್ಯ ತಬಾರ್‌ಖಾನು ತಾರ್‌ಕರಿ ಪ್ರಸಿದ್ವಿನು ಹುಯಿರ ಲ್ಲತೆ ಖ್ವಯೇರ್‌ವಾಳೊ, ಗೋರ್‌ಕರೀನ್ ಆ ಅದ್ಮಿನಿ ಜೋಡೆ ವಾತೆಬೋಲಾನ ಮನ ಹುಕುಮ್ ದೆ” ಕರಿ ಬೋಲೈಯೊ.

40 ಸಿಪಾಯ್‌ಮೋಟಾನೆ ಹುಕುಮ್ ದ್ಯಾವದೀನ್ ಪೌಲನೆ, ಪಾಯಿರಿಪರ್ ಭೀರಿನ್, ಅದ್ಮಿನರ್ದುಂಡನ್ ಖ್ವೊಪೊರ ಲ್ಲೆವೊಕರಿ ಹಾತ್‌ನೊ ಇಷಾರ್ಕೊ ದಿದೊ. ಇವ್ಣೆ ಜರ ಖ್ವೊಪ್‌ಪಡಾದೀನ್ ಇವ್ಣುನ ಇನೆ ಇಬ್ರಿಯ ವಾತೆಮ ಬೋಲಾನ ಶುರುಕರ ಲ್ಲೊ.

22

1 “ಮಾರ ಬಾವೊ, ಯಹೂದಿ ದೋಸ್ತಿವೊ, ಮೇ ಹಮ್ಮೆ ತುಮೂನ ದೆವುಸ್ತೆ ಫೇಡ್ ಖ್ವಮ್‌ಜೊ ಕರಿ ಚಿಕ್ರಿ ಬೋಲೈಯೊ.

2 ಇವ್ಣೆಜೋಡೆ ಇಬ್ರಿಯ ಬೋಲಿಮ ವಾತೆ ಬೋಲಾನು ಖ್ವಮ್‌ಜಿನ್ ಇವ್ಣೆ ಬಿಜೂಬಿ ಖ್ವೊಪೊ ಪಡಿಗು. ತದೆ ಇನೆ ಶಾತ್ ಬೋಲೈಯೊ;

3 ಮೇ ಕಿಲಿಕ್ಯಾನು ತಾರ್ ಖ್ವಯೇರ್‌ಮ ಪೈದಹುಯೊತೆ ಯೆಹೂದ್ಯವಾಳೊ. ಕತೋಬಿ ಆಸ್ ಖ್ವಯೇರ್‌ಮ ಪಳೈಹುಯೊ. ಯೆರೂಸಲೇಮ್ಮ ಮೇ ಗಮಲಿಯೇಲನೊ ಶಿಷ್ಯಹುಯಿನ್, ಹಮಾರ ಗುರುಗುರಬ್‌ಲ್ಯನು ಧರ್ಮಶಾಸ್ತ್ರನು ಖ್ವಾರೊಸ್ ಶಿಕಿರಾಖ್ವೊಸ್; ಹಮ್ಮೆ ತುಮೆಖ್ವಾರು ಛಾತೆ ತಿಮ್ಮಸ್ ಮೇಬಿ ದೇವ್‌ನೊ ದಿಲ್‌ಲಾಗ್ಗೊತೆ ಹುಯಿರ ಲ್ಲೊಥೊ.

4 ಆ ಮಾರಗ್‌ಪರ್ ಚಾಲವಾಳಾನ ಖ್ವಿತಾವ್‌ತೊಹುಯಿನ್ ತಯೇಡ ಪರ್ಖ್ವಾ ಖೇಚಿಲಾಯಿನ್ ಜೇಲ್‌ಮ ಧಕೆಲಿನ್ ಇವ್ಣನ್ ಮರ್‌ನಾಖನಾಬಿ ಕಚ್ ಖಾದೊಕೊಯ್ನಿ.

5 ಅನಿಬಾರೇಮ ಗಲ್‌ಡಯಾಜಕ್‌ಬಿ ಮೋಟಿಸಭೆವಾಳು ಖ್ವಾರು ಸಾಕ್ಷಿ ಹುಯಿರಲ್ಲ್ಹನ್. ಇವ್ಣೇಥಿಸ್ ದಮಸ್ಕಮ ಥೂತೆ ಯಹೂದಿ ದೋಸ್ತಿನ ದೈವಾನಖ್ವಾಜೆ ಅವ್ಣಕನ ಥೂತೆ ಚಿಟ್ಟಿನ ಮಾಂಗಿಲೀನ್ ಇವ್ಣನ್ ಬೇಡಿ ಫಾಲಿನ್ ಖ್ವಿತಾವನ ಯೆರೂಸಲೇಮ್ಮ ಖೇಚಿಲಿ ಆವಾನ ದಮಸ್ಕಮ ಮೇ ವಳ್ಳೊಜಾತೋಥೊ.

ಪಾಲನೆ ಇನು ಮನ್ ಫರಾವನಿ ಬಾರೇಮ ಬೋಲ್ಯೋತೆ
(ಅಪೊ 9:1-19; 26:12-18)

6 ಖ್ವಿಮಾರ್ ಭಾರಘಂಟಾನಿ ವಖ್ವಿತ್‌ಮ ಮೇ ದಮಸ್ಕನ ಖನ್ನೆ ಜೈರಲ್ಲ್ಹಧು. ತದೆ ಅಪ್‌ಗುಪ್‌ಥೀಸ್ ಆಕಾಶ್‌ಮಾಥು ಏಕ್ ಉಜಾಳು ಮಾರ ಅಶ್‌ಪಿಶ್ ಉಜಾಖ್ವಿಧಿ ಝಮ್‌ಕ್ಯು.

7 ಮೇ ಜಮೀನ್‌ಪರ್ ರಡ್ಕಿಗಯೊ. ತದೆ 'ಸೌಲ' ಸೌಲ, ಮನ ಶನ ಖ್ವಿತಾವಸ್? ಕರಿ ಮನ ಬೋಲ್ಯುತೆ ಏಕ್ ಆವಾಜ್‌ನ ಖ್ವಿಮ್‌ಜ್ಯೊ.

8 ಇನ ಮೇ, 'ಪ್ರಭು ತೂ ಕೋಣ್?' ಕರಿ ಪುಲ್ಲಾವದೀನ್, 'ತೂ ಖ್ವಿತ್‌ವಾಕರಸ್ತೆ ನಜರೇತ್‌ನೊ ಯೇಸುಸ್ ಮೇ' ಕರಿ ಇನೆ ಮನ ಬೋಲ್ಯೊ.

9 ಮಾರಿ ಜೋಡೆ ರ್ಲ್ವಾಳು ಉಜಾಳಾನ ದೇಖ್ಪುಪಣ್ಣಿ ಮಾರಿ ಜೋಡೆ ವಾತೆಬೋಲ್ಯುತೆ ಯೋ ಅವಾಜ್ ಖ್ವಿಮ್‌ಜ್ಯುಕೊಯ್ನಿ.

10 ತದೆ ಮೆ 'ಪ್ರಭು ಮೇ ಶಾತ್‌ಕರ್ನು?' ಕರಿ ಪುಲ್ಲಾಯೊ. ತದೆ ಪ್ರಭುನೆ, ತೂ ಉರೀನ್' ದಮಸ್ಕಮ ಜಾ, ತೂ ಶಾತ್ ಶಾತ್ ಕರ್ನುಕಿ ಯೋ ಖ್ವಾರು ತುನ ಹಿಜ್ವಾ ಮಾಲುಮ್ ಪಡ್‌ಶೆ; ಕರಿ ಬೋಲ್ಯೊ.

11 ಯೋ ಉಜಾಳಾನಿ ಮಹಿಮೆಥಿ ಮಾರ ಡೋಳ ಕಾಣಹುಯಿಗಾತೆ ಇನಖ್ವಾಜೆ ಮಾರಿಜೋಡೆ ರ್ಲ್ವಾಳುಖ್ವಾರು, ಮಾರೊ ಹಾತ್‌ಧರೀನ್ ದಮಸ್ಕಮ ಬುಲೈಲಿನ್ ಗಯು.

12 ಹಿಜ್ಜಾ ಧರ್ಮಶಾಸ್ತ್ರನಿ ಬಾರೇಮ ಬರೋಬರ್ ಭಾಲಿಲ್ಯವಾಳೊ ದೇವ್‌ನೊ ಭಕ್ತಾಬಿ ಯೋ ಝಗೋನು ಯೆಹೂದ್ಯರ್ ಖ್ವಾರಾಥಿ ಅಲ್ಲೊಕ್ಕರಿ ನಾಮ್ ಕಮಾಯೊಹುಯೊ ಅನನೀಯಕರಿ ಏಕ್‌ಞ್ಣೊ ಮಾರಕನ ಆಯಿ ಭೀರಿನ್,

13 ಇನೆ, 'ಮಾರೊ ಭೈ ಸೌಲ, ತುನ ಡೋಳ ದೆಖವಾದೆ' ಕರಿ ಬೋಲ್ಯೊ ತದಾನು ತದೇಸ್ ಮನ ಡೋಳಾನಿ ಜೋತ್ ಆಯಿನ್ ಮನ ದೇಖವಲಗ್ಸು ಮೇ ಇನ ದೇಖ್ಲೊ.

14 ತದೆ ಅನನೀಯನೆ, 'ತುಮಾರೊ ಗುರುಖ್ವಾರಾನೊ ದೇವ್ ಘಣ ದನ್ನ ಪಾರಸ್ ತುನ ಚೂಣಿಲಿದೊ. ತೂ ದೇವ್ನಿ ಖ್ವಯಾಲ್ನ ಮಾಲುಮ್ ಕರಿಲ್ಯವಾನಾಬಿ ನೀತಿವಾಳೊಸೇವಕ್ ದೇಕ್ಚುಕರಿಬೀ, ಯೊ ಇನಿ ಶೊಂತ್ ಅವಾಜ್‌ನಿ ವಾತೆನ ಖ್ವಮಜ್‌ಣುಕರಿ ದೇವ್ ತುನ ನೇಮ್‌ಶಾಯೋತೆ.

15 ತೂ ದೇಖಿನ್, ಖ್ವಮ್‌ಜ್ಯೊತೆ ಬಾರೇಮ ಖ್ವಾರಾಸ್ ಅದ್ವಿನ ಖ್ವಮ್ಚೆ ಇನಿ ಸಾಕ್ಷಿ ಬೋಲ್‌ನು.

16 ತೂ ಹಮ್ಚೆ ಶನ ಖ್ವೊಪ್‌ರ್ದೇಸ್ ಉಟ್? ಪ್ರಭುನ ನಾಮ್ ಬೋಲವಾಳೊಹುಯಿನ್, ಬ್ಯಾಪ್ಟಿಸ್ಮ್ ಕರೈಲೀನ್ ತಾರ ಪಾಪ್ ದ್ವೋಯಿಲೆ ಅಜು ತು ಇನಖ್ವಾಜೆ ಪ್ರಾರ್ಥನೆ ಕರ್ ಕರಿ ಬೋಲ್ಯೊ.

ಯೆಹೂದ್ಯರ್ ಕಾಹೆತೆ ಅದ್ವಿನ ಇಚ್ಛೆಮ ಉಪದೇಶ್ ಕರಾನ ಪಾಲಾನಿ ಬುಲಾವ್ಣಿ

17 ಮೇ ಯೆರೂಸಲೇಮ್ ಪಾಟ್ಲೊ ಫರೀನ್ ಐನ್ ದೇವ್ನಿ ಮಂದಿರ್‌ಮ ಪ್ರಾರ್ಥನೆ ಕರುಕರಾನಿ ವಖ್ವತ್‌ಮ ಮೆ ಏಕ್ ದರ್ಶನ್ ದೇಖ್ಲೊ.

18 ಮೇ ಪ್ರಭುನ ದೇಖ್ಲೊ ಇನೆ ಮನ, "ಒಗ್ಗಿ ಯೆರೂಸಲೇಮ್‌ಥು ನಿಕಳ್ ಮಾರಿ ಬಾರೇಮ ತೂ ಬೋಲಾನಿ ಸಾಕ್ಷಿನ ಆ ಖ್ವಾರು ಅದ್ವಿ ಮಾನಿಲೇಯಿ ಕೊಯ್ನಿ" ಕರಿ ಬೋಲ್ಯೊ.

19 ಇನ ಮೇ, 'ಪ್ರಭು, ಮೇ ಅಖ್ವಾಸ್ ಸಬೆನಿ ಝಗೋಮ ತಾರಾಮ ವಿಶ್ವಾಸ್ ರಾಖ್ತುಹುಯ ಅದ್ವಿಖ್ವಾರಾನ ಮೆ ಜೇಲ್‌ಮ ಧಕೆಲಿನ್ ಮರಾಯೊಹುಯೊ ಮೇಸ್ ಕರಿ,

20 ಅಜ್ಜು ತಾರಿ ಸಾಕ್ಷಿ ಹುಯಿರೋತೆ ಸ್ತೆಫನನು ಲೋಯಿ ರಂಞಾವನಿ ವಖ್ವೊತೆ, ಮೇಬಿ ಇನ ಮಾನಿನ್ ಇನ ಮಾರವಾಳಾನು ಝಗ್ಗಾಕನ ಟಿವೈನ್ ಭೀಯೊಥೋನಿ, ಕರಿ ಇವ್ವೆ ಮಾಲುಮ್ ಕರಿರಾವಿವಳು ಹುಯಿರುಸ್.

21 ತದೆ ಪ್ರಭುನೆ; ಜಾ ಮೇ ತುನ ದೂರ್ ಯೆಹೂದ್ಯರ್‌ಕಾಹೆತೆ ಅದ್ವಿನ ತಬರ್‌ಖಾಮ ಮೋಕ್ಲಸ್ ಕರಿ ಮನ ಬೋಲ್ಯೊ.”

22 ಆ ವಾತ್ ಬೋಲಲಗು ಅದ್ವಿಖ್ವಾರು ಪೌಲನಿ ವಾತ್ತ್ ಕಾನ್‌ಲಾಗಾಡಿ ಖ್ವಮ್‌ಜ್ಜು; ಅನಪಾರ್ ಇವ್ವೆ “ಅಥ್ರಾನವಾಳಾನ ಝಮೀನ್‌ಪರ್ಫ ಕಾಡಿನಾಕ್; ಆ ಬಚಾವನ ಲ್ಹಾಯೇಕ್ ಕೊಯ್ನಿ” ಕರಿ ಚಿಕ್ರಿ ಬೋಲ್ಯು.

23 ಇವ್ವೆ ಚಿಕ್ರಾಣ್ ಮ್ವೇಲ್‌ತು, ಇವ್ವು ಲುಂಗ್ಡಾನ ಘಾಡಿಲೇತು ಹುಯಿನ್, ಮಾಟಿ ಉಡಾವ್ತು ರ್ಹಯ್ತು.

24 ತದೆ ರೋಮ್‌ನೊ ಸೇನಾಧಿಪತಿನೆ ಪೌಲನ ಕೋಟೆನ ಮ್ವೇಲಿಭಾವ್ವುಕರಿ ಹುಕುಮ್ ದೀನ್, ಅದ್ವಿಖ್ವಾರು ಅಮ್ ಪೌಲನಿ ವಿರೋದ್ ಚಿಕ್ರಾಣ್ ಮ್ವೇಲುಕರಾಸ್ತೆ ಕಾರಣ್ ಶಾತ್ ಕರಿ ಪುಚ್ಚಾವ್ವುಕರಿ ಸೆನಾಧಿಪತಿನು ಆಖ್ವೊ ಹುಯಿರ್ದೀಥಿ.

25 ಇವ್ವೆ ಪೌಲನ ಡುಗೈನ್ ಭಾಂದಿನ್ ಮಾರಾನಿ ವಖ್ವೊತೆ ಇನ ಖನ್ನೆ ಭಿಯುಥೂತೆ ಖ್ವೊಶಿಪಾಯಿನ ಮೋಟಾನ, “ರೋಮ್ ಪ್ರಜೆ ಹುಯಿರ್ದವಾಳ ಅದ್ವಿನ ಅಪರಾದಿ ಕರಿನ್ ತೀರ್ಪ್ ಹುವಾನ ಅಗಾಡಿಸ್ ಕೋಲ್ಡಿಖ್ವೊ ಮಾರ್ವ್ತಾನು ನ್ಯಾವ್‌ಕಿ ಶು?” ಕರಿ ಪುಲ್ಲಾಯೊ.

26 ಯೋ ಖ್ವೊಶಿಪಾಯಿನ ಮೋಟಾನೆ ಅನ ಖ್ವಮ್‌ಜಿನ್ ತದ್‌ನು ತದೇಸ್ ಸೈನಾಧಿಪತಿಕನ ಜೈನ್ “ತೂ ಶಾತ್ ಕರುಕರಸ್ ಕರಿ ತುನ ಮಾಲುಮ್‌ಕಿ ಶು? ಆ ಅದ್ವಿ ರೋಮ್‌ನೊ ಪ್ರಜೆ!” ಕರಿ ಬೋಲ್ಯೊ.

27 ತದೆ ಸೇನಾಧಿಪತಿ ಪೌಲಕನ ಏನ್, “ಬೋಲ್ ತು ರೋಮ್‌ನೊ ಪ್ರಜೆಕಿಶು?” ಕರಿ ಪುಲ್ಲಾವಮ, ಪೌಲನೆ “ಓಹೊ” ಕರಿ ಝವಾಬ್ ದಿದೊ.

28 ತದೆ ಸೇನಾಧಿಪತಿನೆ, “ಮೇ ರೋಮ್‌ನು ಪ್ರಜೆ ಹುವಾನ ಘಣು ಪೈಶಾದಿದೊ” ಕರಿ ಬೋಲ್ಯೊ. ಕತೋಬಿ ಇನ ಪೌಲನೆ, “ಮೇ ಪೈದಾಖ್ವೊಡೋಸ್ ರೋಮ್‌ನು ಪ್ರಜೆ” ಕರಿ ಬೋಲ್ಯೊ.

29 ಪೌಲನ ಪುಲ್ಲಾವ್ವು ಕರಿ ಆಯುಹುಯು ಖ್ವಾರುಝಣು

ತದ್‌ನು ತದೇಸ್ ಇನಕಂಥು ಚಲಿಗಯು. ಅತ್ರೇಸ್ ಕಾಹೆತೆ ಸೇನಾಧಿಪತಿನೆ ಪೌಲ ರೋಮ್‌ನು ಪ್ರಜೆಕರಿ ಮಾಲುಮ್ ಕರಿಲೀನ್, ಇನ ಭಂದೈರಾಖೊಥೋತೆ ಇನಖ್ವಾಜೆ ಡರಕ್ಯೊ.

ನ್ಯಾವ್‌ನಿ ಸಬೆನ ಖ್ವಾಮ್ಜೆ ಪೌಲ

30 ಪೌಲನ ಉಪ್ಪರ್ ಯೆಹೂದ್ಯರ್ ಖ್ವಾರು ಶನ ಅಪರಾದ್ ನಾಖುಕರಸ್ ಕರಿ ಮಾಲುಮ್ ಕರಿಲ್ಯಾವಾನಖ್ವಾಜೆ ಸೇನಾಧಿಪತಿನೆ ತೀರ್ಮಾನ್ ಕರೀನ್, ಇನಖ್ವಾಜೆ ಪೌಲನ ಬೇಡಿನ ಫೋಡೀನ್ ಮಹಾಯಾಜಕಬಿ ನ್ಯಾವ್‌ಸಬೆವಾಳು ಖ್ವಾರುಸ್ ಭರಾವ್ತುಕರಿ ಹುಕುಮ್ ದೀನ್, ಪೌಲನ ಬುಲೈಲೀಜೈನ್ ಇವ್ವಖ್ವಾಜೆ ಭೀರಾಖೊ.

23

1 ತದೆ ಪೌಲನೆ ಯೆಹೂದ್ಯರ್‌ನ ನ್ಯಾವ್‌ಸಭೆನ ರರ್‌ಕಿ ದೇಖಿನ್, “ಭೈಯೇವೊ, ಮೆ ಹಮ್ಮೆಲಗು ಅಲ್ಫಿ ದಿಲ್ಲಿಸಾಕ್ಷಿಧಿ ದೇವ್‌ಖ್ವಾಮ್ಜೆ ಚಾಲಿರಕ್ಯೊಸ್” ಕರಿ ಬೋಲ್ಯೊ.

2 ಇನಖ್ವಾಜೆ ಮಹಾಯಾಜಕ ಹುಯಿರೋತೆ ಅನಾನೀಯನೆ; ಪೌಲಕನ ಭಿಯಹುಯಖ್ವಾರಾನ ಇನ ಮ್ಹೋಡಾಪರ್ ಮಾರೊ ಕರಿ ಬೋಲ್ಯೊ.

3 ತದೆ ಪೌಲನೆ ಇನ ಅಮ್ ಬೋಲ್ಯೊ, “ದೇವ್ ತುನಾಬಿ ಮಾರ್‌ಶೆ. ಛುನ್ನೊ ಲಗಾಡಿಹುಯು ಭೀತಸ್ ತು. ಶನಕತೊ ಮೋಶೆನ ಧರ್ಮಶಾಸ್ತ್ರನಿಫೊಣಿ ನ್ಯಾವ್‌ಕರಾನ ಹಿಚ್ಚಾ ಬೇಶಿನ್, ಮನ ಮಾರ್‌ವಾನ ಇವ್ವುನ ಬೋಲುಕರಸ್ ಕಿಶು? ಆ ಧರ್ಮಶಾಸ್ತ್ರನವಿರುದ್ ಹುಯಿರಕ್ಯೊಸ್” ಕರಿ ಬೋಲ್ಯೊ.

4 ತದೆ ಪೌಲನ ಖನ್ನೆ ಭಿಯಹುಯಾನೆ, “ದೇವ್ ಮಹಾಯಾಜಕನ ಅಮ್ಮಿಪರಕ್ ವಾತ್ ನಾ ಬೋಲ್‌ನು. ತೂ ಇನ ಖ್ವರಮ್ ಕಾಡುಕರಸ್” ಕರಿ ಬೋಲ್ಯೊ.

5 ಪೌಲನೆ, “ಭೈಯೇವೊ, ಆ ಅದ್ಮಿ ಮಹಾಯಾಜಕ ಕರಿ ಮನ ಮಾಲುಮ್ ಕೋಡುನಿ. ಶನಕತೊ ಅದ್ಮಿಖ್ವಾರಾನೊ ಅದಿಪತಿನಿ

ಬಾರೇಮ ಖರಾಬ್ ವಾತ್ ನಾ ಬೋಲನು ಕರಿ ಧರ್ಮಶಾಸ್ತ್ರ ಲೀಖ್ತಿರುಸ್” ಕರಿ ಬೋಲ್ಯೊ.

6 ಸಭೆಮ ಧೂತೆ ಅದ್ಮಿಮ, ಥೋಡು ಸದ್ಗುಕಾಯವಾಳು, ಅಜ್ಜು ಥೋಡು ಫರಿಸಾಯರ್‌ವಾಳನ ದೇಖಿನ್ ಪೌಲನೆ, “ಮಾರ ಬೈಯೇವೊ, ಮೇ ಫರಿಸಾಯರ್‌ವಾಳೊ ಮಾರೊ ಬಾಬಿ ಪರಿಸಾಯ ಹುಯಿರನ್ನೊಡೊ ಮಾರವಾಳು ಪಾಲ್ತುಜಿವ್ತು ಉಪೇಕರಿ ಕರಿ ಮೆ ವಿಶ್ವಾಸ್ ಕರೀನ್ ಹಜ್ಜ ನ್ಯಾವ್‌ನ ವಿಚಾರಣೆಮ ಪಡ್ವೊಸ್” ಕರಿ ಚಿಕ್ರಿನ್ ಬೋಲ್ಯೊ.

7 ಪೌಲ ಅಮ್ ಬೋಲಾಮ, ಫರಿಸಾಯರ್‌ಮಾಬಿ, ಸದ್ಗುಕಾಯವಾಳಾಮ ಘಣಿ ಅಬ್ಬಾಜಬ್ಬಿ ವಾತೆ ಹುಯಿನ್ ಇವ್ವಾಮಸ್ ಲಡೈಹುಯಿನ್ ಸಭೆ ಫುಟ್‌ವಾನಿ ಮತ್ ಹುಯು.

8 ಶನಕತೊ ಮರೈಹುಯು, ಪಾಲ್ತು ಜಿವ್ತುಹುವಾನು ರ್ವವೊ, ದೇವ್‌ದೂತ ರ್ವವೊ, ಶರೀರ್‌ಕೊಂತೆ ಆತ್ಮರ್ದಿವೊ ಕೊಯ್ತಿಕರಿ, ಸದ್ಗುಕಾಯವಾಳು ಬೋಲಸ್. ಕತೋಬಿ ಆ ಭೇಬಿ ಛಾಕರಿ ಫರಿಸಾಯರ್ ಮಾನಿಲೇಸ್.

9 ತದೆ ಯೋ ಯೆಹೂದ್ಯರಮ ಘಣಿ ಗಲಾಟ್ ಹುಯು ಫರಿಸಾಯರ್‌ನ ಝೂಂಡ್‌ನು ಥೋಡು ಧರ್ಮ ಬೋಧನೆ ಕರವಾಳು ಉರಿಭೀರಿನ್, “ಆ ಅದ್ಮಿಮ ಶನೀಬಿ ಅಪರಾದ್ ದೇಖವ್‌ಕರಕೊಯ್ತು. ದಮಸ್ಕನ ಜ್ಞಾವಾನಿ ವಾಟ್‌ಮ ದೇವ್‌ದೂತರ್‌ಕೀ, ಆತ್ಮಾಕಿ, ಇನಜೋಡೆ ವಾತ್‌ಬೋಲಿರಾಕ್ಪು ಕರಿ ಅಬ್ಬಾಜಬ್ಬಿ ವಾತೆ ಭಾಲಿ.

10 ಆ ಹೊಜ್ಜತ್ ಘಣಿ ಹುಯಿನ್, ಅದ್ಮಿನು ಝೂಂಡ್ ಪೌಲನ ಖೇಚತಾಣಿ ಕರೀನ್ ಫಾಡಿ ಟುಕ್‌ಡ ಟುಕ್‌ಡಾ ಕರಿನಾಕ್ಷೆಕರಿ ಡರ್‌ಥಿ ಸೇನಾಧಿಪತಿನೆ ಶಿಪಾಯಿಖ್ವಾರಾನ ತುಮೆ ಹೇಟ್ ಉತ್ರಿಜೈನ್ ಪೌಲನ ಜುಲಮ್‌ಧಿ ಇವ್ವಕಂಥು ಫೋಡೈನ್ ಕೋಟೆಮ ಲ್ಯಾವ್ವುಕರಿ ಹುಕುಮ್ ದಿದೊ.

11 ಯೋ ದನ್ನಿ ರಾತ್ಮಪ್ರಭು ಪೌಲಕನ ಭೀರಿನ್, “ಭಾಲಿಧಿ ರ್ವಿ; ತೂ ಯೆರೂಸಲೇಮ್ ಮಾರಿಬಾರೇಮ ಬೋಲ್ಯೊತೆ ಇಮ್ಮಸ್ ರೋಮ್‌ನ ಅದ್ಮಿನಾಬಿ ಸಾಕ್ಷಿ ಬೋಲ್ತುಕರಿ ಬೋಲ್ಯೊ.

ಪೌಲನಿ ವಿರೋದ್ ಯೆಹೂದ್ಯರಾನಿ ಮಶ್ಲತ್

12 ಇನವ್ವಾಣೆ ಥೋಡು ಯೆಹೂದ್ಯರಾಖ್ವಾರು ಎಕಾಡಿ ಐನ್ ಎಕ್ಚುಹುಯು ಅಜು ಮಹಿ ಮಹಿಸ್ ಮಶ್ಲತ್ ಭಂದೈನ್ ಹಮೆ ಪೌಲನ ಮರಾಲಗು ಖಾಣುಪಾಣಿ ಥಿಮ್‌ಶುಕೊಯ್ನಿ. ಕರಿ ಆಣ್‌ಲಿದು.

13 ಅಮ್ ಕರನ್ಯಾಹುಯಾಮ ಚಾಳಿಖ್ವಾಣೇಧಿ ಜಾಖ್ವತ್ ಥು.

14 ಅವ್ಣೆ ಗಲ್‌ಥಯಾಜಕರ್‌ನ ಬಿಜು ಗಲ್‌ಥಖ್ವಾರಾಕನ ಜೈನ್, “ಪೌಲನ ಖೂನ್ ಕರಾಲಗು ಹಮೆ ಮ್ಹೋಡಾಮ ಶಾಪ್ಪಿ ಫಾಲ್‌ಶುಕೊಯ್ನಿಕರಿ ಕರಣ್‌ಧಿ ಆಣ್ ಲೀರಾಖ್ವಾಸ್ ಕರಿ ಬೋಲ್ಯು.

15 “ಇನಖ್ವಾಜೆ ಹಮ್ಕೆ ತುಮೆ ಶಾತ್‌ಕರನ್ವಕತೊ, ನ್ಯಾವ್‌ನು ಸಭೆವಾಳಾನಿಬೋಡ್ ರೋಮ್ವೊಸಿಪಾಯ್ವೊ ಮೋಟಾಕನ ಜೈನ್, ಪೌಲನಿ ಬಾರೇಮ ಬಿಜೂಬಿ ಜಾಖ್ವತ್ ತರೀಪ್‌ಶ ಕರ್ನುಕರಿ ಭಾಣುಬೋಲಿನ್ ಇನ ಹಮಾರಕನ ಬುಲೈಲಿನ್ ಆವ್ವುಕರಿ ಸೇನಾಪತಿನ ಖ್ವಮ್‌ಜಾಡ್ ತದೆ ಪೌಲ ಹಜ್ಜ ಆವ್‌ತೊಸ್ ಜಾವ್ವು ಹಮೆ ವಾಟ್‌ಪರ್ ಟಿವೈರ್ಟ್ವಿನ್, ಇನ ಮಾರಿನಾಖೇಸ್” ಕರಿ ಬೋಲ್ಯು.

16 ಕತೋಬಿ ಅವ್ಣಿ ಮಶ್ಲತ್ ಪೌಲನ ಭೇನ್ನಫಿಯ್ಯಾನ ಮಾಲುಮ್ ಪಡ್ವು ಇನೆ ಶಿಪಾಯ್ವು ಕೋಟೆನ ಮಹಿಜೈನ್ ಪೌಲನ ಖ್ವಮ್‌ಜಾಡ್ವೊ.

17 ತದೆ ಪೌಲನೆ ಏಕ್ ಖ್ವೊಶಿಪಾಯಿನ ಮೋಟಾನ ಬುಲೈನ್, “ಆ ಜವಾನಿ ಫೋಕ್ರಾನ ಸೇನಾಧಿಪತಿಕನ ಬುಲೈಲಿನ್ ಜಾ. ಯೋ ಇನ ಖ್ವಮ್‌ಜಾಡಾನಿ ಏಕ್ ವಾತ್ ಛಾ” ಕರಿ ಬೋಲ್ಯೊ.

18 ಇಮ್ವಾಸ್ ಯೋ ಅಧಿಕಾರಿನ ಪೌಲನ ಭಾಣ್‌ಜ್ಯಾನ ಸೇನಾಧಿಪತಿಕನ ಬುಲೈಲಿನ್ ಗಯೊ. ಇನೆ ಸೇನಾಧಿಪತಿನ ಅಮ್‌ಬೋಲ್ಯೊ, “ಯೋ ಕೋಂಡೈರ್ಟ್ವೊತೆ ಪೌಲನೆ ಮನ ಬುಲೈನ್, ಆ ಫೋಕ್ರಾನ ಸೇನಾಧಿಪತಿಕನ ಲೀನ್‌ಜಾತಿ, ಇನ ಏಕ್ ವಾತ್‌ಬೋಲ್ವುಕರಿ ಛಾ” ಕರಿ ಬೋಲ್ಯೊ.

19 ಸೇನಾಧಿಪತಿನೆ ಯೋ ಜವಾನಿ ಫೋಕ್ರಾನ ಹಾತ್‌ಧರೀನ್ ಏಕ್ಲನಾಸ್ ಎಕಾಡಿ ಬುಲೈಲೀಜೈನ್, “ತೂ ಶಾತ್ ಬೋಲ್ವುಕರಿ ಛಾ?” ಕರಿ ಪುಲ್ಲಾಯೊ.

20 ತದೆ ಯೋ ಜವಾನಿ ಛೋಕ್ತಾನ, “ಪಾಲನಿ ಬಾರೇಮ ಘಣು ಮಾಲುಮ್ ಕರಿಲೇವ್ಣಕರಿ ಭಾಣುಕರೀನ್, ಕಾಲ್ನ ನ್ಯಾವ್‌ನಿ ಸಭೆಮ ಪಾಲನ ಬುಲೈಲಿನ್ ಆವ್ಣಕರಿ ತುನ ಯೆಹೂದ್ಯರ್ ಖ್ವಾರು ಬೋಲಾನ ಕರುಕರಸ್.

21 ಕತೋಬಿ ಇವ್ಣಪರ್ ವಿಶ್ವಾಸ್ ನಕೊ ಕರಿಶ್. ಪಾಲನ ಮಾರಾನಖ್ವಾಜೆ ಚಾಳಿಖ್‌ದ್ಲೀಬಿ ಜಾಖ್ತ್ ಯೆಹೂದ್ಯರ್‌ಖ್ವಾರು ಲಪೀನ್ ಟಿವೈರ್ದ್ಲಸ್ ಇವ್ಣೆ ಇನ ಮಾರ್ವಲಗು ಶಾಪ್ತಿ ಖಾಶು ಕೊಯ್ನಿ ಕರಿ ಆಣ್‌ಕರ್ದ್ಲ ಅಜ್ಜು. ಹಮ್ಮೆ ತಾರಿ ಹುಕುಮ್‌ನಖ್ವಾಜೆ ಟಿವೈರ್ದ್ಲಸ್” ಕರಿ ಬೋಲ್ಯೊ.

22 ತದೆ ಸೇನಾಪತಿನೆ ಯೋ ಜವಾನಿ ಛೋಕ್ತಾನ, “ಇವ್ಣಿ ಮಶ್ಲತ್ತಿ ಬಾರೇಮ ಬೋಲಿರಾಖ್ಯೊಸ್‌ಕರಿ ಕಿನಾಬಿ ನಕೊ ಬೋಲ್” ಕರಿ ಅಜ್ಜು ಜವಾನಿ ಛೋಕ್ತಾನ ಹುಕುಮ್‌ದೀನ್ ಮೋಕ್ಲಿದಿದೊ.

ಕೈಸರೈ ಖ್ವಯೇರ್ದ್ ಪಾಲನ ಮೋಕ್‌ಲ್ಯುತೆ

23 ಇನಪಾರ್ ಖ್ವೊಶಿಪಾಯಿನ ಮೋಟಾನೆ ಬೇಜ್ಜಣ ಸೇನಾಧಿಕಾರಿನ ಬುಲೈನ್ ಇವ್ಣನ, “ಆ ರಾತ್ ನೌಘಂಟಾನ ಕೈಸರೈ ಖ್ವಯೇರ್ದ್ ಜಾವಾನ ಬೇಖ್ವೊ ಶಿಪಾಯಿನಾಬಿ, ಖ್ವಡ್‌ತೀನಿಖ್ ಅದ್ಲಿ ಘೋಡಾಚಲಾವಳನಾಬಿ, ಬೇಖ್ವೊ ಅದ್ಲಿ ಭಾಲವಳಾನಾಬಿ, ತಯಾರ್‌ಕರೊ.

24 ಅಜ್ಜು ಘೋಡಾನ ತಯಾರ್‌ಕರ್ದ್ಲಿನ್, ಪಾಲನ ಬೆಖ್ವಾಡಿನ, ರಾಜ್ಯಪಾಲ್ ಹುಯಿರೋತೆ ಫೇಲಿಕ್ಸನ ಇನ ಜತನ್‌ಥೀಸ್ ಬುಲೈಲೀಜಾವ್ಣು” ಕರಿ ಬೋಲ್ಯೊ.

25 ಅಜ್ಜು ಸೇನಾಧಿಪತಿನೆ ಆ ನಾಹುಯಿನ್ ಇವ್ಣನ ಅಮ್ ಏಕ್ ಚಿಟ್ಟಿ ಲೀಖಿನ್ ದಿದೊ:

26 “ಮಹಾಪ್ರಭು ಹುಯಿರೋತೆ ರಾಜ್ಯಪಾಲ್ ಫೇಲಿಕ್ಸನ ಕ್ಲದ್ಲ ಲುಸಿಯಸ್‌ನಿ ಖ್ವಲಾಮ್.

27 ಆ ಅದ್ಲಿನ ಯೆಹೂದ್ಯರ್‌ಖ್ವಾರು ಧರೀನ್ ಮಾರಿನಾಕ್ಕುಕರಿ ಥೂ. ಕತೋಬಿ ಆ ರೋಮ್‌ನೊ ಪ್ರಜೆಕರಿ ಮಾಲುಮ್ ಪಡ್ಲ್ಯ ಮೇ ಶಿಪಾಯಿಖ್ವಾರಾನಿ ಜೋಡೆಜ್ಜೆನ್ ಛೋಡಾಯೊ.

28 ಇವ್ವೆ ಶನ ಅನಪಾರ್ ಅಪರಾದ್ ನಾಮುಕರಸ್ ಕರಿ ಮಾಲುಮ್ ಕರಿಲ್ಯಾವಾನಖ್ವಾಜೆ ಕರಿ ಅನ ಇವ್ವೆ ನ್ಯಾವಾನಿ ಸಬೆಮ ಮೇ ಬುಲೈಲಿನ್ ಗಯೊ.

29 ಮನ ಹಿಜ್ಜಾ ಮಾಲುಮ್ ಪಡ್ಯತೆ ಶಾತ್‌ಕತೊ ಪೌಲ ಖರಾಬ್ ಕಾಮ್ ಕರಿರಾಖ್ಯೊಸ್ ಕರಿ ಯೆಹೂದ್ಯರ್‌ಖ್ತಾರು ಬೋಲ್ಕುತೋಬಿ, ಇವ್ವು ಅಪರಾದ್ ಖ್ತಾರು ಇವ್ವ ಧರ್ಮಶಾಸ್ತ್ರನಿ ಬಾರೇಮಾನಿ ವಾತೆನ ಪಾಡೀನ್, ಇನಪರ್ ಅಪರಾದ್ ಥೋವಡ್ಯ ಪಣ್ಣಿ ಮರಣ್ ದಂಡನೆ ರ್ಹವೊ ಬೇಡಿ ಫಾಲಾನ ರ್ಹವೊ ಕರಾಖ್ತಾರ್ ಖೇವಿಬಿ ಅಪರಾದ್ ಕೋಡಿ.

30 ಕತೋಬಿ ಯೆಹೂದ್ಯರಮ ಥೋಡುಞ್ಣು ಪೌಲನ ಮಾರಿನಾಖನ ಮಶ್ಲತ್ ಕರುಕರಸ್‌ಕರಿ ಮನ ಮಾಲುಮ್ ಪಡ್ಯ ಇನಖ್ವಾಜೆ ಮೇ ಇನ ತುರಂತ್ ತರಾಕನ ಮೋಕ್ಲಕರುಸ್. ಆಸ್ ಕಾಹೆತೆ, ಪೌಲನಪರ್ ಅಪರಾದ್ ನಾಖವಳಾನಾಬಿ ತಾರಸ್‌ಖ್ವಾಪ್ಣೆ ಯೋ ಅಪರಾದ್ನಿ ವಾತೆ ಬೋಲಾನ ಹುಕುಮ್ ದೀರಾಖ್ಯೊಸ್”.

31 ಶಿಪಾಯಿಖ್ತಾರು ಇವ್ವುನ ಹುಕುಮ್ ಹುಯುತೆ ತಿಮ್ಮಸ್ ಪೌಲನ ಇವ್ವಿಜೋಡೆ ರಾತೋರಾತ್ ಬುಲೈಲಿನ್ ಅಂತಿಪತ್ರಿಕರಿ ಗಾಮನ ಬುಲೈಲೀಗಯು.

32 ಇನ ಅಗಲ್ಯದನ್ನೆ ಪೌಲನ ಜೋಡೆ ಅಗಾಡಿ ಭಾವಾನ ಫೋಡ ಚಲಾವವಾಳಾನ ಮ್ಹೇಲಿನ್, ಸಿಪಾಯಿಖ್ತಾರು ಪಾಲ್ತುಫರಿನ್ ಕೋಟೆನ ಆಯು.

33 ಇವ್ವೆ ಕೈಸರೈ ಖ್ತಾಯೇರ್ನ್ ಜೈನ್, ರಾಜ್ಯಪಾಲ್‌ನ ಚಿಟ್ಟಿದಿದೊ. ಇನಪಾರ್ ಪೌಲಾನ ಇನ ಹಾತ್ಮದಿದೊ.

34 ರಾಜ್ಯಪಾಲ್‌ನೆ ಚಿಟ್ಟಿ ಫಡೀನ್, ಇನೆ ಪೌಲನ, “ತು ಖೆವ ದೇಖ್ತೊನೊ?” ಕರಿ ಪುಲ್ಲಾವಮ ಕಿಲಿಕ್ಯವಾಳೊ ಕರಿ ಮಾಲುಮ್‌ಪಡ್ಯ.

35 ರಾಜ್ಯಪಾಲ್ನ “ವಿರೋದ್ ಹುಯಿರ್ನ್ಯತೆ ಯೆಹೂದ್ಯರ್‌ಖ್ತಾರು ಹಜ್ಜಾ ಆವಾದಿನ್, ಮೇ ತಾರ ಅಖ್ಬಾಸ್ ಕಾಮ್ನ ವಿಚಾರ್ ಕರಿಶ್” ಕರಿ ಬೋಲಿನ್ ಪೌಲನ ಹೆರೋದಾನಿ ಮಹೇಲ್‌ಮ ರಾಖಿನ್ ಕಾವ್ಲಿ ಕರ್ನುಕರಿ ಹುಕುಮ್ ದಿದೊ.

24

ಪೌಲನ ವಿರೋದ್ ನ್ಯಾವ್‌ನು ವಿಚಾರ್

1 ಪಾಙ್ಕ್ ದನ್‌ಹುವಾದಿನ್ ಗಲ್‌ಥಯಾಜಕ್ ಅನನೀಯನೆ, ಯೆಹೂದ್ಯರ್‌ನ ಥೋಡಫಲ್ಡಾನ ಅಙ್ಗು ತೆರ್ತುಲ್ಯಕರಿ ಏಕ್ ವಕೀಲ್ನ ಬುಲೈಲಾಯಿನ್, ರಾಜ್ಯಪಾಲನ್ ಖ್ವಾಮ್ಣೆ ಪೌಲನ ಉಪ್ಪರ್ ಫಿರಾದ್ ಬೋಲಾನ ಕೈಸರೈ ಖ್ವಯೇರ್ ಆಯೊ.

2 ಪೌಲನ ನ್ಯಾವ್‌ಮ ಬುಲೈಮಂಗಾಯು. ತದೆ ತೆರ್ತುಲ್ಯನೆ, ಪೌಲನ ಉಪ್ಪರ್ ಇನಿಅಪರಾದ್ನಿ ವಾತ್ತ್ ಡೊವಾಡನ ಶುರುಕರ್‌ಚ್ಚೊ. “ಮಹಾ ಪ್ರಭು ಫಿಲಿಕ್ಸ್‌ ತಾರೆಥೀಸ್ ಹಮಾರು ಅದ್ಮಿಖ್ವಾರು ಸಮಾಧಾನ್‌ಧಿ ಜಿವ್ಣು ಕರುಕರಸ್. ತಾರಿ ಖ್ವೊಜ್‌ಥೀಸ್ ದೇಖ್ವಾಮ್ ಕೆತ್ರಿಕ್ತಿ ಬಿಗ್‌ಡಿಹುಯಿ ಹಾಲತ್ತ್ ಖ್ವಿದಾರಿರಾಖ್ವೊಸ್.

3 ಹರೇಕ್ ಬಾಙ್ಗುಬಿ ಹರೇಕ್ ಪರಕ್‌ಮಾಬಿ ಘಣು ಧನ್ಯವಾದ್ ಕರೀನ್ ಅನ ಹಮೆ ಮಾನಿಲಿಯೇಸ್.”

4 ಕತೋಬಿ ಮೇ ತಾರಿ ವಖ್ವತ್‌ನ ಬಿಙ್ಗುಬಿ ಜಾಖ್ವತ್ ಕೋಲೇವುಂತೆ ಥೋಡಿಸ್ ವಾತೆ ಬೋಲುಸ್. ದಯಾಕರೀನ್ ಖ್ವಮಘ್ಣೆಣುಕರಿ ತಾರಾಮ ಗಿಂಗೈಲೆವುಸ್.

5 “ಆ ಅದ್ಮಿ ಖರಾಬ್‌ಲ್ಲಾ ಅಙ್ಗು ಬರಾಬರ್‌ಕೊಯ್ನಿ ಜಗತ್‌ಮ ಕಿಙ್ವಾಬಿ ರ್ವವೊ, ಯೆಹೂದ್ಯರ್‌ಮ ಲಡೈ ಉರಾಡ್ತೊ ಫಂಡಸ್‌ಕರಿಬಿ, ಆ ನಙ್ಗರೇತ್‌ನಿ ಖೂಮ್ಮೊ ಮೋಟೊ ಕರಿಬಿ ಹಮೆ ದೇಖ್.

6 ಆ ನಾಹುಯಿನ್ ಆ ಅದ್ಮಿ ದೇವ್ನಿ ಮಂದಿರ್ದ್ ಮೈಲುಕರಾನ ಕೋಶಿತ್ ಕರ್‌ಚ್ಚೊ. ಇನಾಖ್ವಾಜೆ ಹಮೆ ಇನ ಬಂಧಿಕರ್‌ಚ್ಚಾ* ಹಮೆ ಹಮಾರ ಶೊಂತ್ ನಿಯಮ್‌ನಿ ಪರಕ್ಮತೀರ್ಪ್ ಕರ್ನುಕರಿ ಖ್ವೊಜ್‌ಕರ್‌ಚ್ಚೊ.

7 ಕತೋಬಿ ಸೇನಾಧಿಪತಿನ ಮೋಟೊ ಲುಸಿಯಸ್ ಆಯೊ. ಅಙ್ಗು ಖ್ವಿತಾವನ ಪರಕ್ಮ ಹಮಾರಕಂಥು ಛೋಡೈಲೀನ್ ಗಯೊ.

8 ತದೆ ಲೂಸಿಯಸ್ಸೆ ಇನ ಗಲತ್ ಲಗಾಡವಾಳನ ತಾರ ಖ್ವಾಮ್ಣೆ ಆವಾನ ಹುಕುಮ್ ದಿದೊ. ತೂ ಅನ ಬೋಲಾಮಸ್, ಹಮೆ ಅನ ವಿರೋದ್

* 24:6 24:6 ಥೋಡು ಚಿಟ್ಟೀಮ 6 ಭಾಗ್‌ಥು 8ಲಗು ಕೊಯ್ನಿ

ಬೋಲುಕರೇತೆ ವಾತೆಖ್ವಾರಿ ಖ್ವಾಚಕರಿ ತುನ ಮಾಲುಮ್ ಪಡ್‌ಶೆ” ಕರಿ ಬೋಲ್ಯೊ.

9 ತದೆ ಯೆಹೂದ್ಯರ್ ಖ್ವಾರು ಯೋ ವಕೀಲ್ವಿಜೋಡ್ತ ಮಳಿನ್ ಆ ಬೋಲುಕರಾತೆ ವಾತೆಖ್ವಾರಿ ಖ್ವಾಚಿಸ್‌ಕರಿ ಬೋಲ್ಯು.

ಫಿಲಿಕ್ಸ್‌ನ ಖ್ವಾಮ್ಜೆ ಪೌಲ ಬಙ್ಗಾಡಿಲಿದೋತೆ

10 ರಾಜ್ಯಪಾಲ್‌ನೆ ಪೌಲನ, ತೂ ವಾತೆ ಬೋಲೆಜಾಯ್ ಕರಿ ಖ್ವಂಜ್‌ಕಾರ್ ದೈವಾಮ ಇನೆ ಪಾಲ್ಟೊ ಜವಾಬ್ ಶಾತ್‌ದಿದೋಕತೊ “ತೂ ಮನ ಕೈಏಕ್ ವರಖ್ವಾಡ್ತು ಆ ದೇಖ್ವೊನೊ ನ್ಯಾವ್‌ಣೊ ಬಣಿರೋಸ್ ಕರಿ ಮನ ಮಾಲುಮ್. ಇನಖ್ವಾಜೆ ಖುಷಿಥಿ ಫೇಡ್ ದೆವ್‌ಸ್.

11 ಮೇ ದೇವ್ನಿ ಆರಾದನೆ ಕರಾನ ಯೆರೂಸಲೇಮ್ಮ ಜೈನ್, ಭಾರ ರೋಜ್ ಖಲಿ ಹುಯಿರಾಥ ಕರಿ ತೂ ಮಾಲುಮ್ ಕರಿಲೀಯೆಜಾಯ್.

12 ಹಿಜ್ಲಾ ದೇವ್ನಿಮಂದಿರ್‌ಮ ರ್ಹವೊ, ಸಬೆನ ಸಬಾಮಂದಿರ್‌ಮ ರ್ಹವೊ, ಖ್ವಯೇರ್‌ಮ ರ್ಹವೊ, ಮೇ ಯೆಹೂದ್ಯರ್‌ನ ಜೋಡ್ತಾಬಿ ಅಬ್ಬಾಜಬ್ಬಿ ಬೋಲುಕರಾನು ರ್ಹವೊ ನತರ್ ಟೋಳ್ ಭಂದಾವನು ರ್ಹವೊ ಅವ್ಣೆ ದೇಖ್ಕೊಯ್ನಿ.

13 ಹಮ್ಕೆ ಮಾರಪರ್ ಇವ್ಣೆ ಥೋವಾಡುಕರಾತೆ ಗಲತ್‌ನ, ಸಬೂತ್‌ಕರಿ ತಾರಖ್ವಾಮ್ಜೆ ಓತಾಳನ ಕೋ ಉಶೇನಿ.

14 ಕತೋಬಿ ಏಕ್ ಖಲಿ ತಾರ ಖ್ವಾಮ್ಜೆ ಮಾನಿಲೆವುಸ್, ಶಾತ್‌ಕತೊ, ಧರ್ಮವಿರೋದಿಕರಿ ಬೋಲಾನು ಮಾರಗ್‌ಮ ಭಾಲವಾಳೊ ಮೇ ಮಾರ ಗುರುಗುರಬ್‌ಲ್ಯನ ದೇವ್ನಿ ಆರಾದನೆ ಕರುಸ್. ಕತೋಬಿ ಮೋಶೇನು ಧರ್ಮಶಾಸ್ತ್ರನು ಪ್ರವಾದನೆ ದಪ್ತರ್‌ಮ ಲೀಖ್ಪಿರುತೆ ಯೊ ಅಖ್ವಾಸ್ನ ವಿಶ್ವಾಸ್ ಕರುಸ್.

15 ಆ ನಾಹುಯಿನ್ ನೀತಿವಾಳನಾಬಿ ಅನೀತಿವಾಳನಾಬಿ ಖ್ವಾರೂಸ್ ಪಾಲ್ಟುಜಿವ್ತು ಉಷೆಕರಿ ಆ ಯೆಹೂದ್ಯರ್ ದೇವ್‌ಮ ಖಿವಿ ಪರಕ್ ಭರೋಖ್ಲೊ ರಾಖಿರಾಖ್ಕುಸ್ಕಿ ಯೋಸ್ ಪರಕ್ ಮೇಬಿ ಭರೋಖ್ಲೊ ಕರಿರಾಖ್ಲೊಸ್.

16 ಇನಾಖ್ವಾಜೆ ದೇವ್ ಬಿಜು ಅದ್ವಿನ ಖ್ವಾಷ್ಟೆ ಮಾರೇಥಿ ಹುವಾಯೆತ್ರೆ ದಿಲ್ವಿಸಾಕ್ಷಿನ ಕದೇಬಿ ಪಾಕ್ ರಾಖಾನ ಕೋಶಿಶ್ ಕರುಸ್.

17 “ಥೋಡ ವರಖ್ವೊನ ವಾರ್ ಮೆ, ಮಾರ ಶೊಂತ್ ದೇಖ್ವಾವಾಳಾನ ಪೈಶಾ, ಕಾಣ್ಕೆ ಅಜು ಮುಡಪ್ ದ್ಯಾವಾನ ಆಯೋಥೊ.

18 ಮೇ ಶುದ್ಧಿ ಕರಿಲೀನ್ ಯೋ ಖ್ವಾರು ದೆವ್‌ಕರಾನಿ ವಖ್ವತ್‌ಮ ಮನ ಅವ್ಣೆ ದೇವ್ಣಿಮಂದಿರಾಮ ದೇಖ್ವು; ತದೆ ಮಾರಿಜೋಡ್ಡ ಅದ್ವಿನು ರ್ಝೂಂಡ್‌ಬಿ ಶಾತ್ ಕೋಥೂನಿ, ಗಲಾಟ್‌ಬಿ ಕೋಥಿನಿ. ಮನ ದೇಖ್ವುತೆ,

19 ಏಷ್ಯ ತಬರ್‌ಖಾಥು ಆಯುತೆ ಥೋಡು ಯೆಹೂದ್ಯರ್ ಮಾರಾಮ ಶನೂಬಿ ಗಲತ್ ಉಷೇತೊ ಇವ್ಣೆ ತಾರಾಖ್ವಾಷ್ಟೆ ಮಾರಪರ್ ವಿರೋದ್‌ಕರಾನ ಹಜ್ಜ ಆವ್ವುಥು.

20 ನಾಹುಯುತೊ, ಹಜ್ಜ ರ್ಝವಾಳು ಮೇ ನ್ಯಾವ್‌ನಿ ಸಬೆನಖ್ವಾಷ್ಟೆ ಭೀರೈವಾನಿವಖ್ವತ್ತ್ ಮಾರಾಮ ಶನು ಅಪರಾದ್ ದೇಖ್ವುಕರಿ ಬೋಲಾದೆ.

21 ಮೇ ಇವ್ಣ ಖ್ವಾಷ್ಟೆ ಭಿರೀನ್; ಪಾಲ್ಟುಜಿವ್ತು ಉಟ್‌ಶೇತೆ ಇನಿ ಬಾರೇಮ ಮೆ ವಿಶ್ವಾಸ್ ಕರೈತೆ ಖ್ವಾಜೆ ಹಜ್ಜ ನ್ಯಾವ್‌ಮ ಭೀಯೊಸ್ತೆ ಕರಿ ಮೆ ಎಕ್ಕಸ್ ವಾತೆನ ಚಿಕ್ರಿ ಬೋಲ್ಯೊ.”

22 ಫೇಲಿಕ್ಸನೆ ಆ ಮಾರಗ್‌ನ ಬಾರೇಮ ಪಹಿಲೇಸ್ ಕೆತ್ರಕ್ಕಿ ಮಾಲುಮ್ ಕರಿರಾಖೊಥೊ. ಇನಖ್ವಾಜೆ ನ್ಯಾವ್‌ಕರಾನು ಭೀರಾಖಿನ್, “ಸೇನಾಧಿಪತಿ ಹುಯಿರೈತೊತೆ ಲುಸಿಯಸ್ ಹಜ್ಜ ಆವಾದಿನ್ ಆ ವಾತ್ಸಿ ಬಾರೇಮ ತೀರ್ಪ್ ಕರಿಶ್” ಕರಿ ಬೋಲ್ಯೊ.

23 ಇನಕೇಡೆಥು ಪೌಲನ ಕಾವ್ಲಿಮ ರಾಖೇಜಾಯ್, ಕತೋಬಿ ಇನ ಶಾತ್ವಿ ಅಡ್ಡಿ ನಾಕರೈ, ಇನ ದೇಖಿಲ್ವಾಳು ಇನ ಖ್ವದ್ದರ್‌ಕರೀನ್ ಆಡು ಶಾತ್ವಿ ನಾಕರೈಕರಿ ಖ್ವೋಶಿಪಾಯಿನ ಮೋಟಾನೆ ಹುಕುಮ್ ಕರೈ.

ಫೆಲಿಕ್ಸ ಅಜು ಇನಿ ಬಾವಣ್ ದ್ರೂಸಿಲ್ಲನ ಖ್ವಾಷ್ಟೆ ಪೌಲ

24 ಥೋಡದನ್ನ ಪಾರ್ ಫೇಲಿಕ್ಸ್ ಇನಿ ಬಾವಣ್ ಹುಯಿರೀತೆ ದ್ರೂಸಿಲ್ಲಾನಿ ಜೋಡ್ಡ ಆಯೊ. ಯೋ ಯೆಹೂದ್ಯವಾಳಿ ಹುಯಿರೈಥಿ.

ಫೇಲಿಕ್ಸನೆ ಪೌಲನ ಬುಲೈಮಂಗೈನ್, ಯೋ ಕ್ರಿಸ್ತಯೇಸುನ ವಿಶ್ವಾಸ್‌ಕರಾನಿ ಬಾರೇಮ ವಾತೆ ಬೋಲಾನು ಖ್ವಮ್‌ಜ್ಯೊ.

25 ಕತೋಬಿ ಪೌಲನೆ, ನೀತಿ, ಅಜ್ಜು ಇನುಯೋ ದಾಬುಕ್ ರ್ತ್ವಾನು, ಅಜ್ಜು ಖ್ವಮ್ಜೆ ಉಳ್ಳಾವತೆ ನ್ಯಾಯತೀರ್ಪ್‌ನಿ ಬಾರೇಮ ಬೋಲಾಮ ಫೇಲಿಕ್ಸನೆ ಡರಿನ್, “ಹಮ್ಮೆ ತೂ ಜ್ಞಾ ಮನ ವಖ್ವತ್ ಮಳಾದಿನ್ ತುನ ಬುಲೈಮಂಗೈಷ್” ಕರಿಬೋಲ್ಯೊ.

26 ಯೋಸ್ ವಖ್ವತ್‌ಮ ಫೇಲಿಕ್ಸನೆ, ಪೌಲ ಶಾತ್ವೋಬಿ ಪೈಶಾ ದೇಸ್ತಿಶುಕಿ ಕರಿ ಭರೋಖ್ವೊಕರೀನ್, ಕದೇಕದೇಬಿ ಇನ ಬುಲೈಮಂಗೈನ್ ಇನಿಜೋಡ್ಲ ಪೊಖ್ವೊಲಾವ್ತೊ ರ್ತ್ವೊತೊಥೊ.

27 ಬೇ ವರಖ್ವನ್ ವಾರ್ ಫೇಲಿಕ್ಸನ ಬದಲ್ ಪೋರ್ಕಿಯ ಫೆಸ್ತ ಕರಿ ರಾಜ್ಯಪಾಲ್‌ಹುಯಿನ್ ಆಯೊ. ಫೇಲಿಕ್ಸನೆ ಯೆಹೂದ್ಯರ್‌ನಿ ಪ್ಯಾರ್ ಕಮಾವ್ಣು ಕರಿ ಆಖ್ವೊಕರೀನ್ ಪೌಲನ ಜೇಲ್‌ಮಾಸ್ ಮ್ಹೆಂದಿನ್ ಗಯೊ.

25

ಫೆಸ್ತನ ಖ್ವಮ್ಜೆ ಪೌಲನ ಲಾಯುತೆ

1 ಫೆಸ್ತನೆ ಅಧಿಕಾರ್‌ಲೀನ್ ತೀನ್‌ದನ್ನ ಬಾದ್ಲ ಕೈಸರೈಯಾಥು ಯೆರೂಸಲೇಮ್ಮ ಗಯೊ.

2 ಹಿಜ್ಜಾ ಗಲ್‌ಡಯಾಜಕ್‌ಬಿ ಅಜ್ಜು ಯೆಹೂದ್ಯರ್‌ನ ಘಲ್ದಾವ್‌ನ ಪೌಲನಿ ವಿರೋದ್ ಛಾಡಿ ಬೋಲ್ಯೊ ಇನ ಯೆರೂಸಲೇಮ್ಮ ಪಾಲ್ಟು ಮೋಕಲ್ವುಕರಿ ಇವ್ಣೆ ಪೆಸ್ತಾನ ಗಿಂಗೈಲಿದು.

3 ತೂ ದಯಾಕರೀನ್ ಇನ ಯೆರೂಸಲೇಮ್‌ನ ಮೋಕಲ್ವುಕರಿ ಪೌಲನ ಕೇಡ್ವಖ್ವೊಜೆ ಸೋಚ್ಚು. ಶನಕತೊ ಜ್ಞಾವಾನ ಮಾರಗ್‌ಪರ್ ಇನ ಮಾರಿನಾಕ್ಕುಕರಿ ಜಪಿರ್ದೊಥು.

4 ಫೆಸ್ತನೆ ಅಮ್ ಜವಾಬ್ ದಿದೊ; ಪೌಲ ಕೈಸರೈನ ಖ್ವಾರ್‌ಟೊಮ ಛಾ. ಮೇ ಹಿಜ್ಜಾ ಒಗ್ಗಿಸ್ ಪಾಲ್ಟೊ ಜ್ಞಾವು ಕರಿ ಛೊ.

5 ಇನಖ್ವಾಜೆ ತುಮಾರಮ ಅಧಿಕಾರ್‌ವಾಳು ಮಾರಕೇಡೆ ಕೈಸರೈಮ ಐನ್ ಯೋ ಅದ್ಮಿಮ ಅಪರಾದ್ ಶನುತೋಬಿ ಉಷೇತೊ ಇನಾಪರ್ ಗಲ್ಲಿ ಲಗಾಡೊ ಕರಿ ಬೋಲ್ಯೊ.

6 ಫೆಸ್ತನೆ ಇವ್ವಜೋಡ್ ಆಟ್‌ಥಿ ಧರೀನ್ ದಖ್ತರೋಜ್‌ಲಗು ರ್ಹೀನ್ ಇನಪಾರ್ ಯೋ ಕೈಸರೈನ ಗಯೊ. ಬಿಜೇಕ್‌ದನ್ನೆ ನ್ಯಾವ್‌ನಿ ಝಗೋಮ ಜೈನ್ ಪೌಲನ ಬುಲೈಲಿನ್ ಆವ್ವು ಕರಿ ಶಿಪಾಯಿ ಹುಕುಮ್ ಕರೈನ್ ಫೆಸ್ತ ನ್ಯಾವ್‌ನಿ ಝಗೋಮ ಬೆರೋಡೊ.

7 ಯೆರೂಸಲೇಮ್‌ಥು ಆಯುಧೂತೆ ಯೆಹೂದ್ಯರ್, ಪೌಲ ಹಿಜ್ಜಾ ಆವಾದಿನ್ ಇನ ಅಶ್‌ಪಿಶ್ ಭೀರಿನ್ ಇನಪರ್ ಘಣು ಗಲತ್ ಲಗಾಡ್ವು ಇವ್ವೆ ಶಾಶ್ವಿ ಸಾಬಿತ್ ಕರಾನ ಕೋಹುಯುನಿ.

8 ಕತೋಬಿ ಪೌಲನೆ ಜ್ವಾಬ್ ದೇತೊಹುಯಿನ್, “ಮೇ ಯೆಹೂದ್ಯರ್‌ನಿ ಧರ್ಮಶಾಸ್ತ್ರನಿ ವಿರೋದ್ ರ್ಹವೊ ದೇವ್‌ಮಂದಿರ್‌ನಿ ವಿರೋದ್ ರ್ಹವೊ, ಚಕರ್‌ವರ್ತಿನಿ ಬಾರೇಮ ರ್ಹವೊ, ಮೇ ಖಿವು ಗಲ್ಲಿಬಿ ಕರೈಕೊಯ್ವಿ” ಕರಿ ಬೋಲ್ಯೊ.

9 ಕತೋಬಿ ಫೆಸ್ತನೆ ಯೆಹೂದ್ಯರ್‌ಥಿ ದಯಾನ ಲ್ಲವಾನಖ್ವಾಜೆ ಪೌಲನ “ತೂ ಯೆರೂಸಲೇಮ್ ಜ್ವಾವನ ಕೋಶಿಶ್ ಕರಾನಿವಖ್ವಾಜೆ, ಹಿಜ್ಜಾ ಮಾರಖ್ವಾಜೆ ಆ ಗಲ್ಲಿನಿ ಬಾರೇಮ ತೀರ್ಪ್ ಕರಿಲೇವ್ವುಕರಿ, ತುನ ಖ್ವಿಯಾಲ್ ಛಾಕಿ ಶು? ಕರಿ ಬೋಲ್ಯೊ.

10 ತದೆ ಪೌಲನೆ ಬೋಲ್ಯೊ “ಮೆ ಹಮ್ಮೆ ಕೈಸರ್‌ನ ನ್ಯಾವ್‌ಝಗೊಮಾಸ್ ಭಿಯೋಸ್; ಮನ ತೀರ್ಪ್‌ಕರೈತೆ ಹಜ್ಜಾಸ್. ಯೆಹೂದ್ಯರ್‌ನ ಮೆ ಶನು ಲಗಾಯೊ ಶಾತ್‌ಕೊಯ್ವಿ ಕರಿ ಬೋಲಾನು ತುಮುನಾಬಿ ಅಲ್ಲಿನಿತರ ಮಾಲುಮ್‌ಛೆ.

11 ಮೇ ಅನ್ಯಾಯ್ ಕರವಾಳೊ ಹುಯಿನ್ ಶಾತ್ಕೋಬಿ ಕರವಾಳೊ ಹುಯಿನ್ ಧರ್ಮಶಾಸ್ತ್ರನಿ ಪರಕ್ ಮನ ಮರಣ್ ದಂಡಣೆನ ಕಾರಣ್ ಹುಯೋತೊಬಿ ಇನ ಮೆ ಮಾನಿಲೇವ್ಸ್ ಕತೋಬಿ ಅವ್ವೆಪೊಳ್ ಗಲತ್‌ನ ಮಾರಪರ್ ನಾಖನುರ್ದಯೂತೊ, ಮನ ಕೋಣ್‌ಬಿ ಅವ್ವ ಹಾತ್‌ಮ ದ್ವವಾನ ಕೋ ಉಶೇನಿ. ಮೆ ಕೈಸರ್‌ನ ಖ್ವಾಜೆ ಬೋಲಿಲೆವುಸ್” ಕರಿ

ಬೋಲ್ಯೊ.

12 ತದೆ, ಫೆಸ್ತನೆ ಇವ್ವಸಭೆವಾಳಾನಿ ಜೋಡ್ಡ ಚರ್ಚೆಕರೀನ್ ತದೆ ಪಾಲನ, “ತೂ ಕೈಸರನ ಖ್ವಾಮ್ಣೆ ಬೋಲಿಲೆವುಸಾಕರಿ ಬೋಲ್ಯೊನಿ, ಇನಖ್ವಾಜೆ ಕೈಸರಕನಾಸ್ ಜಾವುಕ್ಕರಿ ಬೋಲ್ಯೊ.

ಹೆರೋದಾಬಿ ಅಗ್ರಿಪ್ಪನ ಖ್ವಾಮ್ಣೆ ಪಾಲ

13 *ಧೋಡದನ್ನ ಬಾದ್ಮ ಅಗ್ರಿಪ್ಪ ರಾಜಬಿ ಬೆರ್ನಿಕೆನಿ ಜೋಡ್ಡ ಫೆಸ್ತನ ಮಳಾನಖ್ವಾಜೆ ಅಜು ಸ್ವಾಗತ್ ಕರಾನ ಕೈಸರೈಮ ಆಯು.

14 ಇವ್ಣೆ ಖ್ವಾಮಾರ್‌ದನ್ ಹಿಜ್ವಾಸ್ ರಹಿಗು. ಇನಖ್ವಾಜೆ ಫೆಸ್ತನೆ ಪಾಲನಿ ಬಾರೇಮ ರಾಜನ ಖ್ವಾಮ್‌ಜಾಡ್ಯೊ ಶಾತ್‌ಕತೊ, “ಫೇಲಿಕ್ಸನೆ ಖ್ವಾರ್ಕೊಟ್‌ಮಾಸ್ ಮ್ಹೇಲಿನ್ ಗಯೋತೆ ಏಕ್‌ಜಣೊ ಛಾ.

15 ಮೆ ಯೆರೂಸಲೇಮ್ ರಪ್ಪಾನಿವಖ್ವಾತೆ ಯೆಹೂದ್ಯರಾನ್ ಗಲ್‌ಥಯಾಜಕ್‌ಖ್ವಾರು ಅಜು ಗಲ್‌ಥಖ್ವಾರು ಇನಿ ಬಾರೇಮ ಮನ ಆರೋಪ್ ಬೋಲಿನ್ ಇನ ತೀರ್ಪ್‌ಹುವಾದೆ ಕರಿ ಗಿಂಗಾಯು.

16 ಮೆ ಇವ್ಣೆನ್; ಅಪರಾದಿಬಿನ್ ಅಪರಾದ್ ಲಗಾಡವಾಳು ಆಮಖ್ವಾಮೆ ಭೀರೆವ್ಣೆ; ಇನಾಪರ್ ಲಗಾಡಿರಾಖ್ವಾತೆ ಅಪರಾದ್ ವಿರೋದ್ ಜವಾಬ್‌ದ್ಯವಾನ ಅಪರಾದಿನ ಅವಕಾಶ್ ಕರಿದೇವ್ಣೆ ಇಮ್ ಕರ್ಯ್‌ಕೊಂತೆ ಹಾತ್ಮನೇರ್ ದೀನಾಖನು ರೋಮ್ನಿ ಪದತ್ತಿಕಾಹೆ ಕರಿ ಬೋಲ್ಯೊ.

17 “ಇವ್ಣೆ ಹಜ್ಜ ಮಳಿನ್ ಆವಖ್ವತರ್ ಮೇ ಜರಾಬಿ ಧೀರ್‌ಕೊಂತೆ ಬಿಜೇಕ್ ದನ್ನೇಸ್ ನ್ಯಾವಾನಿ ಝಗೋಪರ್ ಬೇಶಿನ್ ಯೋ ಅದ್ನಿನ ಬುಲಾವುಕ್ಕರಿ ಹುಕುಮ್ ದಿದೊ.

18 ಯೆಹೂದ್ಯರ್ ಉರಿಭೀರಿನ್ ಇನ ಉಪ್ಪರ್ ಅಪರಾದ್ ಲಗಾಡ್ಯಾ ಕತೋಬಿ ಮೇ ಸೋಚಾನಿ ಪರಕ್ತ ಇವ್ಣೆ ಇನಾಪರ್ ಖಿವು ಖರಾಬ್ ಅಪರಾದಾಬಿ ಕೊ ಲಗಾಡ್ಯನಿ.

* 25:13 25:13 ಬೆರ್ನಿಕೆ ಆ ಹೈರಿತೆ ಏಕ್‌ನ ಹೆರೋದ ಅಗ್ರಿಪ್ಪನಿ ಫೋರಿ ಅಜು ಬೇನ ಹೆರೋದ ಅಗ್ರಿಪ್ಪನಿ ಭೇನ್ ಹುಯಿರ್ದೊ

19 ಇವ್ವೆ ಬೋಲ್ಯುತೆ ವಾತೆಖ್ವಾರು ಇವ್ವ ಶೊಂತ್ ಧರ್ಮಾನು ಸಂಬಂದಾನಿತರ ಹುಯಿರೊಡ್ಡು. ಅಜ್ಜು ಯೇಸುಕರಿ ಏಕ್‌ಭಣ ಭಣೀಡು ಆ ವಿವಾದ್ ಹುಯಿರ್ದ್ಡು. ಮರಿಗಯೋತೆ ಯೇಸು ಹಮ್ಮೆ ಜಿವೊ ಲ್ಲಾ ಕರಿ ಪಾಲನೆ ಬೋಲ್ಯೊ.

20 ಆ ವಾತೆನಿ ಬಾರೇಮ ಮನ ಜಾಖ್ವತ್ ಮಾಲುಮ್ ಕೊಡುನಿ ಇನಾಖ್ವಾಜೆ ಮೇ ಪುಲ್ಲಾವನ ಕೊಗಯೋನಿ ಕತೋಬಿ ಮೇ ಪಾಲನ, 'ತೂ ಯೆರೂಸಲೇಮ್ಮ ಜೈನ್ ನ್ಯಾವ್ವ ತೀರ್ಮಾನ್ ದೇವ್ವುಕರಿ ಮೆ ಬೋಲ್ಯೊ.

21 ಇನಾಖ್ವಾಜೆ, ಪಾಲನೆ 'ಚಕರ್‌ವರ್ತಿ ಕೈಸರ್‌ಥೀಸ್ ಮಾರು ಜಾವಾಬ್‌ನ ಪೂಚ್‌ತಾಚ್ ಹುವಾದೆ ತಬ್‌ಲಗು ಮನ ಬಚಾಡ್ವು' ಕರಿ ಬೋಲಿಲಿದೊ. ಇನಾಖ್ವಾಜೆ ರೋಮ್‌ನ ಚಕರ್‌ವರ್ತಿ‌ಕನ ಮೋಕ್ಲಗು ಇನ ಕಾವ್ಲಿಮ ರಾಕ್ವುಕರಿ ಹುಕುಮ್‌ದಿದೊ".

22 ಅಗ್ರಿಪ್ಪನೆ ಫೆಸ್ತನ, "ಆ ಅದ್ಮಿ ಬೋಲಾಸ್ತೆ ಖ್ವಮ್‌ಜಾನ ಮನಾಬಿ ಪಸಂದ್ ಲ್ಲಾ" ಕರಿ ಬೋಲ್ಯೊ ಪೆಸ್ತಾನೆ, "ಯೋ ಬೋಲಾನು ತೂ ಕಾಲೆ ಖ್ವಮ್‌ಜೆಜಾಯ್" ಕರಿ ಭವಾಬ್ ದಿದೊ.

23 ಅಗಲ್ಯದನ್ನೆ ಅಗ್ರಿಪ್ಪರಾಜ ಅಜ್ಜು ಬೆರ್ನಿಕೆರಾಣಿ ಘಣು ರಂಗ್‌ರಾಜ್‌ಥಿ ಶಿಪಾಯಿನ ಮೋಟಕನ ಅಜ್ಜು ಕೈಸರ್‌ಥೀನ ಗಲ್‌ಥವಾನಿ ಜೋಡ್ವು ಸಭೆನ ಆಸ್ತಾನ್ಮ ಆವಖ್ವತರ್. ಪಾಲಾನ ಮಹಿ ಬುಲೈಲಿನ್ ಆವ್ವುಕರಿ ಫೆಸ್ತನೆ ಶಿಪಾಯ್ನ ಹುಕುಮ್ ಕರೈಲ್ಯೊ.

24 ತದೆ ಫೆಸ್ತನೆ, "ರಾಜ ಅಗ್ರಿಪ್ಪ ಹಮಾರ ಜೋಡ್ವು ಮಳಿಐರ್ದ್ವಾತೆ ಖ್ವಾರಾಸ್ ಅದ್ಮಿವೊ; ತುಮೆ ದೇಖುಕರಾತೆ ಆ ಅದ್ಮಿನಪರ್ ಹಜ್ಜಾಲ್ವಾತೆ ಅಜ್ಜು ಯೆರೂಸಲೇಮ್ಮ ರ್ದ್ವಾಳು ಖ್ವಾರುಸ್ ಯೆಹೂದ್ಯರ್ ಮನ ಗಲತ್ ಬೋಲಿನ್, ಆ ಜಿವೊ ನಾರ್‌ಡ್ವೇಣು ಕರಿ ಚಿಕ್ರಾಣ್ ಮಾರ್ಲ್ಯೊ.

25 ಮೇ ಅನ ವಿಚಾರ್ ಕರಾನಿ ವಖ್ವಾತೆ ಶನು ಝೂಟುಬಿ ಕೋ ದೇಖೋನಿ ಕತೋಬಿ ಕೈಸರ್‌ಥೀಸ್ ನ್ಯಾವ್‌ನು ತೀರ್ಪ್‌ಹುವಾದೆ ಕರಿ ಬೋಲಿಲಿದೊ. ಇನಾಖ್ವಾಜೆ ಅನ ರೋಮ್‌ನ ಮೋಕ್ಲಾನ ತೀರ್ಮಾನ್ ಕರಿರಾಖೊಸ್.

26 ಕತೋಬಿ ಅನಿ ವಾತೆನಿ ಬಾರೇಮ ಕೈಸರೈನ ಲೀಖಾನ, ಬರಾಬರ್‌ನು ಅಪರಾದ್ ಶಾತ್ತ್ವಿ ಮನ ಕೊದೆಖಾವನಿ, ಇನಖ್ವಾಜೆ ಮೇ ಅನ ತುಮಾರ ಖ್ವಾರಾನ ಖ್ವಾಮ್ಜೇಬಿ ವಿಶೇಷ್‌ಥಿ ಛಾತೆ ರಾಙ ಅಗ್ರಿಪ್ಪನ ಖ್ವಾಮ್ಜೆ ಲೈರಾಖ್ಯೊಸ್. ಇನಖ್ವಾಜೆ ತುಮೆ ಅನ ವಿಚಾರ್‌ಕರೀನ್ ಅನಿ ಬಾರೇಮ ಇನ ಲೀಖಾನ ಶನಿತೋಬಿ ವಾತೆ ದಿಶುಕರಿ ಬೋಲಿನ್ ಟಿವೈರ್ಟ್ವೊಸ್.

27 ಮೇ ಸೋಚಾನಿತರ ಏಕ್ ಖೈದಿನ ವಿರೋದ್ ಛಾತೆ ಅಪರಾದ್ವ ಮಾಲುಮ್ ನಾ ಕರೈತೊ ಇನ ಸೀಜರ್‌ಕನ ಮೋಕ್ಲಾನು ಬರಬ್ಬರ್ ಕೊಯ್ತಿಕರಿ ಬೋಲ್ಯೊ.

26

ರಾಙ ಅಗ್ರಿಪ್ಪನ ಖ್ವಾಮ್ಜೆ ಪೌಲನು ಙವಾಬ್

1 ಅಗ್ರಿಪ್ಪ ಪೌಲನ, “ಹಮ್ಮೇಥೊ ತಾರ ಭಣೀಥು ವಾತೆ ಬೋಲಿಙಾಯ್” ಕರಿ ಬೋಲ್ಯೊ ತದೆ ಪೌಲನೆ ಹಾತ್‌ಪಾಡೀನ್ ಙವಾಬ್ ದೇತೊಹುಯಿನ್ ಅಮ್ ಬೋಲ್ಯೊ;

2 ರಾಙ ಅಗ್ರಿಪ್ಪ ಯೆಹೂದ್ಯರ್ ಮಾರಪರ್ ಅಖ್ವಿ ಅಪರಾದ್ ಕರಸ್ಸಿ ಆಙ್ ತಾರ ಖ್ವಾಮ್ಜೆ ಇನು ಙವಾಬ್ ದ್ಯವಾನಿ ಅವಕಾಶ್ ಮಳಿರೈತ್ತಿ ಮಾರು ಮೇಸ್ ಧನ್ಯಕರಿ ಬೋಲಿಲೇವುಸ್.

3 ಶನಕತೊ ಯೆಹೂದ್ಯರ್‌ಮ ಛಾತೆ ಅಖ್ವುಸ್ ಚಾಲ್ ಭಲಣ್‌ಬಿ, ಅಙು ಯೆಹೂದ್ಯರ್ ವಿಚಾರ್ನ್ ವಾದಕರುಕರಾತೆ ಬಾರೇಮ ತುನ ಅಛ್ಚಿನಿತರ ಮಾಲುಮ್ ಛಾ. ಇನಖ್ವಾಜೇಥಿ ಮಾರಿ ವಾತೆನ ಧೀಮೆಥಿ ಖ್ವಮ್‌ಜ್‌ಣು ಕರಿ ಗಿಂಗೈಲೇವುಸ್.

4 “ಮೆ ಅಡ್ಡಾಣಿಥೋಬಿ ಯೆರೂಸಲೇಮ್ಮ ಮಾರ ಶೊಂತ್ ದೇಖ್ತಿನ ಅದ್ವಿವೋನಿಜೋಡೆ ರೈನ್ ಜಿವ್ವುಕರೈತೆ ರೀತಿ ಅಖ್ವು ಯೆಹೂದ್ಯರ್‌ನ ಮನ ಮಾಲುಮ್ ಛಾ.

5 ಹಮಾರಿ ಧರ್ಮ್‌ನು ಙಾಖ್ವತ್ ಕರಣ್‌ಥಿ ರ್ವವಾನು ಫರಿಸಾಯರ್‌ನು ಪದತ್ತಿನಿ ಅನುಸಾರ್ ಫರಿಸಾಯ ಹುಯಿನ್

ಚಾಲಿಲಿದೊಕರಿ ಶುರುವಾತ್‌ಥೂಬಿ ಇವ್ವುನ ಮಾಲುಮ್ ಲ್ಲಾ. ಸಾಕ್ಷಿ ಬೋಲಾನು ದಿಲ್ ಉಷೇತೊ ಬೋಲೆಜಾಯ್.

6 ದೇವ್ನೆ ಹಮ್ಮೇಬಿ ಅಪ್ಪ ಗುರುಗುರಬ್ಬೊನ ಕರ್ರೊತೆ ವಾಗ್ವಾನ್ನ್ ಉಷೆಕರಿ ವಿಶ್ವಾಸ್ತಾಜೆ ಮೇ ಆಜ್ ನ್ಯಾವ್‌ನಿ ವಿಚಾರಣೆಮ ಭಿಯೋಸ್.

7 ಹಮಾರು ಭಾರ ಖೂಮ್‌ವಾಳು ದನ್‌ರಾತ್ ಭರೋಖ್ವಾಡಿ ದೇವ್ನ್ ಆರಾದನೆ ಕರ್ತುಹುಯಿನ್, ಯೋ ವಾಗ್ವಾನ್ನ್‌ಫಲ್ ಲೀಲ್ಯಾವನಖ್ವಾಜೆ ಟಿವೈರ್ದ್ವಾಸ್. ರಾಜ್, ಯೋಸ್ ಭರೋಖ್ವಾನಿ ಬಾರೇಮ ಯೆಹೂದ್ಯರ್‌ಖ್ವಾರು ಮಾರಿ ವಿರೋದ್ ಅಪರಾದ್ ಲಗಾಡುಕರಸ್.

8 ದೇವ್ನೆ ಮರ್ರ್ಯಾಹುಯಮಾಥು ಉರಾಡ್ಯೊತೆ ನಂಬಾನ ಕೊಹುವಾನಿಕರಿ ತುಮೆ ಶನ ಖ್ವಾಜ್ ಕರೋಸ್?

9 ಏಕ್ ಹಗಾಮ್ ನಜರೇತ್‌ನು ಯೇಸುನ ನಾಮ್ನ ವಿರೋದ್‌ಫಿ ಕೈಏಕ್ ಕಾಮ್ ಮೆ ಚಲಾವುಕ್ವರಿ ಸೋಚಿರಾಖ್ಯೊಥೊ.

10 ಯೆರೂಸಲೇಮ್ ಇಮ್ನಾಸ್ ವಿಶ್ವಾಸಿನ ವಿರೋದ್‌ಕರೀನ್ ಕೈಯೆಕ್ ಕಾಮ್ ಕರ್ರೊಥೊ. ಯೋ ವಿಶ್ವಾಸಿಖ್ವಾರಾಮ ಕೆತ್ರಾಕಿಭಣಾನ ಜೇಲ್‌ಮ ಫಾಲಾನ ಮಹಾಯಾಜಕರನ್ನ ಮನ ಅದಿಕಾರ್ ದಿದೊ. ಇವ್ವುನ ಮರಣ್ಣಿ ತೀರ್ಪ್‌ನಿ ವಖ್ತೆ ಮೇ ಇನ ಮಾನಿಲಿದೊ.

11 ಅಖ್ವಾ ಸಬೇನು ಮಂದಿರ್‌ಮಾಬಿ ಮೇ ಕೈಯೇಕ್‌ಹಲ್ಲ ಇನ ಖ್ವಿತ್ತಾಪ್ಪಿ ದೀನ್ ಇನೇಫಿ ದೇವ್ನ್ ದೂಷಣೆನಿ ವಾತೆ ಬೋಲಾವಾನಿತರ ಕೋಶಿಶ್‌ಕರ್ರೊ ಯೋ ವಿಶ್ವಾಸಿಖ್ವಾರಾಪರ್ ಇರಾದೊ ಕರ್ತೊಹುಯಿನ್ ಇವ್ವುನ ಥೂಂಡಿನ್ ಲತಾಡ ದೈವಾನಖ್ವಾಜೆ ಭಾರ್ ದೇಖ್ವೊ ಖ್ವಿಯೇರ್‌ಮಾಬಿ ಗಯೋಥೊ.

ಇನ ಹುಯುತೆ ಬದ್ಲಾವ್ವಿನ ಬಾರೇಮ ಪೌಲನೆ ಬೋಲ್ಯೊತೆ

(ಅಪೊ 9:1-19; 22:6-16)

12 ಏಕ್ ಹಲ್ಲ ದಮಸ್ಕನ ಜಾವಾನ ಗಲ್‌ಥಯಾಜಕರ್ದಿ ಅದಿಕಾರ್‌ನಾಬಿ ಹಕ್ಕ್ ಲೀನ್ ದಮಸ್ಕನ ಜಾವಾನಿ ವಾಟ್‌ಪರ್ ವಳೇಜಾತೊಥೊ.

13 ತದೆ ಥೊಪಾರ್ ಹುಯಿರ್ದು. ಅಪ್ಪರ್‌ಥೂಸ್ ಸೊರ್ಗಮಾಥು ಚಾಂದ್‌ಥೀಬಿ ಜಾಖ್ತ್ ಏಕ್ ಉಜಾಳು ಆಯಿನ್ ಮಾರಾ ಅಶ್‌ಪಿಶ್ ಅಜು ಮಾರಾಕೇಡೆ ಉಳಿಯಾವ್ತು ಥೂತೆ ಇವ್ಣ ಅಶ್‌ಪಿಶ್ ಉಜಾಖ್ತ್‌ಥಿ ಝಮ್‌ಕ್ಯು.

14 ಹಮೆ ಅಖ್ವಾಸ್‌ಜಣ ಭಮೀನ್‌ಪರ್ ರಡ್ಕಿಗಯ. ತದೆ ಸೌಲ ಸೌಲ ಮನ ಶನ ಖ್ತಾವಸ್? ಕಾಟಾನ ಲರಾನ್ ಲಾತ್ ಮಾರಾಥಿ ತುನಾಸ್ ದರದ್, ಕರಿ ಇಬ್ರಿಯ ವಾತೆಮ ಬೋಲಾನಿ ಏಕ್ ಅವಾಜ್‌ನ ಖ್ವಮ್‌ಜ್ಯೊ.

15 ತದೆ ಮೇ, “ಪ್ರಭು, ತೂ ಕೋಣ್” ಕರಿ ಬೋಲಖ್ತರ್ ಪ್ರಭುನೆ, “ತೂ ಖ್ತವ್‌ಕರಸ್ತೆ ಯೇಸುಸ್ ಮೇ.

16 ಕತೋಬಿ ತೂ ಉರೀನ್ ಭೀರೆ; ತುನ ಮಾರೊ ಸೇವಕ್ ಕರೀನ್‌ಬಿ ಸಾಕ್ಷಿಕರೀನ್‌ಬಿ ನೇಮಿಶಾವನಖ್ವಾಜೆ ಮೇ ತುನ ದೆಖಾಯೆತೆ ವಾತೆನಾಬಿ, ಮೇ ತುನ ದೈವಾನು ದರ್ಶನ್‌ಖ್ವಾರನಿ ಬಾರೆಮಾಬಿ ತೂ ಅದ್ಮಿಖ್ವಾರನ ಸಾಕ್ಷಿ ಹುಯಿರ್ದುಸ್ ಅನಖ್ವಾಜೆಸ್ ಆವಖ್ತು ಮೇ ತುನ ದೇಖಾಯೊ.

17 ಮೇ ತುನ ತಾರು ಇಸ್ರಾಯೇಲ್ ಅದ್ಮಿಥೀಬಿ ಯೆಹೂದ್ಯರ್‌ಕಾಹೆತೆ ಅದ್ಮಿಥೀಬಿ ತುನ ಖರಾಬ್ ನಾಹೊಣುತೆತಿಮ್ ಬಚ್ಚಾಡಿಶ್ ಮೇ ತುನ ಇವ್ಣಕನ ಮೋಕ್ಲಕರುಸ್.

18 ತೂ ಇವ್ಣಖ್ವಾರಾನ ಖ್ವಾಚನ ಖ್ವಮ್‌ಜಾಡೀನ್ ಇವ್ಣನ ಅಂಧಾರಮ ಥೂತೆ ಇವ್ಣಡೋಳನ ಉಜಾಳಾಮ ಆವಾನಿತರಾಬಿ ಶೈತಾನ್‌ನಿ ಅದಿಕಾರ್‌ಥಿ ದೇವ್‌ಭಣಿ ಫರಾನಿತರಾಬಿ ಕರ್ದು. ತದೆ ಇವ್ಣ ಪಾಪ್‌ಖ್ವಾರು ಮಾಪ್‌ಲುಷೆ. ಪರಿಶುದ್ಧರ್‌ನಿ ಜೋಡ್ಡ್ ಹುಕುಮ್ ಲೀಲಿಶೆ. ಇವ್ಣ ಡೋಳ ಉಖಡ್‌ನುಕರಿ ಇವ್ಣಕನ ಮೇ ತುನ ಮೋಕ್ಲಸ್ ಕರಿ ಬೋಲೊ.

ಪೌಲ ಇನಿ ಕಾಮ್‌ಖ್ವಾರೇಮ ವಾತೆಬೋಲೊತೆ

19 ಅನಖ್ವಾಜೆ ಅಗ್ರಿಪ್ಪ ರಾಜ, ಪರಲೋಕ್‌ಥು ಮನ ಹುಯೊತೆ ಯೊ ದರ್ಶನಾನ ಮೇ ಖ್ವರಮ್ ಕಾಡುಕೊಯ್ತು.

20 ಪಹಿಲೆ ಯೆರೂಸಲೇಮ್ಮ ಛಾತೆ ದಮಸ್ಕಮಾಬಿ, ಯೂದಾಯನ ಅಖ್ವಾ ತಭರ್‌ಖಾಮಾಬಿ ಛಾತೆ ಇವ್ವುನ ಅಜು ಯೆಹೂದ್ಯರ್‌ಕಾಹೆತೆ ಅದ್ಮಿನಾಬಿ, ತುಮೆ ದೇವ್‌ಭಣಿ ಫರ್‌ನು ಕರೀಬಿ ತುಮಾರು ಪಾಪ್‌ಭರ್ಯ್ ಜಿವ್ವನ ಮ್ಹೇಲಿನ್ ದೇವ್‌ಭಣಿ ಫರಿಙ್ತಾವ್ಣುಕರಿಬಿ ಆಸ್ ಯೋಗ್ಯಾನು ಅಲ್ಫಕಾಮ್ ಪ್ರಚಾರ್ ಕರ್ಯ್ಚೊ.

21 ಯೊ ಕಾರಣ್‌ಖ್ವಾಜೆ ಯೆಹೂದ್ಯರ್ ಮನ ದೇವ್ ಮಂದಿರ್‌ಮ ಧರೀನ್ ಮಾರಿನಾಕ್ಣುಕರಿ ಕೋಶಿಶ್ ಕರ್ಯ್ಚೊ.

22 ಕತೋಬಿ ದೇವ್ ಮನ ಯೋ ದನ್ತ್ ಮದತ್ ಕರ್ಯ್ಚೊ. ಯೊ ಹಮ್ಮೆಲಗೂಬಿ ಮನ ಮದತ್ ಕರುಕರಸ್. ಇನಾಖ್ವಾಜೆಸ್ ಆಜ್ ಹಜ್ಜಾ ಭಿಯೋಸ್ ಅಜು ಮೆ ದೇಖ್ಚೊತೆ ಘಟನೆನಿ ಬಾರೇಮ ಅದ್ಮಿಖ್ವಾರನ ಸಾಕ್ಷಿ ಬೋಲುಕರುಸ್. ಮೋಶೆ ಅಜು ಪ್ರವಾದಿಖ್ವಾರು ಖ್ವಾಪೆ ಹುವಾನು ಬಾರೇಮ ಖ್ವಮ್‌ಙಾಡ್ಯತೆ ವಾತೇಸ್ ಪಣ್ಣಿ ಖಿವೂಬಿ ನವು ಕೊಬೋಲ್ಚೊನಿ.

23 ಯೇಸುನೆ ಖ್ವತಾಪ್ಣಿನ ಪಾಡಿನ್ ಅಜು ಮರ್ಯ್‌ಹುಯಮಾಥು ಪಾಳ್ತುಜಿವ್ಚೊ ಹುಯಿನ್ ಆವಾಮ ಪಹಿಲೊ ಹುಯಿನ್ ಉರೀನ್ ಯೆಹೂದ್ಯರ್‌ನಾಬಿ ಯೆಹೂದ್ಯರ್‌ಕಾಹೆತೆ ಇವ್ವನಾಬಿ ರಕ್ಷಣೆನ ಉಙಾಳನ ವತಾಳವಾಳೊ ಹುಯಿರಯ್ಚೊಸ್.”

24 ಅಮ್ ಪೌಲನೆ ಇನಭಣಿಥು ಝವಾಬ್ ದೈವಾನಿ ವಖ್ವಾತೆ; ಫೆಸ್ತನೆ, “ಪೌಲ, ತೂ ದಿವಾನೊ ಹುಯಿಗೊ ಙಾಖ್ವತ್ ಪಡಂತ ತುನ ದಿವಾನನಿತರ ಕರಿನಾಖ್ಚು” ಕರಿ ಚಿಕ್ರಿನ್ ಬೋಲ್ಚೊ.

25 ತದೆ ಪೌಲನೆ, “ಮೋಟೊ ಮಹರಾಙ ಹುಯಿರಯ್ಚೊತೆ ಫೆಸ್ತ ಮೇ ದಿವಾನೊಕಾಹೆ ಮೇ ಅಲ್ಫಿ ದಿಮಾಕ್‌ಥಿ ಗಂಭೀರ್‌ಥಿ ಖ್ವಾಙು ವಾತೆನಾಸ್ ಬೋಲುಕರುಸ್.

26 ಅಗ್ರಿಪ್ಪ ರಾಙ ಆ ವಾತೆಖ್ವಾರು ಅಲ್ಫಿನಿತರ ಮಾಲುಮ್ ಕರಾಖ್ಯೊಹುಯೊ; ಶನಕತೊ ಇನಖ್ವಾಪ್ಣೆ ಬರಬ್ಬರ್‌ಥೀಸ್ ವಾತೆ ಬೋಲುಸ್ ಅನಾಮ ಏಕ್‌ಬಿ ಇನ ಲಭಿಪಿಕೊರಯ್ಚೊನಿ ಕರಿ ನಂಬಿರಾಖ್ಯೊಸ್, ಶನಕತೊ ಆ ಏಕ್ ಕೋಣಾಮ ಙಾಲ್ಯತೆ ವಾತೆ

ಕಾಹೆ.

27 ಅಗ್ರಿಪ್ಪರಾಜ ತೂ ಪ್ರವಾದಿ ಖಾರಾನ ನಂಬಾಸ್ಕಿಶು? ತೂ ವಿಶ್ವಾಸ್ ಕರೀಶಾಕರಿ ಮನ ಮಾಲುಮ್” ಕರಿ ಬೋಲ್ಯೊ;

28 ತದೆ ಅಗ್ರಿಪ್ಪರಾಜನೆ ಪಾಲನ ಅಮ್ ಬೋಲ್ಯೊಕಿ, “ಘಣು ಶುಲ್ಬಾಧಿ ಮನ ಕ್ರಿಸ್ತಾನ್‌ವಾಳೊ ಕರ್ನುಕರಿ ತೂ ಸೋಚಿರಾಖ್ಯೊಸ್ಕಿ ಶು?” ಕರಿ ಬೋಲ್ಯೊ.

29 ಇನ ಪಾಲನೆ; ನ್ಹಾನಿ ಕೋಶಿಶಾಧಿ ರ್ವೊ, ಮೋಟಿ ಕೋಶಿಶಾಧಿ ರ್ವೊ, ಯೊ ಮನ ಮುಖ್ಯ ಕಾಹೆ. ತೂಸ್ ಖಲಿಕಾಹೆ ಆಜ್ ಮನ ಖ್ವಮ್‌ಜುಕರಾತೆ ಹರೇಕ್‌ಜಣು ಮಾರಿನಿತರ ಹೋಣುಕರಿ ಮೆ ದೇವ್ ಪ್ರಾರ್ಥನೆಕರುಸ್ ಕತೋಬಿ ಆ ಖ್ವಂಕಳ್‌ಮ ಪಣ್ಣಿ ತುಮೆ ನಾಭಕ್‌ಡಾವ್ಣು ಕರಿಬೋಲ್ಯೊ.

30 ರಾಜ ಅಗ್ರಿಪ್ಪ, ರಾಜ್ಯಪಾಲ್ ಪೆಸ್ತ, ಬೆರ್ನಿಕೆ ಅಜು ಇವ್ಣಬೋಡೆ ಬೆರುಥೂತೆ ಅದ್ಮಿಖಾರು ಉರಿಭೀರನ್.

31 ಇನಪಾರ್ ಭಾರ್‌ಜೈನ್ ಇವ್ಣೆ “ಆ ಅದ್ಮಿನ ಮರಣ್ಣಿ ದಂಡನೆ ನತರ್ ಬೇಡಿ ಫಾಲನು ಅನೆ ಶಾತ್ಪಿ ಕೊಕರ್ರೊನಿ ಕರಿ ಇವ್ಣ ಇವ್ಣಾಮಸ್ ಬೋಲಾಲಗ್ನು.

32 ತದೆ ಅಗ್ರಿಪ್ಪನೆ ಫೆಸ್ತನ, “ಆ ಅದ್ಮಿ ಕೈಸರನ ಖ್ವಾಮ್ಣೆ ಬೋಲಿಲೆವುಸ್‌ಕರಿ ನಾಬೋಲ್ಯೊಹೊತ್ತೊ ಅನ ಛುಟ್ಕಾರ್ ಕರೇಜಾಯಿಥು ಕರಿಬೋಲ್ಯೊ.

27

ಪಾಲನೆ ರೋಮ್‌ನ ಗಯೋತೆ

1 ಹಮೆ ದರ್ರಾವ್ಣ ಮಾರಗಾಧಿ ಇಟಲಿನ ಜಾವ್ಣುಕರಿ ತೀರ್ಮಾನ್ ಹುಯು. ಪಾಲನಾಬಿ ಬಿಜು ಥೋಡು ಖೈದಿಖಾರಾನ ಯೂಲ್ಯ ಕರಿ ಏಕಾಭಣೊ ಖ್ವೊಶಿಪಾಯಿನೊ ಮೋಟೊ ಹುಯಿರ್ರೊಥೊ. ಯೋ ರಾಜನಿ ಡಂಡ್ ಕಾಮ್ ಕರಾವಾಳೊ ಹುಯಿರ್ರೊಥೊ.

2 ತದೆ ಅದ್ರಮಿತ್ತಿಯಧು ಐನ್ ಏಷ್ಯಾನ ಅಲಕ್ ಅಲಕ್ ತಬರ್‌ಖಾನು ಜಾವಾನ ತಯಾರ್ ಹುಯಿರ್ದೀತೆ, ಜಹಾಜ್ ಹಮೆ ಚಡೀನ್ ಚಾಲ್‌ಕುಚ್ ಕರ್ನ್ ಇನಾಮ ಥೆಸಲೋನಿಕಥೊ ಆಯೊತೆ ಮೆಕೆದೋನ್ಯವಾಳೊ ಅರಿಸ್ತಾರ್ಕ್ ಹಮಾರಿ ಜೋಡ್ತೊ.

3 ಇನವ್ವಾಣೆ ಹಮೆ ಸೀದೋನ್‌ಖ್ವಯೇರ್ನ್ ಜೈನ್ ಪೋಚ್ಕ್ ಯೂಲ್ಯನೆ ಪೌಲನಪರ್ ಗೋರ್ ಕರಾವಳೊಹುಯಿನ್, ಇನ ದೋಸ್ತಿಖ್ವಾರನಕನ ಮದತ್ ಲೀಲ್ಯಾವನಖ್ವಾಜೆ ಇನ ಹುಕುಮ್ ದಿದೊ.

4 ತದೆ ಹಿಜ್ವಾಥ ನಿಕ್ಕಿನ್ ಜಹಾಜ್‌ಮ ಜಾವಾನಿ ವಖ್ತಮ್ ಖ್ವಾಪ್ಣೆನೊ ವಹಿರೊ ವಾಗುಕರ್ತುಫೂತೆ ಇನಾಖ್ವಾಜೆ ಹಮೆ ಸೈಪ್ರಸ್ ಟಾಪನ ಖನ್ನೆಕರಿ ಗಯ.

5 ಕಿಲಿಕ್ಯನಾಬಿ ಪಂಫುಲ್ಯನಾಬಿ ಮ್ಹೋರೆ ಹುಯಿರೋತೆ ದರ್ರಾವ್ ಉಲಾಂಗಿನ್, ಲುಕೀಯನು 'ಮುರ' ಕರಿ ಝಗೋಕನ ಆಯಿನ್ ಪೋಚ್ಕ್.

6 ಹಿಜ್ವಾ ಇಟಲಿನ ಜಾವಾನಿ ಅಲೆಕ್ಸಾಂಡ್ರಿಯ ಖ್ವಯೇರ್ನ್ ಜಹಾಜ್‌ನ ಖ್ವೋಶಿಪಾಯಿನ ಮೋಟಾನೆ ದೇಖಿನ್, ಹಮೂನ ಇನಾಮ ಛಡಾಯೊ.

7 ಹಮೆ ಹಳ್ಳೂಥಿ ಕೈಏಕ್ ದನ್‌ಲಗು ಜಹಾಜ್‌ನಿಚಾಲ್ ಕರ್ತಹುಯಿನ್ ಘಣು ಮುಶ್ಕಿಲ್‌ಥಿ ಖ್ವರ್ತಿನ ಸ್ನೀಡ ಖ್ವಯೇರ್ನ್ ಐನ್ ಪೋಚ್ಕ್ ಖ್ವಾಪ್ಣೆನೊ ವಹಿರೊ ವಾಗುಕರ್ತುಫೂತೆ ಇನಾಖ್ವಾಜೆ, ಯೋ ಮಾರಗ್‌ಮ ಅಗಾಡಿ ಜಾವಾನ ಹಮೂನ ಕೊಹುಯುನಿ. ಇನಾಖ್ವಾಜೆ ಹಮೆ ಕ್ರೇಟ್ ಟಾಪಾನ ಕನಾರೆಕರಿ ಸಾಲ್ಮೋನೆನ ಖನ್ನೆಐನ್,

8 ಹಮೆ ಮುಶ್ಕಿಲ್‌ಥಿ, ಯೋ ಟಾಪನ ಕನಾರೆ ಅಗಾಡಿ ಜಾತಹುಯಿನ್ ಶನ್‌ಗಾರ್ನುಕೊಲ್ಲಿ ಕರಿ ಏಕ್ ಝಗೋಕನ ಆಯ. ಯೋ ಲಸಾಯಕರಿ ಖ್ವಯೇರ್ನ್ ಖನ್ನೆಫೂ.

9 ಅಮ್ಮಸ್ ಘಣಾದನ್ ನಿಕ್ಕಿಗಯು. ಯೆಹೂದ್ಯರ್‌ನ ಪಟ್ಟಿನೊ ದನ್‌ಬಿ ಖ್ವತಮ್ ಹುಯಿಗಾಥ. ಇನಾಖ್ವಾಜೆ ಪೌಲನೆ ದರ್ರಾವ್‌ಮ ನಿಕ್ಕಾನು ಮುಶ್ಕಿಲ್ ಕರಿ ಬೋಲ್ಯೊ.

10 ತದೆ ಪೌಲನೆ ಇವ್ವುನ, “ಅದ್ಮಿವೊ ಆ ಚಾಲ್‌ಥಿ ಜಹಾಜ್‌ನಾಬಿ, ಇನಾಮಲ್ಲಾತೆ ರಾಫಾನಾಬಿ, ಅತ್ರೇಸ್‌ಕಾಹೆತೆ ಅಪ್ಪ ಜಾನ್ನಬಿ, ಘಣು ವದೇಖ್ವಾಬಿ ಲುಕ್ವಾನ್‌ಬಿ ಉಷೆಕರಿ ಮನ ದೆಖಾವಸ್” ಕರಿ ರೈತಾಯೊ.

11 ಕತೋಬಿ ಪೌಲನೆ ಬೋಲ್ಯೊತೆ ವಾತೆಥಿಬಿ, ಜಹಾಜ್‌ನೊ ಯಜಮಾನ್ನಿಬಿ ಚಲಾವವಾಳನಿ ವಾತ್ಸ ಖ್ವೊಶಿಪಾಯಿನ ಮೋಟಾನೆ ಕಾನ್‌ದಿದೊ.

12 ಯೋ ಬಂದನೊ ತಬರ್‌ಖೊ ರಣ್ಣಹಗಾಮ್ ಕಾಡಾನ ಯೋ ಜಹಾಜ್ ಅಫ್ಫಿರುಗೊ ಕೋಥೂನಿ. ಇನಖ್ವಾಜೆ ಹಿಜ್ವಾಧು ನಿಕ್ಕಿನ್, ಜಾವಾನು ಹುಯುತೊ ಕಿಮ್‌ಬಿ ಫೆನಿಕ್ಸ್ ಗಾಮ್ವ ಜೈನ್ ಹಿಜ್ವಾಸ್ ಯೋ ರಣ್ಣಹಗಾಮ್ ಕಾಡ್ವಕರಿ ಘಣು ಅದ್ಮಿಖ್ವೊಜ್ ಕರ್ಯ್. ಫೆನಿಕ್ಸ್ ಕ್ರೇಟ್ ಟಾಪಾನು ಏಕ್ ಬಂದನೊ ತಬರ್‌ಖೊ, ಯೋ ಈಶಾನ್ಯ ದಿಕ್ವಾಬಿ, ಆಗ್ನೇಯ ದಿಕ್ವಾಬಿ, ಆಮಖ್ವಾಮೆ ಥು.

ದರ್ಯಾವಮ ತೋಫಾನ್

13 ತದೆ ದಕ್ಷಿಣ್ ಭಣೀಥು ವಹಿರೊ ಹಳ್ಳೆಖ್ವು ವಾಗಲಗ್ಯೊ ಇವ್ವೆ ಉದ್ದೇಶ್ ಹಕ್ಲಾಲ್ ಹುಯುಕರಿ ಖ್ವೊಜ್ ಕರೀನ್, ಲಂಗಾರನ್ ಫೋಡಿಲಿನ್, ಕ್ರೇಟ್ ಟಾಪಾನ ಕನಾರೇಸ್‌ಕರಿ ಪಡ್ತಹುಯಿನ್ ಜಹಾಜ್‌ಪರ್ ನಿಕ್‌ಳ್.

14 ಕತೋಬಿ ಜರಸ್‌ಫಾಡೀಮ ಈಶಾನ್ಯ ಮಾರುತ ಕರಿ ಅಪಟ್‌ರುಪಟ್‌ನೊ ವಹಿರೊ ಟಾಪಾಮ ವಾಗಲಗ್ಯುಥು.

15 ಜಹಾಜ್ ಯೋ ವಹಿರಾಮ ಖ್ವೊಪ್‌ಡಿನ್, ಹಮೆ ಕೋಶಿಶ್ ಕರಾನು ಮ್ಹಂದಿದ. ಅಜು ಅಗಾಡಿ ಜಾವಾನ ಕೋ ಹುಯುನ್ತೆ ವಹಿರೊ ಕೀಕಡ್ ವಾಗಸ್ಕಿ ಥೀಕಡ್ ಕರಿಶ್ ಜಹಾಜ್‌ನ ಧಕೆಲಾವ್ತಹುಯಿನ್ ಗಯು.

16 ಹಮೆ ಕ್ಲಾಡ ಕರಿ ಏಕ್ ನ್ಹಾನು ಟಾಪನ ಓಲೆಕರಿ ಗಯ. ತದೆ ಹಮೆ ಜಹಾಜ್‌ವುಡೂತೆ ನ್ಹಾನಿದೋಣಿನ ಮಹಿ ಪಾಡಿನ್ ಬರೋಬರ್ ಕರ್ವಾನುಹುಯು.

17 ಇನ ಉಪ್ಪರ್ ಪಾಡಿಹುಯಗು ತದೆ ಶಿಂದ್ರಾನ ಪಾಡಿನ್ ಜಹಾಜ್‌ನ ಹೇಟ್ ಭಾಂದ್ಲ್ಯ ಇನಕೇಡೆಥು “ಸುರ್ತಿಸ್” ಕರಿ ರೇತ್ಸೊ ಟಿಮ್ತಾಮ

ಝಹಾಙ್ ಪೇಶಿಙ್ಗಾಶೆಕರಿ ಡರ್‌ಥಿ, ಝಹಾಙ್‌ನ ಉಪ್ಲಿಬಾಙ್ತುನು ಝಹಾಙ್‌ನ ಮಿಲಾವನ ಜಿನಖ್ವಾನ್ ಉತಾರಿನ್ ವಹಿರೊ ವಾಗುಕರಾತೆ ಬಾಙ್ತುಸ್ ಝಹಾಙ್ ತೇಲಾದೆಕರಿ ಮ್ಹೇಲ್ಯು.

18 ಇನವ್ಹಾಣೆ ತೋಫಾನ್ನೊ ವಹಿರೊ ಅಪಟ್ಲಫಟ್ ವಾಗಲಗ್ತುತೆ ದೇಖಿನ್, ಅದ್ನಿಖ್ವಾರು ಝಹಾಙ್‌ಮ ಥೂತೆ ಥೋಡು ಖ್ವಾಮನ್‌ಖ್ವಾರು ಫೇಕಿದಿದು.

19 ಇನ ತೀನ್ ದನ್ತ ಝಹಾಙ್‌ವಾಳನೇಸ್, ಝಹಾಙ್‌ನು ರಾಘ್ತಾವ್‌ನಾಸ್ ಪಾಡಿನ್ ಫೇಕಿದಿದು.

20 ಕೈಏಕ್ ದನ್‌ಲಗು ಘಾಂದ್‌ನ ರ್ವೊ, ಶುಕ್ರನ್ ರ್ವೊ ದೇಖಾನ ಕೊಹುಯುನಿ. ತೋಫಾನ್ ಮೋಟುಸ್ ಹೋತುಆಯು. ಹಮೆ ಬಚಿಜಾಶುಕರಿ ಬೋಲಾನಿ ವಿಶ್ವಾಸ್ ಹಮಾರಮಾಥಿ ನಿಕ್ಕಿಗೈಥಿ.

21 ಯೋ ಅದ್ನಿಖ್ವಾರು ಘಣಾದನ್‌ಥು ಖಾಣುಖಾದೂಥು ಕೊಯ್ನಿ. ತದೆ ಏಕ್‌ದನ್ ಪೌಲ ಉರಿ ಭೀರಿನ್ ಇವ್ಣುನ್ “ಅಲಾ ಅದ್ನಿವೊ, ಕ್ರೇಟ್ ಟಾಪಾಥು ನಿಕ್ಕೊನಕೊ ಕರಿ ಮೇ ತುಮೂನ ಬೋಲ್ಯೊ. ತುಮೆ ಮಾರಿವಾತೆ ಖ್ವಮಙ್‌ಣುಥು. ತದೆ ತುಮೂನ ಅತ್ರಿವದೇಖ್ವೊಲುಕ್ಷಾನ್ ಕೋ ಹುಯುಹೋತ್ಲಿ.

22 ಹಮ್ಕಿತೋಬಿ ತುಮೆ ಭಾಲಿಥಿ ರ್ವೊಕರಿ ತುಮೂನ ಬುದ್ಧಿಬೋಲುಸ್; ಝಹಾಙ್ ನಾಶ್‌ಲುಶೇ ಪಣ್ಣಿ ತುಮಾರಮ ಏಕ್‌ಙ್ಣುಬಿ ಜಾನ್ ಕಾಡಿಲೆಶೆಕೊಯ್ನಿ.

23 ಗೈತೆರಾತ್, ದೇವ್‌ಕಂಥೊ ಏಕ್ ದೂತ ಮಾರಕನ ಆಯೋಥೊ. ಯೋಸ್ ದೇವ್ ಮೇ ಆರಾದನೆ ಕರುಸ್ತೆ ಮೆ ಇನೋಸ್.

24 ಯೋ ದೇವ್‌ದೂತನೆ, ‘ಪೌಲ, ಡರ್‌ನಕೊ ತೂ ಕೈಸರೈನ ಖ್ವಾಮ್ಣಿ ಭೀರೆವ್ಣು ತಾರಿ ಜೋಡೆ ಝಹಾಙ್‌ಮ ಓಳೆಙಾಸ್‌ತೆ ಖ್ವಾರಾಸ್ ಅದ್ನಿ ಜಾನ್ ಬಙ್ಗಾಡುಕರುಸ್ತೆ, ತಾರ ಉಪ್ಪರ್‌ಲ್ಯ ದಯಾನಖ್ವಾಜೆ ಕರಿ ಬೋಲ್ಯೊ.

25 ಇನಖ್ವಾಜೆ, ಅದ್ನಿವೊ ಭಾಲ್‌ಥಿ ರ್ವೊ. ಮನ ಬೋಲೈರ್‌ವ್ತೆ, ಪರಕ್ಮಸ್ ಉಷೆಕರಿ ಮೇ ದೇವ್‌ಪರ್ ವಿಶ್ವಾಸ್ ಕರುಸ್.

26 ಕತೋಬಿ ಅಪ್ಪೆ ಕೆಹೂಕಿ ಏಕ್ ಟಾಪಾನಿ ಕನಾರಿನ ಪೋಚ್ಕುಕರಿಯೇಸ್, ಕರಿ ಬೋಲ್ಯೊ.

27 ಚೌಧಾನಿ ರಾತ್ತ್ ಹಮೆ ಆದ್ರಿಯ ದರ್ರಾವ್‌ಮ ಯೊ ಜಹಾಜ್ ವ್ಹವ್‌ತುಹುಯಿನ್, ಜಾತರವ್ಹಾನಿ ವಖ್ವತ್‌ಮ, ಖ್ವಮಾರ್ ಅಧಿರಾತ್ತ್ ಇನ ಚಲಾವವಾಳನೆ ಹಮೆ ಜಮೀನ್ನ ಖನ್ನೆ ಅಯಿಗ ಕರಿ ಲಾರ್ಚು.

28 ತದೆ ಅಳ್ತಿನು ಗುಂಡ್ ಮ್ಹೇಲಿನ್ ಪಾಣಿನಿ ಗಧಾರ್ನ್ ತರೀಪ್ಪ ಕರಾಮ, ಯೊ ಖ್ವಮಾರ್ ಏಕ್ ಖ್ವೊ ಡೋಡಿಖ್ವ್ ಅಡಿ ಗಧಾರ್ ಲ್ಲಾ ಕರಿ ಮಾಲುಮ್ ಕರಿಲಿದ. ಇವ್ಣೆ ಬಿಜು ಥೋಡಿ ದೂರ್ ಜೈನ್, ಪಾಳ್ತು ಅಳ್ತಿನು ಗುಂಡ್ ಮ್ಹೇಲಿನ್ ದೇಖಾಮ, ಖ್ವಮಾರ್ ಯೊ ಖ್ವಿಡ್‌ಚಾರೀಖ್ವ್ ಅಡಿ ಥು.

29 ಜಹಾಜ್ ಬಂಡಾನ ಟಕ್ಕ್ರ್ ಖಾಶೆಕರಿ ಡರಿನ್ ಜಹಾಜ್‌ನ ಪೀರೆಥು ಚಾರ್ ಲಂಗಾರ್‌ನ ಪಾಣಿನ ಮಹಿ ಮ್ಹೇಲಿನ್ ಒಗ್ಗಿ ವ್ಹಾಣು ಹುವಾದೆಕರಿ ಪ್ರಾರ್ಥನೆ ಕರಚ್.

30 ಜಹಾಜ್ ಚಲವಾಳು ಥೋಡುಜಣು, ಲಪೀನ್ ದೋಣಿನ ದರ್ರಾವ್‌ಮ ಉತ್‌ರೈನ್ ನಿಕ್ಕಿ ಜಾವ್ಣುಕರಿ ಜಹಾಜ್‌ನ ಖ್ವಾಮ್‌ಥೂತೆ ಲಂಗಾರ್ ಅಖ್ವಾನ ಹೇಟ್ ಉತಾರಾನು ಭಾಣು ಕರಚ್.

31 ತದೆ ಪೌಲನೆ ಖ್ವೊಶಿಪಾಯಿನ ಮೋಟನಾಬಿ ಶಿಪಾಯಿಖ್ವಾರಾನ, “ಆ ಜಹಾಜ್ ಚಲವವಾಳೊ ಜಹಾಜ್‌ಮ ನಾರ್ಡ್‌ಯುತೊ ತುಮಾರೊ ಜಾನ್ ಬಚಾವನ ಉಶೇಸ್ ಕೊಯ್ತಿ” ಕರಿ ಬೋಲ್ಯೊ.

32 ಇನಖ್ವಾಜಿ ಶಿಪಾಯಿಖ್ವಾರನೆ, ಶಿಂದ್ರಾವ್‌ನ ಕತ್ರಿನ್ ದೋಣಿಯೇನ ಪಾಣಿಮ ಮ್ಹಂದಿದ.

33 ವ್ಹಾಣುಹುವಾನ ಮ್ಹಯಿಮಾ ಪೌಲನೆ ಇವ್ಣೆ ಖ್ವಾರಾಜಣನ ಶಾಪ್ಪಿ ಖಾವೊಕರಿ ಗಿಂಗೈಲಿದೊ ಅಜ್ಜು “ತುಮೆ ಗಯೋತೆ ಚೌಧರೋಜ್‌ಥೂಬಿ ಖಾಣುಸ್ ಖಾದಸ್‌ಕೋಯ್ತಿ.

34 ಹಮ್ಚೆ ತುಮೆ ದರ್ರಾವ್‌ಖ್ವಿತ್ತೊಬಿ ಖಾಣು ಖಾವ್ಣುಕರಿ ತುಮೂನ ಗಿಂಗೈಲೆವುಸ್. ತುಮೆ ಜೂತುರೈನ್ ಬಚ್‌ಣುಕತೊ, ತುಮೂನ ಖಾಣಾನಿ ಜರೂರತ್ ಲ್ಲಾ. ತುಮಾರಮ ಕೋಣ್‌ಬಿ ತುಮಾರ

ಮುಡ್‌ಕ್ಯಾನೊ ಏಕ್ ಕೇಖ್‌ಬಿ ಗುಮೈಲಿಶುಕೊಯ್ನಿ. ಕರಿ ಬೋಲ್ಯೊ.

35 ಅಮ್ ಬೋಲಿನ್ ಪೌಲನೆ, ರೋಟಾನ ಪಾಡಿ ಖ್ವಾರಾನ ಖ್ವಾಮ್ಪೆ ದೇವ್ ಧನ್ಯವಾದ್‌ಕರೀನ್ ತೋಡಿ ಖಾವಲಗ್ಯೊ.

36 ತದೆ ಇವ್ಣೇಬಿಖ್ವಾರು ಭಾಲ್‌ಲೀನ್, ಖಾಣುಖಾದು.

37 ಯೋ ಜಹಾಜ್‌ಮ ಹಮೆ ಬೇಖ್ವೊ ಛೋಲುಪ್ಪರ್ ಖ್ವಡ್‌ತೀನಿಖ್ವೊ ಜಣು ಥಾ.

38 ಹಮೆ ಬಶ್‌ಹುವಾವತ್ತು ಖೈಹುವಾದೀನ್, ಬಿಜ ಘವ್‌ನ ದರ್ರ್ಯಾವ್‌ಮ ಫೇಕಿನ್, ಜಹಾಜ್‌ನ ವಜನ್ನ ಕಮ್‌ಕರ್ರ್ಯ.

ಜಹಾಜ್ ಫುಟಿಗೈತೆ

39 ವ್ಹಾಣು ಹುವಾದಿನ್ ಜಹಾಜ್ ಚಲಾವವಾಳು ಜಮೀನ್ನ ದೇಖ್ಪು ಕತೋಬಿ ಯೋ ಖೆವಿ ದೇಖ್ವೊ ಝಗೊಕರಿ ಮಾಲುಮ್ ಪಡ್ಯಕೊಯ್ನಿ. ಇವ್ಣೆ ದೇಖ್ಪುತೆ ಏಕ್ ರೇತ್ನಿ ಖಾರಿ ರ್ವಯೂತೊ ಹಿಜ್ಜಾ ಜಹಾಜ್‌ನ ಲೀಜೈನ್ ಭೀರಾಕ್ಪಕರಿ, ಸೋಚ್ಪು.

40 ಇನಖ್ವಾಜಿ ಹಮೆಖ್ವಾರು ಅಖ್ವಾ ಲಂಗಾರ್ನ ಕತ್ರೀನ್ ದರ್ರ್ಯಾವ್‌ಮ ಮ್ಹಂದಿದ. ಅಜು ಚುಕ್ಕಾಣಿನ ಶಿಂದ್ರಾವ್‌ನ ಗಾಟ್ನ ಛೋಡಿನ್ ಜಹಾಜ್‌ನ ಖ್ವಾಮ್ಪೆ ಥೂತೆ ಜಂಡಾನ ವಹಿರಾಮ ಪಾಡಿಭಾಂದಿನ್ ಜಹಾಜ್‌ನ ಕನಾರಿಭಣಿ ಚಲಾವ್‌ತು ನಿಕ್‌ಳ್.

41 ಕತೋಬಿ ಜಹಾಜ್ ರೇತ್‌ನ ದಿಬ್ಬನ ಟೆಕ್‌ರೈನ್, ಇನು ಮ್ಹೋರಾನು ನೋಕ್ ರೇತ್ನ ಗಡೀಗು. ಜಹಾಜ್ ಅಗಾಡಿ ಚಾಲಾನ ಹುಯುಕೋಯ್ನಿ. ತದೆ ಮೋಟೆ ರ್ವೋಕಾಳ್ ಆಯಿನ್ ಜಹಾಜ್‌ನ ಪೀರೆಥು ಮಾರ್‌ಪಡೀನ್, ಫುಟಿನ್ ಟುಕ್‌ಡಾ ಹುಯಿ ಪಡಾಲಗ್ಯುಥು.

42 ತದೆ ಕೈದಿಖ್ವಾರು ತೀರಾಕ್‌ಮಾರಿನ್ ಲಪಿನಿಕ್‌ಳಿ ಜಾಶೆಕರಿ ಶಿಪಾಯಿಖ್ವಾರು ಇವ್ಣನ ಮರ್‌ನಾಖಿ ದೇವ್ಪಕರಿ ಸೋಚ್ಪು.

43 ಕತೋಬಿ ಖ್ವೊಶಿಪಾಯಿನ ಮೋಟಾನೆ ಪೌಲನ ಬಚಾಡ್ತು. ಇನಖ್ವಾಜಿ, ಇವ್ಣೆ ಇಮ್ ನಾ ಕರ್ನುತೆ ತಿಮ್ ದೇಖಿಲಿದೊ. ಅನಬದಲ್ ತೀರಾಕ್ ಮಾಲುಮ್ ರ್ವವಾಳು ಪಾಣಿಮ ಉತ್ರಿನ್ ತೀರಾಕ್‌ಮಾರಿ ಕನಾರಿನ ಜಾವ್ಪಕರಿ, ಹುಕುಮ್ ದಿದೊ.

44 ಅಜ್ಜು ಉಬ್ರಿಹುಯು ಅದ್ಮಿಖ್ವಾರು ಪಲ್ಗನ ಉಪ್ಪರ್ ನತರ್ ಜಹಾಜ್‌ನ ಟುಕ್ಡಾವ್‌ನ ಮದಧಿ ಜಾವ್ವುಕರಿ ಬೋಲ್ಯು. ಇಮ್ಮತ್ ಹಮೆ ಖ್ವಾರುಭಣು ಕನಾರಿನ ಬಚಿನ್ ಪೋಚಿಗಯ.

28

ಮೆಲೀತೆಮ

1 ಹಮೆ ಜತನ್‌ಧಿ ಕನಾರಿನ ಬಚಿನ್ ಜಾವಾದಿನ್ ಯೋ ಮೆಲೀತೆ ಟಾಪು ಕರಿ ಮಾಲುಮ್‌ಹುಯು.

2 ತದೆ ಪಾಣಿ ವರ್ಖುಕರ್ತೊಡೊ ಅಜ್ಜು ಘಣು ರಣ್‌ಧೂತೆಖ್ವಾಜೆ ಯೋ ಟಾಪುನು ಅದ್ಮಿಖ್ವಾರು ಪ್ಯಾರ್‌ಧಿ ಇವ್ಣೆ ಶೇಕಾನಖ್ವಾಜೆ ಆಗ್ ಲಗಾಡಿನ ಹಮೂನ ಖ್ವಾರಾನ ಬುಲಾಯು.

3 ಪಾಲನೆ ಏಕ್ ಭಾರೊ ಲಾಕ್ಡಾನ ಎಕ್ವುಕರಿನ್ ಲೈನ್ ಆಗ್ನುಉಪ್ಪರ್ ನಾಮುಕರಾನಿವಖ್ವಾತೆ ಇನ ಅಂಚ್‌ನಮಾರ್ಮ್ ಖ್ವಾಪ್ ಏಕ್ ಭಾರ್‌ಆಯಿನ್ ಪಾಲಾನ ಹಾತ್‌ಕೇಡೆ ಲಪ್‌ಟೈಗಯು.

4 ಪಾಲನ ಹಾತ್ ಲಪ್‌ಟೈರ್ದೂತೆ ಯೋ ಖ್ವಾಪ್‌ನ ದೇಖ್ವಾತೆ ಟಾಪುವಾಳು, “ಆ ಅದ್ಮಿಖ್ವಾಚ್ ಖೂನಿಸ್ ಹುಯಿರೊಸ್. ಆ ಹೈರೋತೆ ದರ್ಯಾವ್‌ಮಾಡೊ ಬಚಿನ್ ಆಯೋತೋಬಿ ನಶೀಬ್ ಇನ ಜಿವಾನ ಮ್ಹೇಲ್ಯುಕೊಯ್ನಿ.” ಕರಿ ಇವ್ಣೆ ಇವ್ಣಾಮ ಬೋಲಿಲಿದು.

5 ಕತೋಬಿ ಪಾಲನೆ ಖ್ವಾಪ್‌ನ ಆಗ್‌ಮ ಝುಟೈನಾಖ್ಯೊ; ಇನ ಶನು ಖತ್ತಾಬಿ ಕೊ ಹುಯುನಿ.

6 ಇವ್ಣೆ ಇನು ಅಂಗ್‌ತನ್ ಫುಲಿಜಾಶೆ ನತರ್ ಆ ಅಪ್ಪರ್‌ಥೊಸ್ ಮರಿನ್ ಲಡಕ್‌ಶೆ ಕರಿ ಟಿವೈರ್ದೂಡು. ಕತೋಬಿ ಕೆವ್ಡಿ ವಖ್ವತ್ ಟಿವೈನ್ ದೇಖ್ವಾತೋಬಿ ಇನ ಶನು ಲುಕ್ಟಾನ್‌ಬಿ ಕೊಹುಯುನಿ. ಅನ ದೇಖ್ವಾತೆ ಇವ್ಣೆ ಮನ್‌ಫರೈಲಿನ್ ಆ ಏಕ್ ದೇವಸ್‌ಕರಿ ಬೋಲ್ಯು.

7 ಯೋ ಟಾಪುನೊ ಮೋಟೊ ಅಧಿಕಾರಿಮ ಏಕ್‌ಜಣೊ ಪೋಪ್ಲಿಯಾನು ಖೇತರ್ ಗದ್ದೆ ಹಮೆಥಾತೆ ಝುಗೊನ ಖನ್ನೇಸ್‌ಮ ಥೂ. ಯೋ ಹಮೂನ ಸ್ವಾಗತ್ ಕರೀನ್ ತೀನ್ ದನ್‌ಲಗು ಹಮೆ ಇನೇಧಿ ಸತ್ತಾರ್ ಲಿದ.

8 ಪೋಪ್ಲಿಯಾನೊ ಬಾ ತಾವ್‌ಥೀಬಿ ಲೊಯ್ಯವ್‌ಹುಯಿನ್ ಛಾದ್ರಿ ಧರಿರಾಖೊಡೊ. ಪೌಲ ಇನಕನ ಜೈನ್ ಪ್ರಾರ್ಥನೆ ಕರೀನ್ ಇನ ಮುಡ್‌ಕಪರ್ ಹಾತ್‌ಮ್ವೇಲಿನ್ ಅಛ್ಕುಕರೊ.

9 ಇನಪಾರ್ ಯೋ ಟಾಪನ ಅಞ್ಜು ಉಭಾರ್‌ಯ್ತೆ ಖ್ವಾರುಸ್ ರೋಗಿಬಿ ಪೌಲಕನ ಐನ್ ಗುಣ್‌ಹುಯು.

10 ಇವ್ಣೆ ಹಮೂನ ಜಾಖ್ತ್ ಮರ್ಯಾದಿ ದಿದು. ಹಮೆ ಹಿಜ್ಜಾಡ್ತು ಜಾವನ ಖ್ವಾರನಿ ವಖ್ವೆತೆ ಹಮೂನ ಭರೂರತ್‌ಥೂತೆ ಖ್ವಾರು ಚೇಞ್ ಲಯಿನ್ ದಿದು.

ಮೆಲೀತೇಡ್ತು ರೋಮ್‌ನ ಆಯೋತೆ

11 ತೀನ್ ಮಹಿನಾನ ವಾರ್ ಅಲೆಕ್ಸಾಂಡ್ರಿಯಾಡ್ತು ಅಯಿನ್ ಯೋ ಟಾಪಾಮ ರಣ್ಣಾದನ್ ಕಾಡಿಮ್ವೇಲಿಜಾವನ ಖ್ವಾಜೆ ಏಕ್ ಭಹಾಞ್‌ನ ಚಡೀನ್ ಗಯ. ಯೋ ಭಹಾಞ್‌ನ ಖ್ವಾಪ್ಪೆ ಗ್ರೀಕ್ ಅವಳಿಜವಳಿ ದೇವ್ತಿನು ಖ್ವಣೇದ್ ಥು.

12 ಹಮೆ ಸುರಕೂಸ್ ಖ್ವಯೇರ್‌ ಐನ್ ಹಿಜ್ಜಾತೀನ್‌ದನ್ ಥಾ.

13 ಹಿಜ್ಜಾಡ್ತು ಚಾಲ್ತ ಹುಯಿನ್ ರೇಗಿಯ ಖ್ವಯೇರ್‌ಮ ಪೇಶ್ಯ ಏಕ್‌ದನ್ನ ಬಾದ್ಮ ದಕ್ಷಿಣೆನೊ ವಹಿರೊ ವಾಗಲಗೊಡೊ. ಇನಖ್ವಾಜೆ ಬೇನದನ್ನೆ ಪೊತಿಯೋಲಕರಿ ಖ್ವಯೇರ್‌ಮ ಆಯ.

14 ಹಮೆ ಹಿಜ್ಜಾಡ್ತೊಡು ವಿಶ್ವಾಸಿವ್‌ನ ದೇಖ್ಯ. ಇವ್ಣಜೋಡ್ತು ಖ್ವಾತ್ ದನ್‌ತೋಬಿ ರ್ವೇವ್ಣಕರಿ ಬೋಲಿಲಿದು. ಇನಖ್ವಾಜೆ ಹಮೆ ರೋಮ್‌ನ ಆಯ.

15 ಹಮೆ ಹಜ್ಜ ರ್ವಾವಾನು ರೋಮ್‌ ಥೂತೆ ವಿಶ್ವಾಸಿನ ಮಾಲುಮ್ ಪಡ್ತು. ಹಮೂನ ಮಳಾನಖ್ವಾಜೆ ಥೋಡುಜಣು “ಅಪ್ಪಿಯ ನಂಗರ್‌ಲಗು ಅಞ್ಜು ತ್ರಿಫತ್ರಕರಿ ಝಗೋಲಗೂಬಿ ಆಯು. ಪೌಲನೆ ಇವ್ಣನ ದೇಖಿನ್ ದೇವ್ನ ಧನ್ಯವಾದ್‌ಕರೀನ್ ಭಾಲಿಥಿ ಹುಮ್ಮಖ್ ಹುಯೊ.

ರೋಮ್‌ ಪೌಲ

16 ಇನಕೇಡೆಡ್ತು ಹಮೆ ರೋಮ್‌ನ ಪೋಚಾನಿವಖ್ವೆತೆ, ಪೌಲ ಇನ ದೇಖಿಲ್ವವಾಳೊ ಏಕ್‌ಶಿಪಾಯಿ ಇನಿ ಜೋಡ್ತು ರ್ವಯೇಞಾಯ್ ಕರಿ

ಬೋಲಾನು ಹುಕುಮ್ ಲಿದೊ. 17 ತೀನ್‌ದನ್ ಹುವಾನಪಾರ್ ಪೌಲನೆ ಹಿಜ್ಜಾನ ಯೆಹೂದ್ಯರ್‌ನ ಘಲ್ಡಾವ್‌ನ ಏಕ್ ಝಗೊ ಎಕ್ಚು ಬುಲಾಯೊ. ಇವ್ಣೆ ಆವಾಮ ಯೋ ಇವ್ಣುನ, “ಮಾರ ಭೈಯೇವೊ ಮೇ ಅಪ್ಪ ಅದ್ವಿಧಿ ರ್ವವೊ ಗುರುಗುರಬ್‌ಲ್ಯಾಧಿ ಆಯೂತೆ ವಿರೋದ್‌ಧಿ ರ್ವವೊ ಶಾತ್ ಕರೈಕೊಯ್ನಿ. ಮನ ಯೆರೂಸಲೇಮ್ಮ ಖೈದಿಕರೀನ್ ಧರೀನ್ ರೋಮ್‌ವಾಳಾನ ಹಾತ್ಮದ್ಯವಾನಿತರ ಹುಯು.

18 ಇವ್ಣೆ ಮನ ವಿಚಾರ್ ಕರೀನ್, ಮಾರಮ ಮರಣ್ಣಿ ದಂಡನೇನು ಆಪರಾದ್ ಖಿವೂಬಿ ಕೊಂತೆಖ್ವಾಜಿ ಮನ ಛುಟ್ಕಾರ್ ಕರ್ನುಕರಿ ಥೂ.

19 ಕತೋಬಿ ಯೆಹೂದ್ಯರ್ ವಿರೋದ್ ಕರೈತೆ ಇನಖ್ವಾಜಿ, ಮೇ ಕೈಸರನ ಖ್ವಾಪ್ಣೆ ಬೋಲಿಲೇವುಸ್ ಕರಿ ಬೋಲ್ವುಪಡ್ಯಾಥು. ಕತೋಬಿ ಮಾರು ಶೊಂತ್ ಅದ್ವಿಪರ್ ಗಲ್ಲಿ ನಾಲಗಾಡ್ತುಕರಿ ಬೋಲ್ಯೊಕೊಯ್ನಿ.

20 ಆ ಕಾರಣ್ಣಾಖ್ವಾಜಿ ಮೇ ತುಮೂನ ಬೋಲ್ವುಕರಿ ಬುಲೈಮಂಗಯೋತೆ. ಇಸ್ರಾಯೇಲ್ ಅದ್ವಿನ ವಿಶ್ವಾಸ್ನಾಖ್ವಾಜಿ ಆ ಖ್ವಿಂಕ್‌ಳಿಧಿ ಭಂದೈರೈಲ್ವೊಸ್.” ಕರಿ ಬೋಲ್ಯೊ.

21 ಇವ್ಣೆ ಇನ, “ತಾರಿ ಬಾರೇಮ ಯೂದಾಯಥು ಹಮೂನ ಖಿವು ಚಿಟ್ಟಿಬಿ ಕೋ ಆಯೂನಿ. ನತರ್ ಭೈಯೇವ್‌ಮ ಏಕ್‌ಛಣೂಬಿ ತಾರಿ ಬಾರೇಮ ಖಿವೂಬಿ ಖರಾಬ್ ವಾತ್ ಖ್ವಿಮ್‌ಜಾಡ್ಯಾಬಿ ಕೊಯ್ನಿ ಬೋಲ್ವುಬಿ ಕೊಯ್ನಿ.

22 ಕತೋಬಿ ತಾರಿ ಸೋಚ್ ತಾರ ಮ್ಹೋಡೇಖ್ವೊಸ್ ಖ್ವಿಮ್‌ಜಾನ ಪಸಂದ್ ಕರ್ಯೆಸ್. ಶನಕತೊ ಅಖ್ವೊಸ್ ಅದ್ವಿಖ್ವಾರು ಆ ಝೂಂಡ್‌ಮ ಕ್ರಿಸ್ತನು ವಿರೋದ್ ಕರೀನ್ ವಾತೆ ಬೋಲುಕರಸ್‌ಕರಿ ಹಮೂನ ಮಾಲುಮ್” ಕರಿ ಬೋಲ್ಯೊ.

23 ಇನಖ್ವಾಜಿ ಪೌಲ ಅಚ್ಚು ಇವ್ಣೆ ಸಭೆ ಮಳಾನ ಏಕ್‌ದನ್ ಖ್ವಿಣೇದ್‌ಕರೈಯೊ ಯೋ ರೋಜ್ ಕೈಯೆಕ್ಚಿ ಛಣು ಪೌಲನ ಘರ್ಮ ಘಣಿ ಗಣ್ತೀಧಿ ಸಬೆಮಳ್ಳು. ಇನೆ ವ್ಹಾಣೇಥು ಖ್ವಾಂಜೊಲಗು ದೇವ್ವ ರಾಜ್ಯನಿ ಬಾರೇಮ ಇನಿ ವಾತೇನ ಇವ್ಣುನ ಸಾಕ್ಷಿನ ಬೋಲ್ಯೊಹುಯಿನ್. ಅಚ್ಚು ಮೋಶೇನು ಧರ್ಮಶಾಸ್ತ್ರ ಪ್ರವಾದಿನು ದಪ್ತರ್‌ನ ಆಧಾರ್ ಲಿದೊ.

ಯೇಸುನಿ ಬಾರೇನಿ ವಾತೆಮ ಇವ್ವುನ ವಿಶ್ವಾಸ್ ರಾಖಾನಿಫೊಣಿ ಕೋಶಿಶ್ ಕರೊಯ್ತೆ, ಅನಖ್ವಾಜೆ ಇನೆ

24 ಪೌಲನೆ ಬೋಲ್ಯೊತೆ ಥೋಡಿ ವಾತೆನ ಥೋಡಭಣ ಯೆಹೂದ್ಯರನೆ ಮಾನಿಲಿದು. ಕತೋಬಿ ಥೋಡಾನೆ ವಿಶ್ವಾಸ್ ಕರೊಯ್ತೆ.

25 ಇವ್ವಾಮ ವಗ್ಗುಟ್‌ಕೊಂತೆ ವಳಿಜಾತುಥೂತೆ ದೇಖಿನ್ ಖ್ವರ್ತಿಮ ಪೌಲನೆ ಇವ್ವುನ ಪವಿತ್ರಾತ್ಮನೆ ಪ್ರವಾದಿ ಹುಯಿರೋತೆ ಯೆಶಾಯಥಿ ಗುರುಗುರಬ್‌ಲ್ಯನ ಖ್ವಾರಾನ ಖ್ವಾಜನ ಬಾರೇಮ ಬೋಲ್ಯೊ ಹುಯಿನ್,

26 'ತೂ ಆ ಅದ್ಮಿಕನ ಜೈನ್ ಇವ್ವುನ 'ತುಮೆ ಖನ್ನೆ ರ್ಡ್ವೀನ್ ಖ್ವಮ್‌ಜ್ಯುತೋಬಿ ಮಾಲುಮ್ ಕರಾಸ್ ಕೊಯ್ತೆ; ಡೋಳ ರ್ಡ್ವೀನ್ ದೇಖ್ತೋಬಿ ಪರ್‌ಖ್ಯಾಕೊಯ್ತೆ.

27 ಶನಕತೊ, ಆ ಅದ್ಮಿನು ದಿಲ್ ಬಂಡೊ ಹುಯಿಗಯ್ತೆ; ಇವ್ವು ಕಾನ್ ರ್ಡ್ವಯುತೋಬಿ ಕಾನ್‌ಖ್ವಾರು ಮೂಚಿರಾಖ್ಯುಸ್ ಖ್ವಾಘು ರ್ಡ್ವಯುತೋಬಿ ದೇಖಾನ ಮನ್ ಕರಾಕೊಯ್ತೆ, ನತರ್ ಅವ್ವೆಡೋಳೇಥಿ ದೇಖ್ಯುಹೋತ್, ಕಾನ್‌ಥಿ ಖ್ವಮ್‌ಜ್ಯುಹೋತ್, ಮನ್‌ಲಗಾಡಿನ್ ಮಾಲುಮ್ ಕರೊಯ್ತೆ, ಮಾರಭಣಿ ಫರಿಗಯ್ತೆ; ಮಾರೇಥಿ ಅಲ್ಲು ಹುಯಿಗುಹೋತ್.*

28 ತದೆ ಪೌಲನೆ ದೇವ್‌ನು ಆ ರಕ್ಷಣೆನ ಯೆಹೂದ್ಯರಕಾಹೆತೆ ಇವ್ವುನ ಬೋಲಿ ಮೊಕ್‌ಲೈರ್ದ್ವಾಸ್ ಕರಿ ತುಮೂನ ಅಭ್ವಿನಿತರ ಮಾಲುಮ್ ರ್ಡ್ವಾವಾಡೆ; ಕರಿ ಬೋಲಿನ್ ಇನಿ ವಾತೆನ ಖ್ವರ್ತಿಕರೊಯ್ತೆ.

29 ಇನೆ ಆ ವಾತೆನ ಬೋಲಾನ ಪಾರ್ ಯೆಹೂದ್ಯರ್ ಘಣು ಖರಾಬ್‌ಥಿ ವಿವಾದ್ ಕರ್ತುಹುಯಿನ್ ಚಲೀಗು.†

30 ಇನಕೇಡೆಥು ಯೋಸ್ ಭಾಡು ಲೀರಾಖ್ಯೊಥೊತೆ ಘರಮ ಬೇ ವರಖ್ಲಗು ರ್ಡ್ವೀನ್, ಇನಕನ ಆವಾಳಾನ ಖ್ವಾರನ್ನ ಸ್ವಾಗತ್ ಕರೀನ್ ಬುಲೈಲೇತೊಥೊ.

* 28:27 28:27 26ಅಜ್ಜು 27ನು ವಚನಾನ ಯೆಶಾಯ 6,9,10ನು ವಚನಾಥು ಚೂಣಿರಾಖ್ಯುಸ್ † 28:29 28:29 ಥೋಡಿ ಚಿಟ್ಟೀಮ 29 ವಚನ್ ಕೊಯ್ತೆ

31 ತದೆ ಇನೆ ಘಣುಭಾಲಿಥಿ ಅಙ್ಞು ಖಿವಿ ಅಡ್ಡಿಕ್ಕೊಂತೆ; ದೇವ್ನು ರಾಜ್ಯನಿ ಬಾರೇಮ ಉಪದೇಶ್ ಕರ್ತೊಹುಯಿನ್ ಪ್ರಭು ಯೇಸುಕ್ರಿಸ್ತನಿ ಬಾರೇನಿ ವಾತೇನ ಬೋಧನೆ ಕರ್ತೊರ್ಯೊ.

cxxxi

ದೇವಿ ಖಾಚಿ ವಚನ್

The New Testament in the Vaagri Booli language of India: ದೇವಿ ಖಾಚಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವಿ ಖಾಚಿ ವಚನ್ ವಿಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06